


RIBA HARIHARIUNA



The New Testament and portions of the Old Testament in the
Suau language of Papua New Guinea

RIBA HARIHARIUNA
The New Testament and portions of the Old Testament
in the Suau language of Papua New Guinea
Buk Stat, Josua, Buk Song, Esodo, na Nupela Testamen
long tokples Suau long Niugini

Copyright © 1998 The Bible Society of Papua New Guinea

Language: Suau

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-08-19

PDF generated using Haiola and XeLaTeX on 11 Nov 2022 from source files dated 9 Oct 2020

99a191af-3177-577f-b12d-7c7288c64c37

Contents

MATAIO	1
Mareko	59
LUKA	95
IOANE	155
APOSOTOLO ADI HEWAU	199
ROMA	256
1 KORINITO	280
2 KORINITO	303
Galatia	318
Epeso	326
PILIPI	334
KOLOSI	340
1 Tesalonia	345
2 TESALONIA	350
1 TIMOTEO	353
2 TIMOTEO	360
TITO	365
PILIMONI	368
HEBERU	370
IAMESI	388
1 PETERO	394
2 PETERO	401
1 IOANE	406
2 IOANE	412
3 IOANE	413
IUDE	414
HEMASARAHANA	416

MATAIO ENA EVANELIA

¹ Iesu Keriso, Davida natuna, ia urutubunayao bukana ede.

² Aberahama Isaako i hetubu, Isaako Iakobo i hetubu, Iakobo Iuda ma ena tataoyao i hetubudi. ³ Na Iuda Peresa eo Sera i hetubudi, Tamara arinai i abidi, Peresa Hesperona i hetubu, Hesperona Rama i hetubu, ⁴ Rama Aminadaba i hetubu, Aminadaba Nasona i hetubu, Nasona Salamona i hetubu, ⁵ Salamona Boasa i hetubu, Rahaba arinai ie abi, Boasa Obeda i hetubu, Ruta arinai ie abi, Obeda Iese i hetubu, ⁶ na Iese Davida i hetubu, ia ede wasawasa.

Davida Solomona i hetubu, Uria monena arinai, ⁷ Solomona Rehoboama i hetubu, Rehoboama Abia i hetubu, Abia Asa i hetubu, ⁸ Asa Iosapata i hetubu, Iosapata Iorama i hetubu, Iorama Usia i hetubu, ⁹ Usia Iotama i hetubu, Iotama Ahasa i hetubu, Ahasa Heskia i hetubu, ¹⁰ Heskia Manase i hetubu, Manase Amona i hetubu, Amona Iosia i hetubu, ¹¹ Iosia Iekonia maena tataoyao i hetubudi, huiana se toaidi se laedi Babulonia eai.

¹² Babulonia eai se laedi wa, murina eai Iekonia Salatiela i hetubu, Salatiela Serubabela i hetubu, ¹³ Serubabela Abiuda i hetubu, Abiuda Eliakima i hetubu, Eliakima Asora i hetubu, ¹⁴ Asora Sadoka i hetubu, Sadoka Akima i hetubu, Akima Eliuda i hetubu, ¹⁵ Eliuda Eleasara i hetubu, Eleasara Matana i hetubu, Matana Iakobo i hetubu, ¹⁶ Iakobo Iosepa, Maria monena, i hetubu, arinai abo Iesu, esana Keriso, ie tubuma.

¹⁷ Isidi gamagaridi Aberahama i hetubudi i lau e Davida arinai, isidi saudoudoi-hasi, eo Davida ena huia eai i lau e se toaidi se laedi Babulonia eai, isidi saudoudoi-hasi hinage, eo se laedi Babulonia i lau e Keriso arinai, isidi saudoudoi-hasi.

¹⁸ Keriso edi huia labasina eai doha ede ina: ia sinana Maria Iosepa sora nige i tawasorai, taudi labui sora nige se mia esega, Earua Tabuna ia i heabiabi. ¹⁹ Monena Iosepa ia tau-laulaududuraina, nige i henua tatao Maria se ita, bena i torehesuarayamuyamui. ²⁰ Na ena nuatu i nuatudadaasa, enosuai eai Guiau ena aneru i taumasaraha ia arinai i ene, "Iosepa, Davida natuna e, tabu u matausi Maria monem u bodai, na Earua Tabuna ia i heabiabi; ²¹ abo i haisu, natuna tau abo i labasi, esana abo u tore Iesu, paana ede tatao, ia enanayao, edi baaea eai abo i hemauidi." ²² Teina ginauri gamagaridi ta se tubu, bena Guiau ena riba, peroveta awana eai wa, abo i tubu, doha i ene:

²³ "Hage au ita, hasara nuanuasupuna esau abo ie boga, abo hinage i haisu, natuna-tau abo i labasi, esana abo se tore Emanuela," (Is. 7.14)

(heaheasonina ede ina, Eaubada maeda.) (Is. 7, 8, 10)
²⁴ Iosepa eno eai i siliata, abo i toro aneru ena riba wa i lau watai, monena i woeai, ²⁵ na sora nige i bodai i lau e natuna-tau i labasi, abo esana ie tore Iesu.

2

Magoi tataodi se lagema bena Iesu se ita.

¹ Iesu se labasi wa Betelehema eai, Iudea eai, Heroda wasawasa ena huia eai, tatao sonoga headi tupo aruabu eai se laoma, Ierusalem eai se lage si ene: ² “Iudea edi wasawasa se labasiyao ia ede haedi? Tupo aruabu eai ena ipola ai itayao, ai laoma ia bena ai aihelahui.” ³ Heroda wasawasa riba wa i ataiei aruana ie loi, eo Ierusalem gamagamagari maenayao; ⁴ ia kohena lailaidi eo tatao edi tau-uriuri gamagamagari i heoigogoidi i hetalaidi, Keriso haedi eai abo se labasi. ⁵ Ia se heriba si ene, “Betelehema eai, Iudea eai, paana peroveta esau ie uri ina doha:

⁶ ‘Na oa Betelehema e, Iuda oeana eai ta, nige u gagiri ariri wasawasa Iuda aridi eai, paana ede oa guaguam eai Tanuaga abo i laoma, egu tataoyao Isaraela abo i tanuagaidi.’” (Mi. 5.2)

⁷ Heroda sonoga tataodi wa abo i eogamahimahihiedima, ipola edi huia itana wa i oimurikomakomanidi; ⁸ abo i hetamaridi se lau Betelehema, i ene, “Au lau kaimou wa au eooi komakomani, ena au lobai au uioma au heribagu, abo hinage ea lau ia ea aihelahui.”

⁹ Wasawasa arinana se ataiei nonohai, abo se lau ipola wa tupo aruabu eai se ita wa, i eda-bagunaedi, i lau e kaimou wa ena abamia potana eai i alasi. ¹⁰ Isi ipola wa se ita abo se kode, se kode ariariri; ¹¹ na se lage numa alona eai, kaimou wa se ita, ma sinana Maria, arinai se tabaohudobi ia se aihelahui. Edi ginauri se abihemasarahadi ia se ainai, *gold*, eo muramurapanepane, eo muro. ¹² Enosuai eai Eaubada i ribahesanapuedi tabu se uio Heroda arinai, to se uio edi eanua hari dohila eai.

¹³ Isi se lauo, na aneru enosuai eai i taumasaraha Iosepa arinai i ene, “U torohai, kaimou me ma sinana u laedi, u dagoedi Aigupito eai, nei eai au mai i lau e abo ea heribam; paana Heroda kaimou me i eooi bena i unui.” ¹⁴ Ia abo i torohai, kaimou ma sinana maiona eai i woeaidi, i laedi Aigupito eai, ¹⁵ nei eai se mia i lau e Heroda ie mate. Arinai Guiau ena riba i ribaei wa peroveta awana eai, abo se hemamohoiei, si ene, “Aigupito eai natugu-tau ea eogaiyama ede.”

(Hos. 11.1).

¹⁶ Heroda abo i nuatu-lobai, tatao sonoga omi-hede se borai, abo i ouyalayala ariri, tatao headi i hetamaridi se

lau Betelehema eo se tauhetaiiri, merumeru-tatao gagiridi se unuidi, isi edi borimai labui, eo gamagaridi hinage edi borimai sora nige se helabui, lahina i oimuri komakomani wa tatao sonoga aridi eai. ¹⁷ Abotai riba wa peroveta Ieremia i ribaei wa, se hemamohoei, doha i ene:

¹⁸ “Rama, eanuana eai dou gurumoana ie sae, se ataiei, Rahela nanatunayao doudi ie dou, ia taba nige nuana i biga paana se tauyamui-aririo.” (Iere 31.15)

Aigupito eai se uio Nasareta

Lk. 2.39, 40

¹⁹ Na huiana Heroda i mateo, Guiiau ena aneru Iosepa enosuai eai i taumasaraha, Aigupito eai, i ene, ²⁰ “U torohai, gama gagirina me ma sinana u woeauioidi u laedi Isaraela oana eai, isi gama gagirina se eooi bena se unui wa se mateo.” ²¹ Ia abo i torohai, gama gagirina wa ma sinana i woeaidi Isaraela oana eai se laoma. ²² Ia wasa i ataiei Arekelao, Heroda natuna, tamana i helaudamai, ia ede wasawasa Iudea eai, bena i uio nei eai na i matausi; abo Eaubada enosuai eai i ribahesanapuei, arinai i lausudara Galilaia tehana eai. ²³ Ia abo i lage eanua esana Nasareta, arinai se mia, arinai ede peroveta edi riba esau se hemamohoei, doha si ene, “Ia abo se ribaei Nasanasareta.”

3

Ioane Baptiso ana wawari

Mk. 1.3-8; Lk. 3.2-7; Io. 1.6-8, 19-28

¹ Nei asubenadi ne Ioane Baptiso i laoma, Iudea barbarana eai i laulaugugua, ² ena ribariba i ene, “Nuamiu au buidi, galewa basileiana i hanahanaumao.” ³ Ia ede teina Isaia peroveta ie ribaei wa i ene:

“Esau arinana barabara eai i eogaeoga, i ene, Guiiau ena eda au abihetoanonohai, ena dabila au heduduraidi.” (Is. 40.3.)

⁴ Ioane ana lulu kamela wuiana, ana auduaduari sarai opina ie lio; ana aiai madimadi eo amoamo nuura eai se lobai. ⁵ Ierusalemataodi eo Iudea tataodi gamagamagari se lau ia arinai, eo Ioridano hasarina taumiaidi hinage, ⁶ na Ioridano sagana eai ia i bapatisoidi, isi edi baaea se ribahemasarahadi.

⁷ Ia abo Parisea eo Sadukea gamagaridi i itadi ena bapatiso hesabana se laoma, i ribalau aridi eai i ene, “Mota nanatunayao e! Eai i heribanonohaimiuo ouyalayala i laolaoma bena au dagoei me? ⁸ Nuabui uauana au hemasarahadi, ⁹ na tabu emi nuatu ina doha au ene, ‘Aberahama ai tamamai ede’; ea heribamiu Eaubada abina i ata ina we’u eai ta Aberahama nanatunayao i hetubudi. ¹⁰ Abo-ina ilama se

toreyao oeagi paadi eai, oeagi gamagaridi uadi nige se lolo abo se oiheguridi, se gabalaedi oeagi alaalasina boena eai.

¹¹ “Mamohoi eau goila eai ea hebapatisoimiu ta emi nuabui eai, na ia murigu eai i laoma ia mo i sae ariri ede, eau nige ea lolo ia ena ae-um ea baheidi; ia Earua Tabuna ma-alaalasina arinai abo i hebapatisoimiu. ¹² Ena tapitapi nimana eai, ena * sitona ena aba-tapitapi matuna abo i tapitapi komakomani, sitona aiaina abo i tanogogoi i tore ena sanara eai, wenudi wa abo i gabu oeagi alaalasina eai, i lau e nige nosina.”

Iesu se hebapatisoi

Mk. 1.9-11; Lk. 3.21, 22; Io. 1.31-34

¹³ Iesu abotai Galilaia eai i laoma Ioridano eai, Ioane arinai, ia bena i hebapatisoi. ¹⁴ Ioane bena i ribanuahi, i ene, “I lolo taba oa mo u hebapatisoigu, u laoma arigu eai, wa?” ¹⁵ Na Iesu ena riba i heuio i ene, “Taiede ta lauwatai; i lolo bena laulau dudurai gamagamagari ta abi-heohidi.” Arinai abo ie eari. ¹⁶ Iesu se hebapatiso-nonohaiyao, ma-esega goila eai i gaeosaema, galewa abo i taigari ia matana eai, Eaubada ena Earua ie ita i dobima doha bunebune, ie toa ia potana eai; ¹⁷ arina esau galewa eai i ribama, i ene, “Natuyogoyogoigu ede ina, ia arinai nuagu i lolo ariri.”

4

Iesu se nohoi

Mk. 1.12; Lk. 4.1-13; Gen. 3.6

¹ Earua Iesu abo i woeai barabara eai, diabolo ia bena i nohoi. ² Asubena tatao-labui-se-mate eo maiona tatao-labui-se-mate i aiudi, abo i guriam. ³ Taunoho wa abo i laoma ia arinai i ene, “Ena oa Eaubada Natuna, teina we’u ta u heribadi abo se hemala * areto.” ⁴ I ribalau i ene, “Se uriyao si ene,

‘Tau taba nige areto eai mo i mauri,

na riba gamagamagari eai hinage Eaubada awana eai se laoma.’” (Deu. 8.3).

⁵ Diabolo ia abo i woeai i laei eanua tabuna eai, i hetoro dubu lailai isu saesaena eai, ⁶ abo i heriba i ene, “Ena oa Eaubada Natuna, hage u gabodobem; doha se uriyao si ene,

‘Ena aneru i hetorodi se itawataim;’

eo

‘Nimadi eai abo se abiisinim,
ata aem u hetupanei we’u eai.’”

(Psa. 9.11, 12).

⁷ Iesu abo i ribalau i ene, “Hinage se uriyao si ene, ‘Guiiau em Eaubada tabu u nohoi.’” ⁸ Hinage diabolo ia abo i woeai

* 3:12: wheat. * 4:3: bread.

i laei oea tupi lohaloha-aririna eai, tanoubu basileia gamagamagari ia i heita, itaitadi se lolo ariri; ⁹ na i heriba i ene, “Teina ginauri gamagamagari ta abo ea lediwa, ena u tabaohuiguma, u aihelahuigu.” ¹⁰ Iesu abo i ribalau ia arinai i ene, “Satani e, u lausuara! se uriyao si ene, ‘Guiiau em Eaubada iabom taba u aihelahui mo, ia iabom u heaeaiei ede.’”

¹¹ Arinai abo diabololo ia i laugabaei, abotai aneru se laoma se bobodiei.

Iesu Kaperanauma eai i lage, ana wawari i hetubu
Mk. 1.14; Lk. 4.14, 15

¹² Iesu wasa i ataiei Ioane se toai se laei numamasigiri eai, abo i torohai i lau Galilaia; ¹³ Nasareta i laugabaei i laoma Kaperanauma eai ie mia, gabogabo hasarina eai, Sebulona eo Napatali edi oea sigasigadi eai, ¹⁴ bena riba Isaia peroveta i ribaei abo se lauhetubu, i ene ina doha:

¹⁵ “Sebulona oena eo Napatali oena, teha gabogabo, Ioridano hari tehana eai, Galilaia, Murimuri-tataodi enadi wa:

¹⁶ tatao, masigiri boeana eai se babawa, marana lailai se ita,

isi hinage mate tehana eai se bawa, eo mate loguloguna eai, aridi eai mara i iuyari.”

¹⁷ Nei huiana ne Iesu i lauguguia hetubu, i ene, “Nuamiu au buidi, paana galewa basileiana ede i hanahanaumao.”

Petero maena Anederea edi eoga
Mk. 1.16-20; Lk. 5.2-11

¹⁸ Iesu i tautausi Galilaia gabogabona hasarina eai, tataoyao labui i itadi, esau Simona, iaede esana se ribaei Petero, eo ena tau Anederea, hiana se galaei gabogabo eai; paana isi tauyamayama. ¹⁹ I heribadi i ene, “Au hemuriwataiguma, abo ea heteromiu au hemala tauyama, tatao abo au aitoa.” ²⁰ Maesega edi hiana se laugabaedi, ia se lauwatai. ²¹ Abo i laulau e, tau esau maena doge ie itadi, Iamesi Sebedaio natuna, eo ena tau Ioane, taudi labui ma tamadi, isi waga eai, edi hiana se eoma, na i eogaidi. ²² Maesega edi waga eo tamadi wa se laugabaedi, ia se lauwatai.

²³ Iesu Galilaia i lauhetaiiri, edi sunago alodi eai i laulauheata, basileia evaneliana i laugugui, tauaiiawala gamagamagari hinage tatao boeadi eai, i hemauidi. ²⁴ Arinai ia wasana i tadada i lau e Suria i hetaiiri, tau-asiasiebo gamagamagari, eo headi hari iwala, hari amamna, se hearodi se woeaidima ia arinai to i hemauidi. ²⁵ Moutuadi lailai ia se lauwatai, Galilaia eai se laoma, eo Ierusalem hinage, eo Judea, eo Ioridano hari teha eai.

5

Oea tupi eai guguiana
Lk. 6.20-49

Ribahewoiwoina.

¹ Moutuadi wa i itadi, i dalasae oea, eai i bawabigabiga ena heaheatayao abo se laoma ia arinai. ² Awana i dabari i heatadi, i ene:

³ “Tatao se nuatudobidobiuiodi nuadi abo se kode, galewa basileiana isi enadi.

⁴ “Isi taunuanuadubu nuadi abo se kode paana ede abo se henuabigadi.

⁵ “Tatao iila-lolololodi nuadi abo se kode tanoubu abo se abi enadi.

⁶ “Isi laulau-dudurai arinai se guriam eo gadodi se magu, nuadi abo se kode, abo bogadi se sese.

⁷ Isi taunuatoatoa nuadi abo se kode, paana ede isi hinage abo se nuatoatoaidi.

⁸ “Isi tau-nua’aa’aa nuadi abo se kode, isi Eaubada abo se ita.

⁹ “Isi taulaulaubiri nuadi abo se kode, isi abo esadi se ribaedi Eaubada nanatunayao.

¹⁰ “Isi laulau dudurai debana eai se hebaaeadi, nuadi abo se kode galewa basileiana isi enadi.

¹¹ “Taba tatao se isugaraemiu, eo se hebaaeamiu eo wasamiu gamagaridi se hebaaeadi, se bora-auridi, eau debugu eai, nuamiu abo se kode. ¹² Au kode, abo au kode ariri, emi maisa galewa eai ie lai, peroveta se mugamugaiemiu, isi hinage se hebaaeadi doha nei.

Tauataiena se heaheasoniei
Mk. 4.21-23; Lk. 8.16-18

¹³ “Omi tanoubu aritana; na taba arita i gouai edoha ena heahearitana? Abo nige ana abi, se gabaei mo, tatao abo se ututawatawai.

¹⁴ “Omi tanoubu marana. Eanua oea tupina eai se hetoro taba nige i tauyamui. ¹⁵ Hinage lamepa nige se healasi abo gulewa eai se hebuitawai, se tore lamepa ena aba-ota eai, abo tatao gamagaridi numa alona eai i hemaradi. ¹⁶ Hinage doha emi mara au hesinadi tatao matadi eai, emi abi lolodi se itadi arinai abo Tamamiu galewa eai se hedebasaei.

Keriso ena nuatu laugagaeona arinai.

¹⁷ “Tabu emi nuatu au ene ea laoma ta laugagaeo eo peroveta ea hebaaeadi; nige ea laoma ta ea hebaaeadi, ea hemamohoiedi mo. ¹⁸ Mamohoi ea heribamiu ta, galewa eo tanoubu abo se lautom, *iota* esau eo riba gagiri-konekonena esau laugagaeo eai, taba nige se lautom, i lau e ginauri gamagamagari so hemamohoiheohidi. ¹⁹ Ena tau esau teina

laugagaao ta gagirina esega i utusi, eo tatao i heatadi se utusi, ia abo se ribadobedobei galewa basileiana eai; na ena tau esau i lauwataidi eo i heatadi, ia abo se riba-tausaei galewa basileiana eai. ²⁰ Ea heribamiu ta ena emi laulau dudurai, tau-uriuri eo Parisea edi laulau dudurai nige se hemuridi, taba nige au lusora galewa basileiana eai.

²¹ “Au ataieyao tatao mumuga eai wa se heribadi si ene, ‘Tabu u aiunu; (Exod. 20.13) taba esa, esa i aiunu se laei aba-hekiraino eai.’ ²² Eau ea heribamiu ea ene taba esa, esa ena tau esau i ouyalayalaei mo, ia hinage taba se laei aba-hekiraino eai; eo esa, esa ena tau i * riba-hebaaeaei, ia taba se laei Sunederi matadi eai, eo esa, esa i ene, ‘Yauyaurem!’ ia taba Gehena alaalasina i matausiei. ²³ Ena taba em ainauia u peiauri dubu hatahatana tabuna eai, arinai abo nuam i sae eham esau u hebaaea, ²⁴ em ainauia wa ue tore hatahata tabuna nuanuana eai, sora u laugabaei, u lau ma-eham au hainuabiga baguna, abotai abo u laoma em ainauia u mose. ²⁵ Em tau u heyalaei wa maidam au hainuabiga heuheula, sora dobila eai taumi labui au laulau esega lauhetala hesabana; ata em tau u heyalaei wa i laem tauhedudurai arinai, tauhedudurai abo i mosem tauitaitawata arinai, oa abo se tutuguduim. ²⁶ Mamohoi ea heribam ta, taba nige u lulagama i lau e sora em pene u hemaisaheohidi.

²⁷ Au ataieyao tatao mumuga eai si ene, ‘Tabu u ganaganawari.’ (Exod. 20.14). ²⁸ Na eau ea heribamiu ta ea ene taba tau esau sine esau i italau i lelehiei, ia nuana eai i ganawario. ²⁹ Ena mata tutum i hegurim u lamohai, u gabahehuara; i lolo matam esega u hebaaea, ata ma-taum i ohihai abo se gabalaem Gehena eai. ³⁰ Ena nima tutum i hegurim u tomgabaei; i lolo nimam esega u hebaaea, ata ma-taum i ohihai abo se gabadobem Gehena eai.

Iesu inawase ribana i ribaei.

Mt. 19.3-11; Mk. 10.2-12; 1 Kor. 7.10-15

³¹ “Hinage si ene, ‘taba esa, esa monena i gegebiei, abo ena inawase pepana i mosei.’ (Deu. 24.1) ³² Na eau ea heribamiu ta ea ene, ena tau esau monena i gegebiei, sine wa nige i ganaganawari, arinai abo sine wa i heganaganawari; eo esa, esa sine se gegebiei wa i tawasorai, ia hinage abo i ganaganawari.

³³ “Hinage au ataieyao isi mumuga tataodi si ene, ‘Tabu au aigora borabora, (Exod. 20.7) na emi aigora Guiau arinai abo au hemamohoiei’, ³⁴ Na eau ea heribamiu ta ea ene, Tabu au aigora, tabu galewa arinai, Eaubada ena terona meta, ³⁵ tabu tanoubu arinai, aena ana bou meta, tabu Ierusalemata arinai,

* 5:22: Raka, Heleni edi riba baaea esau.

wasawasa lailai ena eanua meta. ³⁶ Tabu u aigora urum arinai, nige abina u ata maiawana esega u heposiposi e u hedubaduba. ³⁷ Em riba u ribaei mo u ene ‘E, E, e Nige’e, Nige’e,’ ina u helaidi ede baaea arinai i tubuma.

³⁸ “Au ataieyao isi si ene, ‘Mata helena mata maisana, mo’a helena mo’a maisana;’ (Ex. 21.24) ³⁹ Na eau ea heribamiu ta ea ene, tau baaea i hebaaeam tabu u hemaisa; esa eo esa parea-tutum ie wai, u sinibui parea esau hinage u mosei; ⁴⁰ ena tau esau i woeaim tauhedudurai matana eai em pereue bena i abi, em pereue lohaloha u mosei hinage; ⁴¹ taba esau i hetaladum i ene u laoma ta lau maila esega, besi maila labui maem au lau. ⁴² Tau esau saha i aiboda arim eai u mosei, esau saha bena i sagenai tabu u otaotaei.

⁴³ “Au ataieyao si ene, ‘Helem-taumia u gadosisiei (Lev. 19.18) na em waiunu u aiouei.’ ⁴⁴ Ea heribamiu ta ea ene, Emi waiunu au gadosisiedi, isi se hebaaeamiu; eo se heamam-namiu, enadi au lau-uura, ⁴⁵ arinai abo Tamamiu galewa eai nanatunayao omi; ena mahana i hesina tatao baaea eo tatao lolo potadi eai, eo nabu i hetaru taulaulau-dudurai eo taulaulaugewagewa potadi eai. ⁴⁶ Taba taugadosisiemiu mo au gadosisiedi, emi lolo saha? † Telona tataodi meta doha se abi, e nige’e? ⁴⁷ Taba ehamiuyao mo au aitoiedi, edohana tatao headi au hemuridi? Murimuri-tataodi isi hinage se abi doha nei, e nige’e? ⁴⁸ Omi bena au lolo-esegaimiu, doha Tamamiu galewa eai i lolodumaduma.

6

Guguia oea-tupi eai wa, se laelaei.

¹ “Au komanimiu emi laulau duduraidi nige au abidi tatao matadi eai, bena se itamiu; ata nige maisana au abi Tamamiu galewa eai wa arinai.

² “Em ainauia u mosei, tabu bogigi u iuhi nonohai, doha tatao borabora sunago alodi eai, eo dobiladi eai, bena tatao se itadi eo se hedebaseadi. Mamohoi ea heribamiu ta, isi maisana se abiyao. ³ Na oa taba u ainauia, nima-tutum ena abiabi tabu nima-seuseurim i ita, ⁴ arinai em ainauia abo u mosemodigau; Tamam i ita-modigauiyao ia abo i hemaisa.

⁵ “Ena u uura hinage, tabu oa doha tatao borabora; paana isi edi gadosisi bena se totoro se uura sunago alodi eai, eo dobila konadi eai, tatao bena se itadi. Mamohoi ea heribamiu ta, isi maisadi se abiyao. ⁶ Na oa ena u lau-uura, u lulau em biriutusi alona eai, dobila abo u gudu, u lau-uura Tamam i mia-modigau arinai; eo Tamam i ita-modigau, abo i ain-auiam.

† 5:46: Isi ede takisi-tautano, abi-gaibu tataodi.

⁷ “Au laulau-uura wa, tabu riba nige aniodi au ribaedi mo, doha hinage Murimuri tataodi; isi edi nuatu si ene riba se hegamagari abo se ataiei. ⁸ Omi tabu doha isi, sora nige au aiboda, Tamamiu i nuatuiyao abi saha, abi saha lolodi bena au abidi.

Uura mamohoi tautaua
Lk. 11.1-13

⁹ “Ina doha au uura, au ene:
Tamamai e, galewa eai,

Esam se hetabuei,

¹⁰ Em basileia bena i laoma,

Em nuatu tanoubu eai ta bena se lauwatai

Doha galewa eai laulauna,

¹¹ Aiai ama wau-ta u leama;

¹² Ema baaea u nuatugabaedi,

Doha hinage ai, tauhebaaeamai edi baaea ai nuatugabaedi;

¹³ Ena noho ai hearo tabu u hesagugabaemai,

Na baaea eai mo u hesaguhaimai.

(Basileiana enam, gigiborina enam, tepo saesaena enam, ana huia, ana tasi, Amen.)

¹⁴ Ena tatao edi baaea au ribagigiridi, Tamamiu galewa eai omi emi baaea abo hinage i ribagigiridi; ¹⁵ ena tatao edi baaea nige au ribagigiridi, Tamamiu omi emi baaea hinage taba nige i ribagigiridi.

¹⁶ “Hinage taba au aiudi tabu omi doha tatao borabora matadi se welawelai, adi ao hinage se hebaaeadi, tatao, bena se itadi se aiudi. Mamohoi ea heribamiu ta, edi ainuia se abiyao. ¹⁷ Na oa taba u aiudi, urum u heyausi, u mata bui hinage, ¹⁸ tatao taba nige bena se itam u aiudi wa, Tamam iabom ena abamiamodigau eai bena i itam; Tamam wa i itamodigau abo i ainuiaim.

Gogo lauheatana: basileia laugagaena.

¹⁹ “Emi gogo tabu au peigogoidi tanoubu eai ta, inai manumanu eo masi abo se hebaaeadi, eo tauaiayahari se lopa abo se aiyahari, ²⁰ na emi gogo galewa eai mo au peigogoidi, nei eai manumanu eo masi nige se hebaaeadi, eo hinage tauaiayahari nige se lopa se aiyahari. ²¹ Emi gogo abatoredi ede, nuamiu abo hinage nei eai.

²² “Tauda lampana ede mata. Arinai ena matam i lau dudurai esega, taum i ohihai abo i mara gudui; ²³ taba matam i baaea, taum i ohihai abo i masigiri gudui. Taba marana boeam eai i masigiri, abo i masigiri dumaduma meta!

²⁴ “Nige tau esau abo tanuaga labui i heaeaiedi; esau abo i hewaiunuei, esau i gadosisie, e esau i nuatuaririei, esau i isuewai. Eaubada eo mamona taba nige au heaeai-esegaidi.

Eda dobila se lau baaea: ta ene Tamada i nuatuida.

²⁵ “Arinai ede ea heribamui ta, tabu maurimui au nuatudaioei, saha abo au ai, saha abo au nom, saha abo au lui. Mauri mo i sae, aiai nige’e, tau hinage i sae, lulu nige’e, wa? ²⁶ Galewa manudi hage au itadi: nige adi se uma, nige se lau-oea, eo nige edi sanara, taiede Tamamui galewa eai i heaidi. Omi isi au saetawatawaidi, e nige’e? ²⁷ Omi esau taba i nuatudaioi, eai abo ena mauri huiana i heloha kubita esega? ²⁸ Eo saha lulu au nuatudaioei? Oea baiobaiodi hage au nuatuidi, isi nige se paisoa, nige se lulu-haturi; ²⁹ hinage ea heribamui ta, Solomona ana pasa lolodi eai ana ao nige i lolo doha hinage isi. ³⁰ Taba Eaubada ina doha oea leidi i heluidi, wau ie ota, maraitom se gabu um boeana eai, omi abo nige i heluimui wa, sunuma gagiri tataomui e? ³¹ Arinai ede tabu emi nua-mode au ene, ‘Saha abo ai aidi?’ e ‘Saha abo ai nomdi?’ e ‘Saha abo ai luidi?’ ³² Teina ginauri gamagamagari ta Murimuri-tataodi se eooyoidi ede; Tamamui galewa eai i itayao teina ginauri gamagamagari ta nige au abidi. ³³ Na Eaubada ena basileia au eobagunai, eo ena laulau-duduraina hinage, abotai abo wau ginauri gamagaridi wa se heoiesegaidiwa.

³⁴ “Tabu maraitom enana u modei, sora maraitom iabom enana abo gonoana, maraitom ena baaea saha maraitom abo u nuatui.

7

¹ “Tabu u hegihegiru, ata oa hinage se hegirum. ² Giru wa arinai u hegiru arinai oa abo hinage se hegirum, eo nonoi wa arinai u nonoiei abo hinage se nonoiyawa arim eai. ³ Ue saha muari u ita em tau matana eai, na oeagi oa matam eai nige u nuatui? ⁴ Hinage edoha em ribariba em tau arinai u ene, ‘Muari matam eai me bena ea abihai,’ na oeagi sora oa matam eai ie ota? ⁵ Oa tauboraborasom, oeagi oa matam boeana eai u abihai bagunai, arinai abo u ita-loloei em tau matana muarina abo u abihai.

Ura lauheatana
Lk. 11.1-13

⁶ “Ginauri tabuna tabu u mosei kedewa aridi eai, hinage tabu em giniuba matamatapoudi u gabaedi sarai aridi eai, ata aedi eai, se utu-tawatawaidi, abo se sinibui se letaim.

⁷ “U aiboda, abo se leawa; u eoo, abo u lobai; u ipeipesi, dobila guduna abo se soeawa. ⁸ Paana ia i aiaiboda abo i abi, eo ia i eoo abo i lobai, eo ia i ipeipesi ia arinai abo se soe. ⁹ Aitea tau arimui eai, taba natuna falawa i aiboda, we’u abo i mosei, wa? ¹⁰ Taba eama i aiboda, mota abo i mosei? ¹¹ Taba omi, baaea tataomiuyao, abidi au atao ainauia lolodi au mosed i nanatumiyao aridi eai, Tamamui

galewa eai iabom ginauri lolodi abo i mosei tauaiaiboda aridi eai, e nige'e? ¹² Abiabidi gamagamagari u henua tatao se abidi arim eai, doha nei hinage u abidi isi aridi eai; teina ta laugageo eo peroveta ribadi ede.

Dobila labui

Sal. 1

¹³ "Au lusoralau dobila gagirina arinai; paana dobila sora-sorana ie lai, eo edana i magaga i lau e mate arinai, tatao gamagaridi abo se lulagelau arinai. ¹⁴ Paana ede abalusoralauna i ahiahi, eo eda sausauaina mo i lau e mauri arinai, tatao hisahisawaidi mo se lobai.

¹⁵ "Peroveta borabora au komanidi, se laowa arimiu eai adi lulu mamoe uiadi, boeadi eai doha * luko aiailtadi. ¹⁶ Uauadi arinai abo au italobaidi. Malanurinuri eai tatao abo vine se abidi wa? eo popohauhau eai abo kuhou hinage se gigidi, wa? ¹⁷ Iaede, oeagi lolodi uaua lolodi se toredi, na oeagi baaeadi uaua baaeadi se toredi. ¹⁸ Oeagi lolona uaua baaeana taba nige i tore, oeagi baaeana hinage uaua lolona taba nige i tore. ¹⁹ Oeagi gamagaridi esau eo esau uaua lolodi nige se toredi se oiheguridi, abo se gabalaedi oeagi alaalasina boeana eai. ²⁰ Arinai ede, uauadi eai abo au italobaidi.

Iesu ta ribaribaei to nige ta sunumawatai, i baaea.

²¹ "Isi gamagaridi arigu eai si ene, 'Guiau e, Guiau e,' headi taba nige se lusora galewa basileiana eai, na iabom mo Tamagu galewa eai i mia ena nuatu i ginauriwatai. ²² Nei asubenana ne gamagaridi abo se ribalaoma arigu eai si ene, 'Guiau e, Guiau e, ai ede esam eai ai riba-peroveta e nige'e, wa? Esam eai demoni ai aiduiedi e nige'e, wa? Esam eai laulau gigiboridi ai ginauridi e nige'e, wa?' ²³ Abo ea riba masaraha aridi eai ea ene, 'Eau ea hekaumiu; omi baaea tauabidi, au lausuaaregu.'

Numa aba-tore labui

Lk. 6.47-49

²⁴ "Esa eo esa teina egu riba ta i ataiedi, eo i lauwataidi, ea ene ia doha tausononogana esau, ena numa malamalatete potana eai i hetoro; ²⁵ nabu abo ie taru, eo abaita ie didi, eo mana ie toa, numa wa ie eai, nige i guri, paana ede malamalatete potana eai se hetoro. ²⁶ Esa eo esa teina egu riba ta i ataiedi, eo nige i lauwataidi, abo se heaheasoniei ia tauyauyaurena, ena numa malageregere eai mo i hetoro; ²⁷ nabu abo ie taru, eo abaita ie didi, eo mana ie toa, numa wa ie eai, abo ie guri; i tatagorigori ariri."

* 7:15: English eai si ene wolves.

²⁸ Iesu teina riba ta i riba lautom, tatao ena gugua se nooei, ²⁹ paana ede i heatadi ena riba ma gigiborina, nige doha tauuriuri tataodi.

8

Iesu lepera tauna i hemaui

Mk. 1.40; Lk. 5.12-14

¹ Ia oea eai wa ie leta ie dobi, moutuadi lailai se hemuriwatai; ² lepera tauna esau i laoma ia arinai, i turibono ia matana eai, i ene, “Guiau e, ena u henua, oa abina u ata u heaagu.” ³ Iesu nimana i loloilaei, tau wa i abiita, i ene, “Ea henua, oa abo u aa.” Maesega ana lepera ie uru. ⁴ Iesu ia i heriba i ene, “Tabu tau esau arinai u wasawasaei; u lau mo kohena arinai, ainauia Mose i ribaei wa u mosei, laulau ta u hemasaraha aridi eai.” (Lev. 14.4).

Iesu kenturion ena heaheari i hemaui

Lk. 7.10

⁵ Ia abo i lulage Kaperenauma eai, kenturion esau i laoma ia arinai, i awanoridaoi, ⁶ i ene, “Guiau e, Tauheaeaiegu numa eai ie ota i palisi, tauna se amamna ariri.” ⁷ Iesu ia i heriba, i ene, “Ea laowa, abo ea hemaui.” ⁸ Kenturion i ribaui o i ene, “Guiau e, eau nige ea lolo bena u laoma egu numa alona eai: em riba mo u ribaei, to egu heaeai tauna abo i mauri. ⁹ Eau hinage tanuaga esau ea heaeaei, eo hinage tauiala tanuagadi ede eau: tau esau ea heriba ea ene, ‘U lau,’ abo i lau: ea heriba ea ene, ‘U laoma,’ abo i laoma: egu heaeai tauna arinai ea ene, ‘U ginaui,’ abo i ginaui.” ¹⁰ Ena riba Iesu i ataei ie noo, isi taulauwataina i heribadi i ene, “Mamohoi ea heribamiu ta, nige sunuma doha ina ea ita, Isaraela eai nige esau doha. ¹¹ Ea heribamiu ta, tatao gamagaridi teha aruabu, eo teha eahala abo se laoma maedi Aberahama, eo Isaako, eo Iakobo se bawabigabiga galewa basileiana eai. ¹² Na basileia nanatunayao masigiri ariariri boeana eai abo se gabalaedi, nei eai abo se doudou, eo gadigadidi se taburuyahisidi.” ¹³ Iesu kenturion i heriba, i ene, “U lau, em sunuma wa abo ie tubu.” Ena heaeai tauna edi huia ribariba eai ne ie mauri.

Iesu, Petero bosiana sine i hemaui

Mk. 1.29-34; Lk. 4.38-41

¹⁴ Abotai abo Iesu i lagema Petero ena numa eai, ia bosiana i ita ie ota, tauna se gigibori ariri. ¹⁵ Ia nimana i abiitalaei, ena gigibori i lautom: abo i toro i heaeaiedi. ¹⁶ I maimailahio, demoni tauluidi gamagaridi se woeaidima ia arinai: ena riba eai earua i aiduiedi, eo isi hinage tauasiasiebo gamagamagari i hemaui. ¹⁷ Arinai abo riba wa Isaia peroveta i ribaei, se hemamohoei, i ene, “Eda beruberu ia i abihaidi, eo eda asiebo i bahedi.” (Is. 53.4).

18 Iesu moutuadi lailai i itadi, ia se lauwatai, i lauhesomdi bena abo se lau hari teha eai ne.

Isi Iesu se ribaribaei mo

Lk. 9.57-62

19 Tauuriuri esau i laoma ia i heriba i ene, “Tanuagagu e, taba em abasae, em abadobi eai ea lauwataim.” 20 Iesu ia i heriba i ene * “Alope edi guda, ewa manudi edi noi se abidi; na Tau Natuna uruna nige ena aba-aiunuaena.” 21 Heaheata esau ia i heriba i ene, “Guiiau e, bena ea lau tamagu ea tore bagunai.” 22 Iesu ia i heriba i ene, “U lauwataiguma mo: taumatemate isibom edi taumatemate abo se toredi.”

Iesu mana eo butubutu i ribahetarudi.

Mk. 4.36-41; Lk. 8.22-25

23 Ia abo i geresae waga eai, ena heaheatayao ia se hemuri-watai. 24 Gabogabo eai mana lailai i lagelage, butubutu waga i poii: na ia ma-enona. 25 Ena heaheatayao se laoma ia se hanoi, si ene, “Guiiau e, u hemauida: ata ta mate.” 26 Ia i heribadi i ene, “Omi saha au matausini? emi sunuma i gagiri.” Ia abo i toro mana eo gabogabo i ribahetarudi: abo i daumori ariri. 27 Tatao wa se noo, si ene, “Tau ta edohana ina, mana eo gabogabo ena riba se ataiei!”

Gadara eai Iesu demoni i aiduiedi

Mk. 5.1-21; Lk. 8.26-40

28 Ia abo ie duna hari teha eai Geresene oeana eai, tatao labui demoni se luidi maedi se hailobai, isi bousa eai se loama, se hemahemanabara ariri, arinai tatao nei dobila wa se laulaugabaei. 29 Isi se eabayaba, si ene, “Oa Eaubada Natuna e, saha abo ai abi arim eai? Oa u laoma ina bena u heamamnanonohaimai?” 30 Sarai eawoidi esau se dumuri eda lohaloha eai. 31 Demoni ia se awanorini, si ene, “Ena u aiduimai u hetamarihesuaramai nei sarai eawoidi ne boeadi eai.” 32 Ia abo i heribadi, i ene, “Au lau.” Abo se lulagema murimuri eai, eo se lulau sarai eawoidi boeadi eai; na eawoidi wa se ohihai abo se aitauteu se dobi padipadi eai, se mate ohi gabogabo eai. 33 Isi sarai tausuisuidi abo se dago, se laulau e eanua eai se lage, wasa wa se heribadi, eo demoni tauluidi wasana hinage. 34 Eanua tataodi gamagamagari abo se laoma bena Iesu maedi se hailobai, ia se ita se aiboda adidiri ia arinai, si ene, “bena ama sigasiga ta u laugabaei.”

9

Iesu i uio Kaperenauma eai; tau palisi i hemaui

Mk. 2.3-13; Lk. 5.18-26

1 Ia waga eai ie geru ie lau hari sana awasi eai, abo ie lage ena eanua eai. 2 Na, tau esau ena asiebo i palisi, ie

* 8:20: English si ene, foxes.

ota hatahata eai, se baheiyama: Iesu edi nuatu adidirina i itayao, asiebo palisi tauabina wa i heriba, i ene, “Natugu e, u kode mo; em baaea se ribagigiridio.” ³ Tauuriuri headi se heunaboisaha, si ene, “Tau ta Eaubada i arina baaeai.” ⁴ Iesu, edi nuatu i nuatulobaiyao, i ene, “Saha baaeana au heunaboisahaie? ⁵ Aitea i masamasaraha ede, ea ene, ‘Em baaea se ribagigiridi,’ e ea ene, ‘U torohai, u lau?’ ⁶ Omi bena au ita Tau Natuna tanoubu eai ta, ia gigiborina eai, baaea i ribagigiridi (asiebo palisi tau-abina i heriba, i ene), U torohai, em eba u nou, u lau em numa eai.” ⁷ Ia i torohai, i lau ena numa eai. ⁸ Moutuadi se ita se matausi Eaubada se hedebasaei, ena gigibori nei doha i mosei tatao aridi eai.

Mataio se eogai

Mk. 2.14; Lk. 5.27-29

⁹ Nei eai Iesu i torohai i lau, tau esau ie ita, esana Mataio, takisi numana eai i babawa, ia i heriba, i ene, “U lauwataiguma.” Ia abo i torohai, ia i hemuriwatai.

Iesu Parisea edi riba i heuio

Mk. 2.15-20; Lk. 5.29-35

¹⁰ Iesu i bawabigabiga, numa eai i aiai, eo takisitautano gamagamagari, eo tatao baabaaea se laoma Iesu maena heaheatayao maedi se bawagogo. ¹¹ Parisea abo se itadi, ena heaheatayao se heribadi si ene, “Tanuagamiu ie saha takisi tataodi, eo tatao baabaaea maedi se aiai esega?” ¹² Iesu riba wa i ataiei, i ene, “Taumaumauri doketa nige se abi, tauasi-asiebo mo. ¹³ Au lau teina riba ta aniona au eooi. ‘Eau nua-toatoa ea henua, aitalasm nige’e (Hos. 6.6):’ paana ede nige ea laoma taulaulau-dudurai ea eogaidi, tatao baabaaeadi mo.”

¹⁴ Ioane ena heaheatayao abo se laoma Iesu arinai, si ene, “Ai, eo Parisea, huia gamagamagari ai aiaiyudi, oaem heaheatayao se saha nige se aiaiyudi hinage?” ¹⁵ Iesu i heribadi i ene, “Wa, tautawasora harihariu ena heriam se nuadubu tautawasora maedi sora se miaesega? Na huiana abo i lagema, tautawasora harihariu abo se laesuara, nei asubenadi eai abo se aiaiyudi.”

Parabole: lulu eo iledi

Mk. 2.21, 22; Lk. 5.36-39

¹⁶ Nige tau esau lulu harihariuna i popoi lulu beabeana arinai, bena se bodigudui abo se tapurisi uio, lulu wa abo i tapurisi ariri. ¹⁷ Hinage tatao waina harihariuna nige se hegoi sarai opina iledi beabeadi alodi eai, ata doha iledi wa se tapurisi, waina abo i boriri, eo iledi abo se baaea; na waina harihariuna se hegoi sarai opina iledi harihariudi alodi eai, abo se lolo labulabui.”

Iesu, sine eo Iairo natuna siu i hemauidi
Mk. 5.22-43; Lk. 8.41-56

¹⁸ Teina riba ta Iesu i heriheribadi, na sunago tanuagana esau i laoma ia i aihelahui, i ene. “Natugu siu ie mateo: na taba u laoma nimam u saosae ia potana eai, abo i mauri.”
¹⁹ Iesu abo i torohai, ia i lauwaitai, ena heaheata maenayao hinage. ²⁰ Na, sine esau ana asiebo borimai saudoudoilabui osina ie didi, ia murina eai i moninihima ana lulu dedeana i heasailaei. ²¹ Ena nuatu i ene, “Ena ana lulu mo ea heasai, taugu abo se lolo.” ²² Iesu abo i torobui sine wa i ita, i ene, “Natugu e, nuam i biga, oa sunusunumam eai taum se lolo’o”.
²³ Iesu abo i awasae sunago tanuagana ena numa eai tatao huelele se oiointi i itadi, eo tatao se doudou. ²⁴ I heribadi i ene, “Au pesagorigori; siu me nige i mate, ie eno mo.” Isi ia se marumaruhiei, eo se talatalawasiei. ²⁵ Tatao wa se pesagorigori abo i lulau biri eai, siu nimana eai i abilau, ia abo i toro. ²⁶ Teina wasa ta ie lau nei oea ne i tauhetaiiri.

Taumatagibugibu labui matadi se helaladi.

²⁷ Iesu nei dimo ne abo i laugabaei, taumatagibugibu labui ia se lauwaitai, se eogayoga, si ene, “Davida natuna e, u nua-toatoaimai.” ²⁸ Ia abo i awasae numa eai, taumatagibugibudi se laoma ia arinai: Iesu i heribadi, i ene, “Emi nuatu i adidiri au ene ina ta abina ea ata?” Se heriba si ene, “Guiau e, hedeona.” ²⁹ Isi matadi i abiitadi, i ene, “Emi sunuma doha meta arinai abo i tubu arimiu eai.” ³⁰ Matadi abo se lala; arinai abo Iesu awadi i tawaidi, i ene, “Wasa ta tabu tau esau i ataiei,” ³¹ Isi abo se lau ia wasana se duai oea se hetaiiri.

³² Ma laudi, dobila eai tau unaunana, demoni ia se lui, se woeayama Iesu arinai. ³³ Demoni wa se aiduieyao, abo tauunaunana wa ie riba: moutuadi lailai se nooei, si ene, “Nabada wa, Isaraela eai laulau ina doha nige ta itaitai.”
³⁴ Parisea tataodi mo si ene, “Demoni edi wasawasa ena ghibori eai, arinai demoni i aiduiedi.”

Iesu Galilaia eai i laugugua
Mk. 6.5, 6

³⁵ Iesu edi eanua lailaidi, eo edi eanua gagiridi hinage gamagaridi i tautausidi, edi sunago alodi eai i lauheatadedi, basileia wasa lolona i lauguguaedi, asiebo eo iwala gamagamagari i hemauidi. ³⁶ Moutuadi lailai i itadi i nuatoatoaedi paana ede se nuadubu, eo se tatagorigori, doha mamoe nige taumiataunidi. ³⁷ Ena heaheatayao abo i heribadi, i ene, “Aiai sunasuna se gamagari ariri: na tauabidi eseesejadi mo.”
³⁸ Guiau, aiai wa tanuagana, arinai au uura bena taupaisoa headi i hetamaridi ana aiai sunasuna abo se abidi.”

10

¹ Ena heaheatayao saudoudoi-labui i eogaidi ia arinai, gigi-bori abo i mosei aridi eai earua biibiidi abo se guduguduidi eo se aiduiedi, eo asiebo, eo iwala gamagamagari abo se hemauidi. ² Aposotolo saudoudoi-labui wa esadi ede ina; Bagubagunana ede Simona, esana ede Petero, eo ana taumurita Anederea; Jamesi, Sebedaio natuna, eo ena tau Ioane. ³ Pilipo, eo Batolomaio; Toma, eo Mataio takisi tautano; Jamesi, Alepaia natuna, eo Tadaio; ⁴ Simona, Kanana tauna, eo Iuda Isakariota ia ede taumoruina wa.

⁵ Isi tatao saudoudoi-labui Iesu i hetamaridi, eo i lauhesomdi, i ene, “Etene edi eanua dobiladi tabu au lauwateri, eo Samaria eanuadi hinage tabu au lulage aridi eai. ⁶ Mamoe se tatagorigori Isaraela numadi eai, au lau hesabadi. ⁷ Au lau ma guguiamiu au ene, ‘Galewa basileiana i hanahanaumao.’ ⁸ Tauasiasiebo au hemauidi, lepera au heaadi, taumatemate au heterouioidi, demoni au aiduiedi: ginauri gamagaridi aue abidi hinage au ainuiaidi nige maisadi. ⁹ Tabu *gold* eo *silver*, eo pene au usaidi emi tobo eai. ¹⁰ Emi lauwasu tobo tabu au laei, tabu pereue labui, tabu aeum, tabu tue hinage, paana ede taupaisoa ana ai ai taba se mosei. ¹¹ Ena eanua esa, eanua esa au lulage aridi eai, au lauhesio, eai nei eai ena abi se lolo; arinai au mia e abo au lau. ¹² Ena au awasae numa esau alona eai, au lautoiedi. ¹³ Numa wa ena edi abi se lolo, emi loni au tore aridi eai: ena edi abi nige se lolo, emi loni au abiuoi. ¹⁴ Esa, esa nige i eogaisinimiu, emi riba hinage nige i ataiedi, ena numa, eo eanua me au laugabaedi, aemi muaridi au oiluilugabaedi. ¹⁵ Mamohoi, ea heribamiu ta, hedudurai asubenana eai Sodoma eo Gomora edi baaea nige si ene ie lai, doha wau eanua wa.

¹⁶ “Na, ea hetamarimiu ta omi doha mamoe luko boeadi eai; arinai abo au sonoga doha mota, au taubiga doha bunebune. ¹⁷ Tatao au komanidi; isi abo se laemi kaunisila aridi eai, edi sunago alodi eai hinage abo se pidirimiu. ¹⁸ Eau debagu eai abo se woeaimiu gavana eo wasawasa matadi eai, bena isi aridi eai, eo etene aridi eai hinage au hemasarahagu. ¹⁹ Isi se toaimiu se laemi wa, tabu emi nuatu au ene edoha emi ribariba: paana ede nei huia eai ne riba se leawa abo au ribaei. ²⁰ Paana ede omi nige au riba, Tamamiu ena Earua boeamiu eai, ia abo i riba. ²¹ Taubaguna ana taumurita abo i mosei se unuhemate, eo tamana ia natuna abo hinage doha, merumeru abo tamadiyao eo sinadiyao se hewaiunuedi, abo se unuhematedi. ²² Tatao gamagaridi taba se hewaiunuemi eau esagu debana eai: na ia i sogohididini i lau e anasigana eai, abo se hemaui. ²³ Taba teina eanua eai ta se heamamamiu, au dago, au lau hari eanua: mamohoi ea heribamiu

ta, Isaraela eanuadi sora nige au baeawaheohidi, Tau Natuna abo i lagema.

²⁴ “Tauheaheata ana tanuaga nige i saepoi, eo tauheaheai ena guiau nige i saetawatawai. ²⁵ Tauheaheata nuana i lolo ena si ene ia doha ana tanuaga: eo tau heaeai doha ena Guiau. Taba numa tanuagana esana se tore Belesebulo, ena numa tataodi hinage esadi nei doha se toredi, e nige’e?”

²⁶ “Arinai tabu au matausiedi: paana ede ginauri esana se hebuitawai, abotai abo i masaraha; eo se toreyamui, hinage abo se ita-lobai. ²⁷ Riba wa ea heribamui wa masigiri boeana eai, marana eai au ribaei; eo riba wa beamui eai au ataiedi wa, numa ewadi eai au gugua hemasarahadi. ²⁸ Isi taumi mo tauunuidi tabu au matausiedi, earuamui unuina nige abina se ata: na ia mo au matausiei ede, earuamui eo taumi taba i hebaaeaesegaidi gehena eai. ²⁹ Manu gagiridi labui se unedi maisadi pene esega, e nige’e wa? taba nige esau i beu tano eai, Tamami abo i ita. ³⁰ Urumui maiawadi gamagamagari se hasiriheohidio. ³¹ Arinai tabu au matausi, manu gagiridi gamagamagari nige se sae doha omi. ³² Ena tau esa, esa, i ribahemasarahagu tatao matadi eai, eau hinage ia abo ea ribahemasaraha Tamagu galewa eai ie mia, ia matana eai. ³³ Ena esa, esa, i hareregu tatao matadi eai, eau hinage ia abo ea harere Tamagu galewa eai ie mia, ia matana eai.

³⁴ “Tabu nuamui au ene ea laoma tanoubu eai loni ea leama: loni taba nige ea leama, elepa mo. ³⁵ Ea laoma ta bena tau ia tamana abo i hewaiunuei: natuna siu, sinana hinage bena i hewaiunuei: lawana hinage bosiana-sine, bena i hewaiunuei. ³⁶ Tau esau ena waiunuyao isi ede ena numa tataodi. (Mic. 7.6) ³⁷ Ia tamana eo sinana i gadosisiedi, nige i gadosisiegu doha i gadosisiedi, ia nige gonoana agu sagu; ia natuna tau, eo natuna sine i gadosisiedi, nige i gadosisiegu doha i gadosisiedi, ia nige i hedebasaegu. ³⁸ Ia ena satauro nige i abiisini, abo i lauwateraigu, ia nige i hedebasaegu. ³⁹ Ia mauri i lobai, ena mauri abo i tauyamui, ia ena mauri i nuagabaei eau debagu eai ena mauri abo i lobai.

⁴⁰ “Ia i taubigaimui i taubigaigu hinage, ia i taubigaigu tauhetamariguma hinage i taubigai. ⁴¹ Ia peroveta i taubigai peroveta esana eai, peroveta ainaiuana abo i abi, ia taulaulau-duduraina i taubigai taulaulau-duduraina esana eai, taulaulau-duduraina ainaiuana abo i abi. ⁴² Ena tau esa, esa goila nomnom kaputi esau mo i mosei merumeru gagirina esau arinai heaheata esana eai, mamohoi ea heribamui ta ia ainaiuana taba nige ie dabu.”

11

¹ Iesu ena heaheatayao saudoudoi-labui i lauhesomnono-

haidi, nei dimo ne abo i laugabaei edi eanua eai bena i lauheata eo i laugugua.

Ioane Baptiso ena heaheatayao i hetamaridi Iesu se hesioei Lk. 7.18-35

² Na, Ioane numa masigiri eai Keriso ana paisoa wasana i ataiei, ena heaheatayao labui i hetamaridi, ³ Iesu arinai si ene, “Ia bena i laoma wa ia ede oa, e esau abo ai eooi?” ⁴ Iesu arinadi i heuio, i ene, “Au lau ginauri wa au ataiedi, eo au itadi, Ioane au heitauioi au ene, ⁵ Taumatagibugibu matadi se helaladi, taulaulaudae se tautausi, lepera tataodi se headi, tau beado’odo’o riba se ataiei, tau matemate se abihetorodi, eo taugogogesagesa wasa lolona se lauguguaiedi. ⁶ Taba tau esa, eo esa nige i nuabaaea arigu eai, nuana abo i woiwoina.”

⁷ Ma laudi, na Iesu moutuadi Ioane ribana enadi i riba-hetubu i ene, “Aue lau barabara eai wa saha bena au ita? Didiari esau mana i iuhihe’eoee? ⁸ Aue lau saha bena au ita? Tau esau ana lulu bigabigana i lui? hage isi lulu bigabigana se lui wasawasa edi numa eai se mia. ⁹ Aue lau saha bena au ita? Peroveta wa? Hedeona, ea heribamiu ta, ia peroveta saesaena. ¹⁰ Ia ede teina, doha se uri wa si ene, ‘Hage, egu tauwasa matam eai ea hetamarimugaiem em dohila i abinonohai.’ ¹¹ Mamohoi, ea heribamiu ta, isi wa sisine se labasidi nige esau ie toro, Ioane Bapatiso mo ia i saetawatawai ede; na ia galewa basileiana eai i murimuritamama Ioane Bapatiso abo i saetawatawai. ¹² Ioane Bapatiso huiana eai, i laoma e huia ta, galewa basileiana se laugirihai, eo tatao adiadihiri edi adidiri eai se laugirihai. ¹³ Peroveta gamagamagari eo laugagaeo hinage se ribaperoveta i laoma e Ioane huiana eai. ¹⁴ Ena au ataiei, Elia ede ina, ia ede si ene abo i laoma wa. ¹⁵ Ia beana eai i ataiei, abo i ataieididini.

¹⁶ “Teina isi ta saha arinai ea heaheasoniei? Doha ede merumeru se bawagogo abauneune eai, adi sasaguyao se eogaidi, si ene. ¹⁷ ‘Huelele aie iuhiawa, nige aue saga: ai dou nuanuadubuemi, nige aue dou.’ ¹⁸ Ioane i laoma aiai nige ie ai, waina nige ie nom, abo si ene, ‘Demoni esau ia boeana eai.’ ¹⁹ Tau Natuna i laoma aiai ie ai, eo waina ie nom, abo si ene, ‘Au ita, tauaiasom, eo waina taunomnomsom, takisi tautano eo tatao baabaaedi ehadi.’ Sonoga nanatunayao aridi eai sonoga wa se hemasaraa.”

Iesu se otaotaei: hekiraino i ribanonohai.

²⁰ Abotai abo eanua headi aridi eai ena laulau gigibori i hemasarahadi i ribasuudi, paana ede nuadi nige se buidi. ²¹ I ene, “Kapore Korasina! Kapore Betesaida! paana ede laulau gigiboridi emi eanua eai se ginauridi wa, taba Turo eo Sidona eai se ginauridi isi nabada nuadi se buidi, eo baeki eo ahu se aiouiaedi. ²² Teina ea heribamiu ta, hedudurai

asubenana i lagema Turo eo Sidona taba nige se hegiru-
daoiedi, omi mo abo se hegirumiu. ²³ Kaperenauma e hinage,
oa se heawasaem galewa eai, abo u dobi hade eai: paana
ede taba laulau gigiboridi se ginauridi Sodoma eai, doha se
ginauridi em eanua eai, ia abo ie mia e huia ta. ²⁴ Teina ea
heribamiu ta Hedudurai asubenana i lagema, Sodoma taba
nige se hegirudaoiei, oa mo abo se hegirum.”

²⁵ Nei huiana ne Iesu riba i heuio, i ene, “Tamagu, galewa
eo tanoubu Guiauna e, ea lautoiem ta, paana teina ginauridi
tatao sonoga, eo tatao sibasiba matadi eai u toreyamuidi:
na kaimou aridi eai u hemasarahadi. ²⁶ Taiede Tamagu e:
nei doha oa matam eai u ene i lolo. ²⁷ Tamagu ginauri
gamagamagari i ledima eau arigu eai: nige tau esau Natuna i
itayao, Tamana iabom: hinage nige tau esau Tamana i itayao,
Natuna iabom, eo ia hinage esa, eo esa, aridi eai Natuna wa
ia i henua i hemasara. ²⁸ Omi gamagarimiu amnamiu se
baaea, eo ami bahebahe se porohe, au laoma eau arigu eai,
abo ea heaiyawasimiu. ²⁹ Egu oibahe au tore gedugedumiu
eai, eo arigu eai au napuhai: paana ede eau ea dobidobiegu
eo eau taumanamanabiga: earuamiu edi abaaiyawasi abo
au lobai. ³⁰ Paana ede agu oibahe i masamasara, eo agu
bahebahe i mamala.”

12

Iesu i ene ia sabati Guiauna
Mk. 2.23-28; Lk. 6.1-5

¹ Nei huiana ne, sabate esau, Iesu i oilulau * sitona oead
eai; ena heaheatayao se guriam, arinai sitona aiadi se wola-
haidi, se aidi. ² Parisea abo se ita, ia se heriba si ene, “U
ita, em heaheatayao sabate laugagaona se utusi ne.” ³ Ia
abo i heribadi i ene, “Davida ena laulau nige au hasiri wa?
huia ne i guriam, eo ana sasaguyao hinage; ⁴ ia i awasae
Eaubada ena numa eai, areto i ai, ia ma ana sasaguyao,
laugagaona se utusi, paana kohena tataodi isibom areto wa
tauaidi ede. (1 Sam. 21.1-6). ⁵ Laugagaona eai hinage nige
au hasiri wa, si ene, asubena sabate kohena tataodi dubu
alodi eai sabate laugagaona taba se utusi, nige se baaea?
⁶ Na, ea heribamiu ta, ea ene, ginauri esau inai dubu wa ia
i saetawatawai. ⁷ Taba teina riba ta abina au ata, doha si
ene, ‘Nuatoatoa ea henua, aitalasam nige’e,’ tatao nige adi
giro taba nige au nuatu hebaeadi. (Hos. 6.6) ⁸ Tau Natuna
ia sabate ena Guiau ede.”

Sabate eai tau nimana ie tubu ea’eyaelua se helolo.
Mk. 3.1-6; Lk. 6.6-11

* 12:1: wheat, arinai flour se lauginauri.

⁹ Nei dimo ne i laugabaei abo i awasae edi sunago alona eai. ¹⁰ Na, tau esau nei eai nimana esau i tubu ea'eyaelua. Ia se oimurini si ene, "Huia sabate eai taba ta hemaui abo i lolo?" ia bena abo se hegiru. ¹¹ Iesu i heribadi i ene, "Aitea tau arimiu eai wa, ena mamoe esega dumaduma, asubena sabate eai ie beu hua eai, abo i abilau i abiisiniama, e nige'e wa? ¹² Tau mamoe i saetawatawai. Arinai i lolo asubena sabate eai laulau lolo au laulauedi." ¹³ Ia abo tau wa i heriba i ene, "Nimam u heleleama." Nimana i helelelaei: i lolo'o, doha hinage nimana esau. ¹⁴ Parisea abo se lulage ia abo se oiribaei, si ene, edoha edi abiabina ia taba se unui.

Iesu eo moutuadi lailai (Tiberia gabogabona eai).

Mk. 3.7-12

¹⁵ Edi nuatu Iesu i itayao nei dimo ne abo i laugabaei: tatao gamagamagari ia se lauwatai: gamagaridi hinage i woisidi; ¹⁶ Ia abo i lauhesomdi, i ene ia tabu se wasawasaei. ¹⁷ Arinai abo riba esau Isaia peroveta i ribaei si hemamohoiei, i ene, ¹⁸ "Egu heaeai tauna au ita, ia ea hinahinawai; ia ea gadoisiei, eo ea nualoloei: earuagu ea toresae ia potana eai: ia hedudurai Murimuri-tataodi abo i heitadi. ¹⁹ Ia nige i haihaiawayagara, eo nige i sagasagari: dobila eai ia arinana taba nige esau i ataiei ²⁰ Didiari leleana taba nige i goduhai, oeagi gagirina taba nige i heboso, i lau e ena hedudurai eai se mauri. ²¹ Ia esana Murimuri-tataodi abo se sunumawatai." (Is. 41.8; 42.1).

Tau demoni se lui se hemaui

Mk. 3.22-30; Lk. 11.14-23

²² Abotai abo tau esau demoni i lui se woeaiama Iesu arinai, ia matana se gibu, eo i unauna hinage: Iesu ia i hemaui, arinai abo taumatagibugibu eo tauunauna wa ie riba, eo matana se lala. ²³ Tatao gamagamagari se nooei, si ene, "Ina ta Davida natuna, e nige'e?" ²⁴ Parisea teina riba ta se ataiei, si ene, "Ina tau ta Belesebulo, demoni edi wasawasa, ena gigibori eai demoni wa i aiduiedi." ²⁵ Iesu edi nuatu i nuatulobaiyao, arinai i heribadi, i ene, "Basileia ena isibom se haitoremuri abo se lautom: eo eanua, e numa, taba se haitoremuriuioidi abo nige se toro: ²⁶ Taba Satani, Satani i aiduei iabom i haitoremuriuioi: ena basileia edohana abo i toro? ²⁷ Taba eau Belesebulo gigiborina eai demoni ea aiduiedi, omi nanatumiyao eai gigiborina eai abo se aiduiedi hinage? Isi mo abo tauhegirumiu. ²⁸ Taba eau demoni ea aiduiedi Eaubada ena Earua gigiborina eai, Eaubada ena basileia ede i lageo omi potamiu eai. ²⁹ Tau adiadidiri ena numa edoha edi lulusaena ena ginaui abo se girihaidi, taba ena tauadiadidirina se aubagunai, abotai abo ena numa ginauridi se abidi. ³⁰ Taba

tau nige i sagusaguigu ia abo i guduguduigu; taba tau nige i tanogogo-saguigu abo i hetatagorigori.

Baaea esau taba nige se ribagigiri

Mk. 3.29-30

³¹ Arinai ea heribamiu ea ene, Tatao edi baaea gamagamagari, eo riba baaea hinage abo se ribagigiridi, na ena Earua Tabuna se riba baaeaei taba nige se ribagigiri. ³² Taba tau esa, eo esa Tau Natuna i hebaaea, edi baaea wa abo se ribagigiri: taba tau esa, eo esa Earua Tabuna i hebaaea ena baaea taba nige se ribagigiri: ina tanoubu maurina eai ta, eo galewa maurina eai hinage.

³³ “Oeagi lolona uauana hinage i lolo: oeagi baaeana uauana i baaea: oeagi abaitalobaina ede uauana. ³⁴ Omi mota nanatudiyao e, au baaea: edohana abo riba lolodi au ribaedi wa? Tau awana ribana nua i monau-boriboriri arinai se tubuma. ³⁵ Tau lolo ena ginauri lolodi abo i hemasarahadi, tau baaea ena ginauri baaedi abo i hemasarahadi. ³⁶ Ea heribamiu ta, Hedudurai asubenana eai riba gaibu gamagamagari tatao se ribaedi, abo se hemasarahadi, eo aridi eai se hegirudi. ³⁷ Emi riba abo se helolomiu: eo emi riba abo se hegirumiu hinage.”

Peroveta Iona heiheinoina: Iesu ena mate eo torouio i ribanonohai

Lk. 11.29, 30

³⁸ Arinai abo tauuriuri headi, eo Parisea headi Iesu se heriba si ene, “Tanuagamai e, heiheinoim esau bena ai ita.” ³⁹ Ia arinadi i heuio i heribadi, i ene, “Isina baaeana, eo isina nige se sunusunuma, heiheinoina se eooi: taba nige heiheinoina esau se mosei na Iona peroveta mo heiheinoina wa. ⁴⁰ Doha ulaulasi Iona ie dom wa, bogana alona eai ie mia asubena haiona eo maiona haiona: doha ede Tau Natuna hinage i mia tano boeana eai asubena haiona eo maiona haiona. ⁴¹ Hedudurai huiana eai Nineva tataodi abo se totoro teina isina ta maenayao, abo hinage se hegirudi: paana ede Iona ena laugugua arinai nuadi se buidi: esau ede ina, Iona i saetawatawai. ⁴² Hedudurai huiana eai tupo eawana edi wasawasa sine abo i toro teina isi ta maenayao abo hinage i hegirudi: ia tanoubu sigana eai i laoma bena Solomona ena sonoga i ataiei: esau ede ina, Solomona i saetawatawai.

Isi se heduduraiuioidi edi lolo nige adi ao

Lk. 11.24-26

⁴³ “Earua bii tau esau nuana eai i laugabaei, i lau dimo pitapitari eai bena ena abaaieawasi i eooi, na nige i lobai. ⁴⁴ E abo i ene, Abo ea uio egu numa eai arinai ea laoma ta: abo i laoma, ie ita numa ahaaha mo, eo se uiauiiauri, eo se deuri. ⁴⁵ Ia abo i lau, maenayao earua baaea haligigilabui i

laedi se lulau tau wa boeana eai, se miahai: lahinae tau wa ena baaea i gagiri, ina huia ta mo ie lai. Teina isina baaeana ta abo hinage doha nei.”

⁴⁶ Moutuana wa aridi eai ma ribaribana, sinana eo ena tataoyao murimuri eai se totoro, bena se ribalau ia arinai. ⁴⁷ Tau esau ia i heriba i ene, “Sinam eo em tataoyao murimuri eai se totoro, si ene bena si ribalaowa.” ⁴⁸ Wau tau wa, tauheribana, arinana i heuio i ene, “Sinagu eai? eo egu tataoyao aidimodi?” ⁴⁹ Ia nimana i helelelaei ena heaheatayao aridi eai to i ene, “Hage sinagu eo egu tataoyao au itadi. ⁵⁰ Eai to eai Tamagu galewa eai gadohina i gadohiei egu tau ede, eo lougu ede, eo sinagu ede.”

13

Galewa basileiana riba eamueamuidi: uaua tauhesuruna Mk. 4.1-25; Lk. 8.4-18

¹ Nei asubenana ne Iesu numa i laugabaei, i dobi salagomgom eai i bawabigabiga. ² Moutuana lailai se oigogo ia arinai, arinai abo ie geru waga esau eai, ie bawabigabiga, moutuana lailai wa geregere eai se totoro. ³ Riba gamagaridi aridi eai i heribaparaboledi, i ene, “Tuma tauhesuruna ie lau i hesuruauri. ⁴ Ia ma hesuheruruna, tuma headi eda gegesina eai se beu to manu se laoma se aidi. ⁵ Headi malatetapari eai se beu, tano i teriteri, se ini heuheula, paana tano nige ie buluma, ⁶ mahana abo i dalasae i sinaidi, nige lamdi, arinai se wowoea. ⁷ Headi nurinuri boeadi eai se beu, nurinuri se ini se imaguidi. ⁸ Na, headi tano lolona eai se beu, abo se ua, headi sinau tatao-haligigi-si-mate, headi sinau tatao-haionasi-mate, headi tau-esega-i-mate-saudoudoi. ⁹ Ia beana eai i ataiei, abo i ataieididini.”

¹⁰ Heaheata se laoma, se ribalau ia arinai si ene, “Ue saha u heribaparaboledi ne?” ¹¹ Aridi eai arinadi i heuio i ene, “Galewa basileia sonogadi eamuyamuidi omi abina au ata, isi nige abina se ata. ¹² Eai to eai i abi enana hinage abo se mosei, enana abo se hegamagari; eai to eai nige i abi, enana begana abo se laeudoiei. ¹³ Arinai ede aridi eai ea heribaparaboledi: paana se itaita taba nige se ita, eo se ataiei taba nige se ataiei, eo nige se nuatui. ¹⁴ Riba peroveta Isaia i ribaei, aridi eai se hemamohoei, doha i ene,
‘Se ataiei, ataiena taba nige abina se ata:

se ita, itana taba nige se italobai.

¹⁵ Teina tatao ta nuadi se porohe,
beadi hinage se do’odo’o,
matadi se hegibudi;
ata huia esau matadi eai se italobai,
eo beadi eai se atailobai,

eo nuadi eai se nuatulobai,

e abo nuadi se buidi eo ea hemauidi.' (Is. 6.9-10).

¹⁶ Omi matamiu se lolo, paana ede se ita; beamiu hinage paana ede se ataiei. ¹⁷ Ea heribamiu mamohoi, peroveta eo laulaududurai tataodi gamagaridi edi gadosisi esega bena teina ginauri ta se itadi doha omi au itadi, to nige se itadi eo teina ginauri ta au ataiedi isi hinage bena se ataiedi, nige se ataiedi.

¹⁸ "Tauhesuhesuruna ena parable abo au ataiei. ¹⁹ Tau basileia ribana i ataiei, eo nige i nuatui, earua baaea abo i laoma riba wa se hesuru nuana eai i abihai i laei. Ia ede tuma se taru wa dohila gegesina eai. ²⁰ Ia malatetepari eai tuma i abidi, ia ede riba wa i ataiei, eo ie kode hinage: ²¹ Taiede iabom nige lamna, huia kuukuu mo ie dudu: e amamna eo baaea i hearodi riba wa debana eai, arinai abo nuana i beruberu. ²² Ia nurinuri boeadi eai tuma se taru wa ia ede riba wa i ataiei: tanoubu nuatudi, eo gogo gadosisidi boraboradi, riba wa arinai se hetaupurupuru, abo nige i ua. ²³ Na ia tano lolona eai uaua i abidi ia ede riba wa i ataiei, eo aniona i itayao: uaua gamagaridi abo i hemasarahadi, headi sinau tatao-haligigi-si-mate, headi sinau tatao-haiona-si-mate, headi tau-esega-i-mate-saudoudoi."

Abi eamuyamui helabuina: Sisanian sitona boeadi eai

²⁴ Parable esau hinage abo i heribadi, i ene, "Galewa basileiana doha ede tau esau tuma lolodi ena oea eai i lauhesuru. ²⁵ Tatao ma enodi ana waiunu i laoma sisanian sitona boeadi eai i hesuruauridi, abo ie lau. ²⁶ Tuma se kapokiarima, e abo sisanian se taumasaraha hinage. ²⁷ Numa tanuagana ena heaheari tataodi se laoma se ribalau ia arinai si ene, 'Taubada e, em oea eai tuma lolodi u umaidi e nige'e wa? sisanian ne haedi se laolaoma?' ²⁸ I ribalau aridi eai i ene, 'Waiunu esau ena laulau meta.' Ena heaheari wa se ribalau ia arinai si ene, 'U ene edoha, abo ai lau sisanian ai laahaidi wa?' ²⁹ I ene, 'Nige'e, ata sisanian wa au laahaidi sitona hinage au laaesegaidi. ³⁰ Se ini labulabui i lau e se suna: aiiai ena huia suna eai abo tauabidi ea heribadi ea ene, 'Sisanian au tanogogo bagunaedi au auaugogoidi au gabudi: sitona wa egu sanara eai au peiauridi.' "

Abi eamuyamui hehaionana: sinapi uauana

Mk. 4.30-32

³¹ Parable esau hinage i heribadi i ene, "Galewa basileiana doha ede sinapi tumana esega, tau esau ie abi, to ena oea eai i umai. ³² Tuma gamagaridi iabom i gagiri ariri: taiede i ini lailai, abo oeagi gagiridi i tubuhemuridi, doha i hemala oeagi lailai, malagaibu manudi se laoma se toalau lagana eai."

*Abi eamuyamui hehasina; yeast**Lk. 13.20-21*

³³Parabole esau hinage i heribadi i ene, “Galewa basileiana doha ede yeast, sine esau i abi, falawa nonoi haiona boeadi eai i toreyamui, e abotai abo ie seseohi.”

³⁴Teina ginauri gamagaridi parabole eai Iesu ie ribalau moutuana aridi eai: nige riba udoi, i ribaparabole mo. ³⁵Peroveta i ribaei bena arinai se hemamohoiei si ene, “Parabole eai, awagu abo ea dabari: riba headi eamuyamuidi tanoubu huia hetubuna eai wa abo ea ribaedi.” (Psa. 78.2).

Abi eamuyamui helabuina se riba hasahasai.

³⁶Iesu moutuana i hetamaridi se lau, abo i awasae numa alona eai: ena heaheatayao se laoma ia arinai si ene, “Parabole sisania oeana eai wa u riba-hemasarahayama.”

³⁷Ia abo i ribalau isi aridi eai i ene, “Ia tuma lolona i hesuru wa ia ede Tau Natuna. ³⁸Oeana ede tanoubu: tuma lolodi basileia nanatunayao ede: sisania isi ede tau baaea nanatunayao. ³⁹Waiunu tauhesuhesuruna ia ede diaboloo: na ena huia suna tanoubu ena abalautom: na tau-tanogogoi ede aneru. ⁴⁰Sisania se tanogogoidi eo se gabudi oeagi alalasina eai: tanoubu ena huia lautom abo doha ede nei. ⁴¹Tau Natuna ena aneru abo i hetamaridi, ena basileia eai ginauri gamagaridi se baaea, eo isi se laulaubaaea hinage, abo se tanogogoidi se gabaedi; ⁴²se gabalaedi oeagi alaalasina boeana eai: nei eai se doudou, eo moadi se taburuyahisidi. ⁴³Nei huiana ne laulau dudurai tataodi Tamadi ena basileia eai abo se namanamari doha mahana. Ia beana eai i ataiei, abo i ataieididini.

Abi eamuyamui hehaligigina gogo se toreyamui:

⁴⁴“Galewa basileiana hinage doha ede gogo esau i tauyamui oea eai, tau esau i lobai, abo i toreyamui, ma nualolona i lau ena ginauri gamagaridi i une gabaedi, abo oea wa ie une.

Abi eamuyamui hehaligigi-esegana: giniuba.

⁴⁵“Galewa basileiana hinage doha ede tau uneune esau, giniuba matamatapoudi i eoidi. ⁴⁶Esau abo i lobai maisana i lai ariri, i lau ena ginauri mauidi i unegabaedi, abo matapou wa ie une.

Abi eamuyamui hehaligigi-labuina: hiana.

⁴⁷“Galewa basileiana hinage doha ede hiana, gabogabo eai se galaei, hari eama, hari eama gamagaridi se toaidi: ⁴⁸ie monau, abo se gomosaei geregere eai; se bawa, lolodi abo se usaidi odi alodi eai, baaedi abo se gabaedi. ⁴⁹Tanoubu ena huia lautom ia ede doha nei: aneru abo se laoma laulau-baaea tataodi laulau-dudurai tataodi se pei labuidi. ⁵⁰Abo se

gabalaedi oengi alaalasina boeana eai: nei eai se doudou, eo moadi se taburuyahisidi.”

⁵¹ Iesu i ribalau isi aridi eai, i ene, “Teina riba gamagaridi aniodi au itadio wa?” Ia se heriba si ene, “E.” ⁵² Abo i ribalau isi aridi eai i ene, “Arinai tauuriuri gamagaridi se hemala galewa basileiana ena heaheatayao, isi doha numa tanuagana, ena gogo aridi eai ginauri harihariudi eo ginauri beabead i hemasarahadi.”

Iesu i uio Nasareta eai: se otaotaeuioi
Mk. 6.1-6; Lk. 4.16-32

⁵³ Iesu nei parabole ne i riba lautom abo i laugabaedi. ⁵⁴ Ia abo ie lage ena eanua tahunuana eai, edi sunago eai abo i lauheataedi, arinai se noo ariri, si ene, “Tau ta teina sonoga ta haedi i lealeama, eo teina laulau gigiboridi ta? ⁵⁵ Teina kamda natuna, e nige’e wa? Ia sinana ede Maria, e nige’e? Ena tataoyao ede Iamesi, eo Iose, eo Simona, eo Iudasi, e nige’e? ⁵⁶ Ia lounayao hinage gamagaridi maedi ta miamia esega wa, e nige’e? Teina tau ta ginauridi ta haedi i abiabidima?” ⁵⁷ Isi ia abo se ouyalayalaei. Na Iesu abo i ribalau aridi eai, i ene, “Peroveta se heasisiei, ena eanua tahunuana eai mo nige’e, ena numa eai mo nige’e.” ⁵⁸ Nei eai laulau gigibori nige i ginauri hegagamari paana ede ia nige se sunusunumaei.

14

Heroda nuana i ipeipesi: Ioane Bapatiso se unui wa
Mk. 6.14-29; Lk. 9.7-9

¹ Nei huiana ne Heroda tetarake, Iesu wasana lailai i ataiei. ² Ia ena heaheariyao i heribadi, i ene, “Ina ta Ioane Bapatiso ede; ia mate eai i torouio, arinai ede laulau gigiboridi ta i hemasarahadi.” ³ Nabada wa Heroda Ioane i toaiyao, eo i auyao, abo i tutugudui numa masigiri eai, ana mata paana ede Herodia, ena tau Pilipo monena. ⁴ Ioane ia i heriba i ene, “Ia ue abi arinai laugagaeo u utusi.” ⁵ Ia Ioane bena i unui, na tatao gamagaridi i matausiedi, paana ede isi si ene ia peroveta. ⁶ Heroda edi huia labasina huiana eai, Herodia natuna siu ana taumana matadi eai ie saga, Heroda i henualolo. ⁷ Arinai abo Heroda i ribahesunumalaei ma aigorana, i ene, ena ginauri saha, saha i aibodaidi, abo i mosei. ⁸ Sinana siu wa i ribahasahasaiyao, arinai i ene, “Ioane Bapatiso uruuruna se usai gaeba eai u leama.” ⁹ Wasawasa abo nuana i baaea; paana mo i aigorayao, eo isi maenayao se aiaisega debadi eai, arinai i hetaladuidi. ¹⁰ I hetamaridi, Ioane numa masigiri eai gadona se tom. ¹¹ Ia uruuruna gaeba alona eai se leama se mosei siu wa arinai: ia abo i laei sinana arinai. ¹² Ioane ena heaheatayao se laoma eaibarabarana se laei, se tore, abo se lau Iesu se heriba.

¹³ Iesu wasana i ataiei, nei eai i gerugabaei, i lau malatupama eai: ena lau wa tatao se ataiei, eanua se laugabaedi, ia se lauwatai. ¹⁴ Iesu i lagema, moutuana lailai i itadi, i nuatoatoaidi, isi enadi tauasiasiebo i hemauidi.

Tausani haligigi se heaidi

Mk. 6.30-44; Lk. 9.10-17; Io. 6.1-14

¹⁵ I maimailahio abo ena heaheatayao se laoma ia arinai, si ene, “Malatupama ina, huiana i lauo: moutuadi ta u hetamaridi se laugorigori, se lau gougou headi aridi eai, aiai adi se uneune.” ¹⁶ Iesu i heribadi, i ene, “Se lau se saha: aiai adi au mosedi.” ¹⁷ Ia se heriba, si ene, “Ina ama falawa haligigi mo, eo eama labui.” ¹⁸ I ene, “Au ledima arigu eai.” ¹⁹ Moutuana wa i hetaladuidi se bawabigabiga lei potana eai. Falawa haligigi eo eama labui wa i abidi i itasae galewa eai i aihelahui, i ihidi, abo falawa wa i mosei ena heaheatayao aridi eai, isi abo se mosei tatao moutuana wa aridi eai. ²⁰ Isi gamagamagari se aiai, e bogadi se sese, mapuradi, se tanogogoidi bosa saudoudoi-labui se monau. ²¹ Isi tauaina nuana tatao tausani haligigi, sisine eo merumeru nige se hasiriesegaidi.

Iesu gabogabo potana eai i laulau: Petero ena sunuma gagirina

Mk. 6.45-56; Io. 6.15-21

²² Arinai abo Iesu ena heaheatayao i lauhesomdi bena waga eai abo se geru, se baguna hari sana awasi eai: ia moutuana lailai wa abo i hetamarigorigoridi. ²³ I hetamarigorigoridio abo i dalasae oea esau arinai, i lausuaara i lauuura; i maimailahi iabom nei eai. ²⁴ Waga wa gabogabo awaawasina eai wowori i hetahetaipiledi: mana i loaoa. ²⁵ Maiona boeana eai, mahana hasi, Iesu ie lau isi aridi eai, gabogabo potana eai ie lau. ²⁶ Ena heaheatayao ia se ita i laulau gabogabo potana eai, aruadi se loi, si ene earuyarua esau nei: se matausi, se eabayaba. ²⁷ Arinai Iesu i heribalaedi, i ene, “Nuamiu se taru: eau ede, tabu au matausi.”

²⁸ Petero ia arinana i heuio, i ene, “Guiiau e, taba oa ede, u ribama abo ea laowa gabogabo potana eai.” ²⁹ I ene, “U laoma.” Petero waga abo i pesagabaei, i laulau gabogabo potana eai, i lau Iesu arinai. ³⁰ Ia mana lailai ie ita i matausi: abo i sariri, ie eaba, i ene, “Guiiau e, u hemaoriguma.” ³¹ Arinai abo Iesu nimana i helelelaei, i abiisini, i ribalau ia arinai, i ene, “Oa nige u sunumaegu, ue saha nuam i ponoponousi?” ³² Isi abo se lage waga eai, mana wa ie motu. ³³ Isi waga taugeruina ia se aihelahui, si ene, “Mamohoi, oa Eaubada Natuna ede.”

³⁴ Isi abo se duna hari sana awasi eai, se lage Genesereta oeana eai. ³⁵ Nei eanua ne tataodi ia se nuatui, abo se lau hetamari se lau gougou gamagari aridi eai, tatao asiasiebo gamagamagari se laedi ia arinai. ³⁶ Isi ia se nuaoini bena ana lulu dedeana se abiita mo: gamagaridi hinage se abiitalaei abo se mauri.

15

¹ Tauuriuri eo Parisea headi, Ierusalemata tataodi, abo se laoma Iesu arinai, si ene, ² “Mumuga tataodi edi riba em heaheatayao se saha se utusidi? Isi aiai se ai nige se nima deuri.” ³ Iesu i ribalau isi aridi eai i ene, “Hinage aue saha emi riba mo aridi eai Eaubada ena laugagaeo au utusi? ⁴ Paana ede Eaubada i hetaladui i ene, ‘Tamam eo sinam u taubigaidi’ (Ex. 20.12) eo hinage i ene, ‘Ia ena tamana eo sinana i arina baaeaidi ia abo i mate’ (Ex. 21.17). ⁵ Omi au ene, ‘Taba esau, eo esau tamana eo sinana i heriba i ene, Ainaiuana, ginauri saha eo saha bena au abidi arigu eai wa, eo ⁶ tamana eo sinana nige i taubigaidi, i lolo hinage.’ Emi laulau mo aridi eai Eaubada ena laugagaeo au hetaupurupurudi. ⁷ Omi tataoboraborasom, Isaia i ribaperovetamamohoiemi, i ene: ⁸ ‘Teina tatao ta sopadi eai mo se hedebaseagu: isi nuadi se lausuaraaririegu.

⁹ Se aihelahu-gaibuigu mo,

tatao edi riba eo edi lau-gagaeo se laulauheataedi’ ”

(Is. 29.13).

¹⁰ Moutuana i eogalaedi i heribadi, i ene, “Au ataiei, eo au nuatui: ¹¹ Taba tau ginauri i toresaei awana eai taba nige i hebaaea: ginauri awana eai i lulagama meta tauhebaeana ede.” ¹² Ena heaheatayao se laoma ia arinai si ene, “U itayao teina riba ta Parisea se ataiei na se ouealayala?” ¹³ Ia i heribadi i ene, “Oeagi gamagaridi Tamagu nige i umaidi, abo se laahaidi. ¹⁴ Se otawa taumatagibugibu ma heledi taumatagibugibu se woeaidi. Taba taumatagibugibu ma helena taumatagibugibu i woeai abo se beulabulabui hua eai.” ¹⁵ Petero ia arinana i heuio i ene, “Teina parable ta u ribahasahasaimai.” ¹⁶ Iesu i ene, “Omi hinage ma nuapononomiu mo? ¹⁷ Sora nige abina aue ata ginauri esadi au toresaei awamiu eai se dobi bogamiu eai abo au tarugabaedi. ¹⁸ Nei ginauridi ne tau awana eai se lulagama nuana eai se tubuma: isi mo tau wa se hebaaea. ¹⁹ Paana ede nuatu baaeadi, eo aiainudi, eo ganaganawaridi, eo laulau niginigidi, eo aiayaharidi, eo ribaribagewadi, eo eaubada arinabaaeaina nua eai se saema. ²⁰ Teina ginauridi ta tau aba hebaeana ede; na taba aiai se ai mo nige se nimadeuri, meta tau aba hebaeana nige’e.”

Kanana sinena natuna siu se hemaui

Mk. 7.24-30

²¹ Iesu nei dimo ne i laugabaei, ie lau Turo eo Sidona edi teha eai. ²² Nei tehana eai ne Kanana sinena esau i laoma ia arinai i eabayabaei i ene, “Guiiau Davida natuna e, u nuatoa-toaiguma: natugu siu diabolo esau i heouyalayalaei.” ²³ Nige riba esau arinai sine wa arinana i heuio. Ena heaheatayao se laoma ia se nuaoini, si ene, “U aiduiei, i eabayabasom murida eai.” ²⁴ Isi arinadi i heuio i ene, “Se hetamariguma inai, boga Isaraela edi mamoe tautauyamui hesabadi mo.” ²⁵ Sine wa abo i laoma ia aena eai i gurisalaoba, i aiboda, i ene, “Guiiau e, u saguigu.” ²⁶ Iesu ia i heriba i ene, “Nige i dudurai merumeru adi falawa se abi se gabalaei kedewa aridi eai.” ²⁷ Ia abo i ene, “Guiiau e, mamohoi; taiede falawa mapuradi tanuagadi edi hatahata eai se beu, kedewa hinage se aiadi.” ²⁸ Iesu ia arinana abo i heuio i ene, “Sine e, em sunuma i lai ariri: ginauri wa u gadosisiei wa abo u abiheohi.” Arinai abo ia natuna wa i mauri.

Tatao moutuadi se hemauidi

Mk. 7.31-37

²⁹ Nei tehana ne Iesu i laugabaei, Galilaia gabogabona hanahanauna eai ie lage: abo i dalasae oea esau eai, nei eai i bawabigabiga. ³⁰ Moutuadi lailai se laoma ia arinai, tatao laulauaedi, eo tatao matagibugibudi, eo tatao unaunadi, eo tauaiiwalala, eo hari asiebo, hari asiebo gamagaridi, hinage se woeaidima Iesu aena eai se hebawadi, ia abo i hemauidi. ³¹ Arinai ede moutuadi wa se nooei, paana ede matadi eai tatao unaunadi se riba, eo tatao aiiaiwaladi se lolo, eo tatao laulauaedi se lau toditodi, eo tatao matagibugibudi matadi se lala: isi Isaraela edi Eaubada abo se hedebasae.

Tatao tausani hasi se heaidi

Mk. 8.1-9

³² Iesu ena heaheatayao i eogaidima, aridi eai i ene, “Moutuana ta ea nuatoatoaidi isi asubena haiona arigu eai se mia, nige adi aiiai: taba nige ea hetamaridi ma aiwesaridi, ata eda eai se aitu.” ³³ Ena heaheatayao se ribalau ia arinai si ene, “Ina malatupama eai ta, haedi aiiai gamagaridi abaabina, moutuana lailai ta abo ta hebogasesedi?” ³⁴ Iesu i ribalau isi aridi eai i ene, “Ami falawa wa hisa?” Si ene, “Haligigi-labui mo, eo eama gagiridi hisahisadi mo.” ³⁵ Moutuana i hetalauadi abo tano eai se bawabigabiga. ³⁶ Falawa haligigi-labui, eo eama wa i abidi, i aihelahui, i ihidi, ena heaheatayao aridi eai i mosedi, ena heaheatayao hinage se mosedi moutuana wa aridi eai. ³⁷ Isi gamagaridi se aiiai, e bogadi se sese: aiiai mapurana se tanogogoi, bosa haligigi-labui se usahemonaudi. ³⁸ Isi tauaina tatao tausani hasi,

sisine eo merumeru hinage nige se hasiridi. ³⁹ Moutuana abo i hetamaridi, ia abo ie geru, ie lau Magadala oeana eai.

16

Iesu Parisea i ribasuuidi

Mk. 8.10-12

¹ Parisea eo Sadukea hinage abo se laoma ia se nohoi, si ene galewa heiheinoina bena abo i heitadi. ² Ie ribalau isi aridi eai, i ene, “Maimailahi eai, au ene, ‘Abo i siwaro’: paana ede i aitala sabesabe. ³ Eo maratomtomo eai, au ene, ‘Wau ta abo ania i eabatutu’: paana ede ania i baaea. Omi tau boraborasom, galewa matana au nuatuiyao; na huiadi heiheinoidi abidi nige aue ata? ⁴ Isi baaeana, eo isi ganaganawarina heiheinoina se eooi; heiheinoina taba nige se mosei aridi eai, na Iona peroveta, ia heiheinoina mo.” Ia abo i laugabaedi, i lau.

Yeast heiheinoina Iesu i ribahasahasai

Mk. 8.13-21

⁵ Ena heaheatayao se duna hari sana avasi eai, adi falawa nuadi se huiedi. ⁶ Iesu i heribadi i ene, “Parisea eo Sadukea edi *yeast* au nuatui, au komakomanini.” ⁷ Isi se heunaboisaha si ene, “Ena riba paana ede falawa wa nige ta abidima. ⁸ Iesu edi nuatu i nuatuiyao, i heribadi, i ene, “Emi sunuma i gagiri, aue saha au heunaboisahausi, paana falawa nige au abidima? ⁹ Omi sora abina nige au ata, sora nige au nuatui hinage, falawa haligigi eo tatao tausani haligigi eo bosa hisa au hemonaudi wa? ¹⁰ Falawa haligigi-labui, eo tatao tausani hasi, bosa hisa au tanogogoidi wa? ¹¹ Aue saha nige au nuatui egu riba ta nige falawa ribana, Parisea eo Sadukea mo edi *yeast* bena au komakomanidi?” ¹² Arinai abo nuadi se taigari, falawa ena *yeast* wa nige i ribaei bena se komakomanini, Parisea eo Sadukea mo edi laulauheata.

Petero Iesu i riba wasawasaei

Mt. 16.13-20; Mk. 8.27-37; Lk. 9.18-22; Io. 6.68-69

¹³ Iesu Kaisaria Pilipi ana siga eai i laoma, i oimurilau ena heaheatayao aridi eai, i ene, “Eau, Tau Natuna, tatao si ene eau eai?” ¹⁴ Si ene, “Headi si ene Ioane Bapatiso eo headi si ene Elia, headi hinage si ene Ieremia, e peroveta wa esau.” ¹⁵ I ribalau aridi eai, i ene, “Omi au ene eau hede eai?” ¹⁶ Simona Petero ia arinana i heuio i ene, “Oa Keriso Eaubada maumaurina Natuna.”

Ekalesia se riba hetubu.

¹⁷ Iesu i ribalau ia arinai i ene, “Simona Ba-Iona e, oa u lolo! Teina ta buluma dobilana eai nige se hemasaraha arim eai, na Tamagu mo galewa eai ie mia, teina ta i hemasaraha arim eai. ¹⁸ Ea heribam ta hinage, oa Petero, teina we’u ta potana

eai egu ekalesia abo ea hetoro; mate gigiboridi taba nige se heguri. ¹⁹ Galewa basileia kina abo ea lediwa saha eo saha tanoubu eai ta u audi, galewa eai hinage abo se audi: saha eo saha tanoubu eai ta u eairihaidi, galewa eai hinage abo se earihaidi.” ²⁰ Ia ena heaheatayao awadi abo i tawaidi isi tabu tau esau se heriba si ene ia Iesu, Kerisona.

*Keriso, ia ena mate, eo ena tarouio i ribamaodai
Mk. 8.31-38; Lk. 9.22-27*

²¹ Nei huiana ne Iesu ena heaheatayao i ribahasahasain-onohaidi, ia abo i lau Ierusalem eai, babada eo kohena babadadi, eo tauuriuri tataodi nimadi eai baaea gamagaridi abo i hearodi, abo hinage se unuhemate, na asubena hehaionana eai abo i torouio. ²² Petero Iesu abo i laehesuara, ia i ribasuui, i ene, “Guiau e, Eaubada matana eai taba nige’e! meta taba nige u hearodi.” ²³ I sinibui i ribalau Petero arinai, i ene, “Oa Satani, u lau murigu eai, u guduguduigu ta, Eaubada ena nuatu nige u nuatuidi, tatao edi nuatu mo u nuatuidi.”

²⁴ Iesu abo i ribalau ena heaheatayao aridi eai, i ene, “Ena tau esau bena i hemuriwataigu, iabom i nuagabaeuioi, ena satauro i abiisini, i lau wataigu. ²⁵ Taba esau bena i mauri, ia maurina i nuatugabaei: taba esau debagu eai ia maurina i nuatugabaei, mauri wa abo i lobai. ²⁶ Tau esau abo saha i abi, taba tanoubu ginauridi i abiheohidi, ia nuana mo abo i mate? Eo aisana abo i mosei ia maurina maisana? ²⁷ Tau Natuna Tamana ana tepo saesaena eai abo i laoma, eo maena aneruyao hinage, tatao gamagaridi, esau eo esau se lolo, e se baaea, abo i hemaisadi, i hegonoahidi.

*Iesu matana se ori: basileia wa tautauna se heitadi
Mk. 9.2-13; Lk. 9.28-36*

²⁸ Mamohoi ea heribamiu ta, headi inai se totoro, mate sora taba nige se hearo, i lau e Tau Natuna se ita ena basileia eai i laoma.”

17

¹ Asubena haligigi-esega se ohi, Iesu Petero eo Iamesi, eo ena tau Ioane i woeaudioiedi, se sae oea deba pogana eai. ² Isi matadi eai ie ori: ana ao udoi, matana i namanamari doha mahana, eo ana lulu se posiposi, doha marana. ³ Arinai abo Mose, eo Elia se taumasaraha maedi se ribariba. ⁴ Petero i ribalau Iesu arinai, i ene, “Guiau e, i lolo inai mo ta mia: ena u henua apa haiona inai ta abidi: esau enam, esau Mose enana, eo esau Elia enana.” ⁵ Ina doha ena ribariba, abo eada namanamarina esau i poiitawaidi: arina esau eada boeana eai laoma i ene, “Natuyogoyogoigu ede teina, nuagu i helolo; ia au ataiei.” ⁶ Heaheatayao riba wa se ataiei, se guridobi se debatutu tano eai, se matausi ariri. ⁷ Iesu abo i laoma i

abiisinidi, i ene, “Au torohai, tabu au matausi.” ⁸ Isi matadi se helabaisinidi, nige tau esau se ita, Iesu mo iabom.

⁹ Abo oea eai wa se leta se dobi, Iesu awadi i tawaidi, i ene, “Wau ginauri wa tabu tau esau au heriba, i lau e, Tau Natuna mate eai se heterouioi.” ¹⁰ Ena heaheatayao se oimurilau ia arinai si ene, “Tauuriuri se saha si ene Elia taba i lagebagunama?” ¹¹ Iesu i ribalau isi aridi eai i ene, “Mamohoi, Elia abo i lagebagunama, abo hinage ginauri gamagamagari i heharihariudi. ¹² Na ea heribamiu ta, Elia i lagenonohamao, ia nige se nuatui, ia arinai, edi nuatu aisana, aisana se lauwataiyao. Doha ede hinage Tau Natuna abo nimadi eai se heamamna.” ¹³ Ena heaheatayao se nuatui Ioane Bapatiso ribana wa i heribadi.

Tauheaheata se beruberu, Keriso i gigibori

Mk. 9.14-29; Lk. 9.37-43

¹⁴ Abo se lulage moutuana aridi eai, tau esau i laoma ia arinai, i turibono, i ene, ¹⁵ “Guiau e, natugu tau u nuatoatoai: i auaulea, eo amnana i baaea ariri: huia gamagari ie guri oeagi alaalasina eai, eo huia gamagari i beu goila eai. ¹⁶ Ea woeaiama em heaheatayao aridi eai bena se abihemaui, nige abina se ata.” ¹⁷ Iesu arinana i heuio i ene, “Omi isi ta au supusupu, eo au awayagara, huia lohaloha eau maemiu wa? eo huia lohaloha ea taubigaimiu wa? Ia au woeaiama arigu eai.” ¹⁸ Iesu demoni i ribadebapogai, abo i lulage murimuri eai: gama wa nei awa ne arinai abo i mauri. ¹⁹ Ena heaheatayao abo se laumahimahihi se lau Iesu arinai, si ene, “Ie saha aiduiena nige abina ai ata?” ²⁰ Iesu i ribalau isi aridi eai i ene, “Paana nige au sunuma adidiri: mamohoi ea heribamiu ta ena emi sunuma au abi doha sinapi tumana esau, abo au ribalau teina oea ta arinai au ene, ‘U lau nei dimo eai,’ abo hinage i lau: taba nige ginauri esau abo au hekau. ²¹ Teina doha uura eo aiudi aridi eai mo ta aiduiedi.”

Iesu ia ena mate eo ena torouio i ribamaodaiuiioi

Mk. 9.30-32; Lk. 9.43-45

²² Isi se oioigogo Galilaia eai Iesu i ribalau aridi eai i ene, “Tau Natuna tatao nimadi eai abo se heabimosei. ²³ Arinai abo ia se unui, asubena hehaionana eai abo se heterouioi.” Ena heaheatayao se nuadubu ariri.

Laulau gigibori: takisi

Mk. 12.13

²⁴ Se lage Kaperenauma eai takisi monina taupeigogoi se laoma Petero arinai, si ene, “Ami tanuaga takisi hinage abo i tore?” ²⁵ I ene, “E.” Ia i awasaema numa-alo eai Iesu i riba baguna i ene, “Simona e, em nuata saha? Tanoubu wasawasadi aidobudi aridi eai edi takisi monina se abi,

nanatudiyao mamohoi aridi eai, e hari dodoga aridi eai?”
²⁶ Petero i ene, “Hari dodoga aridi eai.” Iesu ia i heriba i ene, “Mamohoi, nanatudiyao mo nige’e. ²⁷ Taiede, ata ta henuaponoponodi, u lau gabogabo eai auri u tudobei, em eama u atuibagunai u abi: awana u gasi, moni esega abo u lobai: meta u laei u mosei aridi eai, enagu, eo enam.”

18

Gugua: riba paana merumeru gagirina

Mk. 9.33-37; Lk. 9.46-48

¹ Arinai abo ena heaheatayao se laoma Iesu arinai si ene, “Galewa basileiana eai, eai, abo i sae ariri?” ² Iesu merumeru gagirina esau i eogai, i hebawa boeadi eai. ³ I ene, “Mamohoi, ea heribamui ta, ena nuamui nige au buidi, eo ena nige au hemala merumeru gagiridi hinage, galewa basileiana taba nige au lusora arinai. ⁴ Taba esa, eo esa, i nuatudobidobiui doha ina merumeru ta, ia abo i sae ariri galewa basileiana eai.

⁵ “Ena eai eo eai, esau doha ina merumeru gagirina ta esagu eai i oiama, iaede i oiamigu hinage. ⁶ Teina merumeru gagiridi tausunumaegu wa eai eo eai esau i healabesibesi, i lolo taba we’u lailai ia gadona eai se au, abo se heputuhai gabotum eai.

⁷ “Kapore tanoubu, paana aba-alabesibesina: alabesibesi taba se tubu, abo ahani tau wa arinai alabesibesi se tubu, kapore ia! ⁸ Arinai ena nimam e aem se healabesibesim, u tomhaidi, u gabaheuaradi, i lolo ma laulaudaem eai, eo ma nimakuukuum eai, mauri u abi, ena nimam labui eo aem labui se tudobem oegi alaalasina boeana eai, i lau e nige nosina. ⁹ Eo ena matam i healabesibesim u lamohai, u gabaheuara: i lolo matam esega mauri u abi, ena matam labui abo se tudobem gehena oegi alaalasina eai.

¹⁰ “Au komakomanimui, merumeru gagiridi tabu esau au isuewaei: ea heribamui ta, galewa eai isi anerudi Tamagu galewa eai ia matana huia gamagari se ita.

Mamoe i taueamui: Guiau taueooina.

Lk. 15.3-7

¹¹ “Tau Natuna i laoma isi se tautauyamui bena i hemauridi. ¹² Emi nuatu au ene edoha? Tau esau ena mamoe tatao-haligigi-se-mate, esega ie gege, tau wa mamoe tatao-hasi-se-mate-saudoudoi-haligigi-hasi i laugabaedi, e nige’e wa, esau ie gege wa oea tupina eai i eooi? ¹³ Mamohoi ea heribamui ta wau mamoe wa taba ena i lobai, arinai abo i kode ariri, mamoe tatao hasi-se-mate-saudoudoi-haligigi-hasi nige se gege wa, nige i kodedaoiedi. ¹⁴ Doha ede Tamamui galewa

eai ena nuatu i ene, Teina merumeru gagiridi ta tabu esau i tauyamui.

¹⁵ “Hinage ena em tau i hebaaeam, u lau ia arinai, ia eo oa, omibom mo, abo ena baaea u ribahasahasai: ena em riba i ataiei, em tau u hebiga.

Ekalesia maraitom-asubena edi abahedudurai.

¹⁶ Ena nige i ataiei, tau esega, e tatao labui maemyao au lau, tauribataubiga tatao labui, e haiona awadi eai riba gamagaridi se hemamohoi. ¹⁷ Ena edi riba hinage i awayagaraei abo ekalesia u heribadi: ena ekalesia edi riba nige i ataiei, taiede, nuam eai i hemala etene, eo i hemala telona. ¹⁸ Mamohoi ea heribamui ta, saha eo saha tanoubu eai ta au audi, galewa eai hinage abo se audi: saha eo saha tanoubu eai ta au eairihaidi, galewa eai hinage abo se eairihaidi. ¹⁹ Arimui eai ea ribauioi ta, ea ene, ena taumi labui tanoubu eai, nuamui lelana esega ginauri esana au aibodai, Tamagu galewa eai abo i leawa. ²⁰ Ena labui, haiona, taba se oigogoesega eau esagu eai, eau metai isi boeadi eai.”

Ribagigiri laugagaeona

Lk. 17.3, 4

²¹ Petero abo i laoma ia arinai i ene, “Guiau e, egu tau mahisa i hebahebaeagu, eo ena baaea ea nuatugabaei? Mahaligigi-labui?” ²² Iesu i heribalaei i ene, “Ea heribam ta nige ma-haligigi-labui mo: ea ene ma-tatao-haiona-se-mate-saudoudoi-haligigi-labui.

²³ “Galewa basileiana doha ede eanua wasawasana esau ena tatao paisoa edi buka ginauridi i hesioidi. ²⁴ I lau hesioidi, abo esau i laoma ia arinai, ana haghaga taleni tausani saudoudoi nige i hemaisadi. ²⁵ Ia nige ena gogo, arinai tanuagana i lauhesomdi tau wa se une, monena hinage, eo nanatunayao. eo ena ginauri gamagaridi, wau maisana wa. ²⁶ Taupaisoa wa i guridobi ia i tabaohui i ene, ‘Guiau e, agutoi, sora nuam i taru abotai abo ea hemaisaheohidi.’ ²⁷ Tanuagana taupaisoa i nuatoatoai, abo i eairigabaei, eo ena buka wa i hedudurai mo. ²⁸ Wau taupaisoa wa, ie pesa murimuri eai, helena taupaisoa esau i lobai * denari tatao-haligigi-se-mate i mosehaghagaidi: ia i toai, gadona i lamosi, i ene, ‘Am haga wa maisadi u ledima.’ ²⁹ Helena taupaisoa i guridobi aena eai, i ribagadogadora ia arinai i ene, ‘Sora nuam ie taru abotai abo ea hemaisaheohidi.’ ³⁰ Ia nige i ataiei i lau i heduiahalai numa masigiri eai, i lau e ana haga wa i hemaisadi. ³¹ Helena taupaisoa tataodi wau laulau wa se ita nuadi se baaea ariri, se laoma ginauri gamagaridi adi

* 18:28: Nonoina eda moni eai doha shilling esega.

tanuaga wa se heriba. ³² Ana tanuaga ia i eogai i ribalau ia arinai i ene, ‘Oa taupaisoa baaea e, am haga wa gamagaridi ea nuatugabaedi paana ede u awanorigu. ³³ Helem taupaisoa hinage ue saha ia nige u nuatoatoai, doha hinage eau ea nuatoatoaim ta?’ ³⁴ Ana tanuaga i ouealalayalaei abo i moselaei tauheamamna aridi eai i lau e ana haga i hemaisaheohidi. ³⁵ Hinage nei doha, Tamagu galewa eai abo i abi omi arimiu eai, esa to esa, ena nuam eai em tau ena baaea, esau eo esau, nige u nuatugabaedi.”

19

Iesu Iudea eai i miamiaiuio.

¹ E, abotai Iesu wau riba wa i ribalautom, Galilaia i laugabaei, abo i laoma Iudea ana sigasiga eai, Ioridano hari teha eai. ² Moutuadi lailai ia se hemuriwatai: nei eai i hemaauridi.

Inawasei ribana Iesu i ribaei

Mt. 5.31, 32; Mk. 10.1-12; Lk. 18; 1 Kor. 7.10-15

³ Parisea hinage se laoma ia arinai, ia se nohoi, se ribalau ia arinai si ene, “Laugagaeo si ene edoha, tau, hari mata hari mata aridi eai, monena abo i inavasei, e nige’e?” ⁴ I ribalau aridi eai i ene, “Omi nige au hasiri si ene ia wa huia hetubudi eai i ginauridi, tau eo sine i ginauridi. ⁵ Eo i ene, ‘Arinai ede tau tamana eo sinana abo i laugabaedi, abo i patulau monena arinai: isi taudi labui abo bulumadi esega mo?’ ⁶ Arinai isi labui nige’e, isi buluma esega mo. Arinai ede, saha Eaubada i hepatuesegai tabu tau esau i abihesaradi.” ⁷ Isi ia si heriba si ene, “Na Mose ie saha i lauhesomdi i ene, inawasei pepana se abi abo sine wa i inawasei?” ⁸ Ie ribalau aridi eai i ene, “Nuamiu se oiura ariri, arinai Mose ie eari, monemiuyao abo au inawasedi: na huia bagubaguna eai wa nige doha nei. ⁹ Hinage ea heribamiu ta, ea ene, eai eo eai monena i inawasei sine esau abo i tawasorai, ia i ganawari: eo eai eo eai sine se inawasei wa i tawasorai, ia hinage i ganawari. Taba sine i ganawari, taiede, taba se inawasei.”

¹⁰ Ena heaheatayao ia se heriba si ene, “Ena tau monena arinai doha nei, tawasora nige i lolo.” ¹¹ Ia i heribadi i ene, “Tatao gamagari nige abina se ata riba ta se abi, isibom mo enadi, aridi eai se mosei. ¹² Headi sinadiyao bogadi eai isi eunauka: headi tatao se heeunaukadi: headi hinage, galewa basileiana debana eai isibom nuadi se eunauka. Taba esau abina i ata riba ta i abi, abo i abi.”

Merumeru gagiridi Iesu i oiamidi eo i awaloloedi

Mk. 10.13-16; Lk. 18.15-17

¹³ Abo merumeru gagiridi se woeaidima ia arinai bena nimana i toresaedi potadi eai, eo i lau-uura: na ena hea-heatayao se ribamataedi. ¹⁴ Iesu i ene, “Merumeru gagiridi au eari se laoma arigu eai, tabu au guduguidi: galewa basileiana doha isi ede.” ¹⁵ Nimana i toresaedi potadi eai, nei dimo ne abo i laugabaei.

*Tanuaga hewari esau ribana, ia monamonaune tauna
Mk. 10.17-30; Lk. 18.18-30; Lk. 10.25-30*

¹⁶ Esau abo i laoma ia arinai i heriba i ene, “Tauheaheata lolona e, laulau lolona esana abo ea abi, arinai abo ea mauri nige nosina?” ¹⁷ Ia i heriba i ene, “Ue saha u awanorigu? Nige esau i lolo, esega mo, ia ede Eaubada: taba u ene bena u lage mauri boeana eai, laugagaao u sogohididini.” ¹⁸ Ia arinai i ene, “Aitea?” Iesu i, ene, “Tabu u aiunu, Tabu u ganaganawari, Tabu u aiayahari. Helem taumia tabu u hegirugaibui. ¹⁹ Tamam eo sinam u eogoeogoidi: eo Helem taumia u gadosisie i doha oabom u gadosisiuioim.” ²⁰ Hewari wa i ribalau ia arinai i ene, “Ma-hewarigu eai wa i laoma ina ta, teina ginauri gamagaridi ea nanabuheohidio: ginauri esana ea hedeha?” ²¹ Iesu i ribalau ia arinai i ene, “U henua u lolo esegaim u lau em gogo gamagaridi u unegabagabaedi, u mosedi gogogesagesa tataodi aridi eai: em gogo galewa eai abo se ota, abo u laoma u hemuriwataiguma.” ²² Na hewari wa, teina riba ta i ataiei, i lau-suara, i nuadubu ariri: paana ede ena gogo se gamagari ariri.

²³ Iesu abo i ribalau ena heaheatayao aridi eai i ene, “Mamohoi, ea heribamiu ta, taumonamonaune bena i lusora Eaubada ena basileia eai, i hetahetalaahi. ²⁴ Hinage ea heribauioimiu ta, ea ene, kamela taba i lusora diu gudana eai, taumonamonaune mo Eaubada ena basileia dobilana eai bena i lusora abo i ahi.” ²⁵ Ena heaheatayao ina riba ta se ataiei, se noo ariariri, si ene, “Taba nei doha, eai abo i mauri?” ²⁶ Na Iesu i ita lau aridi eai, abo i heribadi, i ene, “Tatao nige abina se ata: na Eaubada ginauri gamagamagari abidi ie ata.”

*Aposotolo edi abatoro maraitom-asubena basileiana eai,
Iesu i ribaei.*

²⁷ Petero arinana i heuio i ene, “Ai ginauri gamagamagari ai nuagabaedi, ai hemuriwataim: saha abo ai abi?” ²⁸ Iesu i ribalau isi aridi eai i ene, “Mamohoi ea heribamiu ta, omi au hemuriwataiguma wa, huihana eai ginauri se hetubuhar-ihariudi, Tau Natuna ma ana tepo i bawasae ena terona eai, omi hinage abo au bawasae terona saudoudoi-labui eai, Isaraela adi bogao saudoudoi-labui abo au heduduraidi. ²⁹ Tau esau, eo esau, numa i laugabaedi e, ena tataoyao e, lounayao e, tamana e, sinana e, monena e, nanatunayao e,

oea e, eau debagu eai, ginauri gamagaridi taba i abidi, eo mauri nige nosina hinage abo i abi. ³⁰ Na gamagaridi headi se bagubaguna abo se murimurita: eo isi se murimurita abo se bagubaguna.

20

Parabole: vine oeana tatao taupaisoa.

¹ “Galewa basileiana doha ede tau esau ia numa tanuagana, mara-tomtom eai abo i lau ena oea taupaisoaina i eoogogoidi. ² Taupaisoa headi maenayao nuadi lelana esega si ene asubena esega maisana denari esega, abo i hetamaridi, se lau ena vine gana alo eai. ³ Mahana hehaionana eai hinage abo i uio, headi i itadi se totoro gaibu mo abauneune baubauna eai. ⁴ Ie ribalau aridi eai i ene, ‘Omi hinage au lau vine gana alo eai, maisana duduraina abo ea lediwa.’ Arinai isi abo se lau. ⁵ Hinage mahana doha hehaligigi-esegana, eo mahana hehaligigi-hasina eai, ie uio, ena laulau esega mo nei doha. ⁶ Eo mahana doha hesaudoudoi-esegana eai abo i uio, headi hinage i itadi se totoro gaibu mo, ie ribalau aridi eai i ene, ‘Aue saha au totoro gaibu mo inai asubena lohaloha ta ie ohi?’ ⁷ Ia se heriba si ene, ‘Nige tauhepaisoamai.’ I ribalau aridi eai i ene, ‘Omi hinage au lau vine gana alo eai.’ ⁸ I maimailahi, vine oeana tanuagana tautawataina i heriba i ene, ‘Tatao paisoa u eogaidima, edi maisa u mosedi, u hetubu taumurita aridi eai, i lau e taubaguna aridi eai.’ ⁹ Isi mahana doha hesaudoudoi-esegana eai se eogaidi wa se laoma, esa, eo esa, ena denari esega i abi. ¹⁰ Isi taubagubaguna wa se laoma, edi nuatu si ene enadi abo se helai; isi hinage denari esega esega mo se abi. ¹¹ Isi se abiyao, numa tanuagana abo se gadigadiguguei, ¹² si ene, ‘Teina ta taumuritama, mahana esega mo se paisoa, na u hemaisadi u heaigonogonoaimai, ai ai paisoa asubena lohaloha, eo mahana gigiborina eai.’ ¹³ Tau wa arinana i heuio i ene, ‘Ehagu e, nige ea boraim, taoda labui ta oiribao, e nige’e, ta ene denari esega mo?’ ¹⁴ Enam me u abi, u lau em abalau eai: teina taumurimurita ta abo ea mosei doha hinage ea leawa. ¹⁵ Eaubom egu ginauri taba nuagu abo ea lauwatai e nige’e? Matam se baaea paana egu abi se lolo?’ ¹⁶ Taiede isi taumurimurita abo se bagubaguna, isi taubagubaguna abo se murimurita: gamagaridi se eogaidi, hisahisawaidi mo se abihilehileidi.”

Iesu ia ena mate eo ena torouio i ribauio

Mk. 10.32-34; Lk. 18.31-34; Mt. 12.38-45; 16.21-28; 17.22,

23

¹⁷ Iesu i sae Ierusalem, dohila eai ma launa heaheata saudoudoi-labui i woeahesuaradi, i heribadi, ¹⁸ i ene, “Ta sae Ierusalem eai: Tau Natuna abo se heabimosei kohena

lailaidi eo tauuriuri nimadi eai, abo se hegirunonohai abo i mate. ¹⁹ Ia abo se mosei Murimuri-tataodi nimadi eai, abo se talatalawasiei, eo se pidiri, eo se hesatauro: asubena hehaionana eai abo i torouio.”

Iesu ia ena mate eo ena torouio i ribauio
Mk. 10.35-45

²⁰ Sebedaiio nanatunayao sinadi, nanatunayao labui mae-nayao abo se laoma Iesu arinai, i tabaohu ia arinai, ginauri esau i aiboda-gadogadolaei. ²¹ Iesu i ribalau ia arinai i ene, “Saha u henua?” Ia arinai i ene, “Em basileia eai, taba u riba, nanatuguyao labui ta esau nimatutum eai i bawa, eo esau nimaseuseurim eai.” ²² Iesu i heuio i ene, “Au aiboda gaibu, nige au nuatui. Bia wa ea nonom ta, omi abina au ata au nom, eo bapatiso arinai se hebapatisoigu abo hinage se hebapatisoimiu wa?” Ia se heriba si ene, “Gonoamai.” ²³ Ia abo i heribadi i ene, “Mamohoi egu bia wa abo au nom, bapatiso arinai se hebapatisoigu abo omi se hebapatisoimiu hinage: na nimatutugu eai se bawa, eo nimaseuseurigu eai, meta eau enagu nige’e, bena ea mosegaibui mo: headi, isibom enadi Tamagu i abinonohaiyao.” ²⁴ Saudoudoi wa se ataiei, taudi labui wa se ouyalayalaedi. ²⁵ Iesu i eogaidi i ene, “Au itayao Murimuri-tataodi edi wasawasa tatao se lauhearidi, eo isi tatao babadadi hinage se lauhesomdi. ²⁶ Tabu omi doha nei: esa, eo esa bena i saetawatawaimiu, ia abo enamiu taupaisoa eai i lau. ²⁷ Taba esa, eo esa bena abo emi bada, ia abo enamiu tauheaheari eai i lau. ²⁸ Doha hinage Tau Natuna nige i laoma bena ia se bobodiei, iabom mo tatao i bobodiedi, eo ena mauri i torehebiga tatao gamagaridi maisadi.”

Tatao matagibugibu labui matadi se helaladi
Mk. 10.46-52; Lk. 18.35-43

²⁹ Ieriko se laugabaei moutuana lailai ia se hemuriwatai. ³⁰ Taumatagibugibu labui se babawa dobila hasarina eai, isi wasana se ataiei Iesu i baeawaidi, se eogalau ia arinai si ene, “Guiau e, oa Davida natuna e, u nuatoatoaimai.” ³¹ Moutuana wa se ribasuuidi si ene, “Au monou:” na se eogalailai si ene, “Guiau e, oa Davida natuna e, u nuatoatoaimai!” ³² Iesu abo i tarutoro i eogalau aridi eai, i ene, “Omi nuamiu saha, abo ea sahaimiu?” ³³ Si ene, “Guiau e, bena matamai se lala.” ³⁴ To Iesu i nuatoatoaidi matadi i abiitadi: matadi ma-esega abo se lala, abo ia se hemuriwatai.

21

Wasawasa tatao gamagaridi matadi eai i laoma edi wasawasa

Zech. 9.9; Mk. 11.1-10; Lk. 19.29-38

¹ Isi Ierusalema se hanahanau, Betepage eai se lage, Oliveta oeana eai, Iesu ena heaheatayao labui i hetamaridi.

² Aridi eai i ene, “Au lau meta eanua matamiu eai me, au lage asini esau se auiao abo au lobai, ma natuna hinage: au eairidi, au woeaidima. ³ Ena tau esau i ene saha eo saha, abo au ene, ‘Guiiau bena i abidi;’ ia ma esega abo i hetamaridi.”

⁴ Ina laulau gamagaridi se abidi, riba wa peroveta i ribaei wa abo se tubu, i ene ina doha.

⁵ “Omi, Siona natuna siu au heriba, au ene, Hage u ita, em Wasawasa i lagema arim eai, i bulobulou, asini potana eai ie bawa, iaede asini natuna.”

(Is. 62.11; Zech. 9.9).

⁶ Ena heaheatayao abo se lau, se abi doha Iesu i lauhesomdi wa. ⁷ Asini ma natuna se woeaidima, adi lulu se lauweise potadi eai, ia abo se hebawasae potana eai. ⁸ Moutuadi lailai adi lulu se lauweise dohila eai: eo headi oeagi lagadi se talahaidi hinage, se lauweiseauri dohila eai. ⁹ Moutuadi wa se bagubaguna, eo se murimurita, se eogayoga si ene, “Hosana, Davida Natuna arinai. Ia Guiiau esana eai i lagema i lolo! Hosana galewa iniinipuripurina eai.” (Psa. 118.25, 26). ¹⁰ Ia Ierusalema eai i lagema, eanua tataodi se taguguohi, si ene, “Ina ta eai?” ¹¹ Moutuana si ene, “Ina ede Iesu, ia Nasareta Galilaia perovetana.”

Iesu numa tabuna ma-helabuina i heaa.

Mk. 11.15-18; Lk. 19.45-47; Io. 2.13-16

¹² Iesu i awasae Eaubada ena numa tabuna alona eai, tauuneune gamagaridi i aiduiedi, eo moni tauuneheduhe-dudu edi hatahata i ahalabuidi, isi bunebune tauuneune edi abababawa hinage doha. ¹³ Ie ribalau aridi eai, i ene, “Si uriyao, ‘Egu numa esana abo se tore uura numana’ (Is. 56.7): numa wa omi aue abi i hemala tauaiaigirihai edi abaoigogo.” (Iere. 7.11).

¹⁴ Matagibugibu tataodi eo taulaulaudae se laoma ia arinai numa tabuna eai: ia i hemauidi. ¹⁵ Kohena lailaidi eo tauuriuri ena laulau gigiboridi se itadi eo, merumeru numa tabuna eai se eogayoga si ene, “Hosana, Davida Natuna arinai,” arinai nuadi se baaea ariri. ¹⁶ Eo se ribalau ia arinai si ene, “Edi ribariba ne u ataiei?” Iesu ie ribalau aridi eai i ene, “Hedeona; omi nige au hasiri, ‘Kaimou eo merumeru mado-madodi awadi eai aihelahui abo ea hemamohoi?’ ” (Psa. 8.2). ¹⁷ Ia abo i laugabaedi, ie lau eanua murimurina eai, ie lau Betania eai; arinai ie eno.

Suko nige aniona se hebaaea.

Mk. 11.12-14, 20, 24

¹⁸ Mara-ie-tom ie uio eanua, abo i guriam. ¹⁹ Kuhou esau, dobila hasarina eai ie ita; ie lage arinai, aiaina nige i lobai, lugu ahaahana mo, ie ribalau arinai i ene, “Tabu aiain i tore, i lau e, ana huia ana tasi.” Nige baeana kuhou wa abo i wowoea. ²⁰ Ena heaheatayao se ita se noo, si ene, “Kuhou wa nige eawalana i wowoeaohi!” ²¹ Iesu arinadi i heuio i ene, “Mamohoi ea heribamiu ta, taba au sunuma, eo nuamiu nige se labulabui, omi wau kuhou abiabina wa abo meta doha emi abiabi, eo hinage ena au ribalau teina oea ta tupina arinai, au ene, ‘U lau suara, se tudobem gabogabo eai:’ abo ie tubu. ²² Ginauri gamagamagari saha eo saha uura eai au aibodaidi ma sunumamiu, abo au abidi.”

Iesu se haiawaeagaraei

Mk. 11.27-33; Lk. 20.1-8

²³ Numa tabuna alona eai kohena lailaidi, eo eanua babadadi sora ma heaheatana na se lagema ia arinai, si ene, “Eai ena gigibori eai teina ginauri ta u ginauridi? Gigibori ta eai i leawa?” ²⁴ Iesu arinadi i heuio, ie ribalau aridi eai i ene. “Riba esau abo hinage ea hesio arimiu eai, enagu abo au ribama, abo hinage ea heribamiu teina gigiborina ta eai i leama. ²⁵ Ioane ena bapatiso haedi ie abi? galewa eai, e tatao aridi eai?” Isi se heunaboisaha si ene, “Ena ta ene galewa eai i dobima, abo i ene, ‘Ie saha hede nige au ataiei?’ ²⁶ Ena ta ene, ‘Tatao aridi eai,’ tatao ta matausiedi, paana tatao gamagaridi si ene Ioane ia peroveta.” ²⁷ Isi Iesu se heuio si ene, “Nige abina ai ata.” Aridi eai i ene, “Eau hinage nige ea heribamiu eai ena gigibori eai ina ginauri ta ea ginauridi.”

Parabole: tau nanatunayao labui.

²⁸ “Nuamiu au ene edoha? Tau esau ia nanatunayao labui: i laoma taubaguna arinai i ene, ‘Natugu e, wau ta u lau egu oea eai u paisoa.’ ²⁹ Ia arinana i heuio i ene, ‘Taba nige ea lau:’ abotai nuana ie bui, to abo ie lau. ³⁰ I laoma taumurita arinai hinage, ena riba esega mo. Ia arinana i heuio i ene, ‘Taubada e, abo ea lau,’ to nige i lau. ³¹ Taudi labui aitea tamana ena nuatu i lau watai?” Si ene, “Taubaguna.” Iesu ie ribalau isi aridi eai i ene, “Mamohoi, ea heribamiu ta ea ene, telona tataodi, eo laulau-baeaa sisinedi Eaubada ena basileia abo se lusorabagunaemiu. ³² Na, Ioane laulau-dudurai dobilana eai i laoma arimiu eai, eo ia nige au sunumaei: telona tataodi eo laulau-baeaa sisinedi ia se sunusunumaei, au itayao, to murina eai nuamiu nige au buidi, ia bena au sunumaei.”

Parabole: numa tanuaga ena vine oana aiaina i eooi

Mk. 12.1-9; Lk. 20.9-19; Is. 5.1-7

³³ “Parabole esau abo au ataiei: Numa tanuagana esau ena vine ganana i umai: i gana hetaiiri, vine abatomna ie

sara, numa siwasiwa ie abi, abo i mosei tatao paisoa aridi eai, ia abo i lau eanua esau eda lohaloha eai. ³⁴ Ena huia ua ie lage, ena heaheari tataodi i hetamaridi tatao paisoa wa aridi eai, oea wa aiaina bena se abidi. ³⁵ Tatao paisoa ena heaheari tataodi se toaidi, esau se pidiri, eo esau se unui, eo esau se lauwe'ui. ³⁶ Abotai abo ena heaheari tataodi gamagaridi headi i hetamaridi: edi laulau esega mo aridi eai. ³⁷ Murina eai ia natuna abo i hetamari aridi eai, i ene, 'Natugu abo se hemataei.' ³⁸ Tatao paisoa ia natuna se ita, se oioiriba si ene, 'Oea tanuagana ede ina; ehei ta unui, ena oea ta abo ta girihai.' ³⁹ Ia abo se toai, se gabadioi vine ganana murimurina eai, abo se unuhemate. ⁴⁰ Vine ganana tanuagana abo i laoma, wau tatao paisoa abo i sahaidi?" ⁴¹ Ia arinai si ene, "Tatao baabaaeadi meta abo i unuhematedi, ena oea abo i moselaei hari tatao paisoa aridi eai, isi abo oea aiaina edi huia eai, abo se mosei ia arinai."

⁴² Iesu i ribalau aridi eai, i ene, "Omi, uriuri eai nige au hasiri wa, si ene, 'We'u numa tauabidi se otaotaei, ia abo we'u tubeina eai ie lau: Guiau teina ie abi, ta itaitai, eo ta noonooei?'

⁴³ Arinai ea ribalaowa arimiu eai ta, ea ene, Eaubada ena basileia arimiu eai, abo se abiuioi, abo se mosei hari basileia tataodi enadi, isi aiaina mamohoina abo se mosei. ⁴⁴ Eai to eai ina we'u ta potana eai se guridobi abo se tamogorugoru: eai to eai ina we'u ta taba i saidi, abo i hesarurugorigoridi."

⁴⁵ Kohena lailaidi eo Parisea tataodi ena parabole se ataiedi, se nuatulobai isi adi riba. ⁴⁶ Ia bena se abilau se toai, moutuana se matausiedi, paana si ene ia peroveta.

22

Parabole: tawasora mataasina

Lk. 14.16-24

¹ Iesu arinadi i heuio i ribaparaboleuioidi i ene: ² "Galewa basileiana doha ede wasawasa esau ia natuna abo i hetawasora. ³ Ena heaheari tataodi i hetamaridi tatao i ribaedi se eogaidi bena se laoma tawasora eai: se awayagara, nige se laoma. ⁴ Ena heaheari tataodi headi i hetamariuioidi, i ene, 'Isi se ribaedi wa au heribadi, au ene, Agu ai ai abi-nonohaidi: egu bulumakau, eo egu suisui saraidi se unuidio, ginauri gamagaridi se abinonohaidio: au laoma tawasora arinai.' ⁵ Isi se alaliuliua edi dobila udoidi mo se lauwateridi esau i lau ena oea, esau i lau ena sitoa. ⁶ Tatao hisahisawaidi se mia, ena heaheari tataodi se toaidi se hebaaeaarriedi, eo se unuhematedi. ⁷ Wasawasa wa, wasana i ataiei, abo i ouyalayala: tauiala i hetamaridi, tauaiunu wa se unuidi,

edi eanua hinage se gabugorigori. ⁸ Abotai abo i ribalau ena heaheari tataodi aridi eai i ene, ‘Tawasora se abinonohaiyao, isi ea ribaedi wa nige se lolo. ⁹ Au lau dobila lailaidi eai, isi gamagaridi au lobaidi, au heribadi abo se laoma tawasora eai.’ ¹⁰ Heaheari wa abo se lau dobila lailaidi eai, isi gamagaridi se lobaidi se heoigogoidima, headi se baaea, headi se lolo: tawasora taumanana se gamagari.

¹¹ “Wasawasa wa i awasae numa alona eai taumana bena i itadi, na tau esau nei eai ie ita, ena hetahetawasora luluna wa nige i lui: ¹² Ie ribalau ia arinai i ene, ‘Ehagu e, ue saha u laoma inai hetahetawasora luluna nige u lui?’ Ia nige arinana. ¹³ Wasawasa abo i ribalau heaheari wa aridi eai, i ene, ‘Nimana eo aena au auauidi, au laehesuara, au gabadobei masigiri boeana eai: nei eai abo se doudou, eo moadi se taburueahisidi.’ ¹⁴ Na tatao gamagari se eogaidi, hisahisawaidi mo se abi hilehileidi.”

Herodiana tataodi edi riba Iesu i heuio.

Mk. 12.13-17; Lk. 20.20-26

¹⁵ Parisea tataodi abo se oioiriba edoha edi abiabina ena riba wa abo se hepiripiri. ¹⁶ Edi heaheatayao, eo Herodiana tataodi headi se hetamaridi ia arinai si ene, “Tanuagamai e, ai itayao oa u dudurai mo, eo Eaubada ena dobila mamohoina u lauheataei, nige tau esau hinage u matausiei, paana ede taumonamonaune eo taugogogesagesa mo u nuatuidi gonogonoadi. ¹⁷ U heribamai, em nuatu saha? Laugaga eo i lolo wa si ene takisi monina se mosei Kaisara, e nige’e wa?” ¹⁸ Edi baaea Iesu i nuatuiyao i ene, “Aue saha au nohoigu ta, omi tauboraborasom? ¹⁹ Takisi monina esau hage au heitagu.” Abo denari esega se leama ia arinai. ²⁰ Ie ribalau aridi eai i ene, “Eai ana ao ina, eo eai ena uriuri?” ²¹ Ia arinai si ene, “Kaisara enana.” Abo i ribalau aridi eai i ene, “Kaisara ena ginauri au laei Kaisara arinai, eo Eaubada ena ginauri au laei Eaubada arinai.” ²² Teina riba ta se ataiei se noonoei, ia se laugabaei se lau edi abalau eai.

Sadukea edi riba Iesu i heuio.

Mk. 12.18-27; Lk. 20.27-40

²³ Wau asubenana eai wa Sadukea tataodi, isi si ene nige torouiona, se laoma ia arinai se oimuri. ²⁴ Si ene, “Tanuagamai e, Mose i ene, ‘Taba tau esau ie mate ia nige nanatunayao, ena tau ia wabuna abo i tawasorai, natuna taba se labasi abo si ene tau mate wa natuna.’ (Du. 25.5). ²⁵ Arimai eai tatao haligigi-labui bogadi esega: taubaguna sine i tawasorai e ie mate, nige natuna, arinai wabuna wa i mosei ena tau ie hai. ²⁶ Helabuina hinage doha, eo hehaionana hinage, i lau e taiede hehaligigi-labuina wabuna wa i tawasorai. ²⁷ Murina eai sine hinage ie mate. ²⁸ Torouio huiana i lagema sine

wa, tataodi haligigi-labui aitea monena ede? Isi gamagaridi ia se abi.” ²⁹ Iesu arinadi i heuio, i ribalau aridi eai i ene, “Au ponori, uriuri nige abidi au ata, eo Eaubada ena gigibori hinage nige abina au ata. ³⁰ Torouio huiana eai nige se tawasora, eo nige se hetahetawasoraidi, na isi galewa eai doha Eaubada ena aneru. ³¹ Taumatemate se torouio ribana wa Eaubada i ribalaowa arimiu eai nige au hasiri wa, i ene. ³² ‘Eau Aberahama ena Eaubada, eo Isaako ena Eaubada, eo Yakobo ena Eaubada (Ex. 3.6)?’ Eaubada, taumatemate nige edi Eaubada, taumaumauri mo edi Eaubada.” ³³ Moutuana teina se ataiei, ena lauheatata se noonoei.

Parisea edi riba Iesu i heuio
Mk. 12.28-31; Lk. 10.25-28

³⁴ Parisea abo se ataiei ia Sadukea i ribahetuuridi, edi abaoigogo esega. ³⁵ Adi sagu esau, laugagaeo tauna, ia i hesiokamaliua, i ene, ³⁶ “Tanuagamai e, laugagaeo ribadi eai, aitea i saesae ariri?” ³⁷ Iesu i ribalau ia arinai i ene, “Guiau em Eaubada u gadosisie ma nuam i ohi, eo ma earuam i ohi, eo ma nuanuatum i ohi (Deut. 6.5). ³⁸ Teina laugagaeo ta i baguna, eo i sae ariri. ³⁹ Helabuina hinage doha ede. Helem taumia u gadosisie doha hinage oabom u gadosisiuioim (Lev. 19.18). ⁴⁰ Teina laugagaeo labui ta aridi eai laugagaeo gamagaridi, eo peroveta ribadi se heabasisaedi.”

Iesu Parisea i hesioidi
Mk. 12.35-37; Lk. 20.41-44

⁴¹ Parisea tataodi ma oigogodi eai na Iesu i oimuridi, ⁴² i ene, “Emi nuatu au ene Keriso eai? Ia eai natuna?” Isi se ribalau ia arinai si ene, “Davida natuna.” ⁴³ Ie ribalau aridi eai i ene, “Edoha Davida Earua Tabuna debana eai i awaguiauei, i ene, ⁴⁴ ‘Guiau ie ribalau egu Guiau arinai, i ene, Nimatutugu eai u bawa i lau e em waiunuyao se hemala aem adi bou?’ (Psa. 110.1). ⁴⁵ Ena Davida ia i awaguiauei, edohana au ene ia natuna?” ⁴⁶ Nige tau esau heuiona abo abina i ata: eo wau asubena eai i lau e, taba nige esau i hesiouio ia arinai.

23

Parisea heiheinoina
Mk. 12.38-40; Lk. 20.45-47

¹ Iesu abo i ribalau moutuana, eo ena heaheatayao hinage aridi eai, ² I ene, “Tauuriuri eo Parisea tataodi Mose ena abababawa eai se bawa: ³ ginauri gambgamagari, saha eo saha, se lauhesommiu si ene au abiwataidi, abo au abiwataidi: edi laulau mo tabu au laulauedi: awadi mo ribaribadi na taba nige se abiwataidi. ⁴ Adi bahebahe poroporohedi se audi, se porohe ariri, se toresaedi tatao dabaeardi eai: isi nima gigidi nige esega se torelaei aridi eai. ⁵ Na edi

laulau gamagamagari se laulauedi bena tatao abo se itadi, edi pilateri se hemagagadi, eo adi lulu dedeadi se helaidi. ⁶ Mataasi eai biri saesaedi se henuadi: eo sunago alodi eai abababawa saesaedi hinage se henuadi, ⁷ abauneune eai edi nuatu bena tatao abo se laulautoiedi, eo bena tatao abo se awatanuaga aridi eai. ⁸ Tabu au awatanuagauiomiu: ami tanuaga esega mo ede Keriso: omi gamagarimiu boga esega mo. ⁹ Tanoubu eai ta tabu tau esau au awatamaei: Tamamiu esega mo ia ede galewa eai. ¹⁰ Tabu se awatanuagaemiu hinage: ami Tanuaga esega mo, ia ede Keriso. ¹¹ Ena arimiu eai esau i sae ariri, ia abo emi heaheari eai i lau. ¹² Eai to eai ia abo i hedebasaeuioi abo se ribahetamolubulubu: ia i ribahetamolubulubuuioi ia abo se hedebasaei.

Baaea gamagamagari Parisea abo se hearodi Iesu i ribaedi Mk. 12.38-40; Lk. 20.47

¹³ “Tauuriuri eo Parisea tataomiu e, omi tauboraborasom, kapore omi! ouyalayala lailai abo au hearo! Galewa basileiana tatao matadi eai au gudugudui: omi nige au sora, eo isi hinage bena se lusora au lauguduguidi. ¹⁴ Tauuriuri eo Parisea tataomiu e, omi tauboraborasom, kapore omi! ouyalayala lailai abo au hearo! sisine wabuwabu edi numa au aigirihaidi, na emi borabora emi uura au heloha: arinai mate lailai abo au hearo. ¹⁵ Tauuriuri eo Parisea tataomiu e, omi tauborabora, kapore omi! ouyalayala lailai abo au hearo: na gabogabo eo tanoubu au hetaiiri bena tau esega nuana au buihetaiiri, e au abi, ia abo au abi i hemala gehena natuna, abo i baaea ariri i dioimiu.

¹⁶ “Omi tauwoeawoea matagibugibumiu, kapore omi! ouyalayala lailai abo au hearo: au ene ‘Eai eo eai numa tabuna arinai se aigora meta nige aniona: na eai eo eai numa tabuna ena *gold* arinai se aigora, aigora mamohoina ede meta.’ ¹⁷ Au eauyaure omi: eo ma matagibugibumiu: aitea i sae ariri, *gold* wa, e numa tabuna *gold* i hetabuei? ¹⁸ Eo hinage au ene, ‘Eai eo eai abaaitalasamna arinai i aigora, nige aniona meta, na eai eo eai ainauia abaaitalasamna potana eai arinai i aigora, aigora mamohoina ede meta.’ ¹⁹ Omi tauwoeawoeaidi, matamiu se gibugibu mo: aitea i sae ariri, ainauia wa, e abaaitalasamna ainauia wa i hetabuei? ²⁰ Arinai eai eo eai abaaitalasamna arinai i aigora, i aigora mamohoi, eo ginauri gamagaridi potana eai aridi eai i aigora hinage. ²¹ Eai eo eai numa tabuna arinai i aigora, i aigora mamohoi, eo ia arinai i aigora hinage numa tabuna boeana eai ie mia. ²² Ia hinage galewa arinai i aigora, Eaubada ena terona arinai i aigora, eo ia arinai hinage terona potana eai ie bawa.

23 “Tauuriuri eo Parisea tataomiu, omi tauboraborasom, kapore omi; ouyalayala lailai abo au hearo: omi * mint, eo anise, eo kumino hesaudoudoidi eai Eaubada arinai au aiain-auia na laugagaeo lailai, eo heduduraina, eo nuatoatoana, eo sunumawataina au nuagabaedi: i lolo teina au abidi eo meta headi me au abiesegaidi hinage. 24 Omi tauwoeawoea, mata gibugibumiu, niiniili esau au hegoilisi-gabaei, na kamela mo abo au dom.

25 “Tauuriuri eo Parisea tataomiu e, omi tauboraborasom, kapore omi! ouyalayala lailai abo au hearo: kaputi eo gaeba murimuridi au deuriheaadi, nuaboeadi eai mo aigirihai, eo baaea apeapesuiana se ota. 26 Oa Parisea matagibugibum e, kaputi eo gaeba aloalodi u deuri bagunaedi, murimuridi abo hinage se aaesegaidi.

27 “Tauuriuri eo Parisea tataomiu e, omi tauboraborasom, kapore omi! ouyalayala lailai abo au hearo: omi doha bousa se hepoahu- heposiposidi, isi murimuridi itaitadi se lolo, na boeadi eai taumatemate siadadi, eo bii gamagamagari se monau. 28 Omi hinage doha ede tatao matadi eai emi laulau, opi murimurimiu eai mo se itadi si ene se dudurai, nuaboeamiu eai borabora eo baaea apeapesuiana se monau.

29 “Tauuriuri eo Parisea tataomiu e, omi tauboraborasom, kapore omi! ouyalayala lailai abo au hearo: paana peroveta edi bousa au abidi, eo tau laulaududurai tataodi edi bousa au hepasadi. 30 Au ene, ‘Taba ai tamamaiyao edi huia eai wa ai mia, peroveta osinadi se heboriri taba nige ai saguidi. 31 Arinai ede au ribataubigauioimiu; peroveta tauunuidi nanatudiyao omi. 32 Tamamiuyao edi baaea sigasigadi omi au hemonaudi. 33 Omi mota e, omi mota isidi e, gehena matena eai emi abadago ede saha? 34 Arinai, hage, peroveta headi eo tatao sonoga, eo tauuriuri tataodi abo ea hetamaridiwa: headi abo au unuidi, eo au hesataurodi; headi emi sunago eai abo au pidiridi, hari eanua, hari eanua au henaudi abo au hebaaeadi. 35 Laulau dudurai tataodi osinadi gamagari tanoubu eai se heboriridi abo se laoma debamiu eai, Abela laulaududurai tauna osinana arinai se hetubu, i laoma e Sakaria, Barakia natuna osinana, ia au unui wa dubu eo abaaitalasalma duaduaridi eai. 36 Mamohoi, ea heribamiu ta, teina baaea gamagaridi, isi ta abo se hearodi.

Iesu Ierusalema i laukaporei

Lk. 13.34, 35

37 “Ierusalema e, Ierusalema e, oa peroveta tauunuidi, eo headi wa se hetamaridiwa u lauwe’uidi, huia gamagari egu gadosisi bena nanatumyao ea heoigogoidi, doha kamkam

* **23:23:** Lugu panepanedi ai ai abaheanihu, se tanoi abo tupona se mosei Kohena, ainauia gagagiridi.

nanatunayao mabena eai i obatawaidi, na omi au awayagara! ³⁸ Emi numa se laugabaei au abi, numa ahaahana mo. ³⁹ Ea heribamiu ta ea ene, maraitom asubena taba nige au itauiougu, i lau e abo au ene, 'Ia i lolo Guiau esana eai i laoma.' "

24

Oliveta guguiana: (1) numa tabuna abo se helopagorigori se ribanonohai

Mk. 13.1-2; Lk. 21.5, 6

¹ Iesu dubu i laugabaei i lau murimuri eai: ena heaheatayao se laoma ia arinai dubu numadi bena ia se heita. ² Iesu i ribalau isi aridi eai i ene, "Teina ginauri gamagaridi nige au itadi wa? Mamohoi ea ribalaowa arimiu eai, taba nige we'u esau i ota we'u esau potana eai, abo se heboloheohidi."

Oliveta guguiana: (2) hesio haiona

Mk. 13.3, 4; Lk. 21.7

³ Oliveta tupina eai ie bawa ena heaheatayao se lau mahimahihima, si ene, "U heribamai aitea huia eai ina ginauri ta abo se tubu? eo em uioma heiheinoina saha, eo tanoubu ena abalautom heiheinoina saha?"

Oliveta guguiana: (3) teina isi ta ribana

Mk. 13.5, 13; Lk. 21.8-19

⁴ Iesu ie ribalau aridi eai i ene, "Au komakomanimiu, tabu tau esau i boraimiu. ⁵ Gamagaridi abo se lagema eau esagu eai, abo si ene, 'Eau Keriso ede,' gamagaridi hinage abo se boraidi. ⁶ Iala wasadi abo au ataiedi, eo iala ribadi hinage: tabu au nuadubu: teina ginauri gamagamagari abo se tubu baguna, e sigasigana sora. ⁷ Basileia esau eo basileia esau se iala, eo basileia esau eo basileia esau se iala (Is. 19.2); eo hari teha, hari teha eai, guriam abo se tubu, eo moniini abo se hetabutabubu. ⁸ Teina ginauri gamagaridi ta aridi eai nuadubu ie tubu.

⁹ "Omi abo se woelaemiu se henuadubumiu, eo abo se unuhematemiu; hinage basileia gamagaridi eai se ouyalayalaemiu esagu debana eai. ¹⁰ Nei huiana ne gamagaridi abo se alabesibesi (Is. 8.15), esau esau se haihaimoruuioidi, esau esau se haihaiouyalalauuioidi hinage. ¹¹ Peroveta borabora gamagaridi abo se tubu, tatao gamagaridi abo se boraidi. ¹² Paana baaea wa se gamagari ariri, arinai abo gamagaridi edi gadosisi se gogoma. ¹³ Ia ie dudu mo i lau e sigasigana eai, abo i mauri. ¹⁴ Teina basileia evaneliana tanoubu abo se lauguguaheohi, hari tatao, hari tatao gamagaridi se ribahasahasaidi; abotai sigasigana abo i lagema.

*Oliveta guguiana: (4) nuadubu baaeana**Mk. 13.14-23*

¹⁵ “Arinai ena nuadubu baaeana wa au ita, doha Daniela peroveta i ribaei wa (Dan. 9.27), dimo tabuna eai i totoro (eai to eai i hasiri abo i nuatui): ¹⁶ nei huiana ne isi Iudea taumiaina abo se dago oea tupidi eai. ¹⁷ Ia numa ewana eai ie bawa tabu i pesama ena ginauri i abidi numa eai: ¹⁸ hinage ia oea eai tabu i uioma ana lulu i abidi. ¹⁹ Kapore sisine taubogaboga, eo nei asubenana ne sisine nanatudiyao se hemadodi! ²⁰ Au uura, bena emi huia dagodago eai ania nige se baaea, hinage asubena sabate nige’e. ²¹ Nei huiana ne nuadubu baaeana, nige baaea esau doha nei tanoubu se hetubu i laoma, i laoma, e teina huia ta, eo i lau e ana huia ana tasi (Dan. 12.1). ²² Asubena wa ena nige se hekuudi, taba nige tau esau i mauri, na tatao hilehileidi debadi eai nei asubenana ne abo se hekuudi. ²³ Ena tau esau i ribalaowa i ene, ‘Keriso ia ede ina, Keriso ia ede nei’; ena riba tabu au ataiwatai. ²⁴ Paana Keriso boraboradi abo se torohai, eo peroveta boraboradi hinage, isi heiheinoi eo noo lailaidi abo se hemasarahadi: mamohoi, ena abina se ata tatao hilehileidi wa abo se boraidi. ²⁵ Au nuatui, ea heribanonohaimiuo. ²⁶ Taba arimiu eai si ene, ‘Ia barabara eai ie mia’; tabu au lau arinai: taba hinage si ene, ‘ia i miayamui biriutusi eai’; riba wa tabu au ataiwatai.

*Oliveta guguiana: (5) Wasawasa ena uiuioma ma namanamarina**Mk. 13.24-37; Lk. 21.25-36*

²⁷ Doha namanamari i silima tupo aruabu eai, i lau e tupo ealasi eai: Tau Natuna ena laolaoma abo hinage doha ede meta. ²⁸ Sinare ena abaota eai magesubu lailai abo se tupagogoeseagai.

²⁹ “Nei huiana ne, nuadubu baaeana murina eai, mae-sega mahana abo i wahuwahuhuri, eo nawarai hinage taba nige i sina, eo ipora galewa eai abo se beuma, eo galewa gigiboridi abo se moimoiu (Isaia 13.10; 34.4). ³⁰ Arinai abo Tau Natuna ia heiheinoina galewa eai abo i masarahama: tanoubu hari boga, hari boga abo se doudou, Tau Natuna abo se ita galewa eada boeadi eai i laolaoma, ma gigiborina eo ma namanamari-aririna (Dan. 7.13). ³¹ Ia ena aneru abo i heta-maridi, bogigi arinana lailai eai (Isa. 27.13), tatao hilehileidi, enanayao, mana edi abatoama hasi eai, galewa sigana esau i lau e galewa sigana esau eai, abo se heoigogoidima (Deu. 28.64; 30.4).

*Parabole: Kuhou**Mk. 13.28, 29; Lk. 21.29-31*

32 “Omi kuhou parabolena au nuatui: Lagana ma gubugubuna, lugudi i toredi, arinai au nuatui au ene, siwaro huiana i hanahanau. 33 Omi hinage doha meta, wau ginauri gamagamagaridi abo au itadi, abo au nuatui, au ene, i hanahanaumao, iaede dohila hasaridi eai. 34 Mamohoi ea heribamiu ta, teina isi ta sora taba nige i lautom, teina ginauri gamagaridi se tubunonohai. 35 Galewa eo tanoubu abo se lautom, na egu riba taba nige se lautom.

36 “Na asubena ne eo awa ne nige tau esau abina i ata, galewa anerudi hinage nige’e, na Tamagu iabom mo. 37 Doha Noa asubenana eai wa (Gene. 7), Tau Natuna ena laolaoma abo doha ede. 38 Asubenadi wa dibori utuutu sora nige ie tubu, se aiai eo se nomnom, se tawasora eo se hai, i lau e nei asubenana ne Noa i lulau waga eai. 39 Nige se nuatui i lau e dibori utuutu i lagema, gamagaridi i ealuhaidi; Tau Natuna hinage ena laolaoma abo doha meta. 40 Nei huiana ne tatao labui abo se mia oea eai, esau abo se abihai, eo esau abo se laugabaei. 41 Sisine labui edi abagirigiri eai sitona abo se giri: esau abo se abihai, esau abo se laugabaei. 42 Au nuatuhetete: awa wa nige au nuatui arinai emi Guiau i laoma. 43 Teina au nuatui, ena numa tanuagana tauaiaigirihai ena huia lagema i nuatui, ia i silawahetete, ena numa taba nige se lopagorigori. 44 Arinai omi hinage au nuatuhetoanonohai: awa wa nige au nuanuatui arinai Tau Natuna abo i laoma.

45 Eai heaheari tauna i lolo, eo i sonoga, ena guiau ia i hetoro ena numa tanuagana, ia nanatunayao aiai huiadi adi i mosedi? 46 Heaheari meta ena guiau ena huia lagema abo i lobai ena laulau nei doha, ia nuana i woiwoina. 47 Mamohoi ea heribamiu ta, ia abo heaheari wa i hetoro ena gogo gamagamagari tanuagadi eai ie lau. 48 Taba heaheari tauna baeana nuagadona mo i ene, ‘Egu guiau ena laoma i boneawa’. 49 Ana sasaguyao abo i laulaulubidi, tatao eayuaure aridi eai hinage i aiai, eo i aiainom; 50 heaheari wa ena guiau abo i laoma asubenana wa nige i nuanuatui: hinage awa eai wa nige se ribaei, 51 ia abo i talautusihai, i hepatulaei tauborabora tataodi aridi eai: nei dimo eai ne abo se doudou eo moadi se taburuyahisidi.

25

Oliveta guguiana: (6) parabole: sisine nuanuasupu haligigi se sonoga eo haligigi se eayuaure.

1 “Galewa basileiana doha hasara nuanuasupudi saudoudoi, edi lamepa se abidi se lau tau-bena-i-tawasora se laubagibagiei. 2 Haligigi se sibasiba, na haligigi se supusupu. 3 Isi tausupusupu wa edi lamepa se abidi, nige edi keresine.

⁴ Isi tausibasiba wa edi lamempa se abidi eo edi keresine iledi hinage se abidi. ⁵ Tau-bena-i-tawasora wa i boneawa, isi gamagaridi matadi se enoen, arinai se eno. ⁶ Bulinuana eai se hetalaneene si ene, 'Iei, tau-bena-i-tawasora wa i laolaoma; au lau, au laubagibagiei.' ⁷ Hasara nuanuasupu gamagaridi abo se torohai, edi lamempa se ginauri nonohaidi. ⁸ Tausupusupu se ribalau tausibasiba aridi eai si ene, 'Keresine ema bega au leama: ema lamempa se boso'o.' ⁹ Tausibasiba arinadi se heuio, si ene, 'Nige'e; enamiu eai eo enamai eai ata nige gonogonoada: au lau tauuneune aridi eai, enamiu au uneune.' ¹⁰ Isi se lau se uneune wa, tau-bena-i-tawasora wa i lagem; isi se abinonohao wa maenayao se lau tawasora eai: dobila abo se gudu. ¹¹ Murina eai hasara nuanuasupusupu headi wa se laoma, si ene, 'Guiau e, Guiau e, ema dobila u soeama.' ¹² Arinadi i heuio i ene, 'Mamohoi, ea heribamiu ta, ea hekaumi.' ¹³ Omi au nuatuhetoanonohai, asubenana eo awana Tau Natuna arinai i laoma nige abina au ata.

Oliveta guguiana: (7) Guiau ena uioma ena heaheari i lauitadi.

¹⁴ "Galewa basileiana doha ede tau esau i lau eanua eda lohaloha eai, ena heaheari tataodi i eogaidi, ena gogo gamagaridi i mosei nimadi eai. ¹⁵ Esau taleni haligigi i mosei, eo esau labui, eo esau esega; tau esau, eo tau esau ena adidiri i heaigonogonoaiedi; ia abo ena adau i adauei. ¹⁶ Ia taleni haligigi wa i abidi i lau i paisoa arinai taleni haligigi hinage i hetubudi. ¹⁷ Ia labui i abidi, enana hinage i helai labui. ¹⁸ Na ia esega ie abi wa ie lau tano ie sara, ena Guiau ena moni arinai i puruyamui. ¹⁹ Huia lohaloha heaheari wa edi Guiau i laoma, aridi eai ena gogo i hesioedi. ²⁰ Ia taleni haligigi i abidi wa i laoma haligigi i hetubudi wa hinage i ledima, i ene 'Guiau e, taleni haligigi u ledima arigu eai wa: taleni haligigi hinage ea helaidi.' ²¹ Ena Guiau ia arinai i ene, 'U abiloloedi, oa heaheari lolona, eo em nuatu se dudurai; ginauri hisahisawaidi u komakomanidi, abo ea hetorom ginauri gamagaridi abo oa tanuagadi eai u lau: em Guiau ena kode abo i hekodem.' ²² Ia hinage taleni labui i abidi wa i laoma i ene, 'Guiau e, taleni labui u ledima wa; e labui hinage ea hetubudi.' ²³ Ena Guiau i ribalau ia arinai i ene, 'U abiloloedi, oa heaheari lolona, eo em nuatu se dudurai: ginauri hisahisawaidi u komakomanidi, abo ea hetorom ginauri gamagaridi abo oa tanuagadi eai u lau: em Guiau ena kode abo i hekodem.' ²⁴ Ia taleni esega ie abi i laoma, i ene, 'Guiau e, ea nuatuim oa tauawaawayagarana, em laulau enam u abigaibuidi mo, eo ginauri bena u tanogogoidi sora nige u lauhesurudi. ²⁵ Eo ea matausi, ea lau em taleni tano eai ea puruyamui: enam me u

abiuioiawa.’²⁶ Ena Guiiau arinana i heuio i ene, ‘Oa heaheari baaeana, eo tauawaawabada, u nuatui wa egu laulau ginauri ea abigaibuidi mo, eo ginauri ea tanogogoauridi sora nige ea lauhesuru.’²⁷ Ue saha egu moni nige u laei moni tauuneune aridi eai, abo ea uioma ta, egu moni ea abiuioi eo maisana hinage.²⁸ Wau taleni wa ia arinai au abi, au laei abo saudoudoi tauabidi arinai au mosei.²⁹ Paana ena tau esau eo tau esau i abi abo hinage se mosei, enana abo se gamagari ariri: ia ena nige i abi, enana begana abo hinage se abihai.³⁰ Heaheari baaeana wa au gabalaei masigiri boeana eai wa: nei dimo eai ne se doudou, eo moadi se taburuyahisidi.’

Oliveta guguiana: (7) Guiiau ena uioma Etene eanuadi i lauitadi

Ioela. 3.11-16

³¹ “Huiana Tau Natuna i laoma ma namanamarina, maena aneru hetahetabudi hinage, ia abo i bawasae ena terona namanamarina potana eai.³² Ia nuanuana eai hari basileia, hari basileia tataodi se oigogo: ia abo i pei-labuidi, doha mamoe taumiataunidi mamoe eo bokania i pei-labuidi.³³ Ia abo mamoe i toredi ia nimatutuna eai, na bokania i toredi ia nimaseuseurina eai.³⁴ Abo Wasawasa ie ribalau isi ia nimatutuna eai aridi eai, i ene, ‘Au laoma, omi Tamagu i nuawoiwoinaemiu, basileia mumuga eai tanoubu se hetubu se abi nonohaiiao au abi enamiu.³⁵ Paana ede ea guriam, agu aiai au leama; gadogu ie magu, goila eai au henomgu; eau taowawa, au taubigaigu; ³⁶ nige agu lulu, au heluigu; ea asiebo, au itawataigu; eau numa masigiri eai ea mimia, hinage au laoma arigu eai.’³⁷ Tatao laulaududuraidi wa abo se ribalau ia arinai, si ene, ‘Guiiau e, huia esana ai itam u guriam, am aiai ai leawa, hinage gadom ie magu, goila ai leawa ue nom?’³⁸ Huia esana ai itam oa taowawa, ai taubigaim, nige am lulu, ai heluim?’³⁹ Huia esana ai itam u asiebo, eo numa masigiri eai u miamia, hinage aie laowa?’⁴⁰ Wasawasa abo i ribalau isi aridi eai, i ene, ‘Mamohoi ea heribamiu ta, egu tau i hegehegegepo arinai ina laulau ta au laulauedi wa, doha ede au laulauedi arigu eai.’⁴¹ Ia abo hinage i ribalau isi ia nimaseuseurina eai aridi eai, i ene, ‘Au lausuaaegu, au baaea ariri, au lau oeagi alaalasi nige nosina boeana eai, doha se ginauri nonohai diabololo maena aneru enadi: ⁴² paana ede ea guriam, agu aiai nige au leama; gadogu ie magu, agu goila nige au leduhieama au henomgu; ⁴³ eau taowawa, nige au taubigaigu; nige agu lulu, lulu agu nige au leama; ea asiebo, eo numa masigiri eai se toregu, nige au laoma au itagu.’⁴⁴ Isi hinage abo se ribalau ia arinai si ene, ‘Guiiau e, huia esana ai itam u guriam e gadom ie magu, e oa taowawa, e nige am lulu, e u asiebo, e numa masigiri eai

u miamia, hinage nige ai taubigaim?’ ⁴⁵ Ia abo i ribalau isi aridi eai i ene, ‘Mamohoi ea heribamiu ta, doha teina egu tau i hegehegegepo nige au taubigai, nige au taubigaigu hinage.’ ⁴⁶ Isi abo se lau abamate nige nosina eai; na tatao laulau-dudurai abo se mauri nige nosina.”

26

Iudea adi tanuaga se oioiriba bena Iesu se unui

Mk. 14.1, 2; Lk. 22.1, 2

¹ Iesu teina riba gamagaridi ta i riba-lautom, ie ribalau ena heaheatayao aridi eai, i ene, ² “Au nuatuiyao imaisina abo pasova se mataasiei, eo Tau Natuna se moruhai se hesatauro.”

³ Kohena lailaidi, eo tauuriuri tataodi, eo eanua babadadi, se oigogo kohena saesaedaoina ena numa eai, ia esana ede Kaiapa. ⁴ Se oioiriba bena Iesu se toaliuliuai, ia abo se unui. ⁵ Na si ene, “Tabu mataasi eai ta, ata tatao se hetalagegageda.”

Maria Betania Iesu i heyausi

Mk. 14.3-9; Io. 12.1-8

⁶ Iesu Betania eai ie mia, Simona, lepera tauna, ena numa eai i bawa bigabiga i ai, ⁷ sine esau i laoma ia arinai alabata lasina i abiama, eausi alona eai, maisana i lai ariri, i hegoilaei ia boruboruna eai. ⁸ Ena heaheatayao se ita, se siayau, si ene, “Sanapu sahasaha ina i gaba gaibui ta? ⁹ Teina eausi ta taba se uneunei maisana lailai se abi, eo se mosei gogogesagesa tataodi aridi eai.” ¹⁰ Iesu i ataiei abo i ribalau aridi eai, i ene, “Sine ta sahaina au hemode? Laulau lolona i laulauei arigu eai ta. ¹¹ Gogogesagesa tataodi huia gamagamagari maemiyao se mia; eau nige huia gamagamagari maemiu. ¹² Teina eausi i hegoi taugu eai ta, edi toregu i nuatunonohaiyao. ¹³ Ea heribamiu ta mamohoi, hari eanua, hari eanua eai, teina evanelia ta se lauguguiaei i lau e tanoubu i oihai, sine ta ena laulau hinage abo se ribaei, ia abo abahenuaisinina.”

Iudasi Isakariota Guiiau i unelau

Mk. 14.10, 11; Lk. 22.3-6

¹⁴ Saudoudoi-labui wa esau, esana Iuda Isakariota, ie pesa ie lau kohena lailaidi aridi eai. ¹⁵ Ie ribalau isi aridi eai, i ene, “Egu saha abo au leama ia abo ea leawa?” Ana mohara se ribaei *silver* tau-esega-i-mate-soudoudoi. ¹⁶ Arinai ena dobila i eooi bena Iesu abo i morui.

Pasova se abi nonohai

Mk. 14.12-16; Lk. 22.14-20, 24-30

¹⁷ Areto-nige-ie-tubu mataasina asubena bagubagunana eai heaheatayao se laoma Iesu arinai si ene, “Ai lau haedi pasova em abaaina ai abihetoa nonohai?” ¹⁸ Ia i ene, “Au lau

eanua eai tau esau arinai, au ene, “Tanuagada i ene, Egu huia i hanahanaumao: maegu heaheatayao pasova abo ai ai em numa eai.”¹⁹ Heaheatayao Iesu ena riba se lau watai: pasova se abihetoa nonohai.

Pasova murimurita aririna ede meta
Mk. 14.17-21; Lk. 22.14-20, 24-30

²⁰ I maimailahi maenayao saudoudoi-labui se bawabigabiga.

(Ioane 13.2-30 *au hasiri.*)

²¹ Isi ma aiaini, i ene, “Ea heribamiu ta mamohoi ami sagu esau abo i moruigu.”²² Isi abo se nuadubu ariri, esau, esau se ribalau ia arinai si ene, “Guiiau e, eau wa?”²³ Arinadi i heuio i ene, “Ena ia nimana eo nimagu ai hedatuesegaidi gaeba alona eai, ia taumoruigu ede.”²⁴ Tau Natuna abo i lau doha wasana se uri nonohaiyao: tau wa Tau Natuna taumoruina ede, kapore ia nuaahaahanina, tau ne i lolo taba ia nige se labasi.”²⁵ Iuda, taumoruina, ia arinana i heuio, i ene, “Tanuagagu e, eau wa?” Iesu ia arinai i ene, “Oa ede u ribaei.”

Guiiau ena mataasi tabuna Iesu i hetubu
Mk. 14.22-25; Lk. 22.17-20; 1 Kor. 11.23-25

²⁶ Isi ma aiaini, Iesu areto ie abi, i lautoi, i ihi, i mosei heaheatayao aridi eai, i ene, “Au abi au ai; taugu ede ina.”²⁷ Bia ie abi, i lautoi, i mosei aridi eai, i ene, “Arinai gamagarimiu au nom;”²⁸ osinagu ede ina gagaeo harihariuna eai, se heboriri tatao gamagaridi edi baaea abaribagigirina ede.²⁹ Ea heribamiu ta, vine masina taba nige ea nomuioi, i lau e asubenana eai eau maemiu abo ta nom-esega Tamagu ena basileia eai.”

(Ioane, 14.1-31 *au hasiri.*)

Petero i uhara Iesu i ribanonohai
Mk. 14.26-31; Lk. 22.31-34; Io. 13.36-38

³⁰ Wana esau se wana nonohai, abo se lau murimuri eai. Oliveta tupina eai.

(Ioane 15, 16, 17 *au hasiri.*)

³¹ Iesu i ribalau aridi eai, i ene, “Ina maiona ta gamagarimiu debagu eai abo au alabesibesi: doha se uriyao, si ene, ‘Mamoe tautawataidi ea lubi, mamoe eawoidi abo se tatagorigori’ (Zech. 13.7).”³² Ea torouio abotai abo ea bagunaemiu Galilaia eai.”³³ Petero i ribalau ia arinai i ene, “Tatao gamagaridi debam eai abo se alabesibesi, eau taba nige ea alabesibesi.”³⁴ Iesu ia i heriba i ene, “Ea heribamiu ta mamohoi, ina maiona ta kamkam sora nige se dou, mahaiona abo u uharaegu.”³⁵ Petero i ribalau ia arinai i ene, “Eau maem abo ta mate esega, taba nige ea uharaem.” Nei doha hinage heaheatayao gamagaridi edi riba esega mo.

*Iesu amamna lailai i hearo oea eai**Mk. 14.32-42; Lk. 22.40-46*

³⁶ Iesu maedi abo se lage dimo esau eai esana Getesemani, heaheatayao aridi eai i ene, “Inai au bawa, ea lau kalau nei eai ea lau-uura.” ³⁷ Maenayao Petero eo Sebedaiio nanatunayao labui i woeaidi, arinai abo i hetubu i nuadubu, eo nuana i porohe ariri. ³⁸ Ie ribalau aridi eai i ene, “Amnagu i baaea ariri, ea nuadubu matemate: inai au bawa, maegu ta silasilawa.”

*Uura bagubaguna**Mk. 14.35; Lk. 22.41, 42*

³⁹ Ia abo i taulau, i guridobi debana ie tutu, i uura, i ene, “Tamagu e, ea ene bena bia ta u laeudoiei: taiede eau nige egu nuatu ea lauwatati: oabom mo em nuatu.”

*Heaheata ma-enodi**Mk. 14.37, 38, 40; Lk. 22.45, 46*

⁴⁰ Ia abo i laoma heaheatayao aridi eai, ma-enodi i lobaidi, i ribalau Petero arinai, i ene, “Ie saha mahana esega maeguyao nige ta silasilawa? ⁴¹ Au silasilawa, eo au uura, noho ata i hearomiu: earuamiu se eari, na bulumamiu se beruberu.”

*Uura helabuina**Mk. 14.36; Lk. 22.44*

⁴² Ma-labui ie uio, i uura, i ene, “Tamagu e, taba bia ta nige u laeudoiei u ene bena ea nom, oabom nuam.” ⁴³ I uio ma abo i lobaiuioidi se eno-matemateuio: isi matadi se porohe.

*Uuru hehaionana**Mk. 14.39*

⁴⁴ I laugabaedi, ie uio, ma-haiona i uura, ena riba esega mo. ⁴⁵ Abotai abo i laoma ena heaheatayao aridi eai, i heribadi i ene, “Abo au eno-eawasimiu; awa i hanahanaumao, Tau Natuna ia abo se morui se mosei tatao baaea nimadi eai. ⁴⁶ Au torohai ta lau: taumoruigu i lagemao.”

*Iesu se morui eo se toai**Mk. 14.43-50; Lk. 22.47-53; Io. 18.3-11*

⁴⁷ Ia ma ribaribana, Iuda, saudoudoi-labui esau, i lagema moutuana lailai maenayao, ma elepadi, eo ma kebukebubudi, kohena lailaidi, eo eanua babadadi aridi eai se laoma. ⁴⁸ Taumoruina wa heiheinoi i heribadi i ene, “Ena esau ea alagoiei ne, iaede meta, au toai.” ⁴⁹ Abo i lagema Iesu arinai, i ene, “Guiiau e, Euedo!” Abo ia i alagoiei. ⁵⁰ Iesu i ribalau ia arinai i ene, “Ehagu e, saha hesabana u laoma ta?” Arinai abo se laoma, nimadi eai se abilau Iesu arinai, abo se laei. ⁵¹ Iesu ana sagu esau nimana i loloi, ena elepa i nuisihai, kohena lailai ena heaheari esau i lau-elepai beana i talahai. ⁵² Iesu ie ribalau ia arinai i

ene, “Em elepa u toreui oi ena abaota eai, paana isi gamagaridi se aielepa, elepa eai hinage abo se unuhematedi.⁵³ U nuatui, u ene bena nige egu nuatu abo ina ena ea lau-uura Tamagu arinai, ia aneru legiona saudoudoi-labui abo i hetamariesegaidima?⁵⁴ Ena meta doha uriuri tabudi abo edohana edi hemahemamohoiena, si ene taba meta doha.”⁵⁵ Nei awa ne arinai Iesu i ribalau moutuana aridi eai, i ene, “Au laoma au toaigu eau doha tauaiyahari ma elepamiu eo ma kebukebumiu? Asubena gamagamagari numa tabuna eai ea bawa maemiu, ea laulauheata, nige au abilaoma arigu eai.”⁵⁶ Teina ginauri gamagamagari se abidi peroveta edi uriuri bena abo se hemamohoiedi. Heaheata gamagari ia abo se nuagabaei, se dagogorigori.

Iesu se laei Kaiapa eo Sunaderi nuanuadi eai

Mk. 14.53-65; Io. 18.12, 19-24

⁵⁷ Isi wa Iesu se toai, abo se laei kohena lailai Kaiapa arinai, nei eai tauuriuri eo babadadi se oigogo.⁵⁸ Petero muri ariri eai Iesu i laulauwatai se lau kohena saesaedaoina ena numa eai, ia i luhu heaheari maenayao se bawabigabiga, i itaitawatailaei.⁵⁹ Kohena lailaidi, eo babadadi, eo sunaderi gamagaridi, Iesu ana mata borabora se eoidi, ia bena se unuhemate.⁶⁰ Na nige se lobai: mataborabora gamagaridi tauribaedi se laoma, nige se lobai. Abotai abo mata borabora tauribaedi labui se laoma.⁶¹ Si ene, “Teina tau ta i ene, ‘Eaubada ena numa tabuna lopagorigorina abina ea ata, eo asubena haiona eai abo ea heterouioi.’”⁶² Kohena saesaedaoina i toro i ribalau ia arinai, i ene, “Oa nige arinam? Wau taudi labui wa se ribataubigaim, u ene edoha?”⁶³ Iesu nige ariarinana. Kohena saesaedaoina ie ribalau ia arinai i ene, “Eaubada maumaurina debana eai ea hetaladuim ta, ena oa Keriso, Eaubada Natuna, u heribamai.”⁶⁴ Iesu i ribalau ia arinai, i ene, “Oa ede u ribaei: taiede ea heribam ta ea ene, abotai Tau Natuna abo au ita gigibori nimatutuna eai ie bawa, galewa eadadi boeadi eai i laolaoma.”⁶⁵ Kohena saesaedaoina ana lulu i purisihaidi, i ene, “Eaubada i ribahebaaea, ana mata saha ta eooi? Eaubada i ribahebaaea au ataieyao.⁶⁶ Emi nuatu saha?” Arinana se heuio si ene, “Ana mata nonohana, ia abo i mate.”⁶⁷ Ia matana se garigariso, ia se oioialalai; headi ia se laulauwapai,⁶⁸ Si ene, “Oa Keriso, u riba peroveta arimai eai, Eai i lubim?”

Petero Guiiau i uharaei

Mk. 14.66-72; Lk. 22.55-62; Io. 18.16-18

⁶⁹ Petero numa lailai wa murimurina eai i babawa: siu esau i laoma ia arinai, i ene, “Oa hinage Iesu Galilaia maem?”⁷⁰ Isi gamagaridi matadi eai ie uhara, i ene, “Em riba u ribaei nige ea itaitai.”⁷¹ Ia abo i lau murimuri eai, dobila numana eai,

siu esau ia ie ita isi nei eai i ribalau aridi eai i ene, “Teina tau ta hinage Iesu Nasareta maena.” ⁷² Abo ie uhara uio, eo i arina baaea, i ene, “Tau me nige ea nuatui.” ⁷³ Abotai abo isi nei eai se totoro se laoma, se ribalau Petero arinai, si ene, “Mamohoi oa hinage adi sagu esau: arinam i hemasaraham.” ⁷⁴ Arinai abo i arina baaea ariri, i ene, “Tau me nige ea itaitai.” Maesega kamkam abo ie dou masaraha. ⁷⁵ Petero Iesu ena riba wa nuana ie sae, ia i heriba wa i ene, “Kamkam sora nige ie dou, ma-haiona abo u uharaegu.” I lulage murimuri eai, i dou matemate.

27

Sunederi Iesu se moselaei Pilato arinai
Mk. 15.1; Lk. 23.1; Io. 18.28

¹ Mara- ie- tom kohena lailaidi, eo eanua babadadi gamagaridi se oioiriba Iesu bena se unui. ² Ia abo se pai, se woelaei, se mosei gavana Ponotio Pilato arinai.

Iuda ena nuaamamna lailai nige aniona
A. adi H. 1.16-19

³ Iuda, taumoruina wa, abo ie ita Iesu bena se unui, nuana i buibuini, *silver* tau-i-mate-saudoudoi i uioedi kohena lailaidi eo babadai aridi eai. ⁴ I ene, “Eau ea baaea, tau ne ea moruhaiyawa nige ena baaea.” Si ene, “Taiede, ai nige’e, oabom.” ⁵ *Silver* wa i gabalaedi numa tabuna alona eai, i laugabaedi, ie lau i gadosoha. ⁶ Kohena lailaidi *silver* se abidi, si ene, “Moni abatoredi eai taba nige ta toredi ata laugagaeo ta utusi, paana ede osina maisana.” ⁷ Se oioiriba, abo gurewa tauginaurina ena oea aridi eai se une, laolaoma tataodi bena edi bousa. ⁸ Arinai abo oea wa esana se tore, Osina oeana, i laoma e huia ta. ⁹ Arinai peroveta Ieremia ena riba se hemamohoiei, i ene ina doha, “*Silver* tau-i-mate-saudoudoi se abidi, ia maisana si ene gonogonoana, ia Isaraela nanatunayao maisana se ribaei. ¹⁰ Gurewa tauginaurina ena oea aridi eai se mosei, doha Guiau i hetorogu” (Zech. 11.13).

Pilato Iesu i hesihesioi
Mk. 15.2-5; Lk. 23.2, 3; Io. 18.29-38

¹¹ Iesu gavana matana eai i totoro: gavana i oimurini i ene, “Oa Iudea edi Wasawasa wa?” Iesu ia i heriba i ene, “Oa u ribaei.” ¹² Kohena lailaidi, eo eanua babadadi ia se hegiru, ia nige arinana. ¹³ Pilato abo i ribalau ia arinai i ene, “Ginauri gamagari aridi eai se hegirum ta nige u ataiei?” ¹⁴ Nige riba esau awana eai i heuio: arinai gavana i noo ariri.

Iesu e Baraba?
Mk. 15.6, 15; Lk. 23.17, 25; Io. 18.38-40

¹⁵ Gavana ena laulau, ina mataasi eai ta, tauauauna esau i eairihai, aitea tau wa tatao isibom se henua. ¹⁶ Nei eai

tauauauna esau ia wasalaulau, esana Baraba. ¹⁷ Isi abo se oigogo, Pilato ie ribalau aridi eai, i ene, “Eai au henua ede abo ea eairigabaeawa? Baraba, e Iesu esana ede Keriso?” ¹⁸ I nuatulobaiyao edi aiaromagigiri eai ia se moselaei. ¹⁹ Ia i bawasae abaheduhedudurai eai, ia monena tau esau i hetamari ia arinai, i ene, “Taulaulaududuraina me tabu u sahai: wau asubena ta ia ea enoliuliuae, nuagu i hisihisili ariri.” ²⁰ Kohena lailaidi eo babadadi moutuana se nuanuaoidi bena Baraba se awanorini, na Iesu bena se unui. ²¹ Gavana arinadi, abo i heuio, i ene, “Taudi labui ta aitea abo ea eairigabaeawa?” Si ene, “Baraba.” ²² Pilato i ribalau isi aridi eai, i ene, “Iesu se ribaei Keriso wa, edoha egu abiabina?” Gamagaridi se ribalau ia arinai si ene, “Ia abo se hesatauro.” ²³ Gavana i ene, “Paana saha? baaea esana ie abi?” Abo se eogalailai si ene, “Ia abo se hesatauro.” ²⁴ Pilato i nuatuiyao ia awana taba nige se abi, eo se hetalagegagaga, goila ie abi, moutuana wa matadi eai nimana i deuridi, i ene, “Tau laulaududuraina ta osinana se heboriri nige agu giru: omi omibom.” ²⁵ Tatao gamagaridi ia arinana se heuio si ene, “Ia osinana potamai eai i ota, eo nanatumaiyao potadi eai hinage.”

Baraba se eairihai
Mk. 15.15; Lk. 23.24-25

²⁶ Ia Baraba abo i eairihai i laei aridi eai: eo Iesu i pidirihe-mate nonohai, abo i mosei nimadi eai ia bena se hesatauro.

Wasawasa wa nurinuri eai se hekorona, eo se woelaei abahesatauro eai

Mk. 15.16-23; Lk. 23.26-32; Io. 19.16-17

²⁷ Gavana ena iala tataodi Iesu se laei edi abaoigogo birina eai, iala bodadi gamagamagari se oigogo ia arinai. ²⁸ Ana lulu se abihaidi, lulu buiabuia arinai ia se helui. ²⁹ Oeagi nurinuridi arinai korona se haturi se heousaei ia uruna potana eai, eo didiari se tore ia nimatutuna eai: se turturibono ia matana eai, se liuliuaei, si ene, “Eauedo, Iudea edi Wasawasa e!” ³⁰ Ia se garigariso, didiari wa se abi uruna eai se hotaei. ³¹ Se liua lautom, abo lulu wa se abihai, ana lulu mamohoi mo se helui, se woelaei bena se hesatauro.

³² Se lulage murimuri eai, Kurene tauna esau se lobai, esana Simona: ia se lauhesom ena satauro i bahei.

Abihesataurona
Mk. 15.22-23; Lk. 23.33-43; Io. 19.17-24

³³ Isi abo se lage dimo esau eai esana Gologota, heaheasonina ede, uruuru moiarudi. ³⁴ Isi vinega ma oeagi kalakalapina se heboriesegai se mosei bena i nom: i nom’ita abo i otaotaei.

Keriso arinai laugagaeo se hemamohoiei
Mt. 5.17, 18; Gal. 3.11-14

³⁵ Ia se hesatauro, ana lulu se soiedi, edi kelero se abi: peroveta ena riba bena arinai se hemamohoei, doha i ene, “Agu lulu se soiedi, agu lulu arinai se hekelero.” ³⁶ Nei eai se bawabigabiga ia se itaitai. ³⁷ Uruna ewana eai ana mata se tore, se urisae, si ene, “TEINA TA IESU IUDEA EDI WASAWASA.” ³⁸ Tauaiayahari labui maenayao se hesatauroesegaidi, esau nimatutuna eai, esau nimaseuseurina eai. ³⁹ Isi se sae, se dobi se arina baeaei eo se uruuruodei. ⁴⁰ Si ene, “Oa numa tabuna tauailopaina, eo asubena haiona eai bena u heterouioi wa, hage u hemauiuiioim. Taba oa Eaubada Natuna hage satauro eai me u pesadobima.” ⁴¹ Hinage kohena lailaidi, eo tauuriuri tataodi, eo babadadi, ia se liuliuaei, si ene. ⁴² “Hari tatao mo i hemahemauridi: iabom hemauiuiioina abina nige i ata. Ena ia Isaraela edi Wasawasa, satauro eai abo i pesadobima, ia abo ta sunusunumaei. ⁴³ Eaubada i nuatuwatai: Eaubada ia besi i abi abo i hemaui: paana i ene. ‘Eau Eaubada Natuna.’” ⁴⁴ Tauaiayahari hinage maenayao se hesatauroesegaidi wa, edi riba esega mo.

Iesu Keriso i tubahai

Mk. 15.33-41; Lk. 23.44-49; Io. 19.30-37

⁴⁵ Awa haligigi-esega i lau e awa haligigi-hasi tanoubu i amumugudui. ⁴⁶ Awa haligigi-hasi eai Iesu i eaba lailai, i ene, “Eli, Eli, lama sabatani?” heaheasonina ede, “Egu Eaubada, egu Eaubada, ue saha u nuagabaegu ta?” ⁴⁷ Headi nei eai se totoro, arinana se ataiei, si ene, “Tau me Elia i eogai.” ⁴⁸ Adi sagu esau i aिताutau, baro ie abi, vinega i hemonau, didiari eai i auhepatu, i helelesae bena i nom. ⁴⁹ Isi headi si ene, “Sora i otawa, ta ita Elia abo i laoma i hemaui?” ⁵⁰ Iesu i eaba uio arinana lailai, abo i tubahai.

Huia laugagaeona i lautom

Io. 1.17; Heb. 9.3-8; 10.19-20

⁵¹ Numa tabuna ana woeo i tapurisi labuini ewa eai ie dobi paa eai: tanoubu i tabutabubu, eo we’u se taigari. ⁵² Taumatemate bousadi se taigari; hetabu tataodi gamagaridi headiyao se eno abo se torouio. ⁵³ Bousadi eai se lulagema ia torouiona murina eai, eo se lau eanua tabuna eai, se taumasaraha tatao headi aridi eai. ⁵⁴ Kenturion, ma ana sasaguyao Iesu se itawatai wa, tanoubu i tabutabubu se ita, eo wau, ginauri headi wa hinage, arinai se matausi ariri, si ene, “Mamohoi ina Eaubada Natuna ede!”

⁵⁵ Nei eai hinage sisine gamagaridi muri ariri eai ia se itaitai: isi Galilaia eai Iesu se hemuriwataiama ia se tautaubigai. ⁵⁶ Isi ede Maria Magadala, eo Maria Iamesi maena Iose sinadi, eo Sebedaio nanatunayao sinadi.

*Keriso bousa eai**Mk. 15.43-47; Lk. 23.55-56; Io. 19.38-42*

⁵⁷ I maimailahi, Arimatea tauna esau i laoma, ia taumon-
 amonaune, esana ede Iosepa, ia hinage Iesu ena heaheata
 esau. ⁵⁸ Ie lau Pilato arinai, Iesu sinarena wa i awanorini.
 Pilato abo i hetaladuidi sinarena se mosei ia arinai. ⁵⁹ Iosepa
 sinare wa i leao, lulu *linen* aa'aana arinai ie suma. ⁶⁰ Ena
 bousa harihariuna alona eai ie tore, we'u eai duha se sara
 nonohaiyao: we'u nabunabutuana bousa wa se hebuigudui,
 ia abo i lau. ⁶¹ Nei eai Maria Magadala, eo Maria esau bousa
 hasarina eai se babawa.

Bousa wa se gudu eo se itawatai.

⁶² Abinonoha asubenana mara- ie- tom, kohena lailai eo
 Parisea tataodi se tupagogoma Pilato arinai. ⁶³ Si ene,
 "Taubada e, nuamai se sae tauborabora me ma maurina ena
 ribariba i ene, 'Asubena haiona murina eai abo ea torouio.'
⁶⁴ Arinai u lauhesomdi bousa wa abo se itawataikomakomani
 i lau e asubena haiona wa se ohi, ata ena heaheatayao maiona
 eai se laumahimahihima, se laehesuara, abo tatao se heribadi
 si ene, 'Mate eai i torouio:' ata borabora murimuritana,
 borabora bagubagunana wa i saedioi." ⁶⁵ Pilato i ribalau
 aridi eai i ene, "Tautaitawata tauiala au abidi au laedi: au
 lau bousa au gudu komakomani." ⁶⁶ Abo se lau bousa wa se
 itasipoi komakomani, we'u wa se buigudulaei tautaitawata
 se heterodi se itawatai.

28*Iesu Keriso torouiona, nei asubenana ne wasana**Mk. 16.1-14; Lk. 24.1-49; Io. 20.1-23*

¹ Sabate wa ie ohi, asubena bagubagunana eai mara i uiari,
 Maria Magadala, eo Maria esau wa se laoma bousa bena se
 ita. ² Na moniinii tano i hetabutabubu ariri: paana Guiau
 ena aneru galewa eai i dobima, i laoma we'u wa bousa
 guduna eai i buihai, abo i bawabigabiga potana eai. ³ Ia ana
 ao doha namanamari, eo ana lulu ie posiposi doha sinou.
⁴ Tautaitawataina ia se matausiei, eo se tabutabubuei, doha
 se hemala taumatemate. ⁵ Aneru arinadi i heuio i ribalau
 sisine aridi eai i ene, "Tabu au matausi: ea nuatuiyao omi
 Iesu, ia se hesatauro wa, au eooi. ⁶ Ia inai nige'e: ia i toroo,
 doha i ribaeyao. Au laoma, Guiau edi abatorenana ede au ita.
⁷ Au lau heuheula, ena heaheatayao au heribadi ia mate eai
 i torouio'o: ia abo i bagunawa Galilaia eai; taiede ea herib-
 amiu ede ina." ⁸ Isi se lauheuheula bousa wa se laugabaei
 nuadi se matamatausi eo se kode ariri: se aitauiyao bena ena
 heaheatayao wasana se heribadi. ⁹ Ma laudi ena heaheatayao
 bena wasana se heribadi, na Iesu i laubagibagiedi, i ene,
 "Eauedo!" Se laoma se abilau aena eai, ia se aihelahui. ¹⁰ Iesu

abo i ribalau aridi eai, i ene, “Tabu au matausi: au lau egu tataoyao au heribadi se lau Galilaia eai, nei eai abo se itagu.”

¹¹ Ma laudi, na tautaitawataina headi eanua eai se laoma, kohena lailaidi ginauri wa se tubu wa se heribadi. ¹² Maedi babada abo se oigogo, se oioiriba, moni lailai se mosei iala tataodi aridi eai. ¹³ Si ene, “Omi abo au ene, ‘Maiona eai, ma enomai, ena heaheatayao se laoma se laemodigauiyao.’ ¹⁴ Ena wasa ta ie tubu gavana i ataiei, ai abo enamiu ai riba, arinai abo au lolo.” ¹⁵ Arinai abo moni wa se abidi, doha wau se heatadi wa se abiwataidi: wau riba wa Iudea tataodi se ribaribaei i laoma e huia ta.

Iesu Galilaia eai: lauhesomna saesaena

Mk. 16.15-18

¹⁶ Heaheata saudoudoi-esega abo se lau Galilaia eai, oea tupina eai wa arinai Iesu i heribanonohaidio. ¹⁷ Ia abo se ita, se aihelahui: headi mo se heasaasaei. ¹⁸ Iesu i laoma i ribalau isi aridi eai, i ene, “Gigiboridi gamagamagari se ledima arigu eai, galewa eai eo tanoubu eai hinage. ¹⁹ Arinai abo au lau eanua gamagamagari au heatadi, au hebapatisoidi Tamana eo Natuna eo Earua Tabuna esana eai. ²⁰ Hari ginauri hari ginauri gamagamagaridi ea lauhesommiu ta, abiabiwataina au heatadi, na huia gamagamagari eau maemiu, i lau e tanoubu ana sigasiga eai.” Amen.

MAREKO ENA EVANELIA

Ioane Baptiso ana paisoa

Mt. 3.11; Lk. 3.1-16; Io. 1.6-8, 19-27

¹ Iesu Keriso, Eaubada Natuna, ena evanelia ina ie tubu.

² Doha peroveta edi uriuri eai si ene,

“Egu tauwasa ea hetamarimugaiem, oa em eda i sepanonohai (Mal. 3.1);

³ Esau arinana barabara eai i paipainawatai, i ene, Guiau ena eda au sepanonohai, eo ena eda au hedudurai” (Isa. 40.3).

⁴ Ioane barabara eai i hebahebaptiso, eo i gugua teina bap-tiso eai ta bena nuadi se buidi, edi baaea abo se ribagigiridi.

⁵ Iudea se ohihai, eo isi hinage Ierusalema taumiaina, se torohai se tupagogoma ia arinai, ia abo i hebapatisogogoidi Ioridana sagana eai, edi baaea abo se ribahemasarahadi.

⁶ Ioane ana lulu kamela wiana: ena nogi sarai opina, lokasi eo amoamo i aidi. ⁷ Ia i laugugua, i ene, “Esau murigu eai i laoma i saetawatawaigu, eau nige ea lolo ea durudobi ia aena umna mainana ea eairi. ⁸ Eau goila eai ea hebapatisoimiu ta, na ia Earua Tabuna arinai abo i hebapatisoimiu.”

Iesu ena bapatiso

Mt. 3.13-17; Lk. 3.21, 22

⁹ Nei asubenana ne Iesu Nasareta Galilaia eai i laoma Ioane Ioridana eai i hebapatisoi. ¹⁰ Ia goila eai ma-esega i gaeosaema, galewa ie ita i taigari, Earua ana ao doha bunebune i pesadobima ia potana eai. ¹¹ Arina esau galewa eai i laoma, i ene, “Oa Natuyogoyogoigu, nuagu u helolo ariri” (Ps. 2, Isa. 62).

Iesu ena noho

Mt. 4.1-11; Lk. 4.1-13

¹² Abotai Earua Iesu i woeai i laei barabara eai. ¹³ Asubena tatao-labui-si-mate barabara eai Satani ia i nohoi, sarai aiailetadi aridi eai ie mia; aneru ia se bobodiei.

Galilaia eai paisoa bagubagunana

Mt. 4.12-17; Lk. 4.14

¹⁴ Ioane numa masigiri eai se tutuguduiyao abotai Iesu Galilaia eai i laoma Eaubada ena basileia wasa lolona i lauguguaiei. ¹⁵ I ene, “Huia wa i lagemao, Eaubada ena basileia i hanahanaumao; nuamiu au buidi, evanelia ta au awamamohoei.”

Petero eo Anederea adi eoga

Mt. 4.18-22; Lk. 4.10-11; Io. 1.35-42

16 Ia Galilaia gabogabona salagomgomna eai i laulau Simona ma ena tau Anederea edi hiana se galaei gabogabo eai: isi taudi labui tauyamayama. 17 Iesu i heribalaedi i ene, “Au hemuriwataiguma, abo au hemala tatao tauyamayamaidi.” 18 Ma-esega se torohai edi hiana se laugabaedi ia se hemuriwatai. 19 Ia i bagunalau Sebedaio nanatunayao Jamesi ma ena tau Ioane i itadi, isi hinage waga eai edi hiana se eome. 20 Ma-esega i eogalaedi: isi tamadi Sebedaio ma ena tauhaiwawari waga eai se pesagabaedi, Iesu murina eai se lau.

Iesu Kaperenauma eai demoni i aiduiedi

Lk. 4.31-37

21 Isi Kaperenauma eai se lage: asubena Sabati eai i awasae sunago alona eai, i lauheata. 22 Ena lauheata se nooei: i ribahasahasaidi ma gigiborina, nige doha tauuriuri tataodi. 23 Sunago wa alona eai tau esau earua biibii i lui, i eabayaba. 24 I ene, “U otaotaimai, oa saha arimai eai bena u abi? Iesu Nasareta e? Oa u laoma bena u hetatagorigorimai wa? Ea itam, oa Eaubada ena Hetabu Tauna ede.” 25 Iesu ia i siooei, i ene, “U monou, u lulagema.” 26 Earua biibiina ia i basaaraatei, eo i eabayaba lailai, i lulagema. 27 Isi gamagaridi abo se noo, se heunaboisahaedi, si ene, “Teina ginauri ta saha? Teina lauheata harihariuna ta saha? Ena gigibori eai earua biibiidi i ribahesomdi abo se hebigawatai.” 28 Nige baeaona ia wasana ie lau Galilaia i hetaiiriyama.

Iesu Simona bosiana sine i hemaui

Mt. 8.14-15; Lk. 4.38-39

29 Sunago eai se pesama, se awasae Simona ma ena tau Anederea edi numa eai, Jamesi eo Ioane maediyao. 30 Simona bosiana sine ie ota, tauna se gigibori ariri, arinai Iesu se heribalaedi. 31 I laoma, i abilau ia nimana eai i abihetoro; arinai gigiborina wa i lautom, sine wa abo i haitalaidi.

Demoni se aiduiedi: gamagaridi adi iwala i helautomdi

Mt. 8.16-17; Lk. 4.40-41

32 Maimailahi eai, mahana i duio, tauasiasiebo gamagaridi se woeaidima ia arinai, eo isi demoni se luidi hinage. 33 Eanua tataodi gamagaridi se oigogoma dobila eai. 34 Tauasiasiebo udoi, udoi, gamagaridi i hemauidi, demoni hinage gamagaridi i aiduiedi, demoni wa nige arinadi paana ia se nuauiyao.

Iesu i uura: lauguguia laulau Galilaia eai

Lk. 4.42-44

35 Mara sora nige i iuiari Iesu i torohai ie pesa, ie lau malatupama eai, nei eai i lau-uura. 36 Simona eo isi maenayao

wa ia murina eai se lau. ³⁷ Ia se lobai se ribalau ia arinai, si ene, “Tatao gamagaridi se eooim.” ³⁸ Ie ribalau aridi eai, i ene, “Ta lau eanua headi hanahanau eai bena hinage nei eai ea laugugua: hesabana ede ina ea laoma ta.” ³⁹ Galilaia se hetaiiri edi sunago alodi eai i laugugua, demoni hinage i aiduiedi.

Taulepera esau i uruosi

Mt. 8.2-4; Lk. 5.12-14

⁴⁰ Lepera tauna esau i laoma Iesu arinai ia turina ie bono ia nuanuana eai, i awanori gadogadora, i ene, “Taba u henua, oa heaagu abina u ata.” ⁴¹ Iesu ia i nuatoatoaei, nimana i helele, i abiitalaei, ie ribalau ia arinai, i ene, “Ea henua, oa abo u aa.” ⁴² Ie riba ina doha ma-esega ana lepera i uruosi, na i aao. ⁴³ Iesu ia i ribahasahasai, abo i hetamari ie lau. ⁴⁴ I ribalau arinai, i ene, “Tabu tau esau u heriba; u lau oabom u hemasaraham kohena tauna arinai, oa se heaam wa am nima abia u abi doha Mose i lauhesomda, laulau ede meta abo se ita. ⁴⁵ Na, ia mo ie pesa i ribahemasaraha, wasana i duai i hetadada, arinai Iesu nige i laumasaraha eanua eai, ia simalaleilei eai mo ie mia, isi dimo gamagaridi eai se laoma ia arinai.”

2

Tau esau i palisi se hemaui

Mt. 9.1-8; Lk. 5.18-26

¹ Huiana nige eawalana Iesu i uio Kaperenauma; wasana abo ie lau, ia numa eai. ² Arinai tatao gamagaridi se oigogoma, numa nige susuana, numa dobilana hinage nige susuana, riba wa i guguaie aridi eai. ³ Isi abo se laoma ia arinai tau palisi esau se baheiyama, taudi hasi taubaheiyamana. ⁴ Moutuana lailai se guduguidi arinai nige edi aba laoma Iesu arinai, isi atohi se soelapai, se soeheohi, tau palisi wa ma hatahatana se hedawedobei. ⁵ Iesu edi sunusunuma ie ita, ie ribalau taupalisi ne arinai, i ene, “Natugu e, baaeam se ribagigiridio.” ⁶ Tauuriuri tataodi headi nei eai se babawa nuadi eai se heunaboisahaei, si ene. ⁷ “Teina tau ta ie saha Eaubada ie ribabaaeai ina doha? Eai baaea ribagigirina abina ie ata, Eaubada iabom?” ⁸ Edi heunaboisahausi Iesu earuana eai i lobaiyao, ie ribalau aridi eai i ene, “Teina ginauri ta sahana au heunaboisahaei? ⁹ Aitea ribariba masarahana, tau palisi arinai ea ene, ‘Baaeam se ribagigiridi,’ e abo ea ene, ‘U toro, em aba-eno u abi u lau?’ ¹⁰ Omi abo au ita Tau Natuna tanoubu eai ta ia gigiborina eai baaea i ribagigiridi,” (ie ribalau taupalisi ne arinai) i ene, ¹¹ “Ea ribalaowa oa arim eai ea ene, ‘U toro, em aba eno u abiisini, u lau em numa eai.’” ¹² Ia abo i torohai aba eno wa ie abiisini isi gamagaridi matadi

eai ie lau; gamagaridi se nooei, eo Eaubada se hedebasaei, si ene, “Teina laulau ta nabada wa nige ta itaitai.”

Levi ana eoga

Mt. 9.9-13; Lk. 5.27-32

¹³ Ia ie uio salagomgom eai tatao gamagaridi moutuadi se tupagogo ia arinai, ia abo i heatadi. ¹⁴ Ia ie baeawa, * Levi, Alepaia natuna, ie ita, takisi edi ofesi aba paisoa eai i babawa, ie ribalau ia arinai, i ene, “U hemuriwataiguma.” Ia i torohai abo murina eai ie lau. ¹⁵ Abotai Levi ena numa eai Iesu i babawa i aiiai, telona tataodi gamagaridi Iesu maena heaheatayao se bawalau; se gamagari ariri, eo ia murina eai se lau. ¹⁶ Tauuriuri tataodi, to Parisea tataodi, Iesu se ita takisi tau-tanogogo tataodi eo baeaa tataodi maedi se aiiai esega, se ribalau ena heaheatayao aridi eai, si ene, “Ia ie saha nei, telona tataodi eo baeaa tataodi maedi se aiiai esega, eo se nomgogo esega?” ¹⁷ Iesu i ataieyao abo i ribalau aridi eai, i ene, “Tatao maumauridi doketa nige se nuatui, tatao asiasiebodi mo; eau nige ea laoma tatao laulaududurai ea eogaidi; tatao baabaeaa mo nuadi abo se buidi.”

¹⁸ Ioane ena heaheatayao, eo Parisea edi heaheatayao se aiiaiudi; isi se laoma ia arinai, si ene, “Ioane ena heaheatayao, eo Parisea edi heaheatayao ie saha se aiiaiudi, na oa em heaheatayao nige se aiiaiudi?” ¹⁹ Iesu ie ribalau isi aridi eai, i ene, “Tautawasora harihariu maedi se mia esega taba nige se aiiaiudi. ²⁰ Asubenana ne abo i lagemaa tautawasora harihariu abo se laehesuara nei asubenana ne abo se aiiaiudi.

Parabole; lulu eo ile

Mt. 9.16-17; Lk. 5.36-39

²¹ “Nige tau esau lulu harihariuna i popoi lulu beabeana arinai: ata harihariuna se popoi lulu beabeana eai wa abo i tapurisi ariri. ²² Hinage nige tau esau waina harihariuna i leduhi, † sarai opina beabeana alona eai: ena doha meta waina harihariuna sarai opina i aipurisi, abo i boriri, sarai opina hinage abo i hebaeaa. Na waina harihariuna se hegoi sarai opidi harihariudi alodi eai.

Iesu, Sabati Guiauna

Mt. 12.1-8; Lk. 6.1-5

²³ Sabati eai i oiluhulau *wheat* oeana alona eai, eo ena heaheatayao, ma laulaudi, *wheat* aiiai se aiworaidi. ²⁴ Parisea tataodi se ribalau ia arinai, si ene, “U ita edi laulau ne, se saha asubena sabati laugagaeona nige se nuatui?” ²⁵ Ia ie ribalau isi aridi eai, i ene, “Davida ena laulau nige au hasiri wa, ma ana sasaguyao nei huiana ne se wesarimate?” ²⁶ Ia ie lusae

* 2:14: iaede Mataiao. † 2:22: nei tupo ne edi ile ede suisui opidi, waina e goila arinai se hegoi.

Eaubada ena numa alona eai, Abiatara kohena wasawasa huiana eai, eo areto ie ai, heana hinage i mosei ana sasaguyao se ai, aiai tabuna, hari tatao nige se ai, kohena tataodi isibom mo se ai.” ²⁷ Ia ie ribalau isi aridi eai, i ene, “Sabati se hetabuei tatao enadi: tatao Sabati enana nige’e: ²⁸ arinai Tau Natuna ia Sabati tanuagana hinage.”

3

Sabati eai nimana i tubuyaeyaelua Iesu i helolo.

Mt. 12.10-14; Lk. 6.6-11

¹ Ia i awaseuio sunago alona eai; tau esau nei eai nimana i tubu eaeyaelua. ² Isi ia se itadidini, tauna ne bena abo i hemaui asubena Sabati eai; ia bena abo arinai se hegiru. ³ Ia ie ribalau tau nimana i tubu eaeyaelua wa arinai, i ene, “U toro masarahama.” ⁴ Ia ie ribalau isi aridi eai, i ene, “Aitea laulau abo i lolo ede, asubena Sabati eai ta abihemaui e, ta aiunu?” Isi abo se monou. ⁵ Ia i matabarabara hetahetaiiridi ana ou i ealayala, ia nuana i amamna paana nuadi se oiura ariri, ie ribalau tauna ne arinai, i ene, “Nimam u heleleama.” Ia abo nimana i helelelaei: nimana wa i mauriuio doha hinage esau.

Moutuana se hemauidi

Mt. 12.15-16; Lk. 6.17-19

⁶ Parisea tataodi se lau isi maedi Herodiana tataodi, ia se oiribaei edohana bena ia abo se unui. ⁷ Iesu maena heaheatayao se lausudara se lau geregere eai. Galilaia tataodi to Iudea tataodi, moutuana lailai ia se hemuriwatai. ⁸ Eo Ierusalemata tataodi hinage, eo Idumea, eo Ioridana murina eai, eo Turia eo Sidona, se laoma ia arinai. ⁹ Ia ena heaheatayao i heribadi, i ene, waga gagirina se abi enana paana moutuana wa ata doha se hetauihiihie. ¹⁰ Ia moutuana i hemahemauidi arinai tatao asiasiebo gamagaridi ia se lauihiihie, bena ia se heasilaei. ¹¹ Eo earua biibiidi ia se ita se gurisalaoba ia nuanuana eai, se eogayoga, si ene, “Oa Eaubada Natuna ede.” ¹² Ia abo i guguiadi tabu ia se wasawasaei.

Saudoudoi se hineridi

Mt. 10.1-4; Lk. 6.12-16

¹³ Abo ie lau oea tupina esau eai, isi headi i henuadi i eogaidi, isi abo se laoma ia arinai. ¹⁴⁻¹⁵ Tatao saudoudoi-labui i hetorodi isi bena se laoma ia arinai maenayao se miamia, eo bena abo i hetamaridi se laugugua. Ia gigiborina i mosei isi aridi eai, arinai tatao asiasiebo abo se hemauidi, eo demoni hinage abo se aiduiedi: ¹⁶ Simona ia esana i torebui Petero: ¹⁷ Iamesi maena tau Ioane, Sebedaio nanatunayao, esadi hinage i torebuidi Boanere, heaheasonina doha ede,

parere nanatunayao. ¹⁸ Anederea eo, Pilipo eo, Batalomaio eo, Mataio eo, Toma eo, Iamesi Alepaio natuna eo, Tadaio eo, Simona Kanana tauna. ¹⁹ Iuda Isakariota hinage, ia taumoruina ede: isi se lau numa esau alona eai. ²⁰ Moutuana se tupagogoma, arinai ai ai nige begana se ai. ²¹ Ia ehanayao wasana se ataiei abo se lau ia bena se abinuahi, si ene, “Ia bena i eaueaure.”

Baaea esau taba nige se ribagigiri

Mt. 12.24-29; Lk. 11.14-20

²² Tauuriuri tataodi Ierusalem eai se dobima, si ene, “Belesebulo ia boeana eai, demoni edi wasawasa ena gigi-bori eai demoni i aiduiedi.” ²³ Ia i eogaidi parabole headi i ribalau aridi eai, arinai i ene, “Satani edohana Satani i aiduiei? ²⁴⁻²⁵ Taba basileia esau tupona se haitoremuri, meta basileia ne nige i torotahitahi. Taba boga headi se haitoremuri, meta adi boga nige se torotahitahi. ²⁶ Taba Satani iabom i ialaiuioi, nuana labui, ia nige i torotahitahi, abo i lautom. ²⁷ Nige tau esau i awasae gaibu mo tauoroosiara ena numa eai ena gogo i girihaidi, tauoroosiara wa i au mugaiei; abo ena numa ginauridi i girihaidi. ²⁸ Ea heribamiu ta mamohoi, baaea gamagaridi, eo Eaubada ribahebaeana tatao nanatudiyao aridi eai abo se nuatugabaedi. ²⁹ Na, ena tau esau Earua Tabuna i ribahebaeana, baaeana wa taba nige se nuatugabae, ia mate nige nosina abo i hearo.” ³⁰ Paana ede isi si ene, “Earua bii ie abi ia boeana eai.”

Boga harihariuna ribana

Mt. 12.46-50; Lk. 8.19-21

³¹ Ena tataoyao, eo sinana se lagema murimuri eai se totoro, tau esau se hetamari ia arinai, ia se eogai. ³² Moutuana ia se bawahetaiiri, se ribalau ia arinai, si ene, “Sinam, eo em tataoyao murimuri eai se eoom.” ³³ Ie ribalau isi aridi eai, i ene, “Sinagu eai? eo egu tataoyao aidimodi?” ³⁴ Isi ia se bawapaipaei i matabarabaraiddi, i ene, “Sinagu eo egu tataoyao ede ina! ³⁵ Eai to eai Eaubada ena nuatu se ginauriwatai egu tau ede, lougu ede, sinagu ede.”

4

Parabole: tauhesuhesuru

Mt. 13.1-17; Lk. 8.4-10

¹ Ia i heatauioidi geregere eai, moutuana lailai se tupagogoma ia arinai, ia waga potana eai i babawa, moutuana wa geregere eai se torogogo. ² Ginauri gamagaridi i heatadi parabole eai, ena lauheata aridi eai i ene. ³ “Au ataiei, tauhesuhesuru ie lau tuma i hesuhesuru. ⁴ I hesuhesuru, headi se beu eda gegesina eai, malagaibu manudi se laoma se

aidi. ⁵ Headi se beu malatetepari eai, tano nige bulumana, se ini heuheula paana tano i earoyaro mo. ⁶ Mahana i dalasae se wowoea: nige lamdi, arinai se wowoea. ⁷ Headi nuri boeadi eai se beu, nuri abo se ini, se ima, abo nige se ua. ⁸ Headi hinage se beu tano lolona eai, se ini, abo se tubu se ua: headi tau-esega-i-mate-saudoudoi, headi tatao-haiona-se-mate, eo headi tatao-haligigi-se-mate.” ⁹ Ia i ribalau isi aridi eai, i ene, “Ia beana eai i ataiei, abo i ataieididini.”

¹⁰ Iabom ie mia, isi headi maena heaheatayao saudoudoi-labui ia gegesina eai se bawagogo ina parabole ta se hesioei ia arinai. ¹¹ Ie ribalau aridi eai, i ene, “Eaubada ena basileia ginauri eamuyamuidi se hemasarahadi omi arimiu eai: isi murimuri tataodi ginauri gamagaridi parabole eai mo se heatadi. ¹² Isi se itaita taba nige se ita: isi se ataiei taba nige se ataiei, ata se heasibuiuioiama, eo isi baeadi abo se ribagigiridi.”

Parabole tauhesuhesuru se ribahasahasai
Mt. 13.18-23; Lk. 8.11-15

¹³ Ia abo ie ribalau isi aridi eai, i ene, “Parabole ta teina nige au nuatui wa? Parabole gamagaridi abo edohana emi nuanuatuidi? ¹⁴ Tauhesuhesuru ia ede riba tauhesuhesuruna. ¹⁵ Tuma headi se beu eda gegesina eai, isi ede, riba se hesuhesuru, Satani i heulama, riba wa se hesuru nuadi eai i abihai, i laei. ¹⁶ Tuma headi se beu tano malatetepari eai; isi ede riba wa se ataiei, se abi ma nualolodi. ¹⁷ Isi nuadi eai nige lamdi, se abi, nige baeana tatao abo se hebaaeadi teina riba ta debana eai, se alabesibesi. ¹⁸ Tuma headi nurinuri boeadi eai se beu, isi riba tauataiena. ¹⁹ Tanoubu mo nuatudi, eo gogo gamagari nuadi se amnaedi, hari ginauri se gadosisidaoidi, riba wa se hetaupurupuru, abo nige ie ua. ²⁰ Tuma headi tano lolona eai se beu isi ede tauataiena riba wa se abi, abo ie ua, headi tauesega-i-mate-saudoudoi, headi tatao-haiona-se-mate, headi tatao-haligigi-se-mate.”

Parabole: kanela
Mt. 5.15-16; Lk. 8.16; 11.33

²¹ Ia ie ribalau isi aridi eai, i ene, “Lamepa se leama abo se tore gulewa ubuna eai e abaeno ubuna eai wa? nige se tore ena aba ota tahunuana eai? ²² Ginauri gamagaridi tautayamuidi, abo se hemasarahadi; ginauri gamagaridi se toreyamuidi abo se wasawasaedi. ²³ Ena tau esau beana eai i ataiei, abo i ataieididini.” ²⁴ Ia i ribalau isi aridi eai, i ene, “Au ataiei komakomani; nonoi wa arinai au nonoiei abo hinage se nonoiei arimiu eai, eo omi tauataiena enamiu abo se helaiawa. ²⁵ Ia ie abi, enana abo se mosei, ia hinage nige ie abi, enana begana ie abi wa abo se laeudoiei.”

²⁶ Ia abo i ene, “Eaubada ena basileia doha tau esau tuma i hesuhesuru tano eai. ²⁷ Maiona eai ie eno; asubena eai i toro, uaua i kapokiarima abo ie tubu, tuma ena iniini tau wa nige i nuatui edohana. ²⁸ Tano iabom i abiheiniyama, i ini bagubaguna, abotai abo ie boga, e abotai abo * sitona ie suna boga alona eai. ²⁹ Sitona aiaina abo ie suna, ia abo ie tom, paana masuri ie lage.” ³⁰ Ia abo i ene, “Eaubada ena basileia ta saha arinai ta heaheasoniei? Ginauri esana abo arinai ta heaheasoniei? ³¹ Ia doha hinage sinapi tumana, esega se umai tano boeana eai, i gagiri ariri, tuma gamagaridi tano boeana eai iabom i gagiri ariri. ³² Se umai, abo ie tubu lailai, oegi gamagaridi ia abo i tubutawatawaidi, lagana lailaidi se ini, malagaibu manudi abo se toalau loguloguna eai.” ³³ Teina doha ena riba gamagaridi i heatadi parabole eai, isi edi sibasiba i heaigonogonoaiei. ³⁴ Riba parabole eai mo ie ribalau aridi eai; isibom mo se mia suara, riba aniodi abo i hemasarahadi ena heaheatayao aridi eai.

Iesu wowori ie ribahetaru

Mt. 8.23-27; Lk. 8.22-25

³⁵ Meta asubenana ne, maimailahina eai, Iesu ie ribalau aridi eai, i ene, “Ita ta awasi, ta lau hari sana awasi eai.” ³⁶ Isi tatao moutuana se hetamaridi se lau, ia se abi waga eai, isi maedi. Waga headi maedi se lau. ³⁷ Mana lailai abo ie toa, butubutu i iniinisae waga alona eai, bena i monau. ³⁸ Ia ie eno waga tupo lalaki eai, unua potana eai; ia abo se hanoi, se ribalau ia arinai si ene, “Tanuagamai e, ai ata doha aie mate, oa nige u nuatuimai?” ³⁹ Ie toro, mana abo i ribahetaru, eo ie ribalau butubutu arinai, i ene, “Besi, u lautom!” Mana abo ie motu; i daumori ariri. ⁴⁰ Ia abo ie ribalau isi aridi eai, i ene, “Saha au matausini? Edohana nige emi sunuma?” ⁴¹ Isi abo se matausi ariri, edi ribariba si ene, “Ina tau ta tau sahasahaina, mana eo butubutu hede ia se awaabiei?”

5

Gadara eai Iesu demoni i aiduiedi

Mt. 8.28-34; Lk. 8.26-37

¹ Isi abo se dunasae hari sana awasi eai, Geresene edi oea eai. ² Ia waga i pesagabaei, tau esau earua biibii se lui bousa eai i laoma Iesu i hailobai. ³ Tau wa ena aba miamia bousa eai; eo nige tau esau abina ie ata bena i auau, maina poasi eai hinage nige se auau. ⁴ Huia gamagari ia se pai, maina poasi eai se auau, poasi abo i hetamotudi; nige tau esau abina i ata bena ia i hemanasa. ⁵ Huia gamagamagari, maiona to asubena, ia oea eai, eo bousa eai i miamia, i eabayaba, eo sapaila ie abi i aisasaroiuioi. ⁶ Na, Iesu ie ita ia eda

* **4:28:** aiai tumatumana doha wheat, corn e rice.

lohaloha eai abo i aitauteau i aihelahui. ⁷ Ie eaba lailai, i ene, “Iesu e, Eaubada saesaeairina Natuna e, abi saha abo ea abi arim eai? ea awanorilaowa Eaubada esana eai, tabu u heamamnagu.” ⁸ Iesu ie ribalau ia arinai, i ene, “Earua biibii e, tau me u pesagabaeama.” ⁹ Iesu i hesiolau ia arinai, i ene, “Esam eai?” Ia abo i heuio, i ene, “Eau esagu ede Legeona, paana ai gamagarimai hinage.” ¹⁰ Ia i awanoridaoi i ene tabu i aiduiedi ina eanua eai ta. ¹¹ Oea lalalai hanahanaudi eai sarai eawoidi lailai se dumudumuri. ¹² Demoni gamagaridi se awanorilau ia arinai, si ene, “U hetamarimai abo ai lulau tenei sarai eawoidi ne boeadi eai.” ¹³ Iesu ie eari, Earua biibiidi gamagaridi abo se pesa se lulau sarai eawoidi boeadi eai: isi abo se aitauteau, se leta, se dobi padipadi eai, se beugogo gabogabo eai, abo se galamosi. Isi tausani labui.

¹⁴ Sarai wa tauheaheaidi abo se dago wasa wa se wasaduaiei eanua eai, eo gougou eai. Eanua tataodi abo se lau, laulau ne bena abo se ita. ¹⁵ Isi Iesu arinai se lage, tau wa demoni se lui wa se ita ie bawabigabiga, eo lulu ie lui, hinage ie sabaauiei; isi abo se matausi. ¹⁶ Isi tautana enadi se wasaduai, ia ena abiabina demoni tauluina wa arinai, eo sarai eawoidi wasana hinage. ¹⁷ Isi abo se awanorilau Iesu arinai, edi eanua ne bena i laugabaei. ¹⁸ Ia waga eai ie awasae, demoni tauluina wa i awanorilau bena ia maena. ¹⁹ Iesu nige ie eari, na ie ribalau ia arinai, i ene, “U lau em asa ehamyao aridi eai Eaubada ena gigibori i hemasaraha oa arim eai, eo i nuatoatoaim hinage, u heribadi.” ²⁰ Ia abo i lau, Dekapoli eai Iesu ena gigibori i wasaduaiei, eo tatao gamagaridi se noo ariri.

*Iesu sine i hemaui, eo lairo natuna siu mate eai i heterouioi
Mt. 9.18-26; Lk. 8.41-56*

²¹ Iesu ie geru waga eai ie uio hari sana awasi eai, tatao gamagaridi se tupagogoma ia arinai: ia gabogabo hasarina eai. ²² Sunago tanuagana esau i laoma ia arinai esana lairo; ia Iesu ie ita, ia abo i gurisalaoba Iesu aena eai. ²³ Ia ie riba gadogadoralau ia arinai, i ene, “Natugu siu gagirina hanahanau ata ie mate; u laoma nimam u saolaei ia potana eai abo i lolo, ia abo i mauri.” ²⁴ Iesu maena se lau.

Eo tatao gamagaridi ia se hemuriwatai, ia se heduheduiahalai. ²⁵ Sine esau ana asiebo osina i laulau miana borimai saudoudoi-labui. ²⁶ Doketa gamagaridi se laoma ia arinai, arinai ena moni se heohi, ana asiebo nige i lautom, i laulaubodauioi hinage i helai. ²⁷ Ia Iesu wasana i ataieyao, ia tatao moutuadi muridi eai i laoma, ia ana lulu i abiita. ²⁸ Ia ena nutatu i ene, “Taba ena lulu mo ea abiita abo ea lolo.” ²⁹ Maesega ana asiebo osina i lautom; tauna eai amnana i ataiei ana iwala i tatapesa. ³⁰ Iesu i nuatulobai gigiborina i laulaei, i

sinibuiuiuo tatao moutuadi aridi eai, i ene, “Agu lulu ta eai i abiiayama?” ³¹ Ena heaheatayao abo se ribalau ia arinai, si ene, “Tatao moutuadi ue itadi se aiheduheduiahalaim, saha ede u hesioi, u ene, ‘Eai ede i abiitaguma?’ ” ³² Iesu abo i itahetaiiri sine wa ena laulau nei doha ie ita. ³³ Na, sine ne ie ita ena abiabi ia arinai i nuatulobai i matausi, eo i tabutabubu, ia abo i laoma i gurisalaobadobi Iesu nuanuana eai, ena laulau i ribahemasaraha. ³⁴ Iesu ie ribalau ia arinai, i ene, “Natugu sine e, oa em sunuma eai arinai ede u lolo; u lau ma nuabigam am iwala me it tatapesao.”

³⁵ Ma ribaribana headi sunago tanuagana ena numa eai se laoma, si ene, “Natum siu wa i mateo; Tanuagada sahana u hemode?” ³⁶ Iesu teina riba ta i ataiei, ie ribalau sunago guiauna arinai, i ene, “Tabu u matausi, u awamamohoei mo.” ³⁷ Ia tatao ie ribanuahidi ia tabu se hemuriwatai, Petero mo, eo Iamesi, eo Iamesi ena tau, Ioane. ³⁸ Ia abo ie lage sunago guiauna ena numa eai, isi se hetalalilolilousi i itadi, eo se doudou ariri hinage. ³⁹ Ia i awasae numa alona eai, i ribalau aridi eai, i ene, “Saha au hetalaliloliloiei, eo au doudoui? Siu me nige ie mate, ie eno mo.” ⁴⁰ Isi ia se marumaruhiei. Isi gamagaridi i aiduedi se pesa murimuri eai; siuna ne tamana ma sinana ie woeaidi, ma ana sasaguyao hinage se lusae biri eai siuna ne ena aba ota eai. ⁴¹ Ia siu nimana eai ie abilau, i ribalau ia arinai, i ene, “Talita kumi,” heaheasonina ede, “Siu e, ea heribam ta, u toro.” ⁴² Siuna ne i torohai, eo i laulau; ena borimai saudoudoi-labui. Isi se nooariariri. ⁴³ Ia isi i guguiaidi tabu se wasawasaei, eo i lauhesomdi, i ene, “Siu me aiai begana au mosei i ai.”

6

Iesu ie uio Nasareta *Mt. 13.54-58; Lk. 4.16*

¹ Nei dimo ne i laugabaei abo i laoma ena eanua tahunuana eai; ena heaheatayao ia se hemuriwatai. ² Asubena Sabati esau i hearo, ia abo i hetubu i heatadi sunago alona eai tatao gamagaridi ena riba se ataiei, abo se noonoei, si ene, “Tau ta, teina ginauridi ta, haedi i abidi? Sonoga sahasaha ina se mosei ia arinai paisoa gigiborina teina ia nimana eai i ginauridi? ³ Teina kamda natuna, e nige’e wa, Maria natuna, Iamesi ena tau, eo Iose, eo Iuda, eo Simona? Ia lounayao ita maeda ta miamia wa, e nige’e?” ⁴ Na, Iesu i ribalau isi aridi eai, i ene, “Peroveta se heasisiei ena eanua tahunuana eai mo nige’e, ana bogao mo nige’e, ena asa eai mo nige’e.” ⁵ Arinai nei eanua eai ena gigibori bena i hemasaraha nige abina i ata, tatao asiasiebo mo headi ia nimana i toresaei isi potadi eai i

hemaauridi. ⁶ Isi edi awayagara i nooei. Ia ie lau eanua gougou gamagaridi eai, tatao i heaheatadi.

Saudoudoi i hetamaridi se laugugua

Mt. 10.1-42; Lk. 9.1-6

⁷ Saudoudoi i eogaidi, labui to labui i hetamaridi, gigiborina i mosedi earua baaedi abo se aiaiduedi. ⁸ Ia abo i heribadi isi edi aitaumana gogo tobona tabu se bahei, tabu aiai, tabu moni tobo alona eai, tue ahaaha mo se abi. ⁹ Aeum mo se audi; tabu pereue labui se luidi. ¹⁰ Ie ribalau aridi eai, i ene, “Dimona emi aba lusae numa alona eai arinai au mia, e, dimo wa abo au laugabaei. ¹¹ Eai to eai nige se oeamimiu, eo emi riba nige se ataiei, au lau na geregere se patu aemiu eai au oiluiluigabaedi, isi heiheinoidi. Mamohoi ea heribamiu ta, hedudurai asubenana eai Sodoma eo Gomara edi baaea si ene nige ie lai doha wau eanua wa.” ¹² Isi abo se lau, se laugugua bena tatao nuadi abo se buidi. ¹³ Demoni gamagaridi se aiuedi: tauasiasiebo gamagaridi bunama eai se heausidi, eo se abihemaauridi.

Heroda nuana i ipeipesi; Ioane bapatiso se unui wa

Mt. 14.1-14; Lk. 9.7-9

¹⁴ Heroda, Wasawasa, Iesu wasana i ataiei, i ene, “Nuana Ioane Bapatiso ede ina, ia mate eai ie torouioma, arinai ede paisoa gigibori ia i hemasarahadi.” ¹⁵ Headi si ene, “Nuana Elia”; eo headi si ene, “Nuana peroveta, doha hinage peroveta beabeana esau.” ¹⁶ Heroda abo i ataiei, i ene, “Ia ede Ioane, ia gadona ea totom, mate eai i torouioma.” ¹⁷ Paana Heroda i ribayao Ioane abo se toai, se au, numa tutugudu eai se tore, paana Heroda ena tau Pilipo monena, Herodia, i tawasorai. ¹⁸ Ioane ie ribalau Heroda arinai, i ene, “Laugagaeo u utusi, si ene, oa em tau monena tabu u tawasorai.” ¹⁹ Arinai Herodia ia i ouyalayalaei, ia unuina i henua; nige ana mata paana. ²⁰ Heroda Ioane i matausiei, i italobai ia tau laulaududurai, eo ia hetabu tauna, ia Ioane i itawataikomakomani; ia ena riba i ataiei, nuana i tuditudi, nuana hinage i lolo. ²¹ Ena nuatu i nuatui, e, huiana ie lage Heroda ena huia labasi, ia mataasi i mataasiei maena guiau wasawasadi, eo Galilaia babadadi, ²² Herodia natuna, siu, ia abo ie lau isi matadi eai ie saga, Heroda ma ana matagabanu nuadi se lolo, se kode ariri, arinai wasawasa ie ribalau siu ne arinai, i ene, “Oa em gadosisi aisana u awanorima, abo ea leawa.” ²³ Ia ie riba, abo i aigora, i ene, “Ena arigu eai ginauri u gadosisie, u ribaei, abo ea leawa enam, ena u henua egu basileia teina tehana esau enagu, tehana esau enam.” ²⁴ Siu ne abo ie lau sinana arinai i hesiolau, i ene, “Saha abo ea awanorini wa?” Ia i ene, “Ioane Bapatiso uruuruna.” ²⁵ Ia abo i uioma heuheula

guiauna ne arinai, i awanorilau, i ene, “Eau egu gadosisi ede teina, Ioane Bapatiso uruuruna abo u usaiama gaeba alona eai.” ²⁶ Wasawasa wa nuana i baaea ariri; na paana ana matagabanu ena aigora se ataieyao, arinai ede ia nige i talaoriori. ²⁷ Wasawasa tauai aiunu esau ie heribalaei, i ene, “Ioane uruuruna u abiyama.” Ia abo ie lau numa tutugudu eai, ia gadona ie tomutusi. ²⁸ Ia uruuruna i baheiyama gaeba alona eai, i moselaei siuna ne arinai, siu ne i laei sinana arinai. ²⁹ Ioane ena heaheatayao abo se ataiei, abo se laoma, eaibarabarana se bahei, bousa eai se tore.

Aposotolo se uioma edi aba laugugua bagubaguna eai
Lk. 9.10

³⁰ Apostolo tataodi se tupagogoese gaidima Iesu arinai, wasa gamagari ia se heriba, isi adi wawari, eo edi lauheata se wasaduaiei ia arinai. ³¹ Ia ie ribalau isi aridi eai, i ene, “Omibom au lausarama, ta lau malatupama eai, ta aiyawasi sora.” Tatao gamagari se laoma na, se lau, se hemodedi nige edi huia bena se aiyawasi.

Tausani haligigi se heaidi

Mt. 14.13-21; Lk. 9.10-17; Io. 6.5-13

³² Isi waga eai se geru mahimahihi, se lau malatupama eai. ³³ Isi edi aba lau ne tatao se ita, gamagaridi se nuatuiyao, eanua gamagamagari eai isi abo se aita tau, se lage bagunao, abo se tupagogoma ia arinai. ³⁴ Iesu abo ie dunasae moutuana lailai i itadi, eo i nuatoatoaidi, paana isi doha mamoe nige taumiataunidi; ia i hetubu ginauri gamagaridi i heatadi. ³⁵ Mahana ie tarueo, ena heaheatayao se laoma ia arinai, si ene, “Malatupama ina mahana hede i duio ta. ³⁶ U hetamaridi se lau eanua gougou eai, eo eanua hanahanau eai, ai ai adi se uneune; isi ai ai adi nige’e.” ³⁷ Ia i heuio, ie ribalau aridi eai, i ene, “Ai ai adi omi au mosedi.” Isi abo se ribalau ia arinai, si ene, “Denari tataosaudoudoi-se-mate taba ai abidi adi ai ai ai uneune wa, abo ai mosedi se ai?” ³⁸ Ia ie ribalau isi aridi eai, i ene, “Ami falawa wa hisa? Au lau au hasiridi.” Isi se hasiridi, abo si ene, “Haligigi, eo eama labui.” ³⁹ Ia ie ribalau isi aridi eai, i ene, “Gamagaridi au hebawaporuporudi lei potana eai.” ⁴⁰ Isi abo se bawabigabiga, hari poru tatao haligigi se mate, hari poru tatao-labui-se-mate-saudoudoi. ⁴¹ Ia falawa haligigi i abidi, eo eama labui, i itaitasae galewa eai, i aihelahui; falawa abo i ihidi, abo i mosedi ena heaheatayao aridi eai, isi abo se peiauri moutuana lailai wa nuanuadi eai, eo eama labui hinage i soiedi isi gamagaridi adi. ⁴² Isi gamagaridi se ai ai, e, bogadi se sese. ⁴³ Isi falawa eo eama aitoredi se tanogogoidi, bosa saudoudoi-labui se hemonaudi. ⁴⁴ Isi ai ai tauaina nuana tatao tausani haligigi.

*Iesu gabogabo potana eai i laulau**Mt. 14.22-32; Io. 6.15-21*

⁴⁵ Ia ena heaheatayao i nuaoidi arinai se lau waga eai se geru baguna, se lau Betesaida eai, hari sana awasi eai, iabom ie mia moutuana i hetamaridi. ⁴⁶ Ia i hetamaridi se lau, ia abo ie dalasae oea tupina esau eai, i lauuura. ⁴⁷ Mahana ie duio, waga ie lau gabogabo duaduarina eai, ia iabom ie mia oea eai. ⁴⁸ Ia i itadi, isi eare eai eawasidi se motu, mana ie toama matadi eai, bulinuana eai ie lau isi aridi eai, butubutu potadi eai, i laolaoma isi hasaridi eai. ⁴⁹ Isi ia se ita butubutu potana eai i laulau, isi edi nuatu, si ene bena earuyarua. Isi abo se eabayabaei; ⁵⁰ isi gamagaridi ia se ita, se matausi ariariri. Ia ie ribalau isi aridi eai, i ene, “Nuamiu se taru: eau ede ina; tabu au matausi.” ⁵¹ Ia ie gerasae waga eai isi aridi eai, mana abo ie motu; isi abo se noo to se noo ariariri. ⁵² Paana falawa gagiridi laulauna wa nige se nuatulobai, isi nuadi se oiura.

*Genesareta eai Iesu tatao i hemauridi**Mt. 14.34-36*

⁵³ Isi se lage hari sana awasi eai, Genesareta eanuana eai, nei eai se lopatu. ⁵⁴ Isi waga se pesagabei, tatao ia se italobai, ⁵⁵ se aitauteu, nei eanua eai eo eanua maudoudoina se hetaiiri, ena aba lage se ribaei, isi se ataiei, tauasiasiebo ma hatahatadi se laedi ia arinai. ⁵⁶ Eanua gamagamagari ia i baeawaidi, gougou eanuadi ealeba eai, eo eanua lailaidi; isi tauasiasiebo se ledima, baubau eai se hebawadi, se awanorilau ia arinai, ana lulu dedeana bena se abiita; isi gamagaridi ana lulu se abiita abo se mauri.

7*Parisea adi ribasuu**Mt. 15.1-20*

¹ Parisea tataodi, eo tauuriuri tataodi headi Ierusalema eai se laoma, isi se oigogoma ia arinai. ² Ena heaheatayao headi isi se itadi aiiai se ai ma nima biibiidi, nige se nimadeuri, si ene se ponori. ³ Paana Parisea tataodi, eo Iudea tataodi gamagaridi urutubu laulaudi se nanabuedi, aiiai nige se ai gaibu mo, se nimadeuri baguna. ⁴ Edi aba uneune eai isi se uioma ena nige se heauioidi aiiai nige se ai: laulau gamagaridi hinage isi se nanabuedi ina doha, bia, eo gulewa, eo bianomnom udoi, isi se deuridi. ⁵ Parisea tataodi, eo tauuriuri tataodi se hesiolau ia arinai si ene, “Em heaheatayao urutubu laulaudi se saha nige se nanabuedi, isi adi aiiai se aidi mo, nige se nimadeuri?” ⁶ Ia i heuio, ie ribalau aridi eai, i ene, “Omi tatao boraborasom, Isaia i heaheasoniemiu, doha ie uri, i ene, ‘Isi awadi eai mo se aihelahuigu,

isi nuadi eai se tausuaaraegu.

⁷ Isi edi aihelahuigu nige ana ao, tatao

edi laugagaeo mo se heaheatadi.’ (Isa. 29.13).

⁸ Eaubada ena laugagaeo au torehesuaradi, tatao edi laugagaeo mo au abididinidi; eo ginauri gamagaridi nei doha au abiwataidi.’” ⁹ Ia i ribalau isi aridi eai, i ene, “Taiede,

Eaubada ena laugagaeo au otaotaedi bena urutubumiu edi laugagaeo au sogohidi. ¹⁰ Mose i ribaeyao, i ene, “Tamam eo sinam u gigihebigadi’: (Ex. 20.12). eo i ene, ‘Esau tamana eo sinana ie ribahebaeadi abo se unuhemate’: (Ex. 20.17).

¹¹ Omi emi ribaribana, au ene, ‘Ena tau ie ribalau tamana e sinana arinai i ene, Koban, ia ede ainauia, egu gadosisi, eo egu heasisi, eo egu gogo gamagari ea mosei Eaubada arinai, ea ainauiai’: ¹² Au ene taba tamana e sinana ia nige ie gigihebigadi, taiede, i lolo hinage. ¹³ Omi ina doha urutubumiu mo edi laulau au abiwataidi, eo Eaubada ena riba au talaoriori: laulau gamagaridi ina doha au nanabuedi.” ¹⁴ Moutuana wa i eogaidi se laoma ia arinai, abo ie ribalau isi aridi eai, i ene,

“Omi gamagarimiu egu riba au ataiei, eo au nuatui: ¹⁵ Ginauri ina murimuri eai ta, tau ie domdi bogana alona eai ia nige se hepii; boeana eai se laoma temeta mo tau abo se hepii. ¹⁶ Ia beana eai i ataiei ia abo i ataiedidini.” ¹⁷ Ia abo i awasae numa alona eai moutuana wa i laugabaedi, ena heaheatayao parable ta teina se oimuriei ia arinai. ¹⁸ Ia ie ribalau isi aridi eai, i ene, “Omi hinage ma supusupumiu? Nige au nuatui ginauri gamagari murimuri eai ta se domdi tau bogana alona eai, ia nige se heniginigi. ¹⁹ Nige se lau ia nuana boeana eai, bogana eai mo, aiai aba hinerina eai baaeana abo se gabaei?” ²⁰ Eo i ene, “Ginauri wa tau boeana eai se laoma, tau wa abo se hepii. ²¹ Tatao nuadi eai sanapu baaeadi se saema, mata’eo, eo inainana, eo aiunu, ²² eo aiyahari, eo aiaromagigiri, eo baaea gamagari, eo laulau borabora, eo nuatu bii, eo Eaubada se ribahebaeaa, eo nuasaesae, eo eauyaure. ²³ Teina ginauri baaea gamagaridi nuadi eai se laoma tau aba heniginigina.”

Kanana sinena natuna siu se hemaui

Mt. 15.21-28

²⁴ Nei eai i torohai ie lau Turia eo Sidona anadai eai, eo ie awasae numa esau alona eai ena gadosisi tabu tau esau ia i ita: na ia nige i tauyamui. ²⁵ Sine esau, ia natuna siu gagirina, earua baaea ie lui, ia wasana i ataiei, abo ie laoma i tabaohu ia aena eai. ²⁶ Sine wa Heleni sinena, boga Penesia Suria: ia ie riba gadogadora ia arinai, ia demoni natuna siu ne arinai bena i aiduiei. ²⁷ Na, Iesu ie ribalau ia arinai, i ene, “Merumeru sora bogadi si sese baguna: taba merumeru adi aiai se gabalaei kedewa aridi eai, temeta doha nige i

lolo.” ²⁸ Sine ne i heuio, ie ribalau ia arinai, i ene, “Guiau e, mamohoi, na merumeru adi aiai mapuradi taba se beu hatahata ubuna eai, kedewa hinage se aidi.” ²⁹ Ia ie ribalau sine ne arinai, i ene, “U lau em asa eai, demoni wa natum siu boeana eai, i lauo murimuri eai, wau riba wa u ribaei debana eai.” ³⁰ Ia abo ie lau ena numa eai, natuna siu ne ie ota taubiga ena aba eno eai, eo demoni i lauo murimuri eai.

Tau bea doodo se helolo

Mt. 9.32

³¹ Ia Turia eo Sidona adi sigasiga i laugabaedi, ie lau Dekapoli oea duaduarina eai, abo ie lage Galilaia gabogabona eai. ³² Isi tau bea doodoona, eo arina wesawesasana se woeai ia arinai: isi abo se awanorilau ia arinai ia nimana bena i saosaei ia potana eai. ³³ Moutuana boeana eai i woeahai i laehesuara, ia nimana ie saolaei ia beana gudadi eai, i gariso, memenana abo i abiitalaei. ³⁴ Ia i itaitasae galewa eai abo eawasina i tuhalei, abo i ribalau ia arinai, i ene, “Epata,” heaheasonina ede, “U malapai.” ³⁵ Ia beana abo se malapai, memenana abo ie tabonosi, ia riba abo ie ribaei i masaraha. ³⁶ Ia i guguiadi, abo awadi i tawaidi: isi nige se ataiei, se wasaduaiei mo. ³⁷ Isi abo se noo ariariri, si ene, “Ginauri gamagaridi i ginauridi se lolo: tatao doodoodi to beadi i hemalapai, eo tatao unaunadi memenadi i hetabonosidi.”

8

Tatao tausani hasi se heaidi

Mt. 15.32-39

¹ Nei asubenana ne moutuana wa i lai ariri, isi nige adi aiai, Iesu ena heaheatayao i eogaidi, abo ie ribalau isi aridi eai, i ene, ² “Moutuana lailai ta ea nuatoatoaedi paana isi asubena haiona eau arigu eai se mia, nige adi aiai. ³ Ena ea hetamaridi se lau edi eanua eai ma aiwesaridi, ata doha se aitu eda eai: headi edi eda se loloha.” ⁴⁻⁵ Ia ena heaheatayao ia se heuio si ene, “Barabara ina, aiai haedi aba abina moutuana lailai ta abo ta hegonoahidi?” Ia i hesiolau isi aridi eai, i ene, “Omi ami falawa wa hisa?” Isi si ene, “Haligigi-labui.” ⁶ Ia tatao gamagaridi ie ribahesomdi se bawa tano eai: ia falawa haligigi-labui wa i abidi, i aihelahui, abo i ihidi i mosedi ena heaheatayao aridi eai moutuana wa nuanuadi eai se peiauri, isi abo se soiiedi. ⁷ Isi eama gagiridi headi hinage se abidi; i aihelahui, abo ie ribahesomdi isi nuanuadi eai se peiauri. ⁸ Isi se aiai, e, bogadi se sese; aiai mapulana isi abo se tanogogoi bosa haligigi-labui. ⁹ Nuana tauaina tausani hasi: ia abo i hetamaridi isi abo se lau.

Parisea heiheinoi se hesioei: obue heaheasonina i ribahasa-hasaidi

Mt. 16.1-12

¹⁰ Ia maena heaheatayao waga esau eai se geru abo se dunasae Dalemanuta eai. ¹¹ Parisea tataodi se taulagama, se hesiolau ia arinai, galewa heiheinoina esau bena si eooi, arinai ia se nohoi. ¹² I nuadubu, i ene, “Isi ta, saha heiheinoina si eooi? Ea heribamiu ta mamohoi, heiheinoi taba nige se mosei teina isi ta aridi eai.” ¹³ Ia i laugabaedi; ie geruuio waga eai, ie lau hari sana awasi eai. ¹⁴ Ia ena heaheatayao aiai nige se abi, nuadi se hui; isi adi falawa esega mo waga eai ie ota. ¹⁵ Iesu i ribahesanapuedi, i ene, “Nanabumiu au nanabu, Parisea tataodi adi *yeast*, eo Heroda hinage ana *yeast* au itakomakomani.” ¹⁶ Isi se nuatudadaasa, si ene, “Paana nige adi aiai.” ¹⁷ Iesu edi nuatu i nuatui, ie ribalau isi aridi eai, i ene, “Ede saha au nuatudadaasaeai ina nige ami aiai ta? Ma supusupumiu, ma hekaumiu miana mo wa? Ede nuamiu masigirina miana mo wa? ¹⁸ Omi matamiu! nige au ita? omi beamiu! nige au ataiei? (Iere 5.21) omi nige au nuatui? ¹⁹ Falawa haligigi ea ihidi, tatao tausani haligigi ea mosedi se ai, aiai mapulana bosa hisa au usahemonaudi?” Isi si ene, “Saudoudoi-labui.” ²⁰ “Eo falawa haligigi-labui, tatao tausani hasi se mosedi, aiai mapulana bosa hisa au usahemonaudi?” Isi si ene, “Haligigi-labui.” ²¹ Ia ie ribalau isi aridi eai, i ene, “Omi aue saha nuamiu nige se masaraha?”

Tau matagibugibuna esau Betesaida murimurina eai se helolo.

²² Ia Betesaida eai ie lage; tau matagibugibu esau se woeai ia arinai, se awanorilau bena ia i abiita. ²³ Ia tau matagibugibuna nimana eai i abilau, ie woeai eanua murimurina eai: matana i gariso, nimana i saosaei ia potana eai, i hesiolau ia ginauri ie ita? ²⁴ Tau wa ie itaitasae ewa eai, i ene, “Tatao ea itadi adi ao doha hinage oeagi, se tautausi.” ²⁵ Iesu nimana i toreuioi ia matana eai; ia abo i itaitasae ewa eai, matana abo se lala, tatao gamagaridi abo i itakomakomanidi. ²⁶ Iesu ia abo i hetamari ie lau ena numa eai, i ene, “Tabu u lau eanua eai, riba ta eanua eai tabu tau esau u heriba.”

Petero Iesu i ribawasawasaei

Mt. 13.13-16; Lk. 9.18-20

²⁷ Iesu ena heaheatayao se lau eanua gougou gamagaridi Kaisaria Pilipi eai; isi eda eai se lau, ia i hesiolau isi aridi eai, i ene, “Tatao si ene, eau ede eai?” ²⁸ Isi se heuio, si ene, “Headi si ene, Ioane Bapatiso: na headi si ene, Elia; headi si ene, Peroveta tauna esau.” ²⁹ Ia ie ribalau isi aridi eai, i ene, “Na, omi au ene eau ede eai?” Petero ia i heuio, i ene, “Oa Keriso ede.” ³⁰ Ia i guguiaidi ia ribana tabu tau esau si heriba.

³¹ Ia abo i hetubu i heatadi Tau Natuna amamna gamagaridi taba i hearodi, babada, eo kohena babadadi, eo tauuriuri tataodi, isi ia abo se otaotaei, abo hinage se unuhemate, i lau e asubena haiona abo ie torouio. ³² Teina riba ta ie riba hemasaraha, Petero ia i woeahesuara, ia Iesu i ribasuulaei. ³³ Iesu i sinibuima ie italau ena heaheatayao aridi eai, ia Petero i ribasuulaei, i ene, “Oa Satani, u lau udoi wa murigu eai; Eaubada ena ginauri nige u nuatuidi, tatao mo edi ginauri.” ³⁴ Ia ie ribalau tatao gamagari aridi eai, eo ena heaheatayao hinage, i ene, “Ena tau esau i hemuriwataigu, iabom i nuagabaeuioi, ena satauro i abiisini abo i hemuriwataigu. ³⁵ Iabom maurina i gadosisiei ia mauri taba nige ie ita; ia maurina i nuagabaei eau debagu eai, eo evanelia debana eai, ia abo i mauri mamohoi. ³⁶ Saha lolona abo tau ie abi, taba gogo gamagari tanoubu eai ta i abiheohidi, ia maurina hinage ie tauiamui? ³⁷ Tau ena saha abo i mosei ia maurina maisana? ³⁸ Ena isi, teina isina baeana ta, se taumaeamaeigu, eo eau egu riba se taumaeamaeaei, Tau Natuna isi hinage abo i taumaeamaeaidi, huiana i dobiuioma, Tamana ena namanamari arinai, maena aneru hetahetabudi hinage.”

9

Iesu matana se ori *Mt. 17.1-8; Lk. 9.28-36*

¹ Ia ie ribalau isi aridi eai, i ene, “Ea heribamiu ta mamohoi, headi inai se totoro, isi sora mate taba nige se hearo, Eaubada ena basileia ie lagema ma gigiborina isi abo se ita.”

² Asubena haligigi-esega se ohi, Iesu Petero, eo Iamesi, eo Ioane ie woeasaedi, isibom, oea tupi lohaloha deba pogana eai: isi matadi eai ia matana se ori. ³ Ia ana lulu ie namanamari, ie posi ariariri, oma taudeurina tanoubu eai ta nige se heposiposi doha. ⁴ Elia maena Mose se taulagema isi aridi eai: isi maedi Iesu se ribariba. ⁵ Petero ie ribalau Iesu arinai, i ene, “Tanuagamai e, i lolo inai mo ta mia: taba apa haiona ai abidi, esau enam, esau Mose enana, esau Elia enana.” ⁶ Ia ie riba napai mo, isi taudi se ihigori ariri. ⁷ Eada esau isi i poiidi: arina esau eada boeana eai i lagema, i ene, “Natugu ea gadosisiei ede teina: ia au ataiei.” ⁸ Ma esega, isi abo se ita hetahetaiiri, nige tau se ita, Iesu iabom mo maedi isi hinage.

⁹ Isi abo oea eai se leta se dobi, ia awadi i tawaidi wau ginauri wa se itadi wa tabu tau esau se heriba, i lau e, Tau Natuna mate eai abo i torouioma. ¹⁰ Teina riba ta abo se nuatudidini, se nuatudadaasaeei, si ene, Mate eai torouiomana aisana? ¹¹ Isi se hesiolau ia arinai si ene, “Paana saha tauuriuri tataodi si ene, Elia taba ie lage baguna?” ¹² Ia i heuio i ribalau isi aridi eai, i ene, “Mamohoi Elia i lage bagunama, ia abi gamagamagaridi abo i heharihariudi; hinage edoha se uriwatai, Tau

Natuna amamna gamagamagaridi abo i hearodi, eo ia abo se isuewaei? ¹³ Na, ea heribamiu ta Elia mamohoi i laomao, isi edi gadosisi ia arinai se abidio, doha hinage ia enana se urimaodai.”

Tauheaheata se beruberu: Keriso i gigibori

Mt. 17.14-21; Lk. 9.37-42

¹⁴ Ia ie uioma ena heaheatayao aridi eai, moutuadi lailai i itadi se toro hetahetairidi, eo tauuriuri tataodi se hesiolau aridi eai. ¹⁵ Moutuana wa ia se ita, isi aruadi se loi, se aिताutau ia arinai, ia se lautoiei. ¹⁶ Ia ie hesiolau tauuriuri tataodi aridi eai i ene, “Saha au oiribaei isi aridi eai?” ¹⁷ Moutuadi ne tauna esau ia i heuio, i ene, “Tau Heaheata e, natugu ea woeiama oa arim eai, earua auaurea ia arinai; ¹⁸ ia se basaalaalatei: awana i gosagosapuro, eo moana i taburuiahisi, ia tauna i eagayaga: ea ribalau em heaheatayao aridi eai bena se aiduei, isi nige abina se ata.” ¹⁹ Iesu ia i heuio, i ene, “Kapore! sunuma gagiri isina ta, eau arimiu eai miamiagu, i lau e, aitea huia? Ea healapaipaimiu, i lau e aitea huia? Ia au woeiama arigu eai.” ²⁰ Ia abo se woeiama ia arinai: ia Iesu i italaei ina earua ta gama wa ie basaalaalatei, ie guri dobi tano eai, ie boroborosi, awana i gosagosasapuro. ²¹ Iesu i hesiolau ia tamana arinai, i ene, “Auiana teina asiebo ta ie tubu ia arinai?” I ene “Ma gagirina eai. ²² Huia gamagari ia se gabaei oegi boeana eai, eo goila eai hinage, bena abo ie mate wa; ena abina u ata u nuatoatoaimai, u saguimai.” ²³ Iesu ie ribalau ia arinai, i ene, “Taba u awamamohoei: tau taba i awamamohoei ginauri gamagaridi abidi i atao.” ²⁴ Gama ne tamana i eogalau ma matasuruna, i ene, “Guiau e, ea awamamohoei: egu awamamohoi mo i beruberu arinai u saguigu.” ²⁵ Iesu moutuadi i itadi se aिताutauma, earua bii ne i aiduei, i ene, “Oa earua auaureana ta, eo doodoona, ea heribam ta u lau murimuri eai, tabu u luuio ia boeana eai.” ²⁶ Earua wa abo ie eoga, gama wa i basaalaalatei abo ie lau murimuri eai: merumeruna wa doha tau matematenā, moutuana wa si ene, “I mate aririo.” ²⁷ Na, Iesu i abilau ia nimana eai, i abihetoro; ia abo i toro. ²⁸ Ia i awasaema numa alona eai, ena heaheatayao se oimuri modigau ia arinai, si ene, “Paana saha ai aiduena nige abina aie ata?” ²⁹ Ia ie ribalau isi aridi eai, i ene, “Demoni ina doha nige se pesa gaibu murimuri eai, uura, eo aiudi aridi eai mo.”

Iesu ena mate eo ena torouio ie ribamaodai

Mt. 17.22-23; Lk. 9.43-45

³⁰ Nei dimona ne abo se laugabaei, Galilaia eai se baeyawa; ia nige i henua ena lau bena tau esau i nuatui. ³¹ Ia ena heaheatayao i heatadi, ie ribalau isi aridi eai, i ene, “Tau Natuna ia abo se mosei tatao nimadi eai, ia bena abo se unuhemate;

se unuiyao, abotai abo i torouio asubena hehaionana eai.”
 32 Teina riba ta se hekau, ia bena se oimuriei, na se matausi.

Haiawayagara: eai aridi eai abo edi bada

Mt. 18.1-6; Lk. 9.46-48

33 Ia ie lage Kaperenauma eai, numa alona eai ia i hesiolau isi aridi eai, i ene. “Omi saha au haiawayagaraei dobila eai?”
 34 Isi nige arinadi; isibom dobila eai se haiawayagara wa, eai isi aridi eai abo edi bada ede. 35 Ia ie bawa, saudoudoi-labui i eogaidi; ie ribalau isi aridi eai, i ene, “Tau esau i henua bena i baguna, ia abo i murimurita, eo isi gamagaridi edi heaheari eai i lau.” 36 Iesu merumeru gagirina esau ie abi, i torelaei duaduaridi eai: abo i labasi, i ribalau aridi eai, 37 i ene, “Ia merumeru gagirina ina doha i oiami eau esagu eai, ia i oiamigu hinage: tauoiamiguma nige eaubom i oiamigu, ia hinage Tauhetamariguma wa ie oiami.”

Iesu nanatunayao ie ribasuuidi

Lk. 9.49-50

38 Ioane i heuio ia arinai, i ene, “Tanuagagu e, tau esau aie ita oa esam eai demoni ie aiduiedi; ia nige ie lauwataida; ia ai ribagigiri paana ia nige ie lauwataida.” 39 Iesu i ene, “Ia tabu au ribagigiri: tau esau taba gigibori ta i laulauei eau esagu eai, taba nige i ribahebaaeagu. 40 Ena ia nige ie hetataguduguidua ita enada meta. 41 Ena esau, esau, goila nomnom biana esau i leawa eau esagu eai, paana oa Keriso enana; ea ribalaowa omi arimiu eai, mamohoi, ia maisana taba nige i deha.

42 “Ena esau, esau, merumeru gagirina esau eau awagu tauabina i heguri, i lolo taba we’u lailai ia gadona eai se au, abo se tudobei gabogabo eai. 43 Eo ena nimam i hegurim, u tomgabaei; i lolo nimam esega, mauri abo u abi, ena nimam labui masigiri boeana eai ue lage oeagi alaalasina boeana eai nige nosina. 44 Nei dimona ne motamota nige se mate, eo oeagi nige se oiheboso. 45 Ena aem i hegurim, u tomgabaei: i lolo aem ie motu abo mauri u abi, ena aem labui masigiri boeana eai se tudobem oeagi nige ie boso boeana eai; 46 nei dimona ne motamota nige se mate, eo oeagi se oiheboso. 47 Ena matam i hegurim, u lamohai: i lolo matam esega Eaubada ena basileia eai u lage, matam labui oa abo se gabadobem oeagi nige se boso boeana eai: 48 nei dimona ne motamota nige se mate, eo oeagi nige se oiheboso. 49 Gamagarimiu abo se hearitamiu oeagi alaalasina eai. 50 Arita i lolo: ena aritana ne i tomatoma, edoha emi abiabina abo i aritauio. Arita i ota omi nuamiu eai, au hainua-bigauioimiu.”

10

Iesu inawase ribana i ribaei

Mt. 5.31-32; Mt. 19.1-9; Lk. 16.18; 1 Kor. 7.10-15

¹ Ia abo i torohai ie lau Iudea ana siga eai, Ioridano tehana eai; moutuana se oigogouio ia arinai: ia i heatauioidi, ena laulau nei doha.

² Parisea tataodi se laoma ia arinai, se hesiolau, si ene, “Tau, ia laugagaao ta i lau watai ia monena taba i inawasei wa?” ³ Ia i heuio, ie ribalau aridi eai, i ene, “Mose saha i lauhesommiu wa?” ⁴ Isi si ene, “Mose ie riba, inawase ribana se uri abo i inawase.” ⁵ Iesu i heuio, ie ribalau isi aridi eai, i ene, “Omi nuamiu se oiura ariri arinai ede laugagaao ta se uriyao.” ⁶ Mumuga eai, ena huia ginauridi Eaubada tau to sine i ginauridi. ⁷ Paana ede meta tau, tamana eo sinana ie laugabaedi, ie patulau monena arinai: ⁸ isi taudi labui buluma esega mo, isi abo nige labui, na buluma esega mo. ⁹ Saha wa Eaubada i hepatuesegaidi tatao tabu se torehesuaradi.” ¹⁰ Numa alona eai teina riba ta ena heaheatayao se hesiouioi ia arinai. ¹¹ Ia ie ribalau isi aridi eai, i ene, “Ia monena i inawasei esau i hai, ia abo i ganawari: ¹² ena sine hinage monena i inawasei, esau i hai, ia abo i ganawari.”

Iesu merumeru gagiridi i awaloloedi

Mt. 19.13-15; Lk. 18.15-17

¹³ Isi merumeru gagiridi se woeaidi ia arinai bena abo i abitadi; ena heaheatayao merumeru tauwoeaidi se ribagagiridi. ¹⁴ Iesu ie itadi, nuana i baaea ariri, ia i ribalau isi aridi eai, i ene, “Merumeru gagiridi taba se laoma eau arigu eai, tabu au guduguidi: Eaubada ena basileia doha ede isi. ¹⁵ Ea heribamiu ta mamohoi, eai to eai Eaubada ena basileai ia nige ie abi doha merumeru gagirina, ia nige i lusora arinai.” ¹⁶ Ia abo i labaisinidi, ia nimana i saosaei isi potadi eai, i ribahelolodi.

Tanuaga hewari esau ribana

Mt. 19.16-30; Lk. 18.18-30; Lk. 10.25

¹⁷ Ia eda lai eai ie lau, tau esau i aिताutau ia arinai, ia turina ie bono ia nuanuana eai, i hesiolau ia arinai, i ene, “Tanuagagu lolona e, eau egu abiabina edoha mauri nige nosina abo ea abi?” ¹⁸ Iesu ie ribalau ia arinai, i ene, “Ue saha u ene eau ea lolo? Nige esau i lolo, Eaubada iabom.” ¹⁹ Laugagaao u nuatuidi, tabu u matamatae’o, Tabu u aiunu, Tabu u aiyahari, Tabu u morui, Tabu u borabora, Oa tamam eo sinam u eogoyogoidi.” ²⁰ Ia i heuio ia arinai, i ene, “Tanuagagu e, eau ma gagirigu i laoma e teina huia ta, teina laugagaao ta ea nanabuheohidio.” ²¹ Iesu i italau ia arinai, ia i gadosisie, eo i ene, “Ginauri esega mo nige u abi, u lau

em aba lau eai, oa em gogo saha eo saha u unegabaedi u mosedi gogogesagesa enadi, oa em gogo galewa eai abo u abi; u laoma, em satauro u abiisini, u hemuriwataiguma.” ²² Nei riba ne i ataiei ie nuadubu, ia abo ie lau nuana i amamna, paana ia gogo gamagari tauna.

Gogo ribahesanapuna.

²³ Iesu i itahetaiiri, ie ribalau ia ena heaheatayao aridi eai, i ene, “Gogo gamagari tataodi bena se lusora Eaubada ena basileia eai i pipiripi ariri.” ²⁴ Ia ena riba ena heaheatayao se nooei. Na, Iesu i heuiouioidi, i ribalau aridi eai, i ene, “Merumeru e, isi gogo tausunumaena bena Eaubada ena basileia eai se lusora i pipiripi ariri. ²⁵ Kamela ie lusora mo diu gudana eai, taumonamonaune bena i lusora Eaubada ena basileia eai abo ie ahi.” ²⁶ Isi abo se noo ariariri, isi se heunaboisaha, si ene, “Eai abo i mauri?” ²⁷ Iesu i italaedi, i ene, “Tatao abina nige se ata, ede Eaubada mo, Eaubada ia ginauri gamagaridi abidi ie ata.” ²⁸ Petero abo ie ribalau ia arinai, i ene, “Ginauri gamagaridi ai laugabaedi ai hemuriwataim.” ²⁹ Iesu ia i heuio, i ene, “Ea heribamiu ta mamohoi, ena tau esau ena numa i laugabaei, eo ena tataoyao, eo lounayao, eo tamana, eo sinana, eo monena, eo nanatunayao, eo ena oea, eau debagu eai, eo evanelia debana eai, ³⁰ ia ginauri gamagaridi teina huia ta i abidi, numa, eo ena tataoyao, eo lounayao, eo sinanayao, eo nanatunayao, eo oea, ia se heamamna hinage; huia murina eai abo mauri nige nosina hinage i abi. ³¹ Gamagaridi se bagubaguna abo se murimurita, isi se murimurita abo se bagubaguna.”

Iesu ena mate eo ena torouio i ribaeuioi

Mt. 20.17-19; Lk. 18.31-33

³² Isi eda eai se lau Ierusalem; Iesu i bagubagunaedi; isi se noo; eo isi murina eai se laulau se matausi. Ia saudoudo-labui i abihesaradi i hetubu i heribadi ginauri gamagaridi wa ia abo i hearodi. ³³ Ia i ene, “Ta lau Ierusalem eai, Tau Natuna abo se moselaei kohena babadadi, eo tauuriuri tataodi aridi eai; isi ia abo se hegiru bena abo se unuhemate; eo abo se moselaei Murimuri-tataodi aridi eai. ³⁴ Isi ia abo se alaliuluaei, eo abo se pidiri, eo abo se garigariso, eo abo se unuhemate: asubena hehaionana eai ia abo i torouioma.”

Ioane eo Iamesi edi gadosisi bena si baguna

Mt. 20.20-28

³⁵ Sebedaio nanatunayao, Iamesi ma ena tau Ioane, se laoma ia arinai, si ene, “Tanuagamai e, ai ema gadosisi ai awanorilaowa oa arim ena bena u eari.” ³⁶ Ia ie ribalau isi aridi eai, i ene, “Omi emi gadosisi saha abo ea leawa?” ³⁷ Ia arinai si ene, “Teina ta u leama enamai; oa edi aba hedebaseaem eai, ai ene bena esau nimatutum eai ie bawa,

eo esau nimaseuseurim eai.” ³⁸ Na, Iesu i ribalau isi aridi eai, i ene, “Omi emi awanori ta abina nige au ata: taba bia ta ea nonom omi hinage abo au nom? bapatiso eau se hebapatisoigu omi hinage abo se hebapatisoimiu wa?” ³⁹ Isi abo se ribalau ia arinai, si ene, “Hedeona.” Iesu ie ribalau aridi eai, i ene, “Bia ta ea nonom omi hinage abo au nom; bapatiso arinai eau se hebapatisoigu omi hinage abo se hebapatisoimiu: ⁴⁰ na tau nimatutugu eai ie bawa, eo tau nimaseuseurigu eai, eau nige ea mosei gaibui mo: isi isibom enadi wa se ginauri nonohaiyao” ⁴¹ Saudoudoi wa riba ta se ataiei, isi se hetubu Iamesi ma ena tau Ioane se nuabaaeadi. ⁴² Iesu i eogaidi ia arinai, ie ribalau isi aridi eai, i ene, “Omi au itayao Murimuri-tataodi edi guiau gamagaridi tatao se tanuagaidi, eo isi edi babada tatao se tanuagaidi hinage. ⁴³ Na omi tabu nei doha: ena esau i henua ia emi bada ia abo emi heaeai tauna eai ie lau. ⁴⁴ Ena esau arimiu eai i henua bena ia i sae, ia abo gamagarimiu emi heaheari eai ie lau. ⁴⁵ Paana ede hinage, Tau Natuna i laoma nige ena heaheari tauna, iabom heaheari tauna eai ie lau; ia maurina hinage ie mosei tatao gamagaridi maisadi.”

Baratimaio matana se helaladi

Mt. 20.29-34; Lk. 18.35-43

⁴⁶ Isi abo se lage Ieriko eai; ia ma ena heaheatayao, eo tatao moutuadi hinage Ieriko se laugabaei, Baratimaio taumatagibugibu, Timaio natuna, ie bawa dobila lailai hasarina eai, i awaawanori. ⁴⁷ Wasana i ataiei Iesu Nasareta nei, ia i hetubu i eogalau, i ene, “Iesu e, Davida natuna, u nuatoatoaeguma!” ⁴⁸ Gamagaridi ia si siooei si ene, u monou: ia abo ie eoga lailai i ene, “Davida natuna e, u nuatoatoaeguma!” ⁴⁹ Iesu abo i tarutoro, i lauhesomdi ia se eogaiama. Isi abo taumatagibugibuna se eogalau ia arinai, si ene, “Tabu u nuadubu, u toro, i eogaim.” ⁵⁰ Ia ana lulu i abigabaei, i torohai, i laoma Iesu arinai. ⁵¹ Iesu i heuio ia arinai i ene, “Oaem gadosisi abo ea sahim?” Taumatagibugibuna ne i ene, “Guiiau e, eau matagu bena u helaladima.” ⁵² Iesu i ribalau ia arinai, i ene, “U lau em aba lau eai, oa sunumam i helolom.” Arinai ia matana se lala, eo ia Iesu murina eai ie lau dobila eai.

11

Wasawasa, tatao gamagaridi edi wasawasa, matadi eai i laoma

Zech. 9.9; Mt. 21.1-9; Lk. 19.29-38

¹ Isi abo se laoma Ierusalem se hanahanau, Betepage eo Betania eai se lage, Oliveta oeana eai, ia abo ena heaheatayao labui ie hetamarilaedi. ² Ia ie ribalau aridi eai, i ene, “Omi au lau nei eanua gougouna eai ne, au lulagelau arinai, asini

natuna se auauiao abo au ita, sora nige tau esau ie bawasae potana eai: au eairi abo au leama. ³Ena tau esau i ribalaowa arimiu eai, i ene, ‘Saha au abi?’ au ene, ‘Guiau ena gadosisi teina; abo i hetamariuioi inai;’ ia abo i eairi.” ⁴Isi se lau asini natuna se ita numa dobilana murimurina eai se auiao, eda labui edi aba saa eai, isi abo se eairi. ⁵Headi nei eai se totoro se ribalau aridi eai, si ene, “Iei, asini natuna sahana au eairi?” ⁶Iesu i ribahesomdi wa se heribadi; isi abo se eairi. ⁷Asini natuna abo se leama Iesu arinai, edi oma se saosae potana eai. Iesu abo i bawasae arinai. ⁸Gamagaridi edi oma se lauweise dobila eai: headi hinage oeagi bagadi se talahaidi se lauweise dobila eai. ⁹Headi se baguna, eo headi se murita, se wowo, si ene, “Hosana: ia i laoma Guiau esana eai se helolo!” ¹⁰Ita tamada Davida ena basileia i laolaoma Guiau esana eai se helolo: Hosana ini puripurina eai!”

¹¹Iesu i lulagelau Ierusalem eai, i lusae numa uura alona eai, ginauri gamagaridi i ita hetahetairiheohidi, i maimailahio arinai se pesa, ia maena saudoudoi-labui se lau Betania eai.

Kuhou nige aniona

Mt. 21.19-21

¹²Maraietom isi Betania eai se lagema, ia abo i wesari. ¹³Ia kuhou esau i ita eda lohaloha eai i uiawa: i laoma ie ita bena aiaina ewana eai, ede lugu ahaahana mo; aiaina huiana sora. ¹⁴Iesu i ribalau kuhou ne arinai, i ene, “Tabu tau esau aiaim i ai, i lau e, ana huia ana tasi.” Ia ena heaheatayao ena riba se ataiei.

Iesus numa tabuna i heaa

Mt. 21.12-16; Lk. 19.45-47; Io. 2.13-16

¹⁵Isi abo se lagema Ierusalem eai; Iesu i lusae numa uura alona eai, ia abo tauuneune i aiduiedi si unelau, si unelaoma numa uura alona eai, moni tauune heduhedudu edi hatahata, eo bunebune tauuneune edi aba babawa abo i ahalabuidi. ¹⁶Ia nige ie eairi gogo abatoredi se bahei numa uura alona eai se lusora. ¹⁷Ia abo i heatadi, i ene, “Isi se uriyao, ‘Eau egu numa se ribaei, eanua gamagamagari edi aba uura, e nige’e wa?’ Omi au abi i hemala duha, tatao aiayahari edi aba oigogo.” ¹⁸Tauuriuri tataodi, eo kohena babadadi ena riba se ataiei, adi gui se oi ia bena se unui: isi ia se matausiei, paana ede tatao gamagaridi ena lauheata se nooei. ¹⁹I maimailahi ia abo i lau eanua murimurina eai.

²⁰Maratomtom eai isi abo se uio kuhou wa se ita ie wowoeaohi, eo lamna hinage. ²¹Petero nuana ie sae, ie ribalau ia arinai, i ene, “Tanuagagu e, kuhou u ribahebaaea wa, i wowoeaohi.” ²²Iesu ia i heuio, ie ribalau isi aridi eai, i ene, “Eaubada au sunusunumaei. ²³Ea heribamiu ta mamohoi, esau, esau, ie ribalau teina oea tupina ta arinai,

“Oa abo u buihaim, u beudobi gabogabo boeana eai,’ eo ia nige nuana labui, na i nuatui riba i ribaei wa abo ie tubu, mamohoi, abo ie tubu hinage. ²⁴ Arinai ea heribamiu ta, ia ede ginauri gamagaridi au henuadi uura eai au awanoridi, au nuatui abo au abidi, eo abo au hearodi. ²⁵ Ena au totoro au uura, eo headi se hebaeamiu, isi edi baaea au nuatugabaedi, abotai abo omi emi baaea Tamamiu galewa eai ie mia abo i nuatugabaedi. ²⁶ Ena edi baaea omi nige au nuatugabaedi, hinage Tamamiu galewa eai omi emi baaea taba nige i nuatugabaedi.”

Iesu se haiawayagaraei
Mt. 21.23-27; Lk. 20.1-8

²⁷ Isi abo se uio Ierusalem eai: ia abo i lulau numa uura alona eai kohena babada tataodi, eo tauuriuri tataodi, eo babadadi se laoma ia arinai. ²⁸ Isi abo se ribalau ia arinai, si ene, “Eai ena gigibori eai, ina ginauri ta arinai u ginauridi? Gigiborina ta u laulauei ta, eai i leawa?” ²⁹ Iesu i heuio, i ribalau aridi eai, i ene, “Riba esau abo eau hinage ea hesioi omi arimiu eai, eo au heribaguma; abo hinage ea heribamiu eai ena gigibori eai teina ginauri ta ea ginauridi. ³⁰ Ioane ena bapatiso galewa eai i dobima wa? e tatao enadi wa? au heribaguma.” ³¹ Isi se heunaboisaha, si ene, “Ena ta ene, Galewa eai ie dobima, ia abo i ene, Ede ie saha nige au ataiei? ³² Na, ena ta ene, Tatao enadi: tatao ta matausiedi, paana gamagaridi se itaohi Ioane ia peroveta mamohoi.” ³³ Isi abo se heuio, se ribalau Iesu arinai, si ene, “Ai nige abina ai ata.” Iesu ie ribalau isi aridi eai, i ene “Eau hinage nige ea heribamiu eai ena gigibori eai ina ginauri ta ea ginauridi.”

12

Parabole: numa tanuagana ena vine oeana
Mt. 21.33-46; Lk. 20.9-19; Is. 5.1-7

¹ Ia i hetubu i iriba parabole isi aridi eai, i ene, “Tau esau vine oeana esau i umai, i gana hetaiiri, vine aba tomna ie sara, numa siwasiwa ie abi, i mosei tautawataina aridi eai, ia abo ie lau eanua esau eda lohaloha eai. ² Ena huia ua ie lage ia abo heaheari tauna esau i hetamari taupaipaisoa aridi eai, bena isi abo vine oeana aiaina se mosei ia arinai. ³ Isi ia se toai eo se pidiri, eo se hewiwilauioi ma nima ahaahana mo. ⁴ Heaheari tauna esau hinage ia i hetamariuioi: ia abo se lauweui, uruna se oilapalapai, ia se heamamna, eo se hewiwilauioi. ⁵ Esau hinage doha i hetamariuioi: ia se unuhemate: eo heaheari tataodi gamagaridi hinage, headi se pidiridi, eo headi se unuidi. ⁶ Abotai abo ia natu eogoyogoina iabom ie mia mo: ia i hetamari muritai, i ene, ‘Eau natugu

isi abo se hemataei.’ ⁷ Isi tataopaisoa se oioiriba, si ene, ‘Oea tanuagana ede ina: ia ta unui oea ta abo itabom eda oea.’ ⁸ Isi ia se toai, se unuhemate, se gabadioi gana murimurina eai. ⁹ *Vine* tanuagana abo ie saha? Ia abo i laoma oea tataopaisoa i unuhematedi: ia abo *vine* oena i mosei hari tatao enadi. ¹⁰ Riba se uriyao au hasiri, e nige’e, si ene, ‘We’u numa tauabidi se gabaei ia abo we’u tubeina eai ie lau. ¹¹ Guiau ena abiabi ede ina, itaitana ta nooei?’ ”

¹² Isi se henua ia bena se toai, tatao mo se matausiedi: se itayao wau parable wa i ribaei isi adi riba: isi ia se laugabaei abo se lau edi aba lau eai.

Telona monina ribana
Mt. 22.15-22; Lk. 20.19-26

¹³ Isi Parisea tataodi headi, eo Herodiano tataodi headi, se hetamaridi ia arinai ena riba bena se henuaponopono. ¹⁴ Isi se lageo, abo se ribalau ia arinai, si ene, “Tanuagamai e, ai nuatuiyao oa u dudurai, eo tatao nige u matausiedi, eo tatao nige u heasisi-napaidi, na Eaubada ena dobila mamohoina mo u heaheataei: laugagaao i ene, takisi abo ta mosei Kaisara enana e nige’e wa? ¹⁵ Abo ai mosei, e nige’e wa?” Edi borabora i itayao, ie ribalau isi aridi eai, i ene, “Aue saha au nohoigu ta? Denari esega au leama ea ita.” ¹⁶ Isi abo se abiyama: ia ie ribalau isi aridi eai, i ene, “Eai ana ao ina, eo ribana ta?” Isi si ene, “Kaisara enana.” ¹⁷ Iesu i heuio, ie ribalau aridi eai, i ene, “Kaisara enana au laei Kaisara arinai, Eaubada enana au laei Eaubada arinai.” Isi ia abo se nooei.

Sadukea edi riba Iesu i heuio
Mt. 22.23-33; Lk. 20.27-38

¹⁸ Sadukea tataodi se laoma ia arinai: isi mo edi nuatu, si ene mate tataodi nige se torouioma: ia se oimuriei, si ene. ¹⁹ “Tanuagamai e, Mose i uriuri arimai eai, i ene, ena tau esau ana taubaguna i mateo, monena ie mia, nige natuna, ana tau murita ena wabu ie hai, natuna i labasi abo ta ene tau-baguna natuna. ²⁰ Adi boga tauna esau nanatunayao haligigi-labui: tau baguna ie hai, abo ie mate, nige natuna: ²¹ Ana tau murita esau ena wabu ie hai: ia hinage abo ie mate nige natuna: esau hinage doha. ²² Isi gamagaridi taudi haligigi-labui ina doha: isi gamagaridi wabu wa abo se hai: nige natudi: muridi eai sine wa hinage ie mate. ²³ Torouioma huiana ie lage, isi abo se torouioma, sine wa abo eai monena? isi gamagaridi taudi haligigi-labui wa ia se hai.”

²⁴ Iesu ie ribalau isi aridi eai, i ene, “Omi emi aba ponorina ede ina, e nige’e wa, riba se uriyao nige au ita, eo Eaubada ena gigibori nige abina au ata? ²⁵ Isi mate eai abo se torouioma nige se tawasora eo se hetahetawasora: isi abo doha galewa anerudi. ²⁶ Taumate edi torouioma ribana omi nige au hasiri

Mose ena buka eai, oegi gagirina boeana eai Eaubada ie ribalaoma ia arinai, i ene, 'Eau Aberahama ena Eaubada, eo Isaako ena Eaubada, eo Iakobo ena Eaubada?' ²⁷ Eaubada ta, nige taumatemate edi Eaubada, isi taumaumauri mo: omi au ponori aririei.' "

Laugagaeo bagubagunana

Mt. 22.34-40; Lk. 10.25-37

²⁸ Tauuriuri esau i laoma ia arinai, isi edi ribariba i ataiei, riba lolona Iesu i ribaei isi aridi eai i ataiei, abo i hesiolau ia arinai, i ene, "Laugagaeo gamagaridi aisege i bagubaguna ede?" ²⁹ Iesu ie ribalau ia arinai, i ene, "Teina laugagaeo ta i bagubaguna ede, 'Isaraela e, au ataiei: Guiau eda Eaubada, Guiau esega mo: ³⁰ eo Guiau oa em Eaubada abo u gadosisie ma nuam i ohi, eo ma earuam i ohi, eo ma nuauatum i ohi, eo ma adidirim i ohi,' teina laugagaeo bagubagunana ede. ³¹ Helabuina ede ina hinage doha, 'Oa helem taumia tauna u gadosisie doha hinage oa taum me u gadosisiuioi.' Laugagaeo labui ta teina se sae ariri, nige esau doha." ³² Tauuriuri ne i ribalau ia arinai, i ene, "Tanuagagu e, oa em riba u ribaei i dudurai: Eaubada esega mo, nige esau, iabom mo: ³³ ia Eaubada i gadosisie ma nuana i ohi, eo ma sonogana i ohi, eo ma earuana i ohi, eo ma adidirina i ohi, helena taumia tauna hinage i gadosisie, doha ia i gadosisiuioi, teina ie sae ariri ede: aitalasam alagorugorudi, gamagaridi eo aitalasam aiadi hinage, isi nige doha." ³⁴ Iesu ia ena nuatu aniona i itayao, ie ribalau ia arinai, i ene, "Oa Eaubada ena basileia u hanahanai." Nige tau esau riba esau i hesiouio ia arinai, se matausi ariri.

Iesu i hesiolau Parisea tataodi aridi eai

Mt. 22.41-46; Lk. 20.41-44

³⁵ Iesu i heatadi numa uura alona eai, i ribalau i ene, "Tauuriuri edi riba saha si ene, Keriso Davida natuna? ³⁶ Davida iabom ie riba Earua Tabuna debana eai, i ene, 'Guiauna ie ribalau egu Guiau arinai, i ene, Nimatutugu eai u bawa, i lau e oa am waiunuyao abo ea abidi se hemala aem ana bou.' ³⁷ Davida Keriso esana i atai Guiau: ia Davida natuna edohana?" Tatao gaibu ia se ataiei eo nuadi se lolo. ³⁸ Ia ena heaheata eai ie ribalau isi aridi eai, i ene, "Tauuriuri tataodi au itakomakomanidi: edi tautausi eai lulu lohalohadi se gadosisiedi, eo bena aba uneune eai tatao abo se laulau-toiedi. ³⁹ Eo aba-babawa saesaedi hinage sunago alona eai se henuadi, eo dimo wasawasadi edi aba aiaigogo eai: ⁴⁰ Isi wabuwabu edi gogo se aigirihaidi, eo edi uura se helohadi: edi borabora: isi giru lailai abo se geudidini."

Sine wabuwabu ena ainauia

Lk. 21.1-4

⁴¹ Iesu moni aba peipeigogoina hasarina eai ie bawa, tatao i itaitaidi moni se usausadobi alona eai: monamonaune tataodi gamagaridi edi moni gamagari se usausadobi aba peiauri alona eai. ⁴² Sine wabuwabu esau i lagema, ia gogogesagesa sinena, ia moni gagari konekoned, labui maisadi pene esega i usadobedi. ⁴³ Ia ena heaheatayao i eogaidi, ie ribalau isi aridi eai, i ene, “Ea heribamiu ta mamohoi, teina sine wabuwabuna ta ainauia lailai i usadobei aba peiauri alona eai, nige doha isi gamagaridi enadi. ⁴⁴ Paana ede isi edi gogo lalai begadi mo se usadobedi, ia mo ena gogo gagiri konekonedie ie usadobehehohidi aba peiauri eai, ia ede meta ena mia dobilana maudoina.”

13

Oliveta lauguguiaina

Mt. 24.25; Lk. 21

¹ Ia numa uura i pesagabaei, ia ena heaheata esau ie ribalau ia arinai, i ene, “Tanuagamai e, we’u lailai ta, eo numa lalalai ta, u itadi!” ² Iesu i heuio ia arinai, i ene, “Oa numa lailai ta u itadi? taba nige we’u esau i ota we’u esau potana eai abo se hebolohehohidi paa eai.”

³ Ia Oliveta oeana potana eai i babawa numa uura nu-anuana eai, Petero, eo Iamesi, eo Ioane, eo Anederea, se hesiomodigauma ia arinai, si ene, ⁴ “Oa u riba hemasaraha arimai eai, teina ginauridi auiana abo se tubu, eo heiheinoi saha abo se ita teina ginauri gamagaridi abo se tubu?” ⁵ Iesu i ribalau isi aridi eai, i ene, “Omi au itakomakomani, ata se boraimiu. ⁶ Gamagaridi abo se lage eau esagu eai, isi abo si ene, ‘Eau Keriso ede:’” tatao gamagaridi arinai se boraidi. ⁷ Taba iala ribadi au ataiedi, eo iala wasadi, tabu au matausi: teina ta taba se tubu baguna: huiana ana sigasiga sora. ⁸ Eanua esau se torohai, eanua esau se ialaidi; basileia esau se iala basileia esau aridi eai; moniinii se tubu hari eanua, hari eanua eai: abo guriam lailai, eo matausi ie tubu: ina nuadubu edi aba tubu ede.

⁹ “Omi au itakomakomaniuiioimiu: isi abo se woeaimiu sunederi nuanuadi eai; sunago alona eai abo se pidirimiu eau debagu eai: omi abo se woeaimiu gawana, eo guiaguiaudi nuanuadi eai; matadi eai au riba hemasarahagu isi edi aba hegirudi ede meta. ¹⁰ Eanua gamagari se ohi evanelia ta taba se guguiabagunaidi. ¹¹ Na isi abo se woeaimiu, abo se moselaemiu, emi riba bena au ribaei isi aridi eai tabu au nuatu nonohai; huiana ie lage riba wa abo se leawa ia ede abo au ribaei: omi omibom nige au ribaei, na Earua Tabuna ia tauribaena ede. ¹² Tau esau, ena tau abo i nuagabaei, i hegiru abo ie mate; tamana hinage doha ia natuna tau

arinai; merumeru hinage tamadiyao se tausiololedi, edi riba taubiga aridi eai abo se unuidi. ¹³ Tatao gamagaridi se ouyalayalaemi u eau esagu debana eai: na ena esau i healapaipai i lau e ana siga eai, ia abo i mauri.

Nuadubu baaeana

Mt. 24.15

¹⁴ “Arinai ena nuadubu baaeana au ita (tau hasirina abo i nuatui) isi Iudea taumiamia abo se dago se lau oea tupudi eai. ¹⁵ Esau taba numa ewana eai ie bawa, tabu i pesadobi numa alona eai, tabu i awasae gogo esau bena i laei murimuri eai. ¹⁶ Esau hinage oea eai, tabu i uio ana lulu i abi. ¹⁷ Kapore sisine bogabogadi, eo nanatuidiyao se hemadodi nei asubenadi ne! ¹⁸ Omi au uura emi huia dago nige i waoo. ¹⁹ Nei asubenadi ne amamna se hearodi, nige heaheasonina mumuga eai, Eaubada ginauri gamagaridi i hetubudi i laoma e, huia ta, eo murina eai hinage taba nige doha. ²⁰ Nei asubenadi ne, ena Guiau nige i hekuudi, taba nige buluma esau i mauri: na isi ia i hetorodi, eo tatao i hinehineridi, paadi ede isi, nei asubenadi ne abo se hekuudi. ²¹ Ena tau esau i ribalaowa arim eai, i ene, ‘Keriso ede ina!’ e ‘Keriso ia ede nei!’ ena riba tabu au awamamohoei: ²² paana ede Keriso boraboradi, eo peroveta boraboradi, abo se tubu, isi heiheinoidi eo gigiboridi se hemasarahadi, tatao Iesu i hetorodi wa bena se heberuberudi. ²³ Omi au itakomakomani: ginauri gamagamagaridi ea heribamaodaimiuo.

Wasawasa ena uiouioma ma namanamarina

Mt. 24.27-31

²⁴ “Nei asubenadi ne, amamna lilai murina eai, mahana abo i wahuwahuhuri, eo nawalai taba nige ie sina. ²⁵ Galewa iporadi abo se beu, eo galewa ginauri gigiboridi abo se hemoimoiudi. ²⁶ Abotai Tau Natuna si ita eada boeadi eai i laoma, ma gigibori lailaina eo ma namanamarina. ²⁷ Ia ena aneru abo i hetamaridi isi ena hinehineri tataodi se woegogoidima mana hasi edi aba laoma eai, eo i lau tanoubu ana sigana eai, eo galewa ana sigana eai.

Parabole kuhou

Mt. 24.32-33; Lk. 21.29-31

²⁸ “Kuhou ta ana parabole omi au ita: ie bogu, luguna abo i lau ala, abo au nuatui monamonabuluha huiana ie lage. ²⁹ Ia ede hinage doha omi abo au ita teina ginauri gamagaridi se tubu, abo au nuatui i hanahanaumao, dobila hasaridi eai. ³⁰ Ea heribamiu ta mamohoi, teina isi ta nige i lautom, teina riba gamagaridi ta abo se tubu. ³¹ Galewa eo tanoubu isi abo se lautom: eau egu riba taba nige ena aba lautom.

³² “Nei asubenana ne, eo awa ne, nige esau i nuatui, galewa anerudi hinage nige se nuatui, Natuna hinage nige’e, na

Tamana mo iabom. ³³ Omi au ita komakomani, au silasilawa, eo au uura: nei huiana ne nige au nuatui. ³⁴ Doha tau esau ie lau eanua eda lohaloha eai, ena numa i laugabaei, ena riba gigiborina i mosei ena heaheari tataodi aridi eai, tau esa, esa, adi paisoa i mosei aridi eai, dobila taumiataunina i lauhesom ia i silasilawa. ³⁵ Arinai omi au silasilawa: numa tanuagana ena huia lagemu nige au nuatui, maimailahi eai, e bulinuana eai, e kamkam ie dou, e maratontom eai. ³⁶ Ia ata i heulama, i lobaimiu ma enomiu. ³⁷ Riba ea heribamiu ta, tatao gamagaridi ea heribadi, ea ene, 'Au silasilawa.' ”

14

Iudea adi tanuagao se oioiriba bena Iesu si unui

Mt. 26.2-5; Lk. 22.1-2

¹ Asubena labui muridi eai pasova mataasina abo se ai, eo areto ureana: kohena lailai, eo tauuriuri tataodi edi laulau borabora se eooi, ia bena se unui; ² na isi si ene, “Tabu mataasi asubenana eai ata tatao se hetalagegaga.”

Maria Betania Iesu i heausi

Mt. 26.6-13; Io. 12.1-18

³ Iesu Betania eai, Simona lepera tauna ena numa alona eai, ia ie bawa i aiai, sine esau i laoma alabata lasina esau ie abi, eausi panapanena alona eai, ginauri maisana lailai, ia i hegoilaei ia boruboruna eai. ⁴ Headi isi aridi eai se ouyalayalaei si ene, “Paana saha teina eausi ta ia i aihenuhenuariei? ⁵ Taba ta uneunei denari tatao-saudoudoi-haligigise-mate ta abidi, tatao gogogesagesa ta mosei enadi.” Isi ia abo se monunuei. ⁶ Iesu i ene, “Sine me i otawa; sahana au hemodeusei? laulau lolo ede teina ia i laulauei eau arigu eai. ⁷ Tatao gogogesagesa huia gamagamagari omi maemiuyao, ena hari huia au henua, au taubigaidi; na eau mo nige maemiu huia gamagari. ⁸ Ia tohona ede, arinai ede ie abi: i laoma taugu i heyausi nonohai abo se toregu wa. ⁹ Ea heribamiu ta mamohoi, hari eanua, hari eanua tanoubu ta ie ohi teina evanelia ta se lauguguiai, teina sine ta ena laulau hinage abo se ribaei, ia aba nuanuatuina.”

Iuda Isakariota Iesu i unegabaei

Mt. 26.14-16; Lk. 22.3-6

¹⁰ Iuda Isakariota, ia saudoudoi-labui wa esau, ie lau kohena babada aridi eai Iesu bena i morui. ¹¹ Isi se ataiei abo se kode, se unetalai se ribahesunuma si ene, moni enana abo se mosei; ena abiabina i eooi edoha abo Iesu i mosei isi aridi eai.

Pasova se abinonohai

Mt. 26.17-19; Lk. 22.7-13

¹² Mataasi areto ureana asubena bagubaguna ie lage, pasova abo se unui, ena heaheatayao se ribalau ia arinai, si ene, “Ai lau haedi eai pasova ai abinonohai, oa abo u ai?” ¹³ Ena heaheatayao labui i hetamaridi, i ribalau isi aridi eai, i ene, “Omi au lau eanua eai, tau esau abo au hailobai, goila huena i bahei: ia murina eai au lau. ¹⁴ Dimona ia ena aba awasae eai, numa tanuagana au ribalau arinai, au ene, “Tanuaga i ene taumana birina ede haedi eau abo pasova ea ai maegu heaheatayao?” ¹⁵ Ia biriutusi lailai esau ewa eai abo i heitamiu se abinonohaiyao: arinai abo au abinonohai ita enada.” ¹⁶ Ena heaheatayao se lau eanua hesabana, ia ena riba i ribaei i ribawonawonai, eo isi pasova se abinonohai.

Pasova murimurita aririna ede meta

Mt. 26.20-24; Lk. 22.14-23; Io. 13.18-19

¹⁷ Maimailahi eai ia maenayao saudoudoi-labui se laoma. ¹⁸ Isi se bawabigabiga se aiai, Iesu i ene, “Ea heribamiu ta mamohoi, ami sagu esau, ia i aiai maegu ta, abo i moruigu.” ¹⁹ Isi se hetubu se nuadubu, abo ia se oioimurini esau, esau si ene, “Eau wa?” ²⁰ Ia i heuio i ribalau isi aridi eai, i ene, “Esau ia ede saudoudoi-labui eai ta, ai taumai labui nimamai ai hedatuesegai gaeba alona eai. ²¹ Tau Natuna ia abo ie lau doha se uriyao: nei tauna ne ia Tau Natuna i morui abo nuadubu i hearo: i lolo ia taba tabu si labasi.”

Iesu Mataasi Tabuna i hetubu

Mt. 26.26-29; Lk. 22.17-20; 1 Kor. 11.23-26

²² Isi ma aiaidi, Iesu areto ie abi, abo i aihelahui, ie ihi, i mosei isi aridi eai, i ene, “Au abi, au ai: eau taugu ede ina.” ²³ Eo bia hinage ie abi, ia i lautoi e abo i mosei isi aridi eai: isi gamagaridi se nom. ²⁴ Ia ie ribalau isi aridi eai, i ene, “Eau osinagu ede ina, ribahesunuma harihariuna debana eai i boriri tatao gamagaridi enadi. ²⁵ Ea heribamiu ta mamohoi, vine masina taba nige ea nomuioi sora i lau e nei asubenana ne abo ie lage, Eaubada ena basileia eai abo ea nom harihariu.”

Petero ie uhara Iesu i ribanonohaiao

Mt. 26.31-35; Lk. 22.31-34; Io. 13.36-38

²⁶ Isi se wana lautom abo se lau murimuri eai, Oliveta oeana eai. ²⁷ Iesu ie ribalau isi aridi eai, i ene, “Ina maiona ta gamagarimiu abo au lausuaara eau debagu eai, doha se uriyao, si ene, ‘Mamoe taumiataunina ea pidiri mamoe abo se tatagorigori.’ (Zech. 13.7). ²⁸ Na, ea torouio abotai abo ea bagubagunaemiu Galilaia eai,” ²⁹ Na, Petero ie ribalau ia arinai, i ene, “Tatao gamagaridi oa abo se lausuaaraem, eau mo nige’e.” ³⁰ Iesu i ribalau ia arinai, i ene, “Ea heribam ta mamohoi, wau ta, teina maiona eai ta, kamkam sora nige

se dou ma labui, oa ma haiona abo u uharaegu.”³¹ Na, ia manana ie godu, i ene, “Abo ta mate esega, nige ea uharaem.” Isi gamagaridi hinage edi riba esega.

Iesu amamna lailai i hearo oea eai
Mt. 26.36-46; Lk. 22.39-46; Io. 18.1

³² Isi abo se lage dimo esau eai esana Getesemani: ia i ribalau ena heaheatayao aridi eai, i ene, “Inai au bawa, eau ea lauuura.”³³ Ia Petero, eo Iamesi, eo Ioane ie woeaidi ia abo i hetubu i noo ariri, eo nuana i porohe hinage.³⁴ Ia i ribalau isi aridi eai, i ene, “Earuagu i nuadubu ariri doha ie mate: inai au mia, au silasilawa.”

Uura bagubaguna
Mt. 26.39; Lk. 22.41-42

³⁵ Ia i taulau begana, i gurisalaoba tano eai, i awanori bena nei awa ne tabu i hearo.³⁶ Ia i ene, “Aba e, Tamagu e, ginauri gamagaridi oa abidi ue ata: teina bia ta u laeudoiei: taiede eau egu gadosisi ta i otawa, oa em gadosisi mo ta abo ie tubu.”³⁷ Ia i uioma isi i lobaidi ma-enodi, ie ribalau Petero arinai, i ene, “Simona e, oa ma enom? nige abina u ata awa esega mo u silasilawa?”³⁸ U silasilawa, eo u uura, noho ata i hearom. Earuam i adidiri, bulumam i beruberu.”

Uura helabuina
Mt. 26.42; Lk. 22.44

³⁹ Ia hinage i lausuarauio, i uura, ribana esega mo.⁴⁰ Ia abo i uioma, isi i lobaidi se enouio, (matadi se enoeno ariri) isi nige arinadi.⁴¹ Ia ma haiona i laoma, ie ribalau isi aridi eai, i ene, “Au eno eawasimiu, taiede; huiana i lageo abo ina ta; Tau Natuna ia abo se morui se mosei baaea tataodi nimadi eai.⁴² Au toro, ta lau: na taumoruigu i hanahanaumao.”

⁴³ Ena riba sora ma ribaribana Iuda, ia saudoudoi-labui esau, i laoma, ia maenayao moutuana lailai, isi elepa eo kebukebubu se abidi, kohena babadadi eo tauuriuri tataodi, eo tautaubada aridi eai se laoma.⁴⁴ Taumoruina ne heiheinoi i ribahasahasai nonohaidi, i ene, “Tau ea alagoiei ia ede; ia au toai au woahesuarakomakomani.”⁴⁵ Ia abo i lau dudurai Iesu arinai, i ene, “Tanuagagu e, Tanuagagu e,” ia abo i alagoiei.⁴⁶ Isi ia abo se abilau se toai, ia se laei.

Petero heaheari esau i lauelepai, gamagaridi Iesu se laugabaei

Mt. 26.51-56

⁴⁷ Esau aridi eai i totoro ena elepa i niusi, kohena bada ena heaheari esau beana i lauelepai, i talautusi.⁴⁸ Iesu i heuio ie ribalau isi aridi eai, i ene, “Eau doha tauaiyaiyahrina, arinai au laoma au toaigu ma elepamiu, eo ma kebukebubumiu?”⁴⁹ Asubena gamagamagari eau maemiu ta miamia wa, numa

uura alona eai ea lauheataemi, omi nige u toaigu: na uriuri tabuna se uriyao taba se hemamohoi." ⁵⁰ Isi gamagaridi ia se laugabaei, eo se dagogorigori. ⁵¹ Hewari esau ia murina eai ie lau, nogi ie lio: hewari wa ia se toai. ⁵² Ia abo ie dago, matauahaahana ena nogi i laugabaei nimadi eai.

Iesu se laei kohena lailai eo Sunederi nuanuadi eai
Mt. 26.57-58; Io. 18.12-14, 19-24

⁵³ Isi Iesu abo se woeai kohena lailai arinai: ia maenayao kohena babada gamagaridi, eo tautaubadadi, eo tauuriuri tataodi se oigogo. ⁵⁴ Petero ia i hemuriwatai muri ariri eai, kohena lailai ena numa gana alona eai se lage; ena heaheari tataodi maena se bawabigabiga, oeagi eai i aimoiga. ⁵⁵ Kohena babadadi eo Sunederi gamagaridi ribataubiga se eoi, Iesu abo se ribataubigaei bena abo se unui: matapaana nige se lobai. ⁵⁶ Gamagaridi se ribataubiga boraboraei edi riba nige ana ao esega. ⁵⁷ Headi se toro se ribataubiga borabora si ene, ⁵⁸ "Ena riba esau ai ataiei, i ene, 'Teina numa uura tatao nimadi eai se ginauri abo ea hebaaea, e asubena hehaionana eai abo esau ea hetoro nige nima eai si ginauri.'" ⁵⁹ Isi edi ribataubiga ta teina hinage nige ana ao esega. ⁶⁰ Kohena lailai i toro duaduari eai, i hesiolau Iesu arinai, i ene, "Oa nige arinam? nei tauribataubiga ne se saha se hegirum?" ⁶¹ Na, ia nige arinana, i monomonou mo. Kohena lailai abo i hesiouio, ie ribalau ia arinai, i ene, "Oa Keriso, Lolona Natuna wa?" ⁶² Iesu ie ribalau, i ene, "Eau ede: Tau Natuna abo au ita, gigiborina nimatutuna eai ie bawa, eo eada boeana eai i laolaoma." ⁶³ Kohena lailai ana lulu i purisi, i ene, "Ribataubiga esana ta eoi?" ⁶⁴ Au ataieiyao, Eaubada i ribabaeai: au ene edoha?" Isi gamagaridi ia se hegiro, si ene abo i mate. ⁶⁵ Headi ia se garigariso, eo headi ia matana se umui, abo se tubitubini, si ene, "Eai i tubitubim? u ribaei." Heaheari tataodi nimadi eai ia se oipareai.

Petero ena Guiiau i uharaei
Mt. 26.69-75; Lk. 22.56-62; Io. 18.16-18, 25-27

⁶⁶ Petero numa lailai ubuna eai ie bawabigabiga, kohena lailai ena heaheari siuna esau i laoma; ⁶⁷ ia Petero ie ita i aimoiga, ia i itasipoi, i ene, "Oa hinage Iesu Nasareta maem." ⁶⁸ Ia i uhara, i ene, "Eau nige ea nuatui, em riba hinage ea hekau;" ia abo ie lau dobila murimurina eai; ⁶⁹ siu esau hinage ia i itasipoi ie ribalau tautotoro aridi eai, i ene, "Ina tau ta doha isi esau." ⁷⁰ Ia i uharauio. Huia kuukuu mo isi Petero hasarina eai tautotoro se ribalau ia arinai, si ene, "Mamohoi; oa doha isi esau: oa Galilaia tauna, arinamiu esega hinage." ⁷¹ Petero abo ie riba baeai, i aigora, i ene, "Teina tau ta au ribaei eau nige ea nuatui." ⁷² Ma esega kamkam abo i douuio

huia helabuina. Petero Iesu ena riba i nuatui, i ene, “Komkam sora nige i dou ma labui, oa ma haiona u uharaegu.” Arinai ia nuana ie sae, abo i dou matemate.

15

Iesu se hetamari Pilato matana eai

Mt. 27.1-2, 11-15; Lk. 23.1-7, 13-18; Io. 18.28-40; 19.1-16

¹ Maratontom eai kohena babada, eo tatao babadadi, eo tauuriuri tataodi, eo Sunederi se ohihai isi se oioiriba, Iesu se pai, se laehesuara, se mosei Pilato arinai. ² Pilato i hesiolau ia arinai, i ene, “Oa Iudea tataodi edi wasawasa wa?” Ia ie ribalau ia arinai, i ene, “Oa u ribaei.” ³ Kohena lailaidi ia se hegiru ginauri gamagaridi aridi eai; na ia nige arinana. ⁴ Pilato i hesiouio ia arinai, i ene, “Oa nige arinam? U ita giru gamagaridi aridi eai se ribataubigaem.” ⁵ Iesu nige arinana; arinai Pilato ie noo. ⁶ Meta mataasi eai kamanidi tauuauauna esau i eairigabaei; tau wa aisega se henua.

Iesu nigee: Baraba mo

Mt. 27.16-26; Lk. 23.16-23; Io. 18.40

⁷ Tau esau se paiyao miamiana esana Baraba, ia maedi tauhemahemanabara hinage, maedi nei huia hemahemanabarana eai ne i aiunu. ⁸ Moutuana se eoga lailai abo se awasae Pilato arinai, ena laulau kamanina bena abo i laulauei. ⁹ Na, Pilato ie ribalau isi aridi eai, i ene, “Iudea tataodi edi Wasawasa ea eairigabaei omi arimiu eai wa?” ¹⁰ Ia i itayao kohena lailaidi edi aiaromagigiri eai se toai, se laei. ¹¹ Kohena lailaidi isi tatao se hepahepapadi si ene, “Baraba au awanorini bena i eairihai, Iesu nige’e.” ¹² Pilato i heuio, i ribalau aridi eai, i ene, “Saha au henua ea abi ia arinai, Iudea edi wasawasa se ribaei wa.” ¹³ Isi se eogayogauio, si ene, “Ia au hesatauroeawa.” ¹⁴ Pilato abo ie ribalau isi aridi eai, i ene, “Baaea esana ie abi?” Isi abo se eoga lailai si ene, “Ia au hesatauroeawa.” ¹⁵ Pilato i henua moutuana i henuabigadi, arinai Baraba i eairihai, i mosei isi aridi eai: Iesu ie pai, i pidiri, abo i mosei isi aridi eai bena abo se hesatauro.

Iesu nurinuri eai se hekorona

Mt. 27.27-31

¹⁶ Iala tataodi ia abo se woeai numa alo duaduarina eai, aba hedudurai numana eai: iala boda gamagaridi se eogagogoidima ia arinai. ¹⁷ Lulu buiabuia ia se helui, ouou oeagi nurinurina se haturi, se heousaei ia boruboruna eai; ¹⁸ Isi se hetubu ia se laulautoiei si ene, “Iudea edi wasawasa e, Euedo!” ¹⁹ Didiari se abidi ia uruna se pidiri, eo ia se garigarisoi, eo se turibono ia nuanuana eai, ia se tabaohui. ²⁰ Se alaliuliua lautom, lulu buiabuiana wa abo se lauhai, ana

lulu mamohoi se helui, ia abo se laei, se woeai, bena abo se hesatauro.

²¹ Kurene tauna esau, esana Simona, Alesana ma ena Ruposu tamadi, oea eai i laoma, i baeawaidi, ia se lauhesom ena satauro i bahei. ²² Ia se woelaei dimo esau eai, esana Golagota, heaheasonina ede ina, Moiaru dimona. ²³ Isi abo waina ma murona se heboriesegai, se mosei ia arinai, ia bena i nom, na i otaotaei.

Iesu se hesatauro

Mt. 27.33-56; Lk. 23.33-49; Io. 19.17-37

²⁴ Isi ia se hesatauroyao, ana lulu abo se soiei kelero eai, tau esa, esa, enana. ²⁵ Awa haiona eai ia se hesatauro. ²⁶ Riba wa arinai ia se hegiru se urisaei ewana eai, IUDEA TATAODI EDI WASAWASA. ²⁷ Tatao aiayahari labui maena se hesatauroesegaidi, esau nimatutuna eai, esau nimaseuseurina eai. ²⁸ Eo uriuri tabuna se hemamohoei, ia ede si ene, "Ia maedi baaea tataodi se hepatuesegaidi." ²⁹ Isi tausae taudobi ia se hebaaea, se uruuruodei, eo se hegahegadoloesaei si ene, "Eamoisa! Numa uura tausogorigorina e, asubena haiona abo u heterouioi, ³⁰ hage oabom u hemauiuiioim, satauro eai me u pesa dobima." ³¹ Kohena lailai, eo tauuriuri tataodi ia se talawasiei hinage, isi edi ribariba, si ene, "Tatao udoi i hemauidi: ie saha nige iabom i hemauiuiioi? ³² Keriso e, Isaraela Wasawasa e, hage satauro eai me u pesa dobima, ai itam, abo ai awamamohoiem." Isi hinage maena se hesatauro esegaidi wa ia se ribahebaaea hinage.

³³ Mahana haligigi- esega ie lageo, oea maudoudoina i amumu hetaiiri i lau e mahana hehaligigi- hasina eai. ³⁴ Mahana hehaligigi- hasina eai Iesu ie eaba ma arina lailaina, i ene, "Eloi Eloi, lama sabatani?" heaheasonina ede, "Egu Eaubada, Egu Eaubada, ue saha u nuagabaegu ta?" ³⁵ Headi se totoro ia hasarina eai, ena riba se ataiei, si ene, "Ia Elia i eogai." ³⁶ Esau i aitautau baro esau i hebuta vinega eai, i paihepatulaei didiari eai, ia i mosei bena i nom, i ene, "Ta ita, Elia ena i laoma abo i taruhi-dobeama paa eai ta?" ³⁷ Iesu i eabayaba ma arina lailaina, ia abo i tubahai. ³⁸ Numa uura woena i tapurisi labuini, ewa eai ie dobi paa eai. ³⁹ Kenturion esau, Iesu nuanuana eai i totoro, ie ita i eaba lailai, eo Iesu i tubahaio, i ene, "Mamohoi, tau ta Eaubada Natuna ede."

⁴⁰ Sisine headi hinage se itaitalau eda lohaloha eai: isi maedi Maria Magadala, eo Maria, Iamesi gagirina maena Iose sinadi, eo Salome; ⁴¹ (Isi nabada wa Galilaia eai ia se hemuriwatai, eo ia se taubigai) eo sisine headi hinage ia maenayao se laoma Ierusalem eai.

*Se tore bousa eai**Mt. 27.57-61; Lk. 23.50-56; Io. 19.38-42*

⁴² Henonoha asubenana ia ede maimailahina i lagema, mara ie tom Sabati. ⁴³ Iosepa Arimataia, sunederi tauna, tau lolo, ia Eaubada ena basileia taubagibagiena: ma nuakipikipina ie lau Pilato arinai, Iesu tauna i awanorini. ⁴⁴ Pilato i nooei, i ene nuana sora nige ie mate: Kenturion esau i eogai ia i hesioi, i ene, “Iesu i mateo?” ⁴⁵ Ia kenturion wa ena riba i ataiei, sinarena abo i mosei Iosepa arinai. ⁴⁶ Ia oma lolona ie une, ia Iesu i taruhi paa eai, omana ne arinai i umui, bousa eai ie tore, ia ede we’u wa gudana se ginauri nonohai, we’u esau bousa awana eai i buigudui. ⁴⁷ Maria Magadala, maena Maria, Iose sinana, ena aba ota se ita.

16*Iesu Keriso i torouio**Mt. 28.1-15; Lk. 24.1-49; Io. 20.1-23*

¹ Sabate i lautom, Maria Magadala, eo Maria Iamesi sinana, eo Salome, eausi panepanedi se unedi, se laoma ia bena abo se heyausi. ² Maratomtom ariri eai asubena bagubaguna eai, isi abo se lau bousa eai, mahana abo i dalasae. ³ Isi isibom se ribariba, si ene, “We’u wa bousa awana eai se tore, eai abo i buihai?” ⁴ Isi se itaitalau abo se ita we’u wa se buihaiyao, hinage we’u nabunabutuana. ⁵ Isi abo se lusae bousa alona eai, hewari esau se ita i bawabigabiga teha tutuna eai, ana lulu posiposi lohalohana, isi abo se matausi. ⁶ Ia ie ribalau isi aridi eai, i ene, “Tabu au matausi: omi Iesu Nasareta au eooi, ia ede se hesatauroyao wa; ia i torouioo, ia inai nige’e: ia edi aba heotana au ita. ⁷ Na, au lau, ia ena heaheatayao, eo Petero, au heribadi, Ia i bagunaemiu Galilaia eai: ia nei eai abo au ita, doha i ribaei omi arimiu eai wa.” ⁸ Isi se lulage heuheula murimuri eai, bousa se dagogabaei; isi se tabutabubu, eo se noo; nige se ribalau tau esau arinai; se matausi ariri.

⁹ Iesu i toroo, asubena bagubaguna maratmtom ariri eai, i taumasaraha bagubaguna Maria Magadala arinai, nabada wa demoni haligigi-labui ia arinai i aiduiedi. ¹⁰ Ia abo ie lau ena heaheatayao i heribadi, isi ma laulaumurorodi, eo ma doudoudi. ¹¹ Isi wasa se ataiei ia i maurio, eo Maria hinage Iesu i itayao, nige se awamamohoei.

¹² Murina eai hinage i taumasaraha adi sasaguyao labui aridi eai, ana ao udoi: isi ma laulaudi se lau ealeba. ¹³ Isi se lau adi sasaguyao se heriheribadi: edi wasa hinage nige se awamamohoei. ¹⁴ Murina eai i taumasaraha saudoudoiesega aridi eai, edi aba aiai eai, i ribasuuidi paana nige se awamamohoei, eo se nua oiura, eo i torouioo murina

eai headi ia se itayao wa eo se heribadi, na nige se awamamohoiei. ¹⁵ Ia ie ribalau isi aridi eai, i ene, “Omi au lau eanua gamagamagari tanoubu eai ta, evanelia ta teina au guguahemasaraha tau esau, tau esau, gamagaridi aridi eai. ¹⁶ Ia i awamamohoiei eo se hebapatisoi, ia abo i mauri: ia ena nige i awamamohoiei abo se hebaaea. ¹⁷ Heiheinoidi ta teina tauawamamohoiena abo se abidi: eau esagu eai demoni abo se aiduiedi, arina harihariudi isi abo se ribaedi. ¹⁸ Isi abo mota se abigaibuidi; ena aiailewa se nom taba nige si mate; isi nimadi tatao asiasiebodi potadi eai se saolaedi abo si mauri.”

Se abiisini

Lk. 24.50-53; A. adi H. 1.6-11

¹⁹ Guiau ie ribadai isi aridi eai, ia abo se abiisini galewa eai, Eaubada nima tutuna eai ie bawa. ²⁰ Isi abo se lau eanua gamagamagari se lauguguiadi, Guiau hinage maedi adi hevau i saguidi, heiheinoidi i laulauedi, ena riba arinai i hemamohoiedi. Amen.

LUKA ENA EVANELIA

¹ Teopilo e, doha tatao headi edi nuatu si ene bena ginauri ta sunusunumaedi wa si uri hemasarahadi, ² doha hinage se ledima arida eai isi huia hetubuna eai ginauri wa tautadi, eo riba wa taulauguguaena tataodi; ³ ginauri gamagaridi huia bagubagunadi eai wa, eau hinage ea nuatukomakomanidio, arinai, ea 'ne i lolo hinage ea uri heaheasadi oa arim eai. ⁴ Teina ginauri ta bena u nuatuwataididini, doha hinage se ribahasahasaim'o wa.

⁵ Heroda, Iudea wasawasa, huiana eai, kohena esau esana ede Sakaria, ia Abia bogana: ia monena esana ede Elisabeta, ia Arona bogana. ⁶ Taudi labui, Eaubada matana eai edi laulau se dudurai: Guiau ena laulau eo ana sanapu gamagaridi se lauwataidi, se lolo. ⁷ Isi nige natudi: Elisabeta i agari, eo taudi labui edi borimai se gamagari ariri.

⁸ Ena huia kohena eai wa Eaubada matana eai i paisoaei. ⁹ Kohena edi laulau doha meta, isi se lau Guiau ena dubu tabuna alona eai muramura panepane se gabu. ¹⁰ Huia wa muramura panepanena se gabu tatao moutuadi lailai murimuri eai se laulau-uura. ¹¹ Ia arinai Guiau ena aneru esau i taumasaraha muramura panepanena wa hatahatana teha tutuna eai i totoro. ¹² Sakaria ia ie ita nuana i pono-pono, aruana ie loi. ¹³ Aneru abo i ribalau ia arinai i ene, "Sakaria e, tabu u matausi: em uura se ataieyao; monem Elisabeta abo i haisu natum tau abo i leawa, ia esana abo u tore Ioane. ¹⁴ Abo u nuawoiwoina eo u kode: ia abo se labasi wa debana eai tatao gamagaridi hinage abo se kode. ¹⁵ Paana Guiau matana eai ia abo i sae, waina eo nomnom gigigiboridi taba nige i nomdi; na Earua Tabuna arinai abo se hemonau sinana bogana eai i laoma e. ¹⁶ Isaraela nanatunayao moutuadi abo i hesinibuidi Guiau edi Eaubada arinai. ¹⁷ Ia Guiau matana eai abo i edabaguna Elia ena laulau eo ena gigibori eai, tamadiyao nuadi bena i heasibuidi nanatuidiyao aridi eai: eo tauawaawayagara hinage nuadi bena i heasibuidi taulaulaududurai edi sonoga dobiladi eai: tatao bena i henonohaidi Guiau enana." ¹⁸ Sakaria i ribalau aneru arinai, i ene, "Wau wa ginauri edohana abo ea nuanuatui? Ea tautaubadao, eo monegu hinage ena borimai se gamagari." ¹⁹ Aneru arinana i heuio i ene, "Eau Gaberiela ina, Eaubada matana eai ea totoro; na se hetamariguma bena enam ea riba, bena teina wasa lolona ta ea heribam. ²⁰ E oa abo u unauna, taba nige abina u ata riba esau u ribaei i lau e asubenana eai ginauri ta abo se tubu, paana egu riba nige u awamamohoiadi, ia ede abo se tubu edi huia eai." ²¹ Tatao

wa Sakaria se bagiwatai, se noo paana huia lohaloha dubu tabuna alona eai ie bawa. ²² I taulagema murimuri eai, bena i riba to nige arinana: se nuatuiyao numa tabuna alona eai ia ginauri esana ie ita: paana i nimaoidi, eo nige arinana hinage. ²³ Ana paisoa asubenadi se ohi, ie lau ena numa eai.

²⁴ Nei asubenadi muridi eai ia monena Elisabeta ie boga, nawalai haligigi i miayamui, i ene, ²⁵ “Nuana Guiau ena abiabigu doha ede teina, agu iwala tatao matadi eai abo i abihai.”

²⁶ Nawalai hehaligigi- esegana eai aneru Gaberiela wa se hetamariama, Eaubada arinai i laoma Galilaia eanua esau eai, esana Nasareta. ²⁷ Hasara nuanuasupu esau arinai, ia se awaawaduduei tau esau arinai, esana Iosepa, ia Davida bogana; wau hasara nuanuasupuna wa esana ede Maria. ²⁸ Aneru wa i laoma ia arinai i ene, “Eauedo, oa se hedebasaem, Guiau maem: sisine aridi eai oabom u sae!” ²⁹ Hasara wa aneru ie ita ena riba wa nuana i ponoponei, i heunaboisaha, i ene aitoi sahasaha ina? ³⁰ Aneru abo i ribalau ia arinai i ene, “Maria e, tabu u matausi: Eaubada arinai oa se hedebasaem. ³¹ Oa abo u boga, natum tau abo u labasi, ia esana abo u tore IESU. ³² Ia abo i sae, ia esana abo se tore Saesaedaoina Natuna: ia tamana Davida ena terona Guiau Eaubada abo i mosei ia arinai. ³³ Iakobo boganayao ia abo tanuagadi eai i lau e nige nosina; ena basileia hinage taba nige ena abalautom.” ³⁴ Maria abo i ribalau aneru arinai i ene, “Wau wa abo edoha egu abiabina, eau nige monegu?” ³⁵ Aneru arinana abo i heuio i ribalau ia arinai i ene, “Earua Tabuna abo i dobima, Saesaedaoina ena gigibori abo i helogulogum: arinai hinage meta ginauri tabuna wa abo u labasi esana abo se ribaei Eaubada Natuna. ³⁶ Am bogaoyao-sinena Elisabeta i sinesinebadao, hinage ie boga abo i haisu tau, ia i agari wa ena nawalai harigigi-esega se lauo. ³⁷ Paana ede Eaubada nige ginauri esau ie deha, abo i ginauri.” ³⁸ Maria abo i ene, “Eau ina, Guiau ena heaheari sinena; u ribaei wa besi abo i tubu arigu eai.” Aneru ia abo i laugabaei.

³⁹ Nei asubenana ne Maria i torohai, i lau heuheula oea tupidi eai, eanua esau Iudea eai, ⁴⁰ i awasae Sakaria ena numa eai Elisabeta i aitoiei. ⁴¹ Elisabeta Maria ena lautoi i ataiei, natuna bogana eai i lamposi; Elizabeta Earua Tabuna i monau ⁴² i ribalau arinana lailai i ene, “Sisine aridi eai oabom se hedebasaem, bogam aniona i sae ariri! ⁴³ Egu lolo saha egu Guiau sinana i laoma arigu eai ta? ⁴⁴ U aitoiegu wa, arinam beagu eai ea ataiei, kaimou bogagu eai ie kode eo i lamposi. ⁴⁵ Sunusunuma sinena abo i nuawoiwoina, meta ginauridi

Guiau ia i heriba wa, abo hinage se hemamohoiedi.”⁴⁶ Maria abo i ene,

“Guiau nuagu eai ea hedebasae.

⁴⁷ Eo earuagu ie kode Eaubada, Tauhemaorigu arinai.

⁴⁸ Ena heaheari sine epoeposisina i nuaamnaei:

ina ta i lau e isina gamagamagari abo se riba loloegu.

⁴⁹ Paana ede taugigibori ginauri saesaedi i

hetubudio arigu eai, esana tabuna ede.

⁵⁰ Ia matausina taumatausi abo i nuatoatoadi

i lau e hari isi, hari isi.

⁵¹ Ia nimana eai ena adidiri i hemasarahayao;

tauribaribahetausaeuioidi edi nuatu gaibu arinai i het-
atagorigoridio.

⁵² Tatao saesaedi edi abababawa eai i heguridio:

tatao epoeposisidi i hedebaseedio.

⁵³ Tauguriguriam ginauri lolodi eai bogadi i hesesedio:

taumonamonaune i hetamariuioidi ma nima ahaahadi.

⁵⁴ Ena heaheari Isaraela i saguiyao,

ena nuatoatoa i henuaisini.

⁵⁵ Doha i ribaeyao wa tamadayao aridi eai,

Aberahama arinai, eo tumanayao aridi eai i lau e nige
nosina.”

⁵⁶ Maria nuana nawalai haiona Elisabeta arinai ie mia, abo i
uio ena numa eai.

⁵⁷ Elisabeta ena huia labalaba abo ie lage; natuna tau i

labasi. ⁵⁸ Helena taumia eo ena dodogayao Guiau ena nu-

atoatoa lailai wasana se ataieyao; maedi se kodegogoesega.

⁵⁹ Asubena hehaligigi-haionana eai se laoma merumeru wa

bena se heperitome; esana se torelaei Sakaria, tamana esana

se helaudamai. ⁶⁰ Ia sinana arinana i heuio i ene, “Nige’e;

ia esana abo Ioane.” ⁶¹ Se ribalau ia arinai si ene, “Am

bogao nige esau esana doha meta.” ⁶² Se nimanimaoui tamana

arinai, si ene, “U ene gama ta esana?” ⁶³ Abauriuri i aiboda,

abo ie uri, i ene, “Ia esana ede Ioane.” Gamagaridi se nooei.

⁶⁴ Ma esega abo ia awana i dabari, eo memenana i moimoiu,

abo i ribariba eo Eaubada i aihelahui. ⁶⁵ Heledi taumia

gamagamagaridi matausi i abiunuidi: teina riba gamagaridi

ta wasadi se helai i lau Iudea oea tupidi eanuadi se hetaiiridi.

⁶⁶ Wau riba tauataiena gamagaridi isi se nuatuwatai, si ene,

“Teina gama ta abo i hemala saha! Guiau nimana ia potana

eai.”

⁶⁷ Tamana Sakaria Earua Tabuna i monau, i riba peroveta,

i ene.

⁶⁸ “Guiau Isaraela edi Eaubada se aihelahui;

Paana ena tataoyao i aitaumanaidi, eo i lebohaidi.

⁶⁹ Mauri donana esau i lauisini enada

ena heaheari Davida bogana eai.

- 70 Doha ena peroveta tabuna awadi eai i ribaei, tanoubu huia hetubuna eai wa i laoma e huia ta:
- 71 ada waiunu nimadi eai abo se hemauida, eo isi gamagaridi se ouyalayalaeda nimadi eai hinage;
- 72 nuatoatoa se ribahesunumayao tamadayao aridi eai abo se hetubu, eo ribahesunuma tabuna abo ta nuatui.
- 73 Aigora i aigorayao tamada Aberahama arinai,
- 74 enada abo i leama, ita ada waiunu nimadi eai abo se abihemauida ia bena ta heaeaiei taba nige ta matausi.
- 75 Ia matana eai ma hetabuda, eo ma laulaududuraida; eda mauri asubenadi gamagaridi eai.
- 76 Gama e, oa esam abo se tore Saesaeairina ena peroveta: paana Guiau matana eai abo u lau baguna ena eda u abinonohaidi;
- 77 abihemaui nuatulobaina ribana u mosei ena tataoyao aridi eai edi baaea ribagigirina debana eai.
- 78 Eda Eaubada ena nuatoatoa lailai debana eai; arinai mara-ie-tom sasasasari i laoma ewa eai, i sinaida.
- 79 Isi masigiri boeana eai se bawa, eo mate loguloguna eai hinage, ia abo i hemaradi, labini edana eai abo aeda i woeaidi.”
- 80 Gama wa ie tubu, i lau e i sibasiba, nuana abo hinage i adidiri, maratupama eai ie mia i lau e asubenana wa Isaraela matadi eai ia abo se hemasaraha.

2

- 1 Nei asubenana ne Kaisara Aoguso ena laugaga eo ribana esau i lauhesomdi, tanoubu se ohihai esadi abo se lauuri. ² (Se uri bagunai Kurenio, Suria gavanana, huiana eai.)
- ³ Tatao gamagaridi se laulau edi eanua mamohoi eai esadi se lau-uridi. ⁴ Iosepa hinage Nasareta, Galilaia i laugabaei i sae Iudea, Davida ena eanua esau ede Betelehema; (paana ia Davida tubuna eo bogana:) ⁵ maena Maria se sae esadi se lau-uridi, monena sora nige i tawasorai, ia ie boga. ⁶ Taudi labui metai se mia, ena huia se ohi abo i labalaba. ⁷ Abo i haisu ealahou tau, ia lulu eai se suma, bulumakau edi abaaiai hatahatana eai se tore, paana numa alona eai nige susuana.
- ⁸ Mamoe taitawataidi headi nei oea eai ne se mia, edi mamoe eawoidi se itaitawataidi maiona eai. ⁹ Guiau ena aneru esau i laoma aridi eai, Guiau namanamarina i sinahetaiiridi; isi abo se matausi ariri. ¹⁰ Aneru i ribalau aridi eai i ene, “Tabu au matausi: paana wasa lolona ea leama ta, abo au kode ariri, eo tatao gamagaridi enadi. ¹¹ Wau ta Davida ena eanua eai Tauhemahemaui se labasi, ia ede Keriso Guiau. ¹² Heiheinoina ede meta; Bebe abo au lobai

lulu eai se suma, bulumakau edi abaaiai hatahatana eai se heota.”¹³ Ma esega galewa tataodi moutuadi aneru maedi se heoiesegaidi Eaubada se aihelahui, si ene,¹⁴ “Dimo ewa puripurina eai Eaubada se hedebasae eo tanoubu se loni, ena nuatu lolona tatao aridi eai.”

¹⁵ Aneru wa se laugabaedi se uio galewa eai, mamoe taitawataidi se ribariba si ene, “Ta torohai, ta lau Betelehemae eai wau ginauri wa ie tubu wa hage ta ita, ia ede Guiau i heriba nonohaida wa.”¹⁶ Se lau heuheulama Maria eo Iosepa se lobaidi, bebe hinage bulumakau edi abaaiai hatahatana eai se heota.¹⁷ Se ita nonohai abo gama wa ribana aneru se heribadi wa abo se wasaduajiei.¹⁸ Isi wau riba tauataiena wa mamoe taitawataidi edi riba se nooedi.¹⁹ Na Maria teina ginauri gamagaridi i abididinidi, eo nuaboeana eai i nuatuwataidi.²⁰ Mamoe taitawataidi abo se uio, ginauri gamagaridi se ataiedi, eo se itadi doha se heribadi wa, aridi eai Eaubada se hedebasaei eo se aihelahui.

²¹ Asubena haligigi-haiona se ohi gama wa abo se heperitome, esana se tore ede IESU, doha aneru i tore nonohaiyao sora nige sinana i abiabi.

²² Ena asubena headi wa se ohi, doha Mose heaa laugagaona i ribaei wa, ia abo se bahesae Ierusalem eai, bena se mosei Guiau arinai;²³ (Doha Guiau ena laugagaona eai se uri, si ene, “Ealahou merumeru tatao gamagaridi Guiau arinai u hetabuedi;”) ²⁴ Aitalasam se ginauri doha Guiau ena laugagaona eai se ribaei, “Bunebune labui, e gabubu labui.”²⁵ Na, tau esau Ierusalem eai ie mia esana ede Simeona; ia ede tau wa ena laulau se dudurai eo Eaubada matausina i matausi, ia Isaraela abahenuabigadi i bagibagiei; Earua Tabuna ia potana eai ie ota.²⁶ Earua Tabuna tau wa i heribanonohaiyao, mate taba nige i ita, Guiau ena Keriso sora i ita bagunai.²⁷ Earua Tabuna ia i woeai numa uura alona eai: tamana, sinana, merumeru Iesu se leama bena laugagaona laulauna se abiwatai.²⁸ I abilau nimana eai i labasi, Eaubada i aihelahui, i ene.

²⁹ “Guiau e, em heaheari tauna abo i lautom ede ina, ma nualologu,

doha hinage u ribaei:

³⁰ paana em abaabihemauri matagu eai ea itayao.

³¹ Ia ede u abinonohai tatao gamagamagaridi matadi eai;

³² marana eai arinai Etene abo se hemaradi,

Isaraela tataodi edi abahedebasaei.”

³³ Iosepa eo ia sinana meta ginauri ia arinai se ribaedi se nooedi.³⁴ Simeona isi i aihelahuidi, i ribalau ia sinana Maria arinai, i ene, “Teina merumeru ta debana eai Isaraela eai gamagaridi abo se beu, eo gamagaridi hinage abo se toro; eo ia heiheinoina hinage abo se alaliuliuai; ³⁵ (Mamohoi, elepa

hinage nuam abo i gorilapai,) tatao gamagaridi edi nuatu abo se hemasarahadi.”

³⁶ Peroveta sine esau esana ede Ana, Penuela natuna, sine wa Asera bogana eai: i sinesinebada ariri, ma hasarana eai wa monena arinai ie mia borimai haligigi-labui; ³⁷ borimai tataohasi-se-mate-hasi ie wabu, numa uura nige i laugabaei na maiona to asubena i aiudi eo i lau-uura, Eaubada i hea-heaiei. ³⁸ Ia i taulagema Eaubada i lautoiei, isi gamagaridi Ierusalem a bihemaurina se bagigabagiei, kaimou ribana i heribadi.

³⁹ Guiau ena laugagaeo laulauna gamagaridi se abiheohidio, abo se uio Galilaia eai, edi eanua mamohoi Nasareta eai. ⁴⁰ Gama wa ie tubu, i lau e i sibasibaohi ia abo i adidiri, eo i nuagilogilo, Eaubada ena nualolo ie ota ia arinai.

⁴¹ Pasova mataasina huiana eai borimai gamagaridi tamana, sinana se saesae Ierusalem. ⁴² Ia ena borimai saudoudoi-labui, mataasi abiabina wa se sae Ierusalem eai. ⁴³ Asubenadi se ohi, abo se uiouio, gama wa Iesu Ierusalem eai ie bawa, Iosepa eo sinana nige se nuatui. ⁴⁴ Si ene bena maedi se lau, asubena esega se uiouio ehadiyao boead i eai se eooasaei. ⁴⁵ Ia nige se lobai arinai se uio Ierusalem eai se eoi. ⁴⁶ Asubena haiona se ohi, numa uura alona eai se lobai sonoga tataodi boead i eai ie bawa, edi riba i ataiedi, eo i hesihesiolau aridi eai hinage. ⁴⁷ Gamagaridi ia arinana se ataiei, ena sonoga, eo ena riba heuio, se nooedi. ⁴⁸ Ia se ita se nooei, sinana i ribalau ia arinai, i ene, “Natugu e, edoha em abiabimai? Tamam eo eau ai eooeoonuanuadubuem.” ⁴⁹ Ie ribalau aridi eai, i ene, “Aue saha au eooigu? Nige au nuatui tamagu ena hewau ta taba ea abi?” ⁵⁰ Wau riba wa i ribalau aridi eai nige abina se ata. ⁵¹ Maedi abo se lauesega, abo se lage Nasareta eai, i awaabiedi: ia sinana teina ginauri gamagaridi nuaboeana eai i toreyamuidi.

⁵² Iesu i sibasibaohi, tauna hinage i tubu lolo, Eaubada eo tatao ia se gadosisiei.

3

¹ Kaisara Tiberia i wasawasa borimai hesaudoudoi-haligigina eai, Ponotio Pilato Iudea gawanana, eo Heroda Galilaia edi tetaraki, eo ena tau Pilipo Ituria edi tetaraki, Terekoniti tehana eai, eo Lisania Abilene edi tetaraki. ² Ana eo Kaiapa isi kohena lailaidi ede, Eaubada ena riba i laoma Ioane Sakaria natuna arinai barabara eai. ³ Ioridana oead i eai i laoma nuabui hebapatisona i lauguguaiei, baaea ribagigirina ede: ⁴ Doha Isaia peroveta ena riba bukana eai se uriyao, si ene, “Arina esau barabara eai i eogayogai, i ene, Guiau ena eda au abinonohai, ena dobila au hedudurai.

⁵ Arotau gamagaridi abo se hemonaudi, oea deba pogadi eo oea tupidi gamagaridi abo se torehebigadi,

dobila gewagewadi abo se heduduraidi, eo dobila tupitupidi abo se hebaubaudi;

⁶ buluma gamagaridi Eaubada ena abihemaui abo se ita.”

⁷ Moutuadi se laoma bena i hebapatisoidi i heribadi, i ene, “Mota nanatuidiyao e, eai i ribahesanapuemiua baaea lailai ne au dagogabaei? ⁸ Nuabui aniodi au hemasarahadi, tabu emi nuatu au ene, Tamamai ede Aberahama: ea heribamiu, ea 'ne, Eaubada abina i atao bena teina we'u ta aridi eai Aberahama nanatunayao i heterodi. ⁹ Huia ta ilama se toreyao oeagi lamdi eai, oeagi gamagaridi aiaini lolodi nige se toredi abo se oiheguridi, se gabalaedi oeagi alaalasi boeana eai.”

¹⁰ Tatao ia se oimurini, si ene, “Saha abo ai abi?” ¹¹ Arinadi i heuiio i ribalau aridi eai, i ene, “Ia pereue labui i abidi abo i mosei tau nige enana arinai; eo ia aiaini i abi, ena abi hinage doha ede.” ¹² Takisi tautano hinage abo se laoma bena se hebapatisoidi, se ribalau ia arinai, si ene, “Tanuagamai e, ai saha abo ai abi?” ¹³ Ie ribalau aridi eai, i ene, “Gogo maisana duduraina mo au tanoi.” ¹⁴ Tauiala tataodi hinage ia se oimurini, si ene, “Ai hinage saha abo ai abi?” I ribalau aridi eai, i ene, “Tabu tau esau au hematausi, tabu esau au hegirugaibui, emi paisoa maisana au abi nuamiu * sabusabuaina.”

¹⁵ Tatao nuadi se ponopono, Ioane arinai edi nuatu si ene, ia Keriso e nige'e? ¹⁶ Arinai Ioane gamagaridi arinadi i heuioidi, i ene, “Mamohoi, eau goila eai ea hebapatisoimiu, na esau abo i laoma i saetawatawaigu, ia aena umna mainana nige ea lolo bena ea eaiyairihai; ia Earua Tabuna arinai abo i hebapatisoimiu, eo ma alaalasina. ¹⁷ Ena tapitapi nimana eai, ena † sitona ena abatapitapi matuna abo i tapitapikomakomani, sitona aiaini abo i tanogogoidi ie toredi ena sanara eai; wenudi wa abo i gabudi oeagi alaalasina eai nige nosina.”

¹⁸ Eo riba headi gamagamagari ena gugua eai tatao i lauguguaedi. ¹⁹ Na ia Heroda tetaraki i ribasuui, paana Herodia, ena tau Pilipo monena, ie hai, eo paana hinage Heroda baaea gamagamagari i abidi. ²⁰ Baaea lailai esau abo i hepatulaei, ede Ioane numa masigiri eai i tutugudui.

²¹ Tatao gamagaridi se hebapatisoidio, Iesu hinage se hebapatisoi, na ia ma-uurana, galewa abo i taigari. ²² Earua Tabuna i taru dobima ia potana eai ana ao doha bunebune, arina esau galewa eai i laoma, i ene, “Oa Natuyogoyogoigu; u henualolo-aririegua.”

* 3:14: au nuataru. † 3:17: wheat

²³ Iesu ena borimai tau-esega-i-mate-saudoudoi ana paisoa abo i hetubu, (si ene) ia Iosepa natuna, Iosepa wa Heli natuna, ²⁴ Heli Matata natuna, Matata Levi natuna, Levi Meleki natuna, Meleki Ianai natuna, Ianai Iosepa natuna, ²⁵ Iosepa Matatia natuna, Matatia Amosa natuna, Amosa Nahuma natuna, Nahuma Eseli natuna, Eseli Nagai natuna, ²⁶ Nagai Maata natuna, Maata Matatia natuna, Matatia Semeina natuna, Semeina Ioseka natuna, Ioseka Ioda natuna, ²⁷ Ioda Ioanana natuna, Ioanana Resa natuna, Resa Serubabela natuna, Serubabela Salatiela natuna, Salatiela Neri natuna. ²⁸ Neri Meleki natuna, Meleki Edi natuna, Edi Kosama natuna, Kosama Elemadama natuna, Elemadama Era natuna. ²⁹ Era Iesu natuna, Iesu Eliesera natuna, Eliesera Iorima natuna, Iorima Matata natuna, Matata Levi natuna. ³⁰ Levi Simeona natuna, Simeona Iuda natuna, Iuda Iosepa natuna, Iosepa Ionama natuna, Ionama Eliakima natuna, ³¹ Eliakma Melea natuna, Melea Mena natuna, Mena Matata natuna, Matata Natana natuna, Natana Davida natuna, ³² Davida Iese natuna, Iese Obeda natuna, Obeda Boasa natuna, Boasa Salomona natuna, Salomona Nahasona natuna, ³³ Nahasona Aminadaba natuna, Aminadaba Areni natuna, Areni Hesperoma natuna, Hesperoma Paresa natuna, Paresa Iuda natuna, ³⁴ Iuda Iakobo natuna, Iakobo Isaako natuna, Isaako Aberahama natuna, Aberahama Tera natuna, Tera Nahora natuna, ³⁵ Nahora Seruga natuna, Seruga Reu natuna, Reu Pelega natuna, Pelega Ebera natuna, Ebera Sala natuna. ³⁶ Sala Kainana natuna, Kainana Arepakasa natuna, Arepakasa Sema natuna, Sema Noa natuna, Noa Lameka natuna, ³⁷ Lameka Metusela natuna, Metusela Enoka natuna, Enoka Iareda natuna, Iareda Malaleela natuna, Malaleela Kainana natuna. ³⁸ Kainana Enosa natuna, Enosa Seta natuna, Seta Adamu natuna, Adamu Eaubada natuna.

4

¹ Iesu, Earua Tabuna i monau Ioridano eai i uioma, Earua ia i woealaei barabara eai. ² Asubena tatao-labui-si-mate diabololo ia i nohoi. Nei asubenana ne ia nige i aiiai: asubena wa se ohi, abo i guriam. ³ Diabololo i ribalau ia arinai, i ene, “Ena oa Eaubada Natuna, we’u ta u lauhesom abo i hemala falawa.” ⁴ Iesu arinana i heuio, i ene, “Se uriyao meta si ene, ‘Areto mo taba nige tau i mauriei, Eaubada ena riba gamagaridi eai hinage’.” ⁵ Diabololo ia i woeai oea deba pogana eai, ma esega tanoubu basileia gamagaridi ia i heitadi. ⁶ Diabololo i ribalau ia arinai, i ene, “Teina gigibori ta abo ea lediwaheohidi, ma tepodi hinage, paana se ledimao arigu eai, taba ea ’ne ea mosedi abo ea mosedi. ⁷ Ena u tabaohuiguma, gamagaridi abo enam.” ⁸ Iesu arinana i heuio, i ribalau ia arinai, i ene,

“Satani e, u lausuara murigu eai: si uriyao, si ene, ‘Guiiau em Eaubada, taba u aihelahui ede iabom mo taba u heaeaei ede.’” ⁹ Ia abo i woeasae Ierusalem eai, dubu lailai isu saesaena eai ie tore, i ribalau ia arinai, i ene, “Ena oa Eaubada Natuna ede, hage u gabadobem: ¹⁰ doha se uriyao, si ene, ‘Ena aneru abo i hetorodi se itawataikomakomanim: ¹¹ isi nimadi eai abo se abiisinim, ata aem u hetupanei we’u eai.’” ¹² Iesu arinana i heuio i ribalau ia arinai, i ene, “Si ene, ‘Guiiau em Eaubada tabu u nohoi.’” ¹³ Diabolo ena noho gamagamagari se ohi, i lausuara i lau e huia esau.

¹⁴ Iesu Earua Tabuna ena gigibori debana eai i uio Galilaia eai; ia wasana i lau eanua gamagamagari i hetaiiridi. ¹⁵ Edi sunago gamagamagari alodi eai i lauheataedi, tatao gamagaridi ia se hedebasaei.

¹⁶ Ia abo ie lage Nasareta eai, eanua wa ia abaabihelaina: ia kamanina, asubena Sabati eai i awasae sunago alona eai, i totoro bena buka i hasiri. ¹⁷ Isaia peroveta ena buka se mosei ia arinai, Buka wa ie ala, abauriurina wa i lobai si uri ina doha. ¹⁸ “Guiiau ena Earua Tabuna eau potagu eai, paana i heyausigu gogogesagesa tataodi wasa lolona abo ea lauguguiaidi; i hetamarigu taunuanuadubu abo se henu-abigadi, tatao auaudi lebohai ribana abo se lauguguiaidi, tatao matagibugibu matadi abo se helaladi, isi se hebaaeadi abo se eairigabaedi. ¹⁹ Guiiau ena huia lolona ina abo ea lauguguiaei.” ²⁰ Buka wa abo i heapu, abo i moseuioi sunago taitawataina arinai, abo i bawabigabiga. Tatao gamagamagari sunago alona eai se itaitagogolau ia arinai. ²¹ Riba wa i ribahetubu aridi eai, i ene, “Ina asubena ta teina uriuri ta beamiu eai se hemamohoei.” ²² Gamagaridi ia se riba helolo eo riba amna wa ia awana eai se laoma se noonooedi. Eo si ene, “Teina ta Iosepa natuna, e nige’e?” ²³ Ie ribalau aridi eai, i ene, “Mamohoi teina riba sonoga abo au ribalaoma arigu eai abo au ene, ‘Doketa e, u hemauiuiioim: hari laulau eo hari laulau wasadi ai ataiedi Kaperenauma eai u ginauridi, em eanua mamohoi eai ta abo hinage u ginauridi.’” ²⁴ I ene, “Mamohoi, ea heribamiu ta, nige peroveta esau ena eanua mamohoi eai se hemataei. ²⁵ Riba mamohoina ea heribamiu ta, Elia ena huia eai wabu gamagaridi Israela eai se mia, galewa se gudu wa borimai haiona eo nawalai haligigi-esega, eanua gamagamagari guriam lailai se hearo; ²⁶ Elia nige se hetamari aridi eai, i lau mo Sarepeta, Sidona eai, sine esau arinai, sine wa ie wabu. ²⁷ Hinage Elisaia peroveta huiana eai, lepera tataodi gamagaridi Israela eai se mia, nige esau se heaa. Naamana Suria tauna iabom.” ²⁸ Isi gamagaridi sunago alona eai, teina ginauri ta se ataiedi, abo se ouyalayala ariri. ²⁹ Se torohai, se abilau ia arinai se heduheduiahalai eanua

murimurina eai, abo se woeasaei edi eanua oea tupina eai, ia bena se hedonapiledobei. ³⁰ Isi boeadi eai i sapurihai, i lauo ena dobila eai.

³¹ I dobima Kaperenauma, Galilaia eanuana esau, asubena sabate gamagamagari i lauheataedi. ³² Ena lauheata wa se noonooei: paana ena riba ma gigiborina. ³³ Tau sunago alona eai, earua biibiina ie lui, i eabayaba arinana lailai. ³⁴ I ene, "Taiede tabu u laoma arimai eai; oa Iesu Nasareta abo ai sahaim? U laoma bena u unuimai wa? Ea itam'o; oa Eaubada ena Tau Tabuna." ³⁵ Iesu ia i ribasuui, i ene, "U monou me, u lulage murimuri eai." Diabolo tau wa i heguri boeadi eai, ia abo i lulage murimuri eai, tau wa nige i hebaaea. ³⁶ Isi gamagamagaridi se noonoo, se heuheunaboisaha, si ene, "Riba sahasaha ina? Ma gigiborina earua biibiidi i lauhesomdi, abo se lulage murimuri eai." ³⁷ Ia wasana lailai i lau dimo gamagaridi oea wa se tauhetaiiri.

³⁸ Sunago i laugabaei, i awasae Simona ena numa alona eai. Simona bosiana i asiebo, i gigibori ariri: enana se aibodalau ia arinai. ³⁹ I totoro sine wa gegesina eai, gigibori wa i ribagigiri; abo i lautom; ma esega sine wa i torohai i heaeaiedi.

⁴⁰ Na mahana bena i duidobi mo, isi hari iwala gamagaridi se woeaidima ia arinai; ia nimana i toresae gamagaridi potadi eai, i hemauidi. ⁴¹ Gamagaridi diabolo se luidi se lulage murimuri eai, se eabayaba, si ene, "Oa Keriso ede, Eaubada Natuna." Ia i ribagigiridi, i ene tabu se ribaribaei; paana ede se nuatuiyao ia Keriso.

⁴² Mara-ie-tom i laugabaedi i lau maratupama eai, tatao ia se eooi, se lage ia arinai, ia se gudugudui, ia nige i laugabaedi. ⁴³ I ribalau aridi eai i ene, "Ea lau eanua headi aridi eai hinage, Eaubada ena basileia ribana ea lauguguiaidi: arinai ede se hetamariguma ta." ⁴⁴ Galilaia sunago alodi eai i laugugua.

5

¹ Genesareta gabogabona hasarina eai i totoro, tatao ia se hetauihiihi, bena Eaubada arinana se ataiei. ² Waga labui nei eai i itadi se loidi gabogabo hasarina eai: tauyamayama se laugabaei, edi hiana se gusegusedi. ³ I gerusae waga esau eai, Simona enana, i aibodalau ia arinai bena begana i ewalahesigidobei. Abo i bawabigabiga, waga eai tatao i lauheatadi. ⁴ I ribaribalautom, abo i ribalau Simona arinai, i ene, "U dobi gabotum eai, hiana u galaedi u eama." ⁵ Simona arinana i heuio i ribalau ia arinai i ene, "Tanuagagu e, boni ai eama maratom, ai hesabaasa ai boau: taiede na oa u riba wa abo hiana ea galaedi." ⁶ Se galaeyao, eama gamagamagari

se heonadi: edi hiana se heaipurisi, arinai ⁷ adi sasaguyao hari waga eai wa se nimaoidi, bena se laoma se saguidi. Isi se laoma waga labui wa se usahesahesariridi. ⁸ Simona Petero ie ita, i guridobi Iesu turina gegesina eai, i ene, “Ulaugabaegu; Guiau e, eau tau baaea.” ⁹ Paana ia, eo isi gamagaridi maenayao eama se hai wa, se noonooei: ¹⁰ Iamesi, eo Ioane, Sebedaio nanatunayao, Simona ana sasaguyao, hinage se noonooei. Iesu abo i ribalau Simona arinai, i ene, “Tabu u matausi; maraitom asubena tatao abo u aiaitoa.” ¹¹ Edi waga se herisaedi, edi ginauri gamagamagari abo se laugabaedi ia se hemuriwatai.

Iesu lepera tauna esau i hemaui

Mt. 8.2-4; Mk. 1.40-44

¹² Ia eanua esau eai, tau esau tauna maudoina lepera i laugirihai, ia Iesu ie ita i gurisalaoba matana eai, i aibodalau ia arinai, i ene, “Guiiau e, ena u henua abo u heaagu.” ¹³ Iesu nimana i helelelaei, i abiita, i ene, “Ea henua: abo u aa.” Ma esega abo tau wa ana lepera i lautom. ¹⁴ Iesu tau wa i lauhesom, i ene, “Tabu u wasawasaei tau esau arinai, se heaam wa arinai u lau mo Kohena arinai, doha Mose i ribaei abo u mosei, ina laulau ta u hemasaraha aridi eai.” ¹⁵ Taiede, ia wasana lailai ie tubugorigori, moutuadi lailai se tupagogoma ia arinai bena se ataiei, eo edi asiebo bena i hemauidi. ¹⁶ Na ia i lausuara barbara eai, i lauuura.

Tau esau i palisi se hemaui

Mt. 9.2-8; Mk. 2.1-12

¹⁷ Asubena esau eai, i heaheatadi, Parisea eo tausonoga tataodi headi se babawa ia gegesina eai, eanua gamagamagari Galilaia eai, eo Iudea eai, eo Ierusalem hinage aridi eai se laoma: Guiau ena gigibori eai arinai i hemauidi. ¹⁸ Tatao headi tau esau i palisi ma hatahatana se baheiyama: bena se heawasae, se tore Iesu matana eai, dobila se eooi. ¹⁹ Bena se heawasae moutuana se guduguidi dobila se eooasa, arinai se awasae numa dagelana eai, atohi se soelapai abo se hedawedobei boeadi eai Iesu nuanuana eai. ²⁰ Edi sunuma wa ie ita, i ribalau ia arinai, i ene, “Tau e, em baaea se ribagigiridio.” ²¹ Tauuriuri eo Parisea abo se heunaboisaha, si ene, “Ina eai Eaubada i arina baaei? Eai baaea ribagigiridi abina i ata na Eaubada iabom mo?” ²² Iesu edi nuatu i nuatlobaidio, edi nuatu i heuio i ribalau aridi eai, i ene, “Aue saha au heuheunaboisaha nuamiu eai? ²³ Aitea i masamasaraha ede, ea 'ne, 'Em baaea se ribagigiridio,' e ea 'ne, 'U toro u laulau?’ ²⁴ Na bena abo au ita Tau Natuna tanoubu eai ta ia gigiborina eai baaea i ribagigiridi, (arinai asiebo palisi tauabina i heriba, i ene,) 'ea heribam ta, u toro, em eba u launou, u lau em numa eai.’” ²⁵ Ma esega abo matadi eai i

torohai, ena abaeno i abiisini, i laugabaedi i lau ena numa eai, Eaubada i hedebasae. ²⁶ Isi gamagaridi se noonooei eo Eaubada se hedebasae, se matausi dumaduma, si ene, “Ginauri sahasahadi wau ta ta itadi?”

Mataio se eogai

Mt. 9.9; Mk. 2.13-14

²⁷ Ginauri wa muridi eai abo ie lau, takisi tautano esana Levi ie ita, numa telona eai ie bawa: i ribalau ia arinai, i ene, “U hemuriwataiguma.” ²⁸ Ia abo i torohai, ginauri gamagaridi i laugabaedi, ia murina eai ie lau.

²⁹ Levi mataasi lailai ie abi ena numa eai Iesu ana: telona tataodi eo hari tatao, peledi lailai maedi se bawabigabigae-sega.

Iesu tauuriuri eo Parisea tataodi edi riba i heuiodi

Mt. 9.10-17; Mk. 2.16-22

³⁰ Edi tauuriuri eo Parisea ena heaheatayao se gadigadiguedi, si ene, “Aue saha maemiu telona tataodi eo tatao baabaaeadi au aiaiesega, eo au nomnomesega?” ³¹ Iesu arinadi i heuio, i ribalau aridi eai, i ene, “Tauadiadidiri doketa nige se eogai: isi tauasiasiebo mo. ³² Nige ea laoma tatao laulaududurai ea eogaidi, tatao baabaaeadi mo, bena nuadi, se buidi.”

³³ Se ribalau ia arinai, si ene, “Paana saha Ioane ena heaheatayao huia gamagari se aiaiu, eo se lauuura, Parisea edi heaheatayao hinage doha, na oa em heaheatayao se aiai eo se nomnom?” ³⁴ Iesu i ribalau aridi eai, i ene, “Tautawasora harihariu ena heriheriam abo se aiudi wa, tautawasora sora maedi se mia esega? ³⁵ Huiadi abo se lagema tautawasora harihariu abo se laehesuara, abo se aiudi, nei huiadi eai ne.”

Parabole labui: lulu eo ile ribadi

Mt. 9.16-17; Mk. 2.21-22

³⁶ Arinai abo parabole esau i heribadi, i ene, “Nige tau esau lulu harihariuna tupona i abi i popoi lulu beabeana arinai; ata harihariuna wa esau i aipurisi, eo tupona wa, lulu harihariuna eai se abi, nige i patu komakomani lulu beabeana arinai. ³⁷ Hinage nige tau esau waina harihariuna i leduauri ile beabeadu alodi eai; ata ile wa abo se pawa, waina abo i boriri, ile wa taba se baaea. ³⁸ Waina harihariuna taba se ledu ile harihariudi alodi eai; abo se loloesegaidi. ³⁹ Hinage nige tau esau waina beabeana i nom abo ma esega waina harihariuna i gadosisie; paana i ene, ‘Beabeana mo i lolo.’ ”

6

Iesu eo sabate ribana

Mt. 12.1-8; Mk. 2.23-28

¹ Sabate bagubagunana ie ohi, e, sabate helabuina eai, Iesu i lulau * sitona oead i eai, ena heaheatayao sitona se worahaidi, nimadi eai se wosadi, abo se aidi. ² Parisea headi se ribalau aridi eai, si ene, “Aue saha sabate asubenadi eai laugagaeo au utusidi?” ³ Iesu arinadi i heuio, i ene, “Davida ena laulau buka eai nige au hasiri wa, ia i guriam wa, eo ana sasaguyao hinage; ⁴ Eaubada ena numa eai i awasae, areto tabuna ie abi ie ai, tupona hinage i mosei ana sasaguyao aridi eai; kohena tataodi isibom mo tauaiadi ede?” ⁵ I ribalau aridi eai, i ene, “Tau Natuna ia sabate Tanuagana hinage.”

Tau esau nimana i tubu eaeyaelua

Mt. 12.9-14; Mk. 3.1-6

⁶ Na, sabate esau i awasae sunago alona eai i lauheata: tau esau nei eai ia nima tutuna i tubu eaeyaelua. ⁷ Tauuriuri eo Parisea ia se itaitasipoi, asubena sabate tau wa abo i hemaui, e nige'e; ana mata se eooi bena ia abo se hegiru. ⁸ Edi nuatu i itayao, tau wa nimana i eaeyaelua i ribalau ia arinai, i ene, “U toro, u toromasarahama duaduari eai.” I toro, abo i toromasaraha. ⁹ Iesu i ribalau aridi eai, i ene, “Ginauri esega ea oimuri arimiu eai, laugagaeo edoha emi laelaena asubena sabate, laulau lolo ta ginauri, e laulau baaea? ta abihemaui, e ta unuhemate?” ¹⁰ Gamagaridi i itaitahetahetaiiridi, abo i ribalau tau wa arinai, i ene, “Nimam u heleleama.” Nimana i helelelaei: nimana abo i mauriuio doha nimana esau. ¹¹ Adi ou se monauboriboriri; isibom se ribariba, si ene, Iesu abo edoha edi abiabina.

Tatao saudoudoi se hineridi

Mt. 10.2-4; Mk. 3.13-19

¹² Nei asubenadi ne ia i dalasae oea tupina eai i lau uura, maiona esau maudoudoina eai i lau uura Eaubada arinai. ¹³ Mara-ie-tom ena heaheatayao i eogaidima, aridi eai saudoudoi-labui i riba-hilehileidi; isi esadi hinage i toredi ede aposotolo; ¹⁴ Simona. (esana esau ie tore ede Petero,) eo ena tau Anederea, Iamesi eo Ioane, Pilipo eo Batolomaio. ¹⁵ Mataio eo Toma, Iamesi Alepaio natuna, eo Simona esana hinage Selote. ¹⁶ eo Iudasi, Iamesi ena tau, eo Iudasi Isakariota, ia taumoruina ede.

¹⁷ Maedi i leta i dobi, gonu eai i totoro, eo ena heaheatayao peledi hinage, eo moutuadi lailai Iudea eo Ierusalem eai se laoma, eo Turo eo Sidona geregeredi eai se laoma hinage, ena riba bena se ataiei, eo adi asiebo hinage bena i hemaui; ¹⁸ isi hinage earua biibiidi se hebaaeadi; abo se hemaui. ¹⁹ Moutuadi gamagaridi ia bena se abiitalaei; gigibori ia boeana eai i laoma, arinai gamagaridi i hemaui.

* 6:1: wheat.

²⁰ Matana i lau-laei ena heaheatayao aridi eai, i ene, “Omi gogogesagesa tataomiu e, au nuawoiwoina: Eaubada ena basileia omi enamiu.

²¹ “Omi huia ta au guriam au nuawoiwoina: paana bogamiu abo se sese. Omi huia ta au doudou au nuawoiwoina: abo au marumaruhi.

²² “Tatao ena se ouyalayalaemiu, eo se lau-suaraemiu, eo se alaliuliuamemiu, eo esamiu se awagabaei doha ginauri baabaaea, Tau Natuna debana eai, omi abo au nuawoiwoina.

²³ Nei asubenana ne abo au kode, au kode lamposi: emi ainauia galewa eai abo ie lai: tamadiyao edi laulau doha ede peroveta aridi eai.

²⁴ “Ahani omi monamonaune tataomiu e! paana emi henuhenu au abiyao.

²⁵ “Ahani omi bogamiu se seseo! omi abo au guriam. Ahani omi huia ta au marumaruhi! abo au nuadubu eo au dou.

²⁶ “Ahani omi, tatao gamagaridi se riba helolomiu! paana doha ede hinage tamadiyao edi laulau peroveta borabora aridi eai.

²⁷ “Omi arinagu tauataiena arimiu eai ea ene, Ami waiunu au gadosisiedi, isi se ouyalayalaemiu adi gigi au hebigadi. ²⁸ Isi se arina baaeamiu au taubigaidi, isi hinage se hebaaeaimiu au lau uura enadi. ²⁹ Ena tau esau paream ie wai, paream esau u mosei hinage; ia em lulu i girihai em pereue tabu u nuahi. ³⁰ Tatao gamagaridi em ginauri se aibodaidi u mosedi: ia hinage em gogo i girihaidi tabu u abiuoidi. ³¹ Laulau aisana u henua tatao se abi arim eai, meta doha hinage u abi isi aridi eai.

³² “Ena isi taugadosisiem mo u gadosisiedi, em lolo saha? Tatao baaea taugadosisiedi hinage se gadosisiedi. ³³ Eo ena isi tauhelolomiu au helolodi hinage, emi lolo saha? Tatao baabaaeadi edi laulau hinage doha meta. ³⁴ Ena ginauri au mosei, maisana bena se leawa, emi lolo saha? Tatao baaea ma heledi tatao baaea enadi se mosedi maisana gonogonoana bena abo se abi. ³⁵ Omi ami waiunu au gadosisiedi, eo iilamiu se lolo, eo au mosei tabu maisana au nuatui, emi ainauia abo i lai, omi abo Saesaearirina nanatunayao eai au lau, paana tatao ia nige se nuatui i abihelolodi, eo baaea tataodi hinage. ³⁶ Abo tatao au nuatoatoaidi, doha hinage Tamamiu i nuatoatoaidi.

³⁷ “Tabu au hekihekirainodi, abo nige se hekirainomiu: tabu au hebaaeadi, abo nige se hebaaeamiu: au ribagigiridi, abo se ribagigirimiu: ³⁸ au mosei, abo hinage se lediwa arimiu eai; abanonoi abo se hemonau, se abitawai, se heluilui, se heboribori, tatao abo se tore nuapoumiu eai.

Paana nonoi au nonoiei wa abo hinage se nonoieawa arimiu eai.”

³⁹ Parable esau i heribadi ede, i ene, “Taumatagibugibu abina i ata helena taumatagibugibu abo i woelaei? Abo se beu labulabui saga eai, e nige’e? ⁴⁰ Tauheata ana tanuaga nige i saetawatawai: heaheata se heatakomanianiao ia abo doha ana tanuaga. ⁴¹ Ue saha muari u ita em tau matana eai, eo oegi oa matam eai nige u nuatui? ⁴² Hinage edoha em ribariba em tau arinai, u ene, ‘Egu tau e, muari oa matam eai sora bena ea abihai,’ oegi oa matam alona eai ie ota nige u ita. Oa tauboraborasom, oegi matam boeana eai u abihai bagunai, arinai abo u itaitalolo muari em tau matana eai abo u abihai.

⁴³ “Paana oegi lolona uaua baeana nige i uaedi: hinage oegi baeana uaua lolona nige i uaedi. ⁴⁴ Hari oegi, hari oegi uauadi aridi eai ta italobaidi. Tatao lagau nurinurina eai kuhou nige se gigidi, hinage popohauhau eai vine nige se gigidi. ⁴⁵ Tau lolona ginauri lolodi nuaboena eai i toredi abo ginauri lolona i lahahaidi, eo tau baeana hinage ginauri baeana nuaboena eai i toredi abo ginauri baeana i lahahaidi: nuaboena ena monau boriboriri arinai awana eai i ribaribaei.

⁴⁶ “Aue saha esagu au ataatai, au ene, ‘Guiau e, Guiau e’ na egu riba nige au lauwataidi?

Parable: tau esau ena numa i abi we’u-tau potana eai

Mt. 7.24-27

⁴⁷ “Taba tau esa tau esa i laoma arigu eai, egu riba i ataiedi, eo i abiwataidi hinage, ana ao abo ea heitamiu: ⁴⁸ ia doha tau esau i abi-numa, i sarahesigidobei, numa paana abo i tarini we’u-tau potana eai: abaita ie siu, abaita numa wa i utuhai, to nige i moimoiu, paana we’u-tau potana eai se hetoro. ⁴⁹ Ia riba wa i ataiedi, nige i abiwataidi, doha tau esau tano potana eai i abi-numa, nige paana; abaita numa wa i utuhai, ma esega abo ie guri, numa wa i tatagorigori.”

7

Senturion ena heaheari se hemaui

Mt. 8.5-13

¹ Ena riba gamagaridi tatao matadi eai i ribalautom, abo i lagema Kaperenauma eai. ² Senturion esau ena gadosisi heahearina i asiebo, matena i hanahanau. ³ Ia Iesu wasana i ataiei, Iudea edi babada i hetamaridi Iesu arinai, i ribagadogadora ia arinai, ia bena i laoma ena heaheari i hemaui. ⁴ Isi se lagema Iesu arinai, se ribagadogadora, si ene, “Tau lolona nei, bena u sagui: ⁵ paana eda basileia i gadosisie, eo eda sunago esau i hetoro.” ⁶ Iesu maedi se lau. I lagema numa

hanahanauna eai, senturion ia ehanayao headi i hetamaridi Iesu arinai, se ribalau ia arinai, si ene, “Guiiau e, tabu ea hegadotoam: eau nige ea lolo abo u awasaema egu numa alona eai: ⁷ arinai hinage ea ’ne nige ea lolo bena ea laowa arim eai. Riba mo u ribaei, egu heaheari abo i mauri. ⁸ Paana eau tanuaga esau ena heaheari: egu iala heahearidi hinage se awatanuagaegu, esau ea heriba i lau, abo i lau; esau ea heriba i laoma, hinage abo i laoma; egu heaheari ea heriba, ea ’ne, ‘Teina ta u abi,’ abo i abi.” ⁹ Teina riba ta Iesu i ataiedi, tau wa i nooei, i torobui, tatao wa ia se hemuriwatai i heribadi, i ene, “Ea heribamiu ta, nige sunuma lailai esau ea lobai doha ina, Isaraela aridi eai nige’e.” ¹⁰ Isi se hetamaridi wa se uio numa eai, tau asiebo wa se lobai i lolo’o.

Sine wabu natuna se hetorouioi.

¹¹ Mara-ie-tom i lage eanua esau esana ede Naina; ena heaheatayao gamagaridi ia maena se lau, eo moutuana hinage. ¹² Eanua tonana guduna se hanahanau, sinare esau se bahei murimuri eai ia sinana natueseesegana, sine wa hinage ie wabu; eanua tataodi gamagaridi ia se hesaguei. ¹³ Guiiau sine wa i ita, ia i nuatoatoai, i heriba, i ene, “Tabu u dou.” ¹⁴ Iesu i laoma sinare aba-baheina i abiitalaei: taubahena se tarutoro. Ia abo i ene, “Hewari e, ea heribam ta, u toro.” ¹⁵ Taumate wa abo i bawabigabiga, ia abo arinana ie tore, i ribariba. Iesu abo i mosei sinana arinai. ¹⁶ Isi gamagaridi se matausi, Eaubada se hedebasaei, si ene, “Peroveta lailai ita boeada eai ie tubu,” eo si ene “Eaubada ena tataoyao i aitaumanaidi.” ¹⁷ Arinai abo wasana lailai i lau Iudea oead i gamagaridi eai, eo i lau eanua gamagamagaridi i hetaiiridi.

¹⁸ Ioane ena heaheatayao teina ginauri gamagaridi ta ia se heriba.

Ioane Bapatiso ena heaheatayao i hetamaridi se hesiolau Iesu arinai

Mt. 11.2-6

¹⁹ Ioane ena heaheata labui i eogaidi, abo i hetamaridi Iesu arinai, i ene, “Ia se ribaei bena i laoma wa ia ede oa? e hari tau abo ai nuatuwatai?” ²⁰ Taudi labui wa se lagema ia arinai, si ene, “Ioane Bapatiso i hetamarimai arim eai, i ene, ‘Ia se ribaei bena i laoma wa ia ede oa, e hari tau abo ai nuatuwatai?’ ” ²¹ Nei asubenana ne gamagaridi se aiiwala, eo se asiebo, eo earua baaea se luidi, i hemauidi; eo taumatagibugibu gamagaridi matadi i helaladi. ²² Iesu arinadi i heuioidi, i ene, “Taiede au lau, ginauri au itadi eo au ataiedi Ioane au heriba, ia ede taumatagibugibu matadi se lala, taulaulaudae se lautoditodi, lepera se uruosi, taubeadoodoo se ataiei, taumatemate se toro, tatao gogogesagesa

aridi eai evanelia se lauguguaiei. ²³ Taba tau esa eo esa nige i nuabaaea arigu eai, nuana abo i woiwoina.”

Iesu Ioane Bapatiso ribana i heribadi

Mt. 11.7-15

²⁴ Ioane ena riba taulaena se lauo, abo Iesu Ioane ribana tatao aridi eai i ribahetubu, i ene, “Aue lau barabara eai wa saha bena au ita? Didiari mana i iuhiheeo eo wa? ²⁵ Aue lau nei eai saha bena au ita? Tau esau ana lulu bigabigana ie lui? Isi lulu paspasadi tauluidi, eo aiai lolodi tauaidi se bawa wasawasa edi numa eai. ²⁶ Aue lau nei eai saha bena au ita? Peroveta wa? E, ea heribamiu ta, ea 'ne, ia peroveta gamagamagari i saetawatawaidi. ²⁷ Ia ede ia, se uriyao, si ene, ‘Egu tauwasa ea hetamarimugaiem, em eda abo i sepanonohai.’ ²⁸ Ea heribamiu ta, ea 'ne, tatao sisine se labasidi wa aridi eai Ioane Bapatiso mo peroveta saesaena; taiede Eaubada ena basileia eai tau gagiri aririna ia Ioane i saetawatawai.” ²⁹ Tatao gamagaridi ia se ataiei, eo takisi tautano tataodi hinage, Eaubada se awamamohoiei, paana isi Ioane ena bapatiso eai se hebapatisoidi wa. ³⁰ Parisea tataodi eo laugagaeo tauheatana tataodi isi nuaboeadi eai Eaubada ena riba se tauotaotaei, paana Ioane ena bapatiso nige se abi.

³¹ I ene, “Teina isi ta tataodi saha arinai ta heaheasoniedi? Isi doha abo aisana mo? ³² Isi doha ede merumeru se bawagogo abauneune eai, se haihaieogaidi, si ene, ‘Huelele aie iuhiawa arimiu eai na nige aue saga: aie dou nuanuadubuemi, na nige au doudou.’ ³³ Na Ioane Bapatiso i laoma aiai nige i aidi eo waina nige ie nom: omi au ene, ‘Diabolo esau ia boeana eai.’ ³⁴ Tau Natuna i laoma aiai i aidi, eo waina ie nom, omi au ene, ‘Tauaiaisom, eo waina taunomnomsom, takisi tataodi eo tatao baabaaeadi edi heriam!’ ³⁵ Sonoga nanatunayao gamagaridi aridi eai, sonoga wa abo se hemamohoiei.”

Iesu, Parisea tauna ena numa eai.

³⁶ Parisea tauna esau i henua bena Iesu maena se aiaiesega. Ia i awasae Parisea tauna ena numa eai, i bawabigabiga se aiai. ³⁷ Eanua sinena esau, sine baaeana, wasana i ataiei Iesu Parisea tauna ena numa eai i bawabigabiga i aiai, * nado, alabata ilena eai, ie abi leama. ³⁸ Ia murina eai aena eai i totoro i doudou, ia aena matasulu eai i deuridi, eo uru maiawadi eai i saudi, ia aena i alagoiedi, eo nado wa arinai i heeausidi. ³⁹ Parisea tauna, Iesu i eogai wa, wau wa ie ita, nuaboeana eai i nuatui, i ene. “Tau ta ena ia peroveta, sine ta i abilau ia arinai abo i nuatulobaiyao: paana ia sine baaeana.” ⁴⁰ Iesu i heuio ia arinai, i ene, “Simona e, egu riba begana bena ea heribam.” Ia i ene, “Tanuagagu e, u riba.”

* 7:37: wosawosa, pane lolololona.

Parabole: tatao labui tau esau gogo se abidi sora nige se hemaisa.

⁴¹ “Tatao labui tau esau ena gogo se abidi sora nige se hemaisadi: esau ana haga denari handere haligigi, esau denari tatao-labui-si-mate-saudoudoi. ⁴² Isi nige edi moni, ia taudi labui adi hagahaga i soegabaedi. U ene edoha, aitea tau wa ia abo i gadosisiaririei?” ⁴³ Simona ia arinana i heuio, i ene, “Nuana ia wa ana haga ie lai wa, na i soegabaei.” I ribalau ia arinai, i ene, “U nuatui i dudurai.” ⁴⁴ Ia abo i sinibui sine wa arinai, eo i ribalau Simona arinai, i ene, “Sine ta u ita? Ea awasaema em numa eai, goilla nige u oiyama aegu ana deudeuri: na ia mo matasulu eai aegu i deuridi, eo uru maiawadi eai i saudi. ⁴⁵ Oa nige u alagoiegu: teina sine ta egu huia awasaema wa ie tubu aegu i alagoiedi, nige i lautom. ⁴⁶ Urugu eausi eai nige u heeausi: teina sine ta aegu nado eai i heeausidi. ⁴⁷ Arinai ea heribam ta, ea 'ne, ena baaea, se gamagari hinage, se ribagigiridio; paana i gadosisiariri: ia baaea gagiridi mo se ribagigiridi, ena gadosisi hinage gagirina mo.” ⁴⁸ I ribalau sine wa arinai, i ene, “Em baaea se ribagigiridio.” ⁴⁹ Isi ia maenayao se bawabigabiga si aiai edi nuatu, si ene, “Ina eai, baaea hinage i ribagigiridi ta?” ⁵⁰ I ribalau sine wa arinai, i ene, “Em sunuma eai ue mauri; ma nuabigabigam u lau.”

8

Iesu Galilaia eai i lauguguaia eo i abihemaui.

¹ Abotai, i lau eanua lailaidi eo eanua gagiridi gamagaridi i baeawaidi, i lauguguaiaedi eo Eaubada ena basileia wasa lolodi i heribadi: saudoudoi-labui maenayao. ² Sisine headi, earua baaeadi se luidi eo asiasiebodi hinage ia i hemauidio, Maria Magadala, demoni haligigi-labui ia arinai se lulagegabaei. ³ Eo, Ioana Kusa monena, Heroda ena numa taitawataina, maena Susana, eo sisine gamagaridi hinage, edi ginauri se mosemosedi ia arinai, ia se taubigai.

*Parabole: uaua tauhesuruna
Mt. 13.1-23; Mk. 4.1-20*

⁴ Hari eanua, hari eanua, tataodi gamagaridi se tupa-gogoma ia arinai, parabole esau abo i heribadi: ⁵ “Tuma tauhesuhesuruna ie lau sitona tumana i hesuruaui: ma hesuhesuruna, na headi se beu eda gegesina eai; aedi eai se ututawatawaidi, malagaibu manudi abo se aidi. ⁶ Headi se beu malatetepari eai; abo se ini, se wowoea, paana ede tano nige ie buta. ⁷ Headi se beu lagau nurinuri boeadi eai; maedi lagau nurinuri se iniesega, se initawatawai. ⁸ Headi hinage tano lolona eai se beu, se ini, abo se ua aiaidi tatao-haligigi-

se-mate se toredi.” Teina riba i ribalautom, i eoga, i ene, “Ia beana eai i ataiei, abo i ataieididini.”

⁹ Ena heaheatayao se oimurilau ia arinai, si ene, “Teina parabole ta aniona saha?” ¹⁰ Ia i ene, “Omi Eaubada ena basileia riba eamuyamuidi au nuatuidi: na isi aridi eai mo parabole se ribaedi; se itaita taba nige se ita, eo se ataiei taba nige se nuatui. ¹¹ Parabole wa ia ede ina: tuma wa ia ede Eaubada ena riba. ¹² Isi eda gegesina eai wa, isi ede tauataiena: diabolo abo i laoma, riba wa nuaboeadi eai i abihaidi i laedi, ata se sunumaei eo ata se mauri. ¹³ Isi malatetepari eai wa, isi ede tauataiena, riba wa se abi ma kodedi; isi nige lamdi, huia kuukuu mo se sunumaei, noho se hearo abo se beu. ¹⁴ Isi se beu lagau nurinuri boeadi eai isi ede riba wa tauataiena, abo se lau, teina mauri ta modemodedi eo ginauridi eo abakodedi se tubutawatawai, ai ai lolodi nige se toredi. ¹⁵ Isi tano lolona eai wa, isi ede, ma nualolodi, eo ma nuaduduraidi, riba wa se ataiei, abo se sogohididini, eo ai ai se toredi ma nuapaipaidi.

Parabole: kanela se healasi

Mt. 5.15; Mk. 4.21-23; Lk. 11.33

¹⁶ Taba nige tau esau lamepa i healasi, abo lasi esau arinai i hebuitawai, e i tore abaeno ubuna eai; na lamepa ena aba ota eai wa ie tore, isi se awasaema marana bena se ita. ¹⁷ Riba se ribayamuyamui, abo i masaraha; eo ginauri esau se tautauyamui, abo se wasawasaei, eo se hemasaraha. ¹⁸ Temeta mo au ataiwataikomakomani; paana ia i abi enana abo se mosei; ia hinage nige i abi, enana begana i nuatui bena i abi wa, abo se abiuioi.”

¹⁹ Ia sinana eo ena tataoyao abo se laoma ia arinai, tatao se tauihiihi arinai nige edi aba laoma. ²⁰ Headi ia se heriba, si ene, “Sinam eo em tataoyao murimuri eai se totoro, se henua bena se itam.” ²¹ Ia arinadi i heuio i ribalau aridi eai, i ene, “Sinagu eo egu tataoyao isi ede Eaubada ena riba se ataiei, eo se abiwatai hinage.”

Iesu wowori i ribahetarudi

Mt. 8.23-27; Mk. 4.36-41

²² Asubena esau eai, i gerasae waga eai ena heaheatayao maenayao: i ribalau aridi eai, i ene, “Ta lau gabogabo hari sana awasi eai.” Isi abo se geru. ²³ Ma адауди na ie eno: gabogabo eai mana lailai abo i lagelagei; ma esega abo butubutu se iniinisae waga alona i hemonau, se adau baaea. ²⁴ Arinai abo se lau ia se hanoi, si ene, “Tanuagamai e, abo ta mate!” Ia abo i toro, mana eo butubutu lailai wa i ribahetarudi: se lautom, abo i daumori. ²⁵ I ribalau aridi eai, i ene, “Emi sunuma wa haedi?” Isi se matausi se noonoei, se heunaboisaha, si ene,

“Tau ta ie saha? mana eo butubutu i lauhesomdi, eo ia se awaabiei?”

Gadara tauna arinai demoni se aiduiedi

Mt. 8.28-34; Mk. 5.1-17

²⁶ Isi se duna Gerasene tataodi edi oea eai, Galilaia hari sana awasi eai. ²⁷ Ia i pesao, tau esau eanua eai i laoma se hailobai, huia lohaloha demoni ia se lui, lulu nige i luidi, eo nige ie mia numa alo eai, bousa eai mo i miamia. ²⁸ Ia Iesu ie ita, i eabalailai, matana eai ie guri, i arina lailai, i ene, “Iesu Eaubada Saesaeariri Natuna e, saha abo u abi arigu eai? Ea awanorilaoa tabu u heamamnagu.” ²⁹ (Paana ia earua biibiina i lauhesom tau boeana eai wa i lulagema. Huia gamagari earua tau wa i toatoai: maina poasi eo poasi adidiri arinai tau wa se auau; maina wa i hetautusidi eo demoni wa ia i henau barabara eai.) ³⁰ Iesu i hesiolau ia arinai, i ene, “Oa esam wa?” Ia i ene, “Legeona”: paana demoni gamagaridi ia boeana eai se lui. ³¹ Isi se awanorilau ia arinai tabu i lauhesomdi se lau gabotum eai. ³² Metai sarai eawoidi lailai oea eai se aibai: se awanori ia arinai bena se lulau isi boeadi eai. Ia abo ie eari. ³³ Demoni wa tau wa abo se pesagabaei, se lulau sarai boeadi eai: eawoidi wa abo se haidagoidi se lau malasarisari eai, se beu gabogabo eai, abo se galamosi.

³⁴ Tauheaidi wau wa se ita, abo se dago, se lau eanua eai eo oea eai se wasaduie. ³⁵ Isi abo se pesa se lau se ita; se laoma Iesu arinai, tau wa demoni se laugabaei wa, i bawabigabiga Iesu aena gegesina eai, ana lulu i lui, eo nuana i sibasibao: arinai isi se matausi. ³⁶ Headi laulau wa matadi eai se ita se ribaei laulau sahasaha se abiabiei, arinai demoni tauluina se hemaui. ³⁷ Gerasene oead i se hetaiiri tataodi gamagaridi se awanorilau ia arinai bena i laugabaedi; paana isi matausi lailai se hearo: abo i gerasae waga eai, ie uio. ³⁸ Tau wa, demoni se pesagabaei wa, i awanori Iesu arinai bena maena se mia. Iesu mo i hetamari, i ene, ³⁹ “U uio em numa eai, ginauri saesaedi Eaubada i abidi arim eai u hemasarahadi.” I lau ena dobila eai, eanua se oihai, wau abiabina wa Iesu ie abi ia arinai, i heribadi.

Sine esau ana iwala se helautom, eo Iairo natuna siu se heterouio.

Mt. 9.18-26; Mk. 5.22-43

⁴⁰ Iesu ie uio, tatao gamagaridi maenayao se hailobai matadi se soasoari: paana gamagaridi ia se nuanuaiei. ⁴¹ Na tau esau i laoma esana Iairo, ia sunago tanuagana esau: i guridobi Iesu aena eai, i awanori ia arinai, bena i laoma ena numa eai. ⁴² Ia natuna siu esega mo, ena borimai saudoudoi-labui, ia ie ota matena i hanahanau.

Ia ma launa tatao ia se lauihihie.

⁴³ Sine esau asiebo osina ie abi borimai saudoudoi-labui, ena moni gamagari i moseohi doketa aridi eai, nige esau ia i helolo. ⁴⁴ Ia Iesu murina eai i laoma, ana lulu dedeana i abiita: ma esega abo asiebo osina i lautom. ⁴⁵ Iesu i ene, “Eai i abiitaguma?” Gamagaridi se harere, abo Petero ma ana sasaguyao si ene, “Tanuagamai e, moutuana wa se lauihihiem, eo se heduheduiahalaim, hinage u ene, Eai i abiitaguma?” ⁴⁶ Iesu i ene, “Esau i abiitagu: paana ea nuatuiyao gigiborigu i leyao.” ⁴⁷ Sine wa ie ita ia nige i tauyamuyamui, i laoma ma tabutabubuna ia matana eai i guridobi, eo tatao gamagaridi matadi eai Iesu ena abiitana paana i riba hemasaraha, eo ma esegana i mauri. ⁴⁸ Ie ribalau ia arinai, i ene, “Natugu e, nuam ie taru: em sunuma eai u mauri; ma nuabigabigam u lau.”

⁴⁹ Ma-ribaribana, esau sunago tanuaga numana eai i laoma ia arinai, i ene, “Natum siu wa ie mateo; Tanuagada tabu u hegadotoa.” ⁵⁰ Iesu i ataei arinana i heuio, i ene, “Tabu u matausi: u sunumawatai mo ia abo se hemaui.” ⁵¹ Iesu i laoma numa eai, tatao i ribanuahidi tabu esau i awasae, na Petero eo, Iamesi eo, Ioane isibom. eo siu wa tamana eo sinana hinage. ⁵² Gamagaridi se doudou, eo se laulaukapore: ia mo i ene, “Tabu au doudoui: ia nige i mate, ma enona.” ⁵³ Isi ia se marumaruhiei, eo se alaliuliuaei, paana se itayao i mateurio. ⁵⁴ Iesu i aiduiedi, se pesa murimuri eai, siu nimana eai ie abi i eoga, i ene, “Siu e, u toro.” ⁵⁵ Earuana abo ie uioma, ma esega abo i toroma: Iesu i lauhesomdi aiai ana se mosei. ⁵⁶ Ia tamana, sinana, se noonooei: abo i heribadi wau abiabina wa tabu tau esau se heriba.

9

Saudoudoi-labui wa i hetamaridi se laugugua *Mt. 10.1-42; Mk. 6.7-14*

¹ Ena heaheatayao saudoudoi-labui i eogagogoidima, i heterodi demoni gamagamagari tanuagadi eai se lau, eo gigibori i mosei aridi eai iwala gamagamagari abo hinage se abihemauridi. ² Ia i hetamaridi Eaubada ena basileia se lauguguaie, eo tauasiasiebo se hemaui. ³ Ie ribalau aridi eai, i ene, “Emi lauwasie enana tabu saha au bahei, tabu tue, tabu tobo, tabu aiai, tabu moni; tabu emi pereue au heona labui. ⁴ Ena au awasae hari numa hari numa, metai au mia e emi huia lau. ⁵ Ena headi nige se eogaisinimiu, eanua me emi huia laugabaena, aemi geregeredi au oiluilui gabaedi adi giru heiheinoina.” ⁶ Isi se lauo, eanua se baeawaidi, evanelia se lauguguaie, eo tatao asiasiebo hari tupo hari tupo se hemaui.

⁷Ena laulau gamagamagari Heroda tetaraki wasadi i ataiei: nuana i ponopono, paana headi si ene, Ioane mate eai i torouioma. ⁸Headi hinage si ene, Elia i lagemā; eo headi si ene, peroveta esau mumuga eai wa, i torouio. ⁹Heroda i ene, “Ioane uruna ea tomhai wa: na ia eai nei laulau ne i ginauridi wasadi ea ataiedi wa?” I henua Iesu bena i ita.

Aposotolo se uioma: tatao tausani haligigi se heaidi

Mt. 14.13-21; Mk. 6.30-44; Io. 6.1-14

¹⁰Aposotolo tataodi se uioma edi abiabi gamagamagari wa ia abo se heriba. Ia abo i woelaedi, se lausuarayamuyamui edi dobila eanua esau esana Betesaida wa malatupama eai. ¹¹Tatao se ita, ia abo se hemuriwatai: i oiamidi, Eaubada ena basileia ribadi i heribadi, headi hinage se asiebo abo i hemauidi, ¹²Mahana i taru’eo, saudoudoi-labui se laoma, se ribalau ia arinai, si ene, “Moutuadi wa u hetamaridi bena se lau eanua eo oea se lauhetaiiri, se eno, eo aiai se eoo, paana ita malatupama eai ta mimia ta.” ¹³Ia i ribalau aridi eai, i ene, “Aiai adi au mosedi.” Isi si ene, “Ama falawa gagiridi haligigi, eo eama labui mo: taba ai lau tatao gamagamagari ta adi aiai ai uneune.” ¹⁴Paana tatao mo isi tausani haligigi. Ena heaheatayao i heribadi, i ene, “Au hebawabigabigaesegaidi, hari poru, hari poru, tatao-labui-se-mate-saudoudoi.” ¹⁵Ena riba se abiwatai nei doha, gamagaridi se hebawabigabigadi. ¹⁶Ia abo falawa haligigi, eo eama labui i abidi, i itasae galewa eai, i lautoi, abo i ihi, i mosei ena heaheatayao aridi eai, abo se toredi moutuadi wa matadi eai. ¹⁷Isi se aiai, e bogadi se sese: aitoredi se tanogogoidi bosa saudoudoi-labui.

Petero Keriso i wasawasaei

Mt. 16.13-20; Mk. 8.27-30

¹⁸Na, ia mo sora ma uurana, ena heaheata maenayao: i hesiolau aridi eai, i ene, “Tatao si ene eau ede eai, wa?” ¹⁹Isi ia arinna se heuio, si ene, “Ioane Bapatiso; headi si ene, Elia; headi hinage si ene, mumuga perovetadi esau i torouioma.” ²⁰I ribalau aridi eai, i ene, “Na, omi au ene eau ede eai wa?” Petero ia arinana i heuio, i ene, “Eaubada ena Keriso.” ²¹Awadi i tawaidi, i lauhesomdi, tabu tau esau wau riba wa se heriba.

Iesu ia matena, eo ia torouiona i ribanonohai

Mt. 16.21; Mk. 8.31

²²I ene, “Tau Natuna amamna gamagamagari abo i hearodi, eo babadadi, eo kohena lailaidi, eo tauuriuri ia abo se laupalihibaei, abo se unuhemate, asubena hehaionana eai abo se heterouioi.” ²³Ia abo i ribalau gamagaridi aridi eai, i ene, “Tau esau ena gadosisi bena i hemuriwataigu, taba iabom i nuagabaeuioi, asubena gamagamagari ena satauro

i abiisini, eo i hemuriwataigu. ²⁴ Na tau esau, eo esau, ia maurina i nuatuuiioi ia mauri abo ie dabu: tau esau eo esau ia maurina i nuagabaei eau debagu eai, ia mauri abo i abi. ²⁵ Saha lolona abo tau i abi, taba gogo gamagamagari tanoubu eai ta i abiheohidi, ia maurina abo i gabaei? ²⁶ Tau esau, eo esau, i taumaeamaeaeagu, eo egu riba i taumaeamaeaeadi, tau Natuna ia abo hinage i taumaeamaeaeai, ena huia laoma ma namanamarina, eo Tamana namanamarina, eo aneru hetahetabudi namanamaridi hinage.

Iesu ana ao ie ori
Mt. 17.1-8; Mk. 9.2-8

²⁷ Riba mamohoina ede ea heribamiu ta, headi inai se totoro mate sora nige se hearo, Eaubada ena basileia abo se itabagunaei.” ²⁸ Teina riba ta i ribaedi wa i lau e asubena haligigi-haiona se ohi, Petero, eo Ioane, eo Iamesi i woeaidi, i dalasae oea tupina eai, bena i lau-uura. ²⁹ Ma uurana, ana ao ie ori, eo ana lulu se posiposi, eo se balebalelem. ³⁰ Na ia maenayao tatao labui se ribariba, isi ede Mose eo Elia: ³¹ isi se taumasaraha ma namanamarina, ia matena se ribaribaei, ia Ierusalem eai abo i hearo. ³² Na Petero, ma ana sasaguyao, matadi se enoen: isi se siliata ena namanamari se ita, eo taudi labui wa maenayao se totoro, edi namanamari hinage se ita. ³³ Taudi labui wa Iesu bena se laugabaei. Petero i ribalau Iesu arinai, i ene, “Tanuagagu e, i lolo inai mo ta mia: apa haiona ta abidi: esau enam, eo esau Mose enana, eo esau Elia enana:” na i ribariba gaibu. ³⁴ Ma ribaribana eada esau i laoma i poitawaidi: isi se lulau eada wa boeana eai se matausi. ³⁵ Na arina esau eada boeana eai i laoma, i ene, “Natuyogoyogoigu ede teina: ia au ataiei.” ³⁶ Arina wa i lautom, Iesu se ita iabom ie mia. Isi se monomonouei, nei asubenadi eai ne ginauri se itadi wa nige tau esau se heriba.

Tauheaheata nige edi gigibori. Merumeru esau arinai demoni se aiduiei.

Mt. 17.14-21; Mk. 9.14-29

³⁷ Maraietom, oea tupina eai wa se letamao, tatao gamagaridi ia se laubagibagiei. ³⁸ Tau esau, boeadi eai, i eogalau, i ene, “Tanuagagu e, ea awanorim ta, u italau natugu tau arinai, paana natueseesegagu mo. ³⁹ Earua gama wa i toai, eo ma esega i eabayaba; eo tauna i abigogoi awana i gosagosapuro, eo i heamamna, i abigabaei, abo hinage i laubodauio. ⁴⁰ Em heaheatayao ea awanoridi bena se aiduiei; isi nige abina se ata.” ⁴¹ Iesu ia arinana i heuio, i ene, “Omi isi ta nige emi sunuma, eo ma awaeagaramiu, huia lohaloha eau maemiu, eo ea taubigaimiu wa? Hage natum wa u woeaima.” ⁴² Ia i laoma, ma launa, na demoni gama wa i helubiei, eo i

abigogoi, Iesu earua biibiina wa i ribamataei, gama wa abo i hemaui, ia abo i moseuio tamana arinai. ⁴³ Isi gamagaridi Eaubada ena gigibori lailai se noonoei.

Ginauri gamagamagari Iesu i ginauridi wa, isi gamagaridi ma noonoodi, ie ribalau ena heaheata aridi eai, i ene,

Iesu ia matena i ribauio
Mt. 17.22-23; Mk. 9.30-32

⁴⁴ “Teina ribadi ta taba se ludobi beamiu gudadi eai: paana Tau Natuna abo se moselaei tatao nimadi eai.” ⁴⁵ Ena riba wa nige se nuatui, riba wa se ribayamui arinai nige se ita: riba wa hinage bena se oimuriei se matausi.

Iesu i laugugua, ena riba paana ede merumeru
Mt. 18.1-5; Mk. 9.33-37

⁴⁶ Haiawayagara esau ie tubu isi boeadi eai, si ene eai aridi eai abo i sae ariri. ⁴⁷ Iesu edi nuatu i nuatulobai, merumeru gagirina ie abi, ia gegesina eai i hebawa. ⁴⁸ Ie ribalau aridi eai, i ene, “Tau esau eo esau merumeru ta i oiامي debagu eai ia i oiامigu hinage: tau esau eo esau i oiامigu tauhetamariguma hinage i oiامي: paana ia gamagarimiu arimiu eai i gagiri konekone, ia abo i sae ariri ede.”

Iesu nanatunayao i ribasuudi
Mk. 9.38-40

⁴⁹ Ioane ia arinana i heuio, i ene, “Tanuagagu e, tau esau aie ita demoni i aiduiedi oa debam eai; ia ai ribanuahi paana ia nige i hemuriwataida.” ⁵⁰ Iesu i ribalau ia arinai, i ene, “Ia tabu au ribanuahi: paana ede ia nige i hetataguduguidida ita enada meta.”

Iesu nuatu harihariuna ena heaheatayao i heatadi Galilaia i laugabaei, nige i uiio

Io. 7.2-10

⁵¹ Huiana i hanahanauma ia bena se abisiniuiioi, ia nuana esega mo bena i sae Ierusalem eai. ⁵² Ena tauwasa matana eai i hetamaridi: isi se lau abo se lulage Samaria tataodi edi eanua esau, ena abamia bena se abi nonohai. ⁵³ Isi ia nige se oiامي, paana ia nuana esega mo bena i sae Ierusalem eai. ⁵⁴ Ena heaheata Iamesi eo Ioane teina se ita, si ene, “Guiau e, em nuatu saha, oeagi alaalasina abo ta lauhesom galewa eai i dobima tatao wa se alasiohi doha hinage Elia ena laulau wa?” ⁵⁵ Ia abo i torobui, taudi labui i ribasuuidi, i ene, “Emi nuatu aniona nige au nuatui. ⁵⁶ Paana Tau Natuna nige i laoma tatao bena i unuidi, na bena i hemauidi mo.” Isi abo se lau eanua esau.

Iesu ena heaheatayao harihariudi nuadi i lauitadi
Mt. 8.18-22

⁵⁷ Dobila eai ma laudi, tau esau i ribalau ia arinai, i ene, “Guiau e, em abalau gamagamagari eai abo ea hemuriwataim.” ⁵⁸ Iesu i ribalau ia arinai, i ene, “*Alope edi guda, eo malagaibu manudi edi noi; Tau Natuna uruna nige ena abaaionuaena.” ⁵⁹ I ribalau tau esau arinai, i ene, “U hemuriwataigu.” Ia mo i ene, “Guiau e, sora ea lau tamagu ea toretorettau baguna.” ⁶⁰ Iesu i ribalau ia arinai, i ene, “Tautemate enadi taumate abo se toretorettau: na oa mo u lau Eaubada ena basileia ribana u lauguguaei.” ⁶¹ Tau esau hinage i ene, “Guiau e, eau abo ea hemuriwataim; sora ea lau baguna egu numa tataodi ea lauaioniedi.” ⁶² Iesu i ribalau ia arinai, i ene, “Tau esau nimana i torelaei tano abagiagarina gigena eai, eo taba i sinibui, Eaubada ena basileia taba nige i abi.”

10

Iesu tatao-haiona-se-mate-saudoudoi i hetamari bagunaedi Mt. 10.1-42

¹ Teina ginauri ta muridi eai Guiau tatao tatao-haionase-mate-soudoudoi i heterodi, labui, labui, ia matana eai abo i hetamaridi, eanua eo dimo gamagamagari ia bena abo i lau aridi eai. ² Arinai abo i ribalau aridi eai, i ene, “Aiai sunasunadi se gamagari ariri, tauabidi eseesegeadi mo: Guiau masuri wa tanuagana au uura arinai, bena tatao headi i hetamaridi aiai sunasunadi abo se abidi. ³ Emi dobila au lawataidi: ea hetamarimiu ta omi doha mamoe * luko boeadi eai. ⁴ Moni tobona, eo tobo, eo aeum tabu au laedi: eo dobila eai tabu tau esau au lautoiei. ⁵ Ena numa esau, esau, au awasae alodi eai, au riba baguna, au ene, ‘Loni bena ai tore numa eai ta!’ ⁶ Ena loni natuna esau metai ie bawa, emi loni arinai i ota: ena nige’e, emi loni abo au abiuioi. ⁷ Meta numa me arinai au mia, ena aisadi, aisadi, se lediwa au ai eo au ainom: paana i lolo taupaisoa maisana se mosei. Tabu au lau hari numa, hari numa. ⁸ Eo ena eanua esau, esau, aue lage aridi eai, ena se eogaisinimiu, aiai aisadi, aisadi, se peiauri matamiu eai, au aiai: ⁹ nei eanua tataodi se asiebo au hemauidi, au ribalau aridi eai, au ene, ‘Eaubada ena basileia ie lagema, i hanahanauimiu.’ ¹⁰ Ena eanua esau, esau, aue lage aridi eai isi nige se eogaisinimiu, au lau edi baubau dobiladi eai, au heribadi, au ene, ¹¹ ‘Emi eanua geregeredi se patuimai, abo ai saugabaedi, abahegirimiu: taiede, riba mamohoina ede au nuatui, Eaubada ena basileia i lagema, i hanahanauimiu.’ ¹² Na ea heribamiu ta, nei asubenana ne, Sodoma abo si ene nige se baaea ariri, doha meta eanua me.

* **9:58:** English edi riba: fox. * **10:3:** Wolves: nuura kedewana esau, lailaina, aiailetana.

Iesu eanua headi i hegirudi.

Mt. 11.20-24

¹³ “Korasina kapore oa! Betesaida, kapore oa! Ena Turo eo Sidona aridi eai laulau gigiboridi se ginauridi doha se ginauri arimiu eai beabeaaririna eai wa nuadi se buidio; se babawa baeki se luidi, eo ahui eai se heahudi. ¹⁴ Hedudurai asubenana eai Turo eo Sidona abo nige se baaea doha omi. ¹⁵ Oa Kaperenauma hinage, se lauisinim galewa ewana eai, hade eai abo se gabadobem.

¹⁶ “Ia ena arinamiu i ataiei: arinagu hinage i ataiei: ia ena i isugaraemiu, eau hinage i isugaraegu; ia ena i isugaraegu, ia tau hetamariguma hinage i isugaraei.”

¹⁷ Tatao tatao-haiona-se-mate-saudoudoi wa se uioma, ma kodedi si ene, “Guiau e, demoni hinage oa esam debana eai arinamai se ataiei.” ¹⁸ Ie ribalau aridi eai, i ene, “Satani ea ita doha namanamari, galewa eai i beuma. ¹⁹ Gigibori ea lediwa arimiu eai gaganadenadewa aemiu eai au ututawaidi, eo waiununa ena gigibori gamagaridi emi gigibori abo i saetawatawai: eo taba nige ginauri esau abo i hebaaeamiu. ²⁰ Taiede tabu au kode paana earua baabaaeadi wa arinamiu se ataieyao; au kode mo paana galewa eai esamiu se uridio.”

²¹ Meta huiana eai wa Iesu Earua Tabuna debana eai, ie kode ariri eo i ene, “Tamagu e, galewa eo tanoubu Guiauna, ea lautoiem ta, teina ginauridi sonoga tataodi, eo sibasiba tataodi matadi eai u toreyamuidi, bebe mo aridi eai u hemasarahadi: taiede Tamagu e, oa matam eai u ene meta i lolo. ²² Ginauri gamagaridi Tamagu i ledimao arigu eai; nige tau esau Natuna i nuatui, Tamana mo iabom; eo nige tau esau Tamana i nuatui hinage, Natuna mo iabom, eo ia hinage arinai Natuna abo i hemasarahai.”

²³ Ia abo i sinibui ena heaheatayao aridi eai, isibom enadi i ribariba, i ene, “Matadi se lolo, taba ginauri au itadi wa, abo hinage se itadi. ²⁴ Paana ina ea heribamiu ta, ginauri au itadi peroveta eo wasawasa gamagaridi se henua bena se itadi, nige se itadi; eo riba wa au ataiedi bena se ataiedi hinage, nige se ataiedi.”

Laugagaeo tauna Iesu i hesioei

Mt. 22.34-40; Lk. 12.28-34

²⁵ Laugagaeo tauna esau i toro bena Iesu i nohoi, i ene, “Tauheata e, saha ea ginauri mauri nige nosina abo ea abi?”

²⁶ Iesu ie ribalau ia arinai, i ene, “Laugagaeo bukana eai saha se uri? edoha em hasihasirina?” ²⁷ Ia arinana i heuio, i ene, “Guiau em Eaubada u gadosisiei ma nuam i ohi, eo ma earuam i ohi, eo ma adidirim i ohi, eo ma nuauatum i ohi; eo helem taumia tauna u gadosisiei doha hinage oabom u

gadosisiuioim.” ²⁸ Iesu i ribalau ia arinai, i ene, “Em riba i dudurai; teina u abiwatai ede, abo u mauri.”

Parabole: Samaria tauna lolona.

²⁹ Ia mo, ena riba bena i hedudurai, i ribalau Iesu arinai, i ene, “Helegu taumia ede eai?” ³⁰ Iesu ia arinana i heuio i ene, “Tau esau Ierusalem eai ie dobi Ieriko, na tauaiaigirihai i hearodi, ana lulu se abihaidi, eo ia se laulaulubini abo se laugabaei, matena i hanahanau. ³¹ Kohena esau nei dobila eai ne i laulau ie lau: abo tau wa ie ita, i utugesi hari teha eai ie lau. ³² Hinage doha Levi tauna esau wau dimo wa arinai ie lage, i laoma i aiaiewaei, abo i utugesi hari teha eai ie lau. ³³ Samaria tauna esau ena lauwasia eai ie lau e ie lage tau wa ena aba ota eai, ia abo ie ita eo i nuatoatoaei. ³⁴ I lau ia arinai ana gai wa i sumadi, waina eo eausi i hegoilaedi ana gai eai, eo i hebawasae ena asini potana eai, i woeai i laei abaaiaitau-mana edi numa eai, abo i itawatai. ³⁵ Mara-ie-tom ia abo i laugabaei, denari labui i abidi i mosedi numa tanuagana arinai, i ribalau ia arinai, i ene, ‘Ia u itawataikomakomani: ena moni nige gonogonoana, ea uioma abo ea hemaisam.’ ³⁶ Tatao haiona ta aitea helena taumia tauna ede, wau tau wa arinai, tauaiaigirihai i hearodi wa?” ³⁷ Tau wa i ene, “Tau wa ia i nuatoatoaei.” Iesu abo i ribalau ia arinai, i ene, “U lau, meta doha hinage em abiabi.”

Mareta eo Maria ribadi.

³⁸ Isi se lau abo se lulage eanua gagirina esau eai: sine esau esana Mareta ia i eogaisini ena numa eai. ³⁹ Sine wa ena dogasana Maria, ia hinage Iesu aena gegesina eai i bawabigabiga, ena riba i ataatai. ⁴⁰ Mareta paisoa se hemode, i laoma Iesu arinai, i ene “Guiau e, nige u nuatuigu egu dogasana i laugabaegu eaubom ea paisoa ta? U heriba i saguigu.” ⁴¹ Iesu ia arinana i heuio, i ribalau ia arinai, i ene, “Mareta e, Mareta e, ginauri gamagaridi se hemodem, eo se henuadubum. ⁴² Ginauri esega i lolo: Maria ginauri lolona ina i hineri ta, teina ta taba nige ia arinai se abihaiuioi.”

11

Iesu uura ribana ie ribaei.

¹ Dimo esau eai, Iesu ma uurana, e i uura lautom, ena heaheata esau i ribalau ia arinai, i ene, “Guiau e, uura u heatamai, doha hinage Ioane ena heaheatayao i heatadi.” ² Ie ribalau aridi eai i ene, “Omi au uura, abo au ene,

“Tamamai e, galewa eai, oa esam se hetabuei. Em basileia bena i laoma. Em nuatu, tanoubu eai ta bena se lauwaitai, doha hinage galewa eai laulauna. ³ Bena asubena esau,

asubena esau, aiai ama u ledima. ⁴ Ema baaea ta u nuatu-gabaedi; doha hinage ai tauhebaaeamai edi baaea ai nuatu-gabaedi, Ena noho ai hearodi tabu u hesagugabaemai; baaea eai oa u hesaguhaimai.”

Parabole: tau esau ena heriam arinai i aibodadaoi.

⁵ Iesu i ribalau aridi eai i ene, “Eai, omi arimiu eai, bu-linuana eai i lau ena heriam arinai, i ene, ‘Egu heriam e, falawa haiona u sagenaidima; ⁶ ehagu esau ena abalauwasi eai i laoma arigu eai, nige egu haitala bena ea tore ia matana eai?’ ⁷ Numa alo eai ia arinana abo i heuio, i ene, ‘Tabu u hegadotoagu: dohila se guduiyao, ma nanatuguyao ai enoo ema abaeno eai; taba nige ea toro ea lediwa.’ ⁸ Ea heribamiu ta, ea ’ne ena nige i toro eo i mosei paana ia tau wa ena heriam, paana i awaawanoridaoi arinai abo i toro, eo ginauri aisadi, aisadi i henuadi wa abo i mosei. ⁹ Ea heribamiu ta, ea ’ne, Au aiboda, abo se lediwa; au eooi, abo au lobai; au ipeipesi, dohila abo se soeawa. ¹⁰ Paana esau, eo esau i aiaiboda abo i abi; eo ia i eooyoo abo i lobai; eo ia i ipeipesi dohila ia arinai abo se soe.

¹¹ “Omi arimiu eai aitea tau natuna falawa i aibodai we’u abo i mosei wa? Eo eama i aibodai ia mota abo i mosei wa? ¹² Kamkam kasinona i aibodai abo gaganadenadewa i mosei? ¹³ Na, taba omi, baaea tataomiuyao abidi au atao ainauia lolodi au mosedo nanatumiuyao aridi eai: Tamamiu, galewa eai ie mia, Earua Tabuna abo i mosei tauaiaiboda aridi eai.”

Si ene Iesu demoni i aiduiedi Belesebulo ena gigibori eai Mt. 12.22-37

¹⁴ Demoni esau Iesu i aiduiei, ia i tuutuuri. Demoni wa i lulagelau murimuri eai tau tuutuuriina wa ie riba: tatao abo se noonoei. ¹⁵ Isi headi si ene, “Belesebulo demoni edi wasawasa debana eai demoni wa i aiduiedi.” ¹⁶ Headi hinage, ia se nohoi, heiheinoina bena se eooi galewa eai i laoma. ¹⁷ Edi nuatu i itadio, arinai i ribalau aridi eai, i ene, “Basileia ena isibom se haitoremuriuioi meta abo se tatagorigori; numa hinage ena isi se haitoremuriuioi abo se guri. ¹⁸ Ena Satani hinage iabom i haitoremuriuioi ena basileia abo edoha ena totoro? Paana au ene, Belesebulo debana eai demoni ea aiduiedi. ¹⁹ Ena eau Belesebulo debana eai demoni ea aiduiedi, nanatumiuyao eai abo debana eai se aiduiedi? Isi abo enamui tau heduhedudurai. ²⁰ Taba eau Eaubada nima-gigina eai demoni ea aiduiedi, mamohoi Eaubada ena basileia i lagemao arimiu eai. ²¹ Tau adiadidiri-riina ena numa i itawatai ma alahiana, eo ma elepana, arinai ena gogo se ota komakomani. ²² Tau esa i adiadidirisom i laoma, tau wa i toai, ena alahia eo ena elepa eo ena abi gamagamagari i girihaidi, eo abi gamagamagari wa abo i

soiedi. ²³ Ia nige i saguigu, ia abo i hetataguduguduigu: ia hinage maegu nige ai tanotanogogo, ia abo i hetatagorigori.

Tau iabom taba nige i heduduraiuioi

Mt. 12.43-45

²⁴ Earua biibiina tau esau i laugabaei, abo i laulau malapitapitari eai, ena abaaiyawasi i eoo; i eooasa nige i lobai, abo i ene, 'Egu numa ea laugabaei wa abo ea uio arinai.' ²⁵ Ie lage, abo ie ita numa wa se uiauia eo se taubigaikomakomani. ²⁶ Ia abo i lau earua baabaeaariridi haligigilabui i abidi; abo se lulau ia boeana eai arinai se miahai; tau wa murina eai abo i baaea ariri, nige doha bagubagunana eai."

²⁷ Teina riba ta i ribaei ma ribana na sine esau tatao boeadi eai i eaba lailai i ribalau Iesu arinai, i ene, "Bogana eai u laoma, eo susuna u madoidi se sae ariri." ²⁸ Iesu abo i ene, "Isi mo se lolo ariri, Eaubada ena riba se ataiei, eo se sogohididini."

Iona heiheinoina

Mt. 12.39-42

²⁹ Tatao se oigogoma ia arinai, se gamagari, ena riba i hetubu, i ene, "Teina isi ta i baaea; heiheinoina se eooi: heiheinoina taba nige se mosedi, Iona peroveta mo ia heiheinoina. ³⁰ Doha Iona Nineva tataodi edi heiheinoi ede, tau Natuna hinage teina isi ta ia edi heiheinoi. ³¹ Tupo eawana edi wasawasa sine abo i toro, teina isi ta tataodi i hegirudi, eo abo i hebaaeadi paana tanoubu sigasigana eai i laoma wa bena Solomona ena sonoga i ataiei, na esau ede ina Solomona i saetawatawai. ³² Nineva tataodi abo hinage se toro isi ta abo se hegirudi, eo se hebaaeadi: paana Iona ena gugua eai nuadi se buidi: esau ede ina Iona i saetawatawai.

Parable: kanela se healasi

Mt. 5.15-16; Mk. 4.21-22; Lk. 8.16

³³ Nige tau esau lamepa i healasi abo i toreyamui, eo gulewa eai hinage taba nige i hebuitawai, na ie tore lamepa ena abaota eai, isi se awasaema marana abo se ita. ³⁴ Tauhemara ede mata: ena matam i lolo esegai taum i ohihai hinage abo i mara-gudui: ena matam i baaea taum hinage i masigiri-gudui. ³⁵ U komakomanim mara boeam eai ata i masigiri. ³⁶ Ena taum i ohihai i mara gudui na nige tupo esa i masigiri, taum i ohihai abo i mara gudui, doha lamepa alapurupururuna i hemaram."

³⁷ Iesu ena riba ma ribaribana na Parisea tauna esau ia i heriba bena ia maena se ai ai esega: to i awasae i bawabigabiga, bena i ai ai mo. ³⁸ Parisea tauna meta ie ita, i nooei, paana ai ai sora, Iesu nige i nimadeuri baguna.

Iesu Parisea nuadubu lailai abo se hearo i ribanonohai

Mt. 23.13-35

³⁹ Guiau i ribalau ia arinai, i ene, “Omi Parisea kaputi eo gaeba murimuridi mo au headi: boeamiu eai hari baaea eo hari baaea se monauboriboriri. ⁴⁰ Au eauyaure, murimuri wa tauginaurina aloalo hinage i ginauri, e nige’e? ⁴¹ Emi ginauri aisadi au abidi wa au ainauiaedi; abo ginauri gamagaridi arimiu eai se heaadio. ⁴² Kapore omi Parisea tataomiu e! minete eo pagano eo lagau aiai gamagaridi au peini saudoudoi, lausoiso e sega saudoudoi eai wa au ainauiai: abidudurai eo Eaubada ena gadosisi nige au nuatui: i lolo wau wa au abiwatai, esau wa tabu au nuahuedi. ⁴³ Kapore omi Parisea tataomiu e! paana sunago alodi eai abababawa saesaedi au gadosisiedi, eo abauneune eai bena se aitoiemiu. ⁴⁴ Kapore omi tauuriuri eo Parisea tataomiu e, omi tauboraborasom! Paana omi doha bousa nige se masaraha, eo tatao potadi eai se laulau nige se nuatuidi.”

Iesu laugagaeo tauheaheata edi nuadubu i ribaei.

⁴⁵ Laugagaeo taulauheata esau Iesu arinana i heuio i ene, “Tanuagamai e, oa u riba doha meta ai hinage u ribasuumai.” ⁴⁶ Iesu abo i ene, “Kapore omi hinage laugagaeo tau-laulauheataena tataomiu e! Oibahe poroporohedi tatao dabaeardi eai au hebaheidi, omi mo oibahe wa nige nimagimiu esega arinai au abilau. ⁴⁷ Kapore omi! paana peroveta bousadi numadi au heterodi, tubumiuyao se unuhematedi wa. ⁴⁸ Arinai ede au hemasaraha ta tubumiuyao edi laulau au ene se lolo: mamohoi isi se unuhematedi, omi bousadi numadi au heterodi. ⁴⁹ Arinai hinage Eaubada ena sonoga si ene, Peroveta tataodi eo aposotolo tataodi abo ea hetamaridi aridi eai, headi abo se unuhematedi, eo se heamamnadi: ⁵⁰ tanoubu se hetubu i laoma, i laoma, e peroveta gamagaridi osinadi se heboriri, teina isi ta arinai abo se hegirudi; ⁵¹ Abela osinana i laoma e Sakaria osinana hinage, ia se unui abaaitalasam hatahatana tabuna, eo numa uura ena birigom tabuna duaduaridi eai: mamohoi ea heribamiu ta, arinai abo se hegirudi! ⁵² Kapore omi laugagaeo taulauheataena e! Nuasonoga kina au lahesuara: omi nige au awasae, eo isi hinage bena se awasae au guduguidi.”

⁵³ Teina riba ta i ribalau aridi eai, ma ribaribana na tauuriuri tataodi eo Parisea tataodi ia se nohoi eo se hesohesom, riba gamagaridi bena abo i ribaedi: ⁵⁴ Isi abo se itaheteteusei, ena riba saha esau arinai bena se hegiru.

12

*Iesu i ene Parisea edi obue se ita komakomani
Mk. 8.14-21*

¹ Nei huiana, tatao se oigogo-esega se gamagari ariri, taba nige se hasiridi, se haihaiututawatawauioidi, arinai abo i ribahetubu ena heaheatayao aridi eai, i heribabagunaedi, i ene, “Parisea adi * obue au ita komakomani; meta edi laulau borabora. ² Paana ede nige ginauri esau se hebuitawai, na abotai abo se hemasaraha; eo nige ginauri esau hinage se toreyamui, na abo abina se ata. ³ Arinai ede saha eo saha au ribaedi masigiri boeana eai, na marana eai abo se ataiedi; meta hinage riba wa au riba moninihi biri alona eai, numa ewana eai abo se painaei.

⁴ “Egu heriamyao e, omi ea heribamui ta, ea ’ne, isi tauaiaiuu, tau ahaaha mo se unui, tabu au matausiedi, taiede taba nige ginauri esau se abi. ⁵ Ia mo matausina au matausi ia ede ea ribahesanapunonohaimui ta: ia au matausiei, taumui mo i unuidi, eo hinage ena gigibori eai abo i gabadobemiu Gehena boeana eai; mamohoi ea heribamui ta, ia mo bena au matausiei ede! ⁶ Manu gagiridi se uneuneidi pene labui maisadi wa, na Eaubada matana eai nige esau se nuagabaei? ⁷ Urumui maiawadi gamagaridi se hasiriheohidio. Arinai ede tabu au matausi: omi emi lolo wau manu gagiridi gamagaridi wa au saetawatawaidi.

⁸ Hinage ea heribamui ta, ea ’ne, esau eo esau tatao matadi eai i wasawasaegu, tau Natuna hinage ia abo i wasawasaei Eaubada ena aneru matadi eai: ⁹ na ena esau, tatao matadi eai i halelegu, Eaubada ena aneru matadi eai ia hinage abo se halelei. ¹⁰ Ena tau esau eo esau tau Natuna arinai riba baeae i ribaei, ena baeae abo se ribagigiri: na ena Earua Tabuna arinai riba baeae i ribaei, ena baeae taba nige se ribagigiri. ¹¹ Eo ena se woeaimui sunagodi eai, eo tauhedudurai eo tanuaga matadi eai, arinadi bena au heuioidi, eo saha eo saha abo au ribaedi, tabu au nuatu nonohai. ¹² Paana Earua Tabuna nei huiana ne ia abo i hesibasibamui saha eo saha abo au ribaedi.”

¹³ Edi pele esau i ribalau ia arinai, i ene, “Tanuagagu e, egu tau u heriba bena tamamai ena gogo i soiedima.” ¹⁴ I ribalau ia arinai, i ene, “Tau e, eai i hetorogu enamui tauhedudurai, eo enamui tausoiso i eau?” ¹⁵ Abo i ribalau isi aridi eai, i ene, “Au komakomanimui, gogo tabu nuamui se lauedi: tatao gogo gamagamagari se abidi, meta edi mauri nige’e.”

Parabole: taumonamonaune eauiyaure.

¹⁶ Parabole esau i heribadi, i ene, “Tau monamonaune ena oea i masuri ariri: ¹⁷ abo iabom ena nuanuatu, i ene, “Saha abo ea abi, egu masuri nige egu abapeiaurina?” ¹⁸ Abo i ene, “Teina mo abo ea abi: egu sanara abo ea lopahaidi, lailaidi ea abidi: alodi eai egu masuri, eo egu gogo egu abapeiauri.

* 12:1: Yeast

¹⁹ Nuagu ea 'ne, Nuagu e, gogo gamagaridi u peiauridi bori-mai gamagamagari adi laubagi: abo u aiyawasi, u aiai, u nomnom, eo u kode.' ²⁰ Na Eaubada i ribalau ia arinai, i ene, 'Oa eauyaure, maiona ta earuam abo se abihai: wau ginauri wa oa u peiauridi wa abo aidimo enadi?' ²¹ Doha ede ina ia gogo i peiauri iabom enana, eo nige ena gogo Eaubada arinai."

²² Ie ribalau ena heaheatayao aridi eai, i ene, "Arinai ede ea heribamiu ta, ea 'ne, Tabu maurimiu au nuatudaoiei, saha abo au ai; eo taumi saha abo au helui. ²³ Mauri mo i sae ariri ede, aiai nige'e, taumi hinage se sae, lulu nige'e. ²⁴ Boeobo eo au nuatuidi: nige adi se uma; eo nige adi se paipaisoa; eo nige edi sitoa, eo edi sanara nige'e; na Eaubada mo i heaidi; omi manudi au saetawatawaidi, e nige'e? ²⁵ Esau arimiu eai taba i nuatuda oi abo siarina i heloha kubita esega wa? ²⁶ Ginauri gagiridi wa nige abina au ata, ginauri gamagaridi omi saha au nuatudaoiedi? ²⁷ Oea baeobaeodi se inima au nuatui: isi nige se paisoa, eo nige se lulu haturi; hinage ea heribamiu ta, Solomona ana tepo lolodi eai ana ao nige i lolo doha hinage isi. ²⁸ Taba Eaubada ina doha oea leidi i heluidi, wau ie ota oea eai, maraitom se gabu um boeana eai: omi abo nige i heluimiu wa, sunuma gagiri tataomiu e! ²⁹ Eo saha abo au ai, eo saha abo au nom, tabu au eoo, nuamiu tabu se dagugu. ³⁰ Paana teina ginauri gamagaridi tanoubu enadi se eoidi: Tamamiu hinage i nuatuiyao omi teina ginauri gamagamagari bena au abidi. ³¹ Eaubada ena basileia mo au eooi: abo teina ginauri gamagaridi se hepatulediwa arimiu eai.

³² "Eawoi gagirina e, tabu au matausi; paana ede Tamamiu ena gadosisi lailai bena basileia abo i leawa. ³³ Emi gogo au uneuneidi, eo au aiainuiaedi; tobo abo au abidi taba nige se beabea, gogo wa galewa eai taba nige i ohi, arinai nige tauaiyahari i awasae eo hinage motamota nige se hebaaea. ³⁴ Haedi emi gogo abatorena, nuamiu ede metai.

Ia taumasarahana ribadi Iesu i ribahesanapunonohaidi

³⁵ "Taumi au taididini miu, eo omi emi lamepa au healasi-nonohaidi; ³⁶ omi hinage abo doha tatao edi Guiau se laubag-ibagiei, tawasora mataasina eai bena i uioma; ia i laoma eo i ipeipesi, arinai abo ma esega dobila se soe. ³⁷ Meta hea-heari se lolo, Guiau ena huia laoma i hearodi ma silasilawahetetedi: mamohoi ea heribamiu ta, ia abo i taididini uioi, abo i hebawabigabigadi se aiai, eo i laoma i taubigaidi. ³⁸ Ena bulinuana eai i lagema, e ena kamkam ie dou i lagema, isi ma silasilawahetetedi i lobaidi, meta heaheari se lolo. ³⁹ Teina ta au nuatui, ena numa tanuaga i nuatui mahana hisa tauaigirihai abo i laoma, ia abo i silasilawa eo taba nige se awasae ena

numa eai. ⁴⁰ Omi hinage abo au abihetoanonohai: paana tau Natuna abo i laoma ena huia laoma nige au nuatui.”

Parabole: Numa tauitawataina ena heaheari.

⁴¹ Petero abo i ribalau ia arinai, i ene “Guiau, e, wau parabole ta u ribaeyama enamai, e tatao gamagaridi enadi?”
⁴² Guiau i ene, “Eai heaheari tauna i lolo, eo i sonoga, ena Guiau abo i hetoro ena numa tataodi tanuagadi eai i lau, huia gamagari adi aiai abo i mosedi? ⁴³ Heaheari wa i lolo ena guiau i lagema i lobai ena laulau nei doha. ⁴⁴ Mamohoi ea heribamiu ta, ia abo i hetoro ena gogo gamagaridi tanuagadi eai i lau. ⁴⁵ Na, heaheari wa ena nuaboeana eai i ene, ‘Egu guiau ena laoma taba nige i heulama’; ena heaheari, tatao eo sisine, i pidiridi eo i aiai eo i nomnom eauyaure. ⁴⁶ Asubena esau, heaheari wa nige i nuatuhetoa, ena guiau abo i lagema, mahanana hinage nige i nuatui, eo ia abo i helautom, tatao riba nige se ataataiedi aridi eai i heoiesegaidi maenayao. ⁴⁷ Meta heaheari, ena guiau ena nuatu i nuatuiyao, eo nige i abihetoanonohaiuioi, eo ena nuatu nige i abiwataidi, abo se lubilubini eo se pidiri. ⁴⁸ Taba tau esau nige abina i ata, ena laulau debana eai taba se pidiri, taiede taba nige se pidiridaoei. Paana tau esau ginauri gamagaridi se mosei wa, ia arinai hinage gamagaridi bena se abiuioidi: ia hinage tatao ginauri gamagaridi se mosedi, aridi eai ginauri gamagaridi hinage abo se hetaladi.

Keriso tatao i peilabuidi.

⁴⁹ “Ea laoma ta oegi alaalasina abo ea gabadobei tanoubu potana eai ta; egu gadosisi saha? ea ’ne taba se healasi maodai! ⁵⁰ Na, eau bapatiso esau arinai abo se hebapatisoigu; nuagu i hisihisili i lau e abo ea heohi! ⁵¹ Omi au ene ea laoma ta bena loni ea leama tanoubu eai ta? Ea heribamiu, nige’e; ea peilabuiemiu mo. ⁵² Paana ede maraitom-asubena numa esega tataodi haligigi se mia: haiona, labui abo se hewahe-waiunuuioidi, eo labui, haiona abo se hewahewaiunuuioidi. ⁵³ Tamana, natuna tau abo i hewaiunu, eo natuna tau tamana abo i hewaiunu; sinana natuna siu abo i hewaiunu, eo natuna siu sinana abo i hewaiunu; lawana ia malawana abo se haihewaiunuuioidi.”

⁵⁴ Ie ribalau hinage tatao aridi eai, i ene, “Ania dubana teha lalasi eai au ita, abo au ene, ‘Nabu abo i leama;’ abo hinage ie taru. ⁵⁵ Eo eawana i toama, abo au ene, ‘Mahana abo i posinasina;’ abo hinage ie tubu. ⁵⁶ Omi tauboraborasom, galewa eo tanoubu aniadi au italobaidi; edoha teina huia ta hinage nige au italobai?”

⁵⁷ “Aue saha omibom laulau dudurai nige au nuatui? ⁵⁸ Em waiunu maidam au lau tauheduhedudurai matana eai, do-bila eai aue lau u aipate u aulabi ia arinai; ata i woeaim tauhe-dudurai matana eai, eo ia hinage abo i moselaem polisimani arinai, eo ia abo i gabasaem numa tutugudu alona eai. ⁵⁹ Ea heribam ta, taba nige u pesagabaei, sora moni gamagaridi wa u hemaisaheohidi i lau e pene gagirina anasiga!”

13

¹ Nei huiana ne, tatao headi metai ia se heriba, si ene, “Pilato, Galilaia tataodi osinadi i heboririesegaidi, edi aita-lasam.” ² Iesu arinadi i heuio, i ene, “Omi emi nuatu, au ene Galilaia tataodi gamagaridi aridi eai teina Galilaia tataodi isibom mo se baaea, paana amamna ta se hearodi? ³ Ea heribamiu ta, ea ’ne, nige’e: na ena nuamiu nige au buidi, omi gamagarimiu sora hinage abo au mate nei doha. ⁴ Meta tatao saudoudoi-haligigi-haiona hinage, Siloama bonana ie guri potadi eai, isi se mate wa: omi au ene Ierusalemata tataodi gamagaridi aridi eai isibom mo bena se baaea? ⁵ Ea heribamiu ta, ea ’ne, nige’e: na ena nuamiu nige au buidi omi gamagarimiu sora abo au mate nei doha.”

Parabole: Suke, nige aiaina

Is. 5.1-7; Mt. 21.18-20

⁶ Teina parabole hinage abo i heribadi i ene, “Tau esau ena vine oeana alona eai kuhou esau i umai; i laoma aiaina i eooi, nige i lobai. ⁷ Vine oeana tautawataina ia i heriba, i ene, ‘Borimai haiona ea laoma kuhou aiaina ea eooi, nige ea lobai: u oiheguri; oea saha i hewaa?’ ⁸ Ia arinana i heuio i ribalau ia arinai, i ene, ‘Guiau e, sora i otawa, teina borimai ta sora tano ea hebigabiga hetaiiri, eo ea samui: ⁹ ena aiaina aboi tore, i lolo: ena nige’e, abotai abo u oiheguri.’ ”

Sine esau ena asiebo se helautom.

¹⁰ Sabate esau sunago esau alona eai i lauheataedi. ¹¹ Na, sine esau i dabadabaruru, borimai saudoudoi-haligigi-haiona i asiebo, ia dagelana ie eou, toro i heasaasaai. ¹² Iesu sine wa ie ita i eogai, i ribalau ia arinai, i ene, “Sine e, em asiebo abo i tatapesa.” ¹³ Ia nimana i saosaei ia potana eai: ma esega abo i dudurai, ia Eaubada i aihelahui. ¹⁴ Sunago tanuagana nuana i baaea paana ede Iesu asubena sabate eai i abi hemaui, ia abo arinana i heuio, i ribalau tatao aridi eai, i ene, “Asubena haligigi-esega tatao se paisoaidi: arinai se laoma bena se mauri: sabate asubenana eai nige’e.” ¹⁵ Guiau ia arinana i heuio i ene, “Oa tauboraborasom, sabate asubenana eai gamagarimiu emi bulumakau, e emi asini edi numa eai au eairidi, eo au laedi goila bena se nom wa? ¹⁶ Eo

teina sine ta hinage ia Aberahama tubuna esau, Satani ia i auau, borimai saudoudoi-haligigi-haiona, asubena sabate eai ana auau abo se eairigabaei, e nige'e?" ¹⁷ Wau riba wa i ribaedi, abo ana papate se taumaeamaea: na tatao gamagaridi se kode ariri paana ginauri lolololodi gamagaridi i ginauridi.

Parabole: sinapi uauana

Mt. 13.31, 32; Mk. 4.30-32

¹⁸ Ia abo i ene, "Eaubada ena basileia doha saha? Saha abo arinai ea heaheasoniei? ¹⁹ Ia doha hinage sinapi tumana esau, tau esau ie abi, i hesuru ena oea eai; abo ie ini abo i hemala oeagi lailai; malagaibu manudi abo se toalau lagana eai."

Parabole: obue

Mt. 13.33

²⁰ Eo i ribauio hinage i ene, "Saha arinai Eaubada ena basileia abo ea heaheasoniei? ²¹ Ia doha hinage yeast sine esau ie abi falawa nonoi haiona boeadi eai i toreyamui, e abotai abo i sese ohi."

Se lau Ierusalem a dobilana eai, Iesu i lauheatadi.

²² Eanua lailaidi eo eanua gagiridi abo i baeawaidi, i lauheataedi, ie lau Ierusalem a dobilana eai. ²³ Tau esau i ribalau ia arinai, i ene, "Guiau e, tatao eseesejadi mo abo se mauri?" Ie ribalau aridi eai, i ene. ²⁴ "Adidirimiu au abi, abo au lulagelau dobila gagirina arinai: paana ea heribamiu ta tatao gamagaridi bena se lulagelau, abina nige se ata. ²⁵ Ena numa tanuaga i toro'o, dobila i guduyao, eo omi au totoro murimuri eai dobila eai au ipeipesi, au ene, 'Guiau e, Guiau e, dobila u soeama:' ia abo arinamiu i heuio, i ribalaowa arimiu eai, i ene, 'Omi aidobu, ea hekaumi.' ²⁶ Omi abo au riba, au ene, 'Ai aiai, eo ai ainom matam eai, ema baubau eai u lauheata wa.' ²⁷ Ia abo i ene, 'Ea heribamiu ta, ea 'ne, Emi abalaoma nige ea nuatui; au laugabaegu, omi gamagarimiu laulau baaea tauabidi.' ²⁸ Metai abo se doudou, eo moadi se taburuyahisidi, huiana ne Aberahama, eo Isaako, eo Iakobo eo peroveta gamagaridi, Eaubada ena basileia eai abo au itadi, omi mo abo se aiduemiuru murimuri eai. ²⁹ Isi headi teha aruabu, eo teha lalasi, teha bauri, eo teha eawana aridi eai se tupagogoma, eo se bawabigabiga Eaubada ena basileia eai. ³⁰ Isi headi taumurimurita abo se bagubaguna, eo isi headi taubagubaguna abo se murimurita."

³¹ Nei asubenana ne, Parisea, tataodi headi se laoma, se ribalau ia arinai si ene, "U lau udoi hari tupo eai: paana Heroda bena i unuim." ³² Ia i ribalau aridi eai i ene, "Au lau alope me au heriba, au ene, 'Demoni ea aiduiedi, eo wau ta eo maraitom tau asiasiebo ea hemauidi, eo asubena

hehaionana eai abo egu lau ea heohi. ³³ Taiede wau ta, eo maraitom, eo asubena esau, egu dobila eai ea laulau; paana peroveta tauna taba nige hari eanua se unui, Ierusalem eai mo.

Iesu Ierusalem eai laukaporei

Mt. 23.37-39; Lk. 19.41-44

³⁴ Ierusalem e, Ierusalem e, peroveta tauunuunuidi, eo isi se hetamaridi wa taulauweuidi; huia gamagamagari nanatumyao bena ea heoigogoidi, doha kamkam mabena eai nanatunayao i obatawaidi, na au awaeagara! ³⁵ Emi numa ahaahana mo se nuagabaei mamohoi, ea heribamiu ta, ea ene, Taba nige au itauioigu, i lau e huiana i lagema omi abo au ene, 'Ia Guiau esana eai i laoma, i lolol!' "

14

Iesu sabate eai tauasiebo i hemaui.

¹ Asubena sabate Iesu i awasae Parisea edi bada esau ena numa eai, bena i aiai, ia se itaitahetete. ² Na, tau esau ia matana eai asiebo osina i taguri. ³ Iesu i ribalau laugaga eo tataodi eo Parisea tataodi aridi eai, i ene, "Au ene i lolol asubena sabate eai ta hemahemaui wa?" ⁴ Isi se monomonou. Iesu tau wa abo i laei, i hemaui, eo i hetamari i lau; ⁵ isi arinadi i heuio, i ene, "Omi arimiu eai, eai ena asini e ena bulumakau ena i beu hua eai asubena sabate eai ia abo nige i abisini?" ⁶ Teina riba ta se ataiei, hemaisana nige abina se ata.

Parable: aitaumana iabom i nuatuuiioi.

⁷ Parable esau isi tatao se eogayogaidi se aitaumana wa enadi ie riba, paana i itadi biri saesaedi se abihineridi; i ribalau aridi eai, i ene. ⁸ "Ena tau esau tawasora mataasina arinai i eogaim, tabu u bawabigabiga abababawa saesaena eai; ata tau wasawasa lailai esau se eogai hinage; ⁹ ata tauyogaim wa i laoma, i ribalau arim eai, i ene, 'Tau ta abababawa ta u mosei arinai;' ata doha u taumaeamaea u babawa abababawa dobidobina eai. ¹⁰ Na, ena se eogaim, u lau abababawa dobidobina arinai u bawabigabiga; tauyogaim wa abo i laoma, abo i ribalaowa arim eai, i ene, 'Egu heriam e, u bawasae;' isi maemyao au aiaigogo arinai abo se hede-basaem ¹¹ Paana ede, tau esau eo esau iabom i hede-basaeuioi abo se heguri hegagiri; ia mo i nuatudobidobiuiioi abo se hede-basae."

¹² Ia abo i ribalau tauyoga wa arinai, i ene, "Ena asubena aiaina, eo maiona aiaina u ginauri nonohai, em heriam, eo em tataoyao, eo ehamyao, eo helem tau mia monamonaune tataodi tabu u eogaidi; ata isi hinage se eogaim, abo hinage se hemaisam. ¹³ Ena mataasi u ginauri, gogogesagesa tataodi eo tautubutubuyaeyaelua tataodi, eo taulaulaudae tataodi, eo

taumatagibugibu tataodi, u eogaidi. ¹⁴ Oa abo u lolo; paana isi bena se hemaisam nige abina se ata; taulaulaududurai se torouio huiana eai abo se hemaisam.” ¹⁵ Tau esau maedi se aiai esega, teina riba ta i ataiedi, abo i ribalau Iesu arinai i ene, “Ia Eaubada ena basileia eai i aiai, abo i lolo.”

Parabole: mataasi lailai

Mt. 22.1-14

¹⁶ Iesu abo i ribalau ia arinai, i ene, “Tau esau aiaigogo mataasina, tatao gamagamagari i eogaidi. ¹⁷ Aiai huiana wa ena heaheari i hetamari tatao i eogaidi wa i heribadi, i ene, ‘Au laoma, ginauri gamagaridi se suasuamaodao.’ ¹⁸ Isi gamagaridi nuadi esega, se awaeagara. Taubagubaguna i ribalau ia arinai, i ene, ‘Tano esau ea uneunei, abo ea lau hage ea ita: agutoi, u heriba u ene ea bawa.’ ¹⁹ Tau esau abo hinage i ene, ‘Bulumakau edi auaugogo haligigi ea uneunedi, abo ea lau hage ea itasipoidi: agutoi, u heriba u ene ea bawa.’ ²⁰ Esau hinage i ene, ‘Sine esau ea tawasorai, arinai nige ea laowa.’ ²¹ Tauheaheari wa abo i laoma teina riba ta ena Guiau i heriba. Numa tanuagana abo i ouyalayala, i ribalau ena heaheari arinai, i ene, ‘U pesa heuheula eanua dobiladi eo baubaudi u lauwataidi, gogogesagesa tataodi, eo tauyaeyaelua tataodi, eo taulaulaudae tataodi, eo taumatagibugibu tataodi u woeaidima.’ ²² Heaheari i ene, ‘Guiiau e, se abi nonohaiyao doha wau u lauhesomdi wa, numa mo sora nige i monau.’ ²³ Guiau i ribalau ena heaheari arinai, i ene, ‘U pesa dobila lailaidi eai, eo gana hasaridi dobiladi u lauwataidi, u lauhesomdi abo se laoma, egu numa bena i monau. ²⁴ Paana ede ea heribamiu ta, Tatao se eogaidi wa taba nige esau agu aiai begana i ai.’ ”

Iesu ena heaheatayao i lauitauioidi.

Mt. 10.37-39

²⁵ Na, moutuadi lailai ia maenayao se lau: ia i torobui, i ribalau isi aridi eai, i ene, ²⁶ “Ena tau esau i hemuriwataiguma, ia tamana eo sinana, eo monena, eo nanatunayao, eo ena tataoyao, eo lounayao, eo ia iabom hinage, nige i hewaiunuei, ia taba nige egu heaheata eai i lau. ²⁷ Tau esau eo esau ena satauro nige i bahei, eo i hemuriwataigu, ia taba nige egu heaheata eai i lau.

Parabole: bonana ribana.

²⁸ Paana ede aitea tau arimiu eai, ena bona bena i tarini, ia i bawabigabiga baguna, maisana i hasiri, ena moni gonogonoana abo i ginauri heohi, e nige’e? ²⁹ Ata paana i tarini bagunai, hinage nige ena abaheohina, eo tatao gamagaridi se ita ia se alaliuluaei. ³⁰ Si ene, ‘Tau ta ena bona i tarini hetubu, eo i ginauriasaeai, nige i ginauri heohi.’

Parabole: wasawasa i lau i iala.

³¹ Eo aitea wasawasa, hari wasawasa bena i ialaei, nige i bawabigabiga bagunai, abo i nuatui ena iala tataodi tausani saudoudoi, ana waiunu ena iala tataodi tausani tau-esega-i-mate abo nimadi gonogonoana? ³² Ena nige se adidiri, esau wa sora eda lohaloha eai, tautauwasa i hetamari loni ribana i ribaei. ³³ Doha hinage tau esau, eo esau, arimiu eai, ena gogo gamagaridi nige i laugabaedi, taba nige egu heaheata eai i lau.

Parabole: arita i tomatoma.

³⁴ Arita i lolo: ena arita wa i arita lautom, edoha ena ariaritaui? ³⁵ Nige ana abi tano eai, eo nige se tore alami boeana eai; tatao abo se gabaei mo. Ia beana eai i ataiei, abo i ataieididini.”

15

Parisea tataodi se gadigadigugu.

¹ Takasi tau-tanogogo tataodi eo baaea tataodi gamagaridi abo se laolaoma ia arinai, arinana bena se ataiei. ² Parisea tataodi eo tauuriuri tataodi, se gadigadigugu, si ene, “Teina tau ta baaea tataodi i eogaisinidima, eo maenayao se aiai esega.”

Parabole: mamoe i tauyamui

Mt. 18.12-14

³ Teina parabole ta i ribalau aridi eai, i ene. ⁴ “Aitea tau arimiu eai ena mamoe handere esega i abidi, ena esega i gege, ninety-nine i laugabaedi, i lau esau ie gege wa i eooi, i lau e abo i lobai? ⁵ I lobai, i toresae dabaeirona eai, ma nualolona. ⁶ I lagemma ena numa eai, ehanayao eo helena tau mia i heoigogoidi, i ribalau aridi eai, i ene, ‘Ehei ta kodegogo, egu mamoe ie gege wa ea lobaiyao.’ ⁷ Ea heribamui ta, galewa eai abo hinage se kode doha meta tau baabaaea esega taba nuana i bui; taulaududurai tataodi tatao-hasi-se-mate-saudoudoi-haligigi-hasi nige edi nuabui, galewa eai taba nige se kodeidi.

Parabole: moni se tauyamui.

⁸ Hinage aitea sine ena moni saudoudoi i abidi, esega i tauyamui, eo lamepa nige i healasi, eo ena numa i uiauia, eo i eoo komakomanini, i lau e abo i lobai? ⁹ Ia i lobai ehanayao, eo helena tau mia tataodi i heoigogoidi, i ene, ‘Ehei ta kodegogo, paana moni wa i tauyamui ea lobaiyao.’ ¹⁰ Ea heribamui ta doha meta hinage Eaubada ena aneru matadi eai abo se kode, tau baabaaea esega taba nuana ie bui.”

Parabole: natuna tau i tauyamui.

11 Ia abo i ene, “Tau esau ia nanatunayao tatao labui: 12 tau murita i ribalau tamana arinai, i ene ‘Tamagu e, gogo tupona u ledima enagu.’ Ena gogo gamagamagari abo enadi ie soi. 13 Nige baeana tau murita ena gogo gamagamagari abo i peigogoidi, ia abo i lau eanua esau eda lohaloha eai, nei eai ena gogo i aihegohegoilaedi laulau baeana aridi eai. 14 Ena gogo wa abo se ohi, guriam lailai ie tubu nei oea eai ne; ia abo i guriam. 15 Ia abo i lau nei eanua tauna esau i patulau ie mia arinai; ia abo i hetamari ena gana eai, ena sarai i heaheaidi. 16 Ia sarai adi aiai mo bena i aidi, abo bogana i sese: nige ana aiai tau esau i mosei. 17 Arinai ia nuana abo ie sae, i ene ‘Tamagu ena heaheari tataodi i hemaisadi adi aiai ureadi se aitoredi se ota, eau mo ea guriam matemate ta!’ 18 Nuana ea torohai ea lau tamagu arinai, abo ea ribalau ia arinai, ea ’ne, ‘Tamagu e, ia galewa eai ie mia ea hebaaea, eo oa matam eai hinage ea baeana. 19 Eau natum se ribaegu nige ea lolo, eau abo ea hemala em heaheari esau doha isi hinage u hemaisadi ne.’ 20 Ia abo i torohai, i laoma tamana arinai. Tamana i itaitalau ia ie ita eda lohaloha eai, i nuatoatoai, abo i aitautau, i heaitalagadoi, ia abo i alagoiei. 21 Natuna i ribalau ia arinai i ene, ‘Tamagu e, ia galewa eai ie mia ea hebaaea, eo oa matam eai hinage ea baeana, nige ea lolo si ene bena natum eau.’ 22 Tamana abo i ribalau ena heaheari tataodi aridi eai, i ene, ‘Lulu lolo-aririna au leama, ia au helui; nimaau ia nimana eai au tore; eo aeum aena eai au toredi hinage: 23 bulumakau natuna tubutubu-lolona au woeaiama au unui; abo ta aiai, eo ta kodegogo. 24 Paana ede natugu ta i mateo, na i mauriuio: i tauyamui, ta lobaiuioi.’ Isi abo se kodegogo.

25 “Tau baguna ia oea eai: ia abo i laoma numa i hana-hanau, huelele eo se saga arinadi i ataiei. 26 Heaheari tauna esau i eogai, i oimurini, nei ginauri saha. 27 Ie ribalau ia arinai, i ene, ‘Am taumurita ie lage: tamam bulumakau tubutubu-lolona i unui; paana ia i lobaiuioi, ma maurina eo ma lolona.’ 28 Ia abo i ouyalayala, nige i awasae numa alo eai: arinai tamana ie pesa ia i heriba-hebigabiga. 29 Ia arinana i heuio, i ribalau tamana arinai, i ene, ‘Borimai gamagamagari ea hesosoalem, eo em laugagaao ribana nige ma esega ea utusi; goti natuna esau nige u leama enagu, ma egu heriam abo ai kodegogo. 30 Teina natum ta i laoma, em gogo i aihegohegoilaedi sisine baeana aridi eai, bulumakau natuna tubutubu-lolona u unui ana.’ 31 Tamana i ribalau ia arinai, i ene, ‘Natugu e, huia gamagamagari u miatahitahi arigu eai: egu gogo gamagaridi oa enam. 32 I lolo ta kode, eo nuada se lolo, paana ede em goroa ta i mateo, na i mauriuio: eo i tauyamui na ta lobaiuioi.’ ”

16

Gogo taitawataina baaeana.

¹ Ia i ribalau ena heaheatayao aridi eai i ene, “Tau monauna esau, ena gogo tanuagana se hegiru, si ene, ena gogo i aihegohegoilaedi. ² Tau wa i eogai, i ribalau ia arinai, i ene, ‘Wasam ta ea ataiei, edoham, ue saha? oa gogo tanuagadi em abiabidi hage u heribaguma: ata gogo ta abo u tanuaga lautom.’ ³ Gogo tanuagana iabom ena nuatu, i ene, ‘Abo edohagu? egu guiau gogo tanuagana hewauna eai abo i helautomgu ta: tano giarina nige abina ea ata, awanorina ea taumaeamaea. ⁴ Egu nuatu ta abo ea hetubu ede, taba gogo ta ea tanuaga lautom abo hinage se eogaisinigu edi numa alodi eai.’ ⁵ Guiau ena ginauri ena abamose-hagahagaidi tataodi i eogaidi, esau i bagunama i hesio, i ene, ‘Am haga wa hisa, sora egu guiau nige u hemaisadi wa?’ ⁶ Ia abo i ene, ‘Eausi nonoi handere esega.’ I ribalau ia arinai, i ene, ‘Em uriuri pepana u abi, u bawabigabiga heuheula, abo nonoi tatao-labui-se-matesoudoudoi u uridi.’ ⁷ Abo i ribalau esau arinai, i ene, ‘Am haga wa hisa? Ia abo i ene, ‘Sitona nonoi handere esega.’ I ribalau ia arinai i ene, ‘Em pepa u abi tatao-hasisemate u uridi.’ ⁸ Gogo tanuagana ena laulau se gewagewa wa guiau i awaloloei paana i nuatu sibasiba: teina tanoubu merumerudi isidi se sibasiba ariri, marana merumerudi nige se sibasiba doha. ⁹ Ea heribamiu ta, gogo baaea debana eai taba au awa-eha; ena i lau baaea isi abo se eogaisinimiu abamia tahitahi eai.

¹⁰ “Ia ginauri gagiridi i abiloloedi abo ginauri lailaidi hinage i abiloloedi: ia ginauri gagiridi nige i abikomakomanidi, abo ginauri lailaidi hinage nige i abikomakomanidi. ¹¹ Ena gogo arinai nige au abiloloei, eai gogo mamohoi abo i lediwa bena au itawataidi? ¹² Ena tau esau ena gogo nige au itawataikomakomani, omibom emi gogo eai abo i lediwa? ¹³ Nige heaheari esau ena tanuaga labui i heaeaiedi, esau abo i hewaiunuei, esau i gadosisiei: e esau i nuatui, esau i tauiololoei. Eaubada eo mamona taba nige au heaeaieseigaidi.”

Iesu Parisea arinadi i heuio.

¹⁴ Parisea tataodi hinage, moni taunuanuaiedi, teina riba gamagaridi ta se ataiedi: ia se alaliuluiaei. ¹⁵ I ribalau aridi eai, i ene, “Tatao matadi eai omibom mo au heduduraiuioimiu: Eaubada nuamiu i italobaidio: paana ginauri tatao se hedebaseaedi, Eaubada matana eai se baaea ariri.

¹⁶ “Laugaga eo peroveta huiadi se laoma e Ioane arinai: murina eai Eaubada ena basileia se guguaiei, eo tatao gamagaridi se lau adidiriesega se lulau boeana eai. ¹⁷ Galewa eo

tanoubu abo se lautom, laugagaeo eai mo taba nige iota esau i lautom.

Iesu inawase ribana i ribaei

Mt. 5.31, 32; 19.3-11; Mk. 10.2-12; 1 Kor. 7.10-15

¹⁸ “Tau esau eo esau monena i inawasei, sine esau abo i tawasorai i ganaganawari; eo tau esau eo esau sine wa monena i inawasei wa i tawasorai ia hinage i ganaganawari.

Tau monamonaune eo Lasaro.

¹⁹ Tau monamonaune esau, ana lulu buiabuiiana eo *linen* lolona i luidi, eo asubena gamagamagaridi aiai lolodi mo i aiaidi. ²⁰ Tau awaawanori esau esana Lasaro, tau wa ena dobila guduna eai se heota, ia tauna bonu se laugirihai. ²¹ Ena gadosisi tau monamonaune ana aiai mapuradi ena hatahata eai se beu bena i abidi i aidi: hinage kedewa se laoma ia bonuna se ainamosidi. ²² Tau awaawanori wa abo ie mate, aneru ia abo se laei Aberahama nuapouna eai se tore; eo tau monamonaune hinage ie mate, ia abo se tore. ²³ Hade eai i amamna, matana i tusaei Aberahama ie ita eda lohaloha eai, eo Lasaro ia nuapouna eai. ²⁴ I eogolau i ene, ‘Tamagu e, Aberahama e, u nuatoatoaegu, Lasaro u hetamariama bena nima gigina i hedatu goila eai memenagu abo i hebuta: paana eau oeagi alaalasina eai ta, eo ea amamna.’ ²⁵ Aberahama i ene, ‘Natugu e, u nuatuiyao em huia mauri eai wa em ginauri lolodi u abidio, eo Lasaro hinage ginauri baabaaeadi i abidi; huia ta ia amnana se lolo, oa amnam se baaea ariri. ²⁶ Hinage oa eo ai duaduarida eai ta duha lailai i otaesegai; ena headi hinage ina bena se laowa nige edi abalaowa; nei tupo eai hinage nige edi abalaoma.’ ²⁷ Ia abo i ene, ‘Tamagu e, ea aibodaim ta ia bena u hetamari i lau tamagu ena numa eai: ²⁸ paana egu tataoyao ede haligigi; i heribakomakomanidi ata isi hinage abo se laoma amamna dimona eai ta.’ ²⁹ Aberahama i ribalau ia arinai i ene, ‘Isi Mose eo peroveta tataodi se abidio: isi taba se ataiedi.’ ³⁰ Ia i ene, ‘Tamagu e, Aberahama, nige’e: taba tau matemate esau i lau isi aridi eai, abo nuadi se buidi.’ ³¹ Ie ribalau aridi eai, i ene, ‘Ena Mose eo peroveta nige se ataiedi, taba nige se ataiei hinage, ena taumatemate esau mate eai i torouio.’”

17

¹ Iesu abo i ribalau ena heaheatayao aridi eai, i ene, “Al- abesibesi taba se laoma: ia tauhetubudi mo, kapore! ² I lolo we’u lailai ia gadona eai se au hepatulaei, ia abo se gabadobei gabogabo eai, ata merumeru gagirina esau hinage i heal- abesibesi. ³ Au komakomanimiu: ena em tau i hebaaeam, u guguiyai: ena nuana i bui ena baaea u nuatugabaedi. ⁴ Ena asubena esau ma haligigi-labui i hebaaeam, eo asubena esau

ma haligigi-labui i uiowa, i ene, ‘Nuagu ea buiyao,’ ena baaea u nuatugabaei.”

⁵ Aposotolo tataodi se ribalau Guiiau arinai, si ene, “Guiiau e, ema sunuma u hemotulayama.” ⁶ Guiiau i ene, “Taba emi sunuma doha sinapi tumana esau, omi abo au ribalau teina oeagi wa sukamine arinai au ene, ‘Se laahaim se umaim gabogabo eai’; abo hinage i awaabiemi.

Parabole: heaheari.

⁷ “Eai arimiu eai, ena heaheari tauna tano i giari, e bu-lumakau i heaidi, ia oea eai i laoma abo au ribalau ia arinai au ene, ‘U lau, u bawabigabiga, u aiai?’ ⁸ Omi emi riba doha ina wa, au ene, ‘Agu aiai u pei nonohai, em nogi u lio, u saguigu ea aiai eo ea aiainom; e abotai abo u aiai eo u ainom?’ ⁹ Heaheari wa riba u lauhesom wa i abiwataidi, ia abo au lautoiei? Nuana nige’e. ¹⁰ Omi hinage, ginauri gamagaridi se lauhesommiu au ginauriheohidio, abo au ene ai heaheari baaeamai: meta ama paisoa mo, arinai ai ginauri.”

Lepera tataodi saudoudoi se hemauidi.

¹¹ Iesu abo i lau Ierusalem, Samaria eo Galilaia i baeawa duaduaridi eai. ¹² Eanua gagirina esau eai ie lage, lepera tataodi saudoudoi ia maedi se hailobai, isi se totoro eda lohaloha eai. ¹³ Se arina lailai, si ene, “Iesu e, tanuagamai e, u nuatoatoaemai.” ¹⁴ Ia i itadi, abo i ribalau aridi eai, i ene, “Au lau au hemasarahauioimiu kohena aridi eai.” Ma laulaudi eda eai, abo se aa. ¹⁵ Esau aridi eai, ie ita i mauri, abo ie uio, i arina lailai arinai Eaubada i aihelahui. ¹⁶ Eo i gurisalaoba Iesu aena eai, i lautoi: ia Samaria tauna. ¹⁷ Iesu arinana i heuio i ene, “Tatao saudoudoi se heaadi e nige’e? Tatao haligigi-hasi wa haedi? ¹⁸ Nige tau esau i uio bena Eaubada i aihelahui, teina laolaoma tauna mo.” ¹⁹ Ie ribalau ia arinai, i ene, “U torohai u lau em dobila wa u lauwatai: em sunuma eai u mauri.”

Basileia ribana

Lk. 19.11, 12

²⁰ Parisea tataodi ia se oimurini, si ene, “Eaubada ena basileia auiana abo i laoma,” arinadi i heuioidi, i ene. “Eaubada ena basileia nige i laoma masamasaraha: ²¹ hinage taba nige si ene, Ia ede ina! e ia ede nei! Paana Eaubada ena basileia omi nuaboemiu eai ede.”

Iesu ena loama helabuina ie ribanonohai

Deut. 30.3; A. adi H. 1.9-11

²² Ia i ribalau ena heaheatayao aridi eai, i ene, “Asubenadi abo se laoma, omi abo au henua ariri bena Tau Natuna ena asubena esega au ita, taba nige au ita. ²³ Isi abo se ribalaowa arimiu eai, si ene, ‘Au ita ina: e au ita nei.’ tabu au lauwataidi, eo tabu au hemuriwataidi. ²⁴ Doha namanamari galewa teha

esau eai ie siri, i lau e teha esau eai: abo tau Natuna ena asubena eai ena abiabina doha meta. ²⁵ Na bagubaguna ia amamna gamagamagari i hearodi; teina isi ta hinage ia abo se nuagabaei. ²⁶ Doha Noa ena asubenadi wa, abo Tau Natuna hinage ena asubenadi nei doha. ²⁷ Isi se aiai, eo se aiainom, monediyao se tawasoraidi, se hetahetawasora hinage, i lau e asubenana wa Noa i awasae akina eai, dibori utuutu i lagema isi gamagaridi i earuhaidi. ²⁸ Lota ena asubena hinage doha; isi se aiai, eo se aiainom, se haiuneune, eo se uma, eo se abinuma. ²⁹ Nei asubenana ne Lota Sodomā i laugabaei oegi alaalasi eo tano alaalasi galewa eai i taruma isi gamagaridi i unuhematedi. ³⁰ Nei asubenana tau Natuna se hemasaraha hinage meta doha. ³¹ Nei asubenana ne, tau numa ewa eai, ena gogo numa alo eai, taba nige i pesadobi i abihai i laei; eo tau hinage oea eai, taba nige i uiō ena numa eai. ³² Lota monena au henuaisini. ³³ Ia ena mauri i abididini bena abo i mauri, ena mauri abo i tauyamui; ia ena mauri i nuagabaei ena mauri abo i abi. ³⁴⁻³⁵ Ea heribamui ta, meta maionana eai ne tatao labui edi aba-eno esega arinai se eno, esau se abi, na esau se laugabaei. Sisine labui hinage *wheat* se girigiri, esau abo se abi na esau se laugabaei.” ³⁶⁻³⁷ Isi ia arinana se heuio, si ene, “Guiāu e, haedi eai?” I heribadi i ene, “Tau sinarena ena aba-ota eai, manu aiāitāudi nei eai abo se tupagogoesege.”

18

Parabole: tauhekiraino baaeana.

¹ Parabole esau i ribalau isi aridi eai aniona ede ina, tatao huia gamagamagari bena se lau-uura mo, tabu nuadi se beruberu; ²⁻³ i ene, “Eanua lailai esau eai tauhedudurai esau ie mia, Eaubada matausina nige i matausi, eo tatao hinage nige i nuatuidi. Sine wabuwabu esau eanua eai ne; i laoma ia arinai, i ene, ‘Agu waiunu u hemaisa.’” ⁴ Ena riba bagubaguna nige i ataiei: abotai abo ia nuana eai, i ene, ‘Eaubada matausina nige ea matausi, eo tatao nige ea matausiedi;’ ⁵ taiede sine wabuwabu ta abo ea sagui paana i hemodeaririegu, ata huia gamagamagari i laulaudoima abo taugu si siololo.” ⁶ Guiāu abo i ene, “Tauhedudurai baabaaeana ena riba au ataiei. ⁷ Eaubada ia enanayao abo i saguidi e nige’e, isi asubena to maiona se eogalau ia arinai, huia lohaloha edi riba sora nige i hemaisa?” ⁸ Ea heribamui ta, ea ’ne abo i saguiheuheulaidi. Taiede, tau Natuna ena huia laoma eai sunuma abo i lobai tanoubu eai ta?”

Parabole: Parisea tauna eo telona tauna.

⁹ Teina parabole ta i ribalau tatao headi aridi eai isi si ene isi isibom se laulaududurai, eo tatao gamagaridi se isugaraedi: ¹⁰ “Tatao labui se awasae numa uura alona eai lau-uura

hesabana; esau Parisea tauna, eo esau takisi tautano tauna. ¹¹ Parisea tauna wa i toro, i uurapasipasiei, i ene, ‘Eaubada e, ea lautoiem paana eau nige doha tatao gamagaridi, isi tauaigirihai, eo taulaulaugewagewadi, eo tauganaganawari, eau hinage nige doha teina takisi tauna ta. ¹² Sabate esega ma labui ea aiaidabu, egu gogo gamagaridi ea peini peina saudoudoi, lausoisoina esega ea ainaiuae.’ ¹³ Na, takisi tautano wa i torosuara eaaawana, ia matana nige i tusaedi galewa eai, gabagabana eai ie oi, i ene, ‘Eaubada e, eau tau baabaaeagu, u nuatoatoaegu.’ ¹⁴ Ea heribamiu ta teina tau ta i dobiuio ena numa eai se taubigai, tau esau wa nige’e, paana tau esau iabom i hedebasaeuioi abo se heguri, eo tau esau iabom i hemerumeruioi abo se hedebasae.”

Iesu merumeru gagiridi i helolodi

Mt. 19.13-15; Mk. 10.13-16

¹⁵ Bebe abo se ledima ia arinai bena i abiiadi; ena hea-heatayao se ita, abo se ribasuuidi. ¹⁶ Na, Iesu mo i eogaidi, i ene, “Merumeru gagiridi taba se laoma arigu eai, tabu au guduguidi: paana ede Eaubada ena basileia doha ede isi. ¹⁷ Mamohoi ea heribamiu ta, eai to eai Eaubada ena basileia nige i abi doha merumeru gagirina, taba nige i lusora alona eai.”

¹⁸ Wasawasa esau i hesiolau ia arinai, i ene, “Tanuagagu lolona e, saha abo ea ginauri, mauri nige nosina abo ea abi?” ¹⁹ Iesu i ribalau ia arinai, i ene, Paana saha u ene eau ea lolo? Nige esau i lolo, esega dumaduma mo, Eaubada. ²⁰ Laugaga eo ribadi u nuatuidio, Tabu u ganaganawari, tabu u aiainu, tabu u aiayahari, tabu u hegihegiru gaibu, tamam eo sinam u taubigaedi.” ²¹ Ia i ene, “Teina ginauridi gamagaridi ea sogohididinidio, ma hewarigu i laoma e huia ta.” ²² Na Iesu teina riba ta i ataiedi, i ribalau ia arinai, i ene, “Taiede, ginauri esega mo u hedeha, em gogo gamagaridi me u uneunedi, tatao gogogesagesa aridi eai u soiedi, em gogo ede abo u abi galewa eai: eo u laoma, u hemuriwataiguma.” ²³ Teina riba ta i ataiei, ia abo i nuadubu ariri: paana ede ena une se gamagari ariri. ²⁴ Iesu tau wa i ita i nuadubu ariri abo i ene, “Isi taumonamonaune Eaubada ena basileia bena se lusora se hesabaasa! ²⁵ Kamela ie lusora mo diu gudana eai, taumonamonaune Eaubada ena basileia dohilana eai bena i lusora, abo i ahi.” ²⁶ Isi tatao teina riba ta se ataiei abo si ene, “Taba nei doha eai abo i mauri?” ²⁷ Ia i ene, “Ginauri wa tatao nige abidi se ata, Eaubada mo abidi ie ata.” ²⁸ Petero abo i ene, “Ai ginauri gamagaridi ai laugabaedio, ai hemuriwataim.” ²⁹ Iesu i ribalau aridi eai, i ene, “Mamohoi, ea heribamiu ta nige tau esau numa, e tamana, e sinana, e ena dodogayao, e monena, e nanatunayao i laugabaedi Eaubada ena basileia

debana eai. ³⁰ Ia teina huia ta ginauri gamagaridi abo i abidi, eo maraitom asubena mauri nige nosina.”

Iesu ia matena eo torouiona i ribauio.

³¹ Saudoudoi-labui wa i woeaidima, ie ribalau aridi eai, i ene, “Ta sae Ierusalem eai, riba gamagaridi, tau Natuna ribana, peroveta se uridio abo se hemamohoiedi. ³² Paana ia abo se moselaei Murimuri-tataodi nimadi eai, ia abo se talatalawasiei, eo se hebaaeaaririei, eo se garigarisoi. ³³ Ia abo se lubilubini, eo se unuhemate: asubena hehaionana eai abo i torouio.” ³⁴ Teina riba ta nige se nuatulobaidi: riba wa i ribayamui, riba wa i ribaedi wa aniodi nige abina se ata.

Ieriko hanahanauna eai taumatagibugibu esau matana se helala

Mt. 20.29-34; Mk. 10.46-52

³⁵ Ia abo i laoma Ieriko i hanahanau, tau matagibugibu esau i bawabigabiga eda gegesina eai, ginauri i awaawanori. ³⁶ Moutuadi se laulau dagugudi i ataiei, i hesio, i ene, “Ina saha, wa?” ³⁷ Ia se heriba, si ene, “Iesu Nasareta i baeawa ie lau.” ³⁸ Ia abo ie eoga i ene, “Iesu, Davida natuna e, u nuatoatoaigu.” ³⁹ Isi se bagubaguna ia se ribasuui, si ene bena i monou: ia abo i eogalailai, i ene, “Oa Davida natuna e, u nuatoatoaigu!” ⁴⁰ Iesu abo i tarutoro, i lauhesomdi bena tau wa se woeaiyama: ia abo i laoma ia gegesina eai, i oimurini, ⁴¹ i ene, “Em nuatu saha abo ea sahaim?” Ia abo i ene, “Guiau e, bena matagu se lala.” ⁴² Iesu i ribalau ia arinai, i ene, “Matam se lalao: em sunuma debana eai u lolo.” ⁴³ Ma esega matana abo se lala, ia Iesu abo i lauwatai, Eaubada i hedebasaei; tatao gamagamagaridi se ita, Eaubada se ailhelahui.

19

¹ Iesu i lulage Ieriko eai i baeawa ie lau. ² Tau esau esana Sakaio, ia takisi tau-tanogogo tanuagadi, tau monamonaune. ³ Ena gadosisi Iesu bena i ita: tatao se gamagari ariri nige ena abaitana, paana siarina ie kuu. ⁴ I aिताutau baguna oeagi sukamoa eai i hinae Iesu bena abo i ita paana nei dobila eai ne arinai abo i baeawa. ⁵ Iesu ie lage wau dimo wa arinai, i sanalolosae tau wa ie ita, i ribalau ia arinai, i ene, “Sakaio e, u pesaheuheulama: wau ta em numa eai abo ea babawa.” ⁶ Ia i pesaheuheula, i woeaisaei ena numa eai ma kodena. ⁷ Isi abo se ita, gamagaridi se gadigadiguguei, si ene, “Ia i lau tau baabaeana i aitaumania.” ⁸ Sakaio i toro, i ribalau Guiau arinai, i ene, “Guiau e, egu gogo tupona abo ea mosei tatao gogogesagesa aridi eai: eo ena ginauri aisana ea abigaibuidi hari tau, hari tau, aridi eai ea boraidi, abo ea hemaisauioidi, ma hasi maisana ea helai.” ⁹ Iesu i ribalau ia arinai, i ene,

“Teina asubena ta mauri i lage teina numa eai ta, paana ia hinage Aberahama natuna esau. ¹⁰ Paana ede Tau Natuna i laoma tatao se tauyamui i eooidi, eo i hemauidi.”

Parabole pauna saudoudoi: eo basileia sora nige se hetubu Lk. 17.21; A. adi H. 1.6-8

¹¹ Teina riba ta se ataiedi, parabole esau abo i heribadi, paana ia Ierusalemia i hanahanau, eo isi edi nuatu hinage si ene, Eaubada ena basileia nige baeiona abo se hemasara. ¹² Arinai i ene, “Wasawasa esau i lau eanua esau eda lohaloha eai ena basileia esau bena i abi, eo i uioma. ¹³ Ena heaheari tataodi saudoudoi i eogaidima, moni pauna saudoudoi i mosedi, i ribalau isi aridi eai, i ene, ‘Au hepaisoaei i lau e ea uioma.’ ¹⁴ Ena eanua tataodi ia se ouyalayalaei, riba esau se laei ia arinai, si ene, ‘Tau ta nige ai henua ia ama tanuaga.’ ¹⁵ Ia i uioma, basileia wa i abiyao, tatao, abo i lauhesomdi heaheari tataodi se eogaidima ia arinai, isi wa moni i mosedi wa, isi se uneune bena i itadi moni hisa se hetubudi. ¹⁶ Tau baguna i laoma, i ene, ‘Guiau e, em pauna esega i hemala pauna saudoudoi.’ ¹⁷ I ribalau ia arinai i ene, ‘I lolo ariri, oa heaheari lolona: em nuatu se dudurai, ginauri hisahisawaidi mo u komakomanidi, abo ea hetorom eanua saudoudoi oa tanuagadi eai u lau.’ ¹⁸ Heaheari helabuina wa i laoma, i ene, ‘Guiau e, em pauna esega i hemala pauna haligigi.’ ¹⁹ Hinage ia arinai i ene, ‘Oa abo se hetorom eanua haligigi tanuagadi eai u lau.’ ²⁰ Heaheari esau wa i laoma, i ene, ‘Guiau e, hage u ita em pauna meta: ea suma komakomani, ea totore ie ota; ²¹ paana ea matausiem oa tau isuisupunapunana: eo em laulau enam u abigaibuidi mo, eo ginauri bena u tanogogoidi sora nige u lauhesuru.’ ²² I ribalau ia arinai, i ene, ‘Oa heaheari tauna baeana, oa awam eai abo ea hegirum. U nuatui eau tau isuisupunapunana, eo ginauri ea abi gaibuidi, eo ea tanotanogogo sora nige ea hesuru. ²³ Ie saha egu moni nige ue tore bank eai, ea uioma abo egu moni ea abi, eo hagahagadi hinage?’ ²⁴ Isi ia gegesina eai tau totoro i ribalau aridi eai, i ene, ‘Pauna esega wa au abi, abo au mosei tau wa pauna saudoudoi tau abina arinai.’ ²⁵ (Isi se ribalau ia arinai, si ene, ‘Guiau e, ia pauna saudoudoi i abidio.’) ²⁶ Paana ea heribamui ta eai to eai enana ie abi, enana hinage abo se mosei: eai to eai nige ie abi enana begana abo se laeudoiei. ²⁷ Na isi, agu waiunuyao nige se henua eau bena tanuagadi, au woaidima, au unuidi matagu eai.’”

²⁸ Ia i ribalau ina doha, abo i bagubagunaedi, se sae Ierusalemia eai. ²⁹ Betepage eo Betania i hanahanau, tupi esau esana Oliveta arinai se lage, ena heaheatayao labui i hetamaridi. ³⁰ I ene, “Au lau eanua matamui eai, au lage

arinai asini natuna se hedai au ita, sora nige tau esau i bawasae arinai, abo au eairihai, au woeaiama. ³¹ Ena tau esau i hesiowa, i ene, 'Paana saha asini ne au eairihai?' abo au riba ina doha, au ene, 'Paana Guiau bena i abi.' ³² Isi se hetamaridi wa abo se lau, hinage se ita doha ena riba i ribaei. ³³ Asini natuna daina bena se earihai, tanuagana se ribalau aridi eai, si ene, 'Asini natuna me sahana au eairihai?' ³⁴ Si ene, 'Guiiau bena i abi.' ³⁵ Abo se woeai se laei Iesu arinai, adi lulu se toresae asini natuna potana eai; abo Iesu se hebawasae potana eai. ³⁶ Ia ma launa adi lulu se lauwestauri dobila eai. ³⁷ Ia i lage hanahanau, Oliveta tupina abaleta-dobina eai, ena heaheatayao moutuadi gamagamagari se kode, eo se arina lailai Eaubada se aihelahui, paana ana paisoa gigiboridi se itadio; ³⁸ si ene, 'Wasawasa i lolo, ia i laoma Guiau esana eai: loni galewa eai, ma ana tepo i mia iniini puripurina eai!' ³⁹ Parisea tataodi headi moutuana boeadi eai se ribalau ia arinai si ene, 'Tanuagamai e, em heaheatayao u ribasuudi.' ⁴⁰ Ia arinadi i heuio, i ribalau aridi eai, i ene, 'Ea heribamiu ta ena tatao ta se monomonou ta, weu ma esega abo se eabayabalaoma.'

Iesu Ierusalem sabina ie dou

Lk. 13.34-35

⁴¹ Ia abo i lage hanahanau, eanua wa i ita, sabina ie dou. ⁴² I ene, 'Oa, ena oa u nuatui, teina em asubena ta ginauri se patulaoma em loni arinai! wau ta matam eai se tauyamiu. ⁴³ Paana asubena abo u hearodi, em waiunu hua lohaloha abo se sara hetaiirim, hari teha, hari teha se guduguduim, nige em abalulage. ⁴⁴ Se heasibuim, u hemalagonu, eo nanatumyao boeam eai hinage; nige we'u esau abo i ota we'u esau potana eai paana egu lagema huiana nige au nuatui.'

Dubu lailai se hea ma helabuina

Mt. 21.12-16; Mk. 11.15-18; Io. 2.13-17

⁴⁵ Ia abo i awasae numa uura alona eai, isi tauuneunelau eo tauuneunelaoma nei eai i aiduiedi. ⁴⁶ I ribalau aridi eai, i ene, 'Se uriyao, egu numa abauura ede: omi numa wa au abi i hemala tauaiayahari edi abamia.'

⁴⁷ Asubena gamagamagari i lauheata numa uura eai: kohena lailaidi eo tauuriuri tataodi eo eanua babadadi ia se eooi bena se unui. ⁴⁸ Edi nuatu si eooasa; paana tatao gamagaridi ena riba se gadosisiedi.

20

¹ Nei asubena ne esau tatao i lauheataedi numa uura eai eo evanelia hinage i lauguguiaidi, kohena lailaidi eo tauuriuri tataodi babadayao maedi se laoma ia arinai. ² Se ribalau ia arinai, si ene, 'U heribamai, teina ginauridi ta eai ena gigibori

eai u ginauridi wa? E eai gigibori ta i leawa?” ³ Arinadi i heuio, i ribalau aridi eai, i ene, “Riba esau hinage abo ea hesioimiu: abo omi au heribaguma: ⁴ Ioane ena bapatiso galewa eai i laoma wa, e tatao aridi eai ie tubuma?” ⁵ Isi se heunaboisaha si ene, “Ita ta ’ne, Galewa eai i laoma; ia abo i ene, ‘Ie saha ia nige au ataiei?’ ⁶ Na, ita ta ’ne, ‘Tatao aridi eai ie tubuma’: tatao gamagamagari abo se lauwe’uida: paana isi se nuatuiyao Ioane ia peroveta mamohoi ede.” ⁷ Arinana abo se heuio si ene, “Ena abalaoma nige abina ai ata.” ⁸ Iesu i ribalau aridi eai i ene, “Eau hinage nige ea heribamiu eai ena gigibori eai teina ginauri ta ea ginauridi.”

Parabole: vine oana

Mt. 21.33-46; Mk. 12.1-12; Is. 5.1-7

⁹ Ina parabole ta abo tatao i heribadi; “Tau esau vine oana i umai: i mosei tautawata aridi eai, abo i lau eanua eda lohaloha eai, huia lohaloha ie mia. ¹⁰ Ena huia buina ena heaheari esau i hetamari ie lau tautaitawata aridi eai, vine oana aiaina bena se mosei ia arinai; tautaitawata tau wa se laulaulubini; ia se hetamari ma nima ahaahana. ¹¹ Abotai abo heaheari esau i hetamari: ia hinage se laulaulubini, eo edi abi se baaea ariri ia arinai, ia se hetamari ma nima ahaahana. ¹² Abotai abo heaheari hehaionana wa i hetamari; ia hinage abo se unui: eo se heduiahalai. ¹³ Vine oana tanuagana i ene, ‘Abo ea saha? Natuyogoyogoigu ta ea gado-sisariiei abo ea hetamari: nuana ia se ita abo se heasisiei.’ ¹⁴ Tautaitawata ia se ita, se oiouiba, si ene, ‘Tanuaga ede teina: ehei! ia ta unui, oea ta abo ta abi itabom eda oea.’ ¹⁵ Arinai vine oana eai ia se heduiahalai, eo se unuhemate. Vine oana tanuagana tatao wa ia abo edoha ena abiabidi? ¹⁶ Ia abo i laoma oea tautaitawataina wa abo i unuhematedi, vine oana abo i mosei hari tatao aridi eai.” Isi riba ta se ataiei abo si ene, “Eaubada taba nige meta doha!” ¹⁷ Ia i itadi, i ene, “Ina riba ta saha se uriyao si ene, ‘We’u wa numa tauabina se gabaei, iaede i hemala we’u tubeina eai i lau.’ ¹⁸ Tau esau eo esau i beu teina we’u ta potana eai abo i tamogorugoru; ia we’u wa i beu potana eai, ia abo i hemala ahu.”

Telona monina ribana

Mt. 22.15-22; Mk. 12.13-17

¹⁹ Nei huiana eai ne kohena lailaidi eo tauuriuri tataodi edi dabila se eoiu bena ia se abilau nimadi eai: tatao mo se matausiedi; paana se itayao teina parabole ta i ribaei wa arinai i hegirudi. ²⁰ Isi ia se itaitasipoi tauwesewese se hetamaridi se lau se boraborai, si ene bena isi tau laulaududurai tataodi, bena riba se hepilipili ia abo se moselaei gavana nimana gigiborina eai. ²¹ Isi ia se oimurini, si ene, “Tanuagamai e, ai nuatui oa em riba eo em lauheata se dudurai,

hinage nige tau esau u heasisinapai, Eaubada ena dobila tatao u heatamamohoiedi. ²² Laugagaeo i ene saha, i dudurai Kaisara takisi monina ta mosei, e nige'e?" ²³ Edi borabora i italobaidio, ie ribalau aridi eai i ene, "Aue saha au nohoigu ta? ²⁴ Hage denari esega au heitagu. Eai ana ao, eo eai ena uriuri ede meta?" Arinana se heuio, si ene, "Kaisara enana." ²⁵ Abo i ribalau aridi eai, i ene "Kaisara ena ginauri au laei Kaisara arinai, eo ena Eaubada ena ginauri au laei Eaubada arinai."

Iesu Sadukea tataodi torouio ribana i heribadi
Mt. 22.23-33; Mk. 12.18-27

²⁶ Ena riba nige se hepilipilidi tatao matadi eai: ena riba se noonoei: nige ariarinadi. ²⁷ Sadukea tataodi headi abo se laoma ia arinai, edi nuatu si ene, tatao nige mate eai se torouio, ia se oimurini ²⁸ si ene, "Tanuagamai e, Mose ena uriuri arimai eai i ene, tau esau, ena doga i tawasora ie mate nige nanatunayao, ena doga abo ena wabu i hai tumadiyao abo i hetubudi ena doga wa enana. ²⁹ Boga esau tataodi haligigilabui, taubaguna i tawasora, ie mate, nige natuna. ³⁰ Helabuina hinage sine wa ie hai, ia hinage ie mate eo nige natuna. ³¹ Hehaionana hinage sine wa ia abo ie hai; hehaligigi-labui edi laulau nei doha mo: gamagaridi se mate, nige nanatuidiyao. ³² Abotai abo hinage sine wa ie mate. ³³ Torouio huiana sine wa eai abo monena? tatao haligigilabui ia se hai."

³⁴ Iesu arinadi i heuioidi, i ribalau aridi eai i ene, "Ina tanoubu tataodi se tawasora, eo se hetahetawasoraedi. ³⁵ Isi si ene se lolo bena nei huia ne abo se hearo, eo mate eai se heterouioidi, taba nige se tawasora, eo hinage nige se hetahetawasora: ³⁶ hinage taba nige se mateuio paana isi eo aneru gonogonoadi; isi Eaubada nanatunayao, eo torouio nanatunayao. ³⁷ Taumatemate abo se torouio wa, Mose oeagi gagirina eai i hemasarahayama, Guiau esana i ribaei Aberahama ena Eaubada, eo Isaako ena Eaubada, eo Iakobo ena Eaubada. ³⁸ Paana ia nige taumatemate edi Eaubada: na taumaumauri mo isi edi Eaubada: paana tatao gamagamagari ia debana eai se mauri."

Iesu i hesiolau tauuriuri aridi eai
Mt. 22.41-46; Mk. 12.35-37

³⁹ Tauuriuri tataodi headi ia arinana se heuio si ene, "Tanuagamai e, em riba se lolo." ⁴⁰ Arinai abo se hesiolautom, nige se oimuriuio.

⁴¹ Ie ribalau aridi eai, i ene, "Ie saha si ene Keriso ia Davida natuna? ⁴² Wana bukana eai Davida hinage i ene, 'Guiiau i ribalau egu Guiau arinai, i ene, U bawabigabiga nima-tutugu

eai. ⁴³ I lau e am waiunuyao ea heterodi abo se hemala aem adi bou.' ⁴⁴ Davida ia i awaguiawei, ie saha ia natuna?"

⁴⁵ Tatao gamagamagari matadi eai i ribalau ena hea-heatayao aridi eai, ⁴⁶ i ene, "Tauuriuri au komakomanidi, edi gadosisi mo lulu lohaloha se tautausiedi, eo abauneune eai bena tatao abo se laulautoiedi; eo sunago eai abababawa saesaedi se henuadi, eo abamataasi eai biri saesaedi se henuadi hinage. ⁴⁷ Isi sisine wabuwabu edi numa se aigirihaidi, eo adi lulu se helohadi bena abo tatao se itadi: isi mate lailai abo se hearo."

21

Sine wabuwabu ena ainauia

Mk. 12.41-44

¹ Iesu i sanalolosae tatao monamonaune i itadi edi ainauia se toretoredobi moni abapeiaurina eai. ² Eo sine wabuwabu esau hinage ie ita, pene gagiridi labui i toredobedi. ³ Ia i ene, "Mamohoi ea heribamiu ta, teina sine wabuwabuna ta nige ena gogo, enana i toredobedi i sae ariri, gamagaridi enadi wa i hemuridi. ⁴ Paana teina tatao gamagaridi edi gogo gamagaridi wa arinai edi ainauia se usadobedi begadi mo Eaubada se ainaui: wabuwabu wa, ia gogogesagesa, ena moni maudoina i usadobei-esegaidi."

Oliveta lauguguiaina

Mt. 24.25; Mk. 13

⁵ Tatao headi numa uura ribana se oioiribaei, si ene, "We'u lolodi eai eo ainauia lolodi eai numa wa se hepasa," ia i ene, ⁶ "Teina ginauridi ta omi au itadi, asubenadi abo se lagema nige we'u esau i ota we'u esau potana eai, gamagaridi abo se heboloheohidi." ⁷ Isi ia se oimurini si ene, "Tanuagamai e, auiana teina ginauridi ta abo se tubu? Eo heiheinoidi saha abo se tubu hanahanai?" ⁸ Ia i ene, "Au komakomanimiu ata se boraimiu: paana gamagaridi abo se laoma esagu eai, si ene, 'Eau Keriso ede': 'Huiana i hanahanauma!' omi tabu au lauwataidi. ⁹ Omi iala eo heasiworewore wasadi au ataiedi, tabu au matausi: paana teina ginauridi abo se tubu baguna: na sigasigana sora."

¹⁰ Ia abo i ribalau aridi eai i ene, "Eanua abo eanua esau se ialaidi: eo basileia abo basileia esau se ialaidi: ¹¹ hari teha, hari teha eai moniini lailaidi abo se tubu; eo guriam hinage: eo laumatemate: eo nuamatamatausi, eo heiheinoidi lailaidi galewa eai se laoma. ¹² Ina ginauri sora nige se tubu, omi abo se toabagunaimiu, eo se heamamnamiu, se moselaemiu sunago eo numa tutugudu eai, eo se niurilaemiu wasawasa eo gavana matadi eai, eau esagu debana eai. ¹³ Omi emi abaribahemasaraha huiana ede meta. ¹⁴ Nuamiu

au headidiriesegaidi, emi riba saha saha tabu au nuatunonohaidi: ¹⁵ paana awamiu sonogana abo ea lediwa, ami waiunu gamagaridi taba nige se heuio, eo taba nige se ribaheboso. ¹⁶ Omi tamamiu, sinamiu, eo emi dodogayao, eo ami bogao, eo ehamiuyao abo se moruimiu: omi headi hinage abo se unuhematemi. ¹⁷ Tatao gamagamagari abo se ouyalayalaemi e au esagu debana eai. ¹⁸ Na urumiu maiawadi taba nige esega se hebaaea. ¹⁹ Emi miatahitahi debana eai nuamiu abo se mauri.

Ierusalem a bo se hebaaea se ribanonohai.

²⁰ “Omi Ierusalem a u ita tauiala gamagamagari se hetaiiri, au nuatui sabom abo i hanahanau ede. ²¹ Nei huiana ne isi Iudea taumiaidi abo se dago oea tupidi eai: isi hinage oea wa boeana eai abo se dago murimuri eai: eo ealeba tataodi tabu se sae arinai. ²² Paana teina maisa baaea asubenadi, bena riba gamagaridi se uridio abo se hemamohoiedi. ²³ Nei asubenadi ne kapore sisine bogabogadi, eo isi hinage nanatudiyao se hemadodi! Paana oea eai wa abo baaea lailai se hearodi, eo ouialalaila hinage teina tatao ta potadi eai i taru. ²⁴ Isi elepa matana eai abo se mate, eo se auauidi se niurilaedi eanua gamagamagaridi eai: Murimuri tataodi Ierusalem a bo se utuututawatawai, i lau e Murimuri tataodi edi huia i lautom.

*Guiau i uioma ma namanamarina
Mt. 24.29-31*

²⁵ “Heiheinoidi abo se tubu mahana boeana eai, eo nawalai boeana eai, eo ipora boeadi eai; eo tanoubu eai ta eanua tataodi baaea se hearodi; eo aruadi se loi; hinage gabogabo eo butubutu se dagugu lailai; ²⁶ tatao nuadi abo se beruberu paana se matausi, eo paana ginauri wa se itadi se tubu tanoubu eai ta: galewa ginauridi abo se moimoiu. ²⁷ Tau Natuna abo se ita eada boeana eai i laoma ma gigiborina ma ana tepo, ma ana bela. ²⁸ Teina ginauridi se tubuma, au sanalolosae, urumiu au lausinidi; emi mauri i hanahanauma.”

*Parabole: Kuhou
Mt. 24.32, 33; Mk. 13.28, 29*

²⁹ Parabole esau i heribadi i ene, “Kuhou a u ita, oeagi gamagaridi hinage; ³⁰ ena se ini omi a u nuatui, a u ene, siwara abo i hanahanauma. ³¹ Hinage doha meta teina ginauri a u itadi se laoma, a u nuatui a u ene Eaubada ena basileia i hanahanaumao. ³² Mamohoi ea heribamiu ta, teina isi ta taba nige i lautom, riba gamagaridi ta abo se hemamohoiedi. ³³ Galewa eo tanoubu abo se lautom: egu riba taba nige edi abalautom.

*Guiau abo i uioma aridi eai i ribanonohai**Mt. 24.34-51; Mk. 13.30-37*

³⁴ “Au komakomanimiu, ata huia esau nuamiu se porohe, au aiadaoi, eo au nomnomdaoi, eo teina mauri ginauridi ta au nuauatuidi, eo nei asubenana ne i lagema ata i het-agugumiu. ³⁵ Paana abo i laoma tatao gamagaridi tanoubu maudoudoina taumiaidi abo i sa’idi. ³⁶ Arinai au silasilawa, eo huia gamagamagari au lau-uura, omi abo si ene au lolo teina ginauridi ta abo se laoma au dagoedi, abo au totoro hinage tau Natuna matana eai.”

³⁷ Asubena i lauheata numa uura alona eai: maiona ie pesa, oea esau arinai ie mia oea wa esana ede Oliveta. ³⁸ Mara-ietom tatao gamagamagari se lau ia arinai numa uura alona eai, ia arinana bena se ataiei.

22*Iuda i ene Iesu abo i morui**Mt. 26.2, 14, 15; Mk. 14.1, 2, 10, 11*

¹ Areto Nige ie Sese mataasina i hanahanau, esana ede Pasova. ² Kohena lailaidi tataodi, eo tauuriuri tataodi, ana mata se eooi ia bena se unui: tatao mo se matausiedi.

³ Satani Iuda, esana esau Isakariota, abo i lui, ia saudoudoi-labui wa esau. ⁴ Ia i lau dobila eai kohena lailaidi eo kapena maedi se ribariba, Iesu edoha ena abiabina abo i morui eo i mosei isi aridi eai. ⁵ Isi nuadi se lolo, eo se oioiriba moni abo se mosei ia arinai. ⁶ Ia i heribanonohaidi ena dobila i woeai aisana, bena i moruiyamui, tatao wa nige se ita.

*Pasova se abinonohai**Mt. 26.17-19; Mk. 14.12-16*

⁷ Areto Nige i Sese asubenana i lagema, pasova arinai bena se unui. ⁸ Ia Petero eo Ioane i hetamaridi, i ene, “Au lau, pasova au abinonohai, abo ta ai.” ⁹ Isi se ribalau ia arinai, si ene, “Haedi abo ai abinonohai?” ¹⁰ I heribadi, i ene, “Ena au lulage eanua eai, tau esau abo au hailobai, goila siaki eai i bahei: ia au lauwaitai numa ena abaawasae eai hinage au awasae. ¹¹ Numa wa tanuagana abo au heriba, au ene, “Tanuagada i heribam, i ene, Taumana edi biri haedi, arinai pasova ea ai, ma egu heaheatayao?” ¹² Ia abo biri lailai ewa eai i heitamiu se peinonohao: metai au abinonohai.” ¹³ Isi se lau, hinage se lobai doha wau i ribaei wa: pasova abo se abinonohai.

¹⁴ Huiana ie lage, ia i bawabigabiga, eo aposotolo saudoudoi-labui maenayao. ¹⁵ I ribalau aridi eai, i ene, “Egu gadosisi lailai ede ina maeguyao omi pasova ta ai baguna, abo ea amamna: ¹⁶ paana ede ea heribamiu ta, pasova ta taba nige ea ai uiui, i lau e abo se hemamohoei Eaubada ena basileia eai.” ¹⁷ Kaputi i abi, abo i lautoi, i ene, “Teina au

abi, ami au soi: ¹⁸ Ea heribamiu ta, vine masina taba nige ea nomuioi, i lau e Eaubada ena basileia i lagema.”

Mataasi tabuna se hetubu
Mt. 26.26-29; Mk. 14.22-25

¹⁹ Areto ie abi, i lautoi, abo i ihi, i mosei aridi eai, i ene, “Taugu ede teina se leawa au abi, arinai emi abahenu-aisinigu.” ²⁰ Se aiai lautom abo kaputi hinage ie abi, i ene, “Teina kaputi ta gagaeo harihariuna osinagu eai, se heboriri debamiu eai.

Iesu tau moruina i ribaei
Mt. 26.21-25; Mk. 14.18-21; Io. 13.18-30

²¹ “Na, ia abo i moruigu, maegu nimana ie tore hatahata potana eai ta. ²² Mamohoi tau Natuna abo i lau doha se nuatui nonohai: kapore nei tau ne ia i morui ne!” ²³ Isibom se hesihesiouioidi si ene aitea tau aridi eai abo i abi doha nei.

Se lulu, si ene eai aridi eai abo i sae
Mt. 20.25-28; Mk. 10.42-45

²⁴ Hinage isibom se haiawayagara, aitea aridi eai abo i saeariri. ²⁵ I ribalau aridi eai i ene, “Murimuri tataodi edi wasawasa se lauhearidi, eo isi tatao se lauhesomdi, esadi se tore tatao tauhelolodi. ²⁶ Na, omi tabu meta doha: esau arimiu eai i sae ia abo i hemala taumurita: eo ia se awaguauei, abo i hemala tauheaheari. ²⁷ Aitea i sae ariri ede, ia abo i bawabigabiga i aiai, e ia abo heaeai tauabina? Ia i bawabigabiga i aiai, e nige’e? Na eau arimiu eai doha heaheari tauna.

²⁸ “Agu noho ea hearodi omi ede au miatahitahi arigu eai. ²⁹ Basileia esau abo au abi enamiu: doha hinage Tamagu i leama enagu; ³⁰ egu basileia eai, egu hatahata eai abo au aiai, eo au aiainom, eo abo au bawabigabiga terona potadi eai Israela bogadi saudoudoi-labui abo au heduduraidi.”

Petero Iesu i uharaei se ribanonohai
Mt. 26.33-35; Mk. 14.29-31

³¹ Guiau abo i ene, “Simona e, Simona e, Satani i henua ariri bena i abim, bena i oiluiluim doha sitona. ³² Na ea lau-uurao enam, bena em sunuma tabu i lautom: oa nuam u bui, em dodogayao abo u headidiridi.” ³³ I ribalau ia arinai, i ene, “Guiiau e, eau abo ea lauwataim, ta lau numa masigiri eai, eo ta mate.” ³⁴ I ene, “Petero e, ea heribam ta, teina wau ta kamkam sora nige ie dou, oa ma haiona abo u uharaegu, abo u ene nige abigu u ata.”

Tauheaheata hari baaea, hari baaea, abo se hearodi, i heribadi.

³⁵ Iesu i ribalau aridi eai, i ene, “Nabada wa ea hetamarimiu wa, nige moni tobona, eo nige tobo, eo nige ae’um, ginauri esau au hedehe?” Isi si ene, “Nige’e.” ³⁶ Abo i ribalau aridi

eai, i ene, “Teina huia ta ia taba moni tobona i abi abo i abi, eo lauwasia tobona hinage: ia hinage nige ena elepa, ena lulu i uneunei, abo ena elepa ena abaabina. ³⁷ Paana ea heribamiau ta, ea ’ne, teina ta se uriyao debagu eai abo se hemamohoei, si ene, ‘Laugaga eo tauutuutusia maedi se heoiesegai,’ paana ede saha enagu si uri, abo se hemamohoei.” ³⁸ Isi si ene, “Guiiau e, hage u ita elepa labui ede ina.” I ribalau aridi eai, i ene, “Gonoana.”

Iesu oea eai

Mt. 26.36-46; Mk. 14.32-42

³⁹ Ia ie pesa ie lau Oliveta tupina eai, doha ia kamanina; ena heaheatayao ia se hemuriwatai. ⁴⁰ Ie lage dimona eai, i ribalau aridi eai, i ene, “Au lau-uura, ata noho se hearomiu.” ⁴¹ Ia i lausuara siuna lohana doha we’u ta tu, i turibono, i lau-uura. ⁴² I ene, “Tamagu e, ena nuam u ene i lolo, teina kaputi ta u laehesuara: Taiede eau nuagu nige’e, oa mo nuam ta abi.” ⁴³ Aneru esau galewa eai i lagema ia arinai, ia i headidiri. ⁴⁴ Ia amamna lailai i nuhuri ena uura i uura adidiri: i muiasa doha osina i namtutu lailai dobi tano eai. ⁴⁵ I lau-uura nonoha abo i toro, eo ie lau ena heaheatayao aridi eai i lobaidi ma enodi, paana se nuadubu ariri. ⁴⁶ I ribalau aridi eai, i ene, “Saha au enoi? Au toro au uura, noho ata i hearomiu.”

Iuda Iesu i morui

Mt. 26.47-56; Mk. 14.43-50; Io. 18.3-11

⁴⁷ Ia ma ribaribana na tatao moutuana se lagelage, tau wa esana se tore Iuda, saudoudoi-labui wa esau, i eda-bagubagunaedi, i lau e Iesu gegesina eai ia bena i alagoiei. ⁴⁸ Na Iesu i ribalau ia arinai, i ene, “Iuda e, Tau Natuna em alagoi ta arinai u morui?” ⁴⁹ Isi se torogogo ia gegesina eai tatao edi nuatu se itayao, se ribalau Iesu arinai si ene, “Guiiau e elepa eai ai lauelepai wa?” ⁵⁰ Tau esau aridi eai, kohena lailai ena heaheari tauna i lauelepai, ia bea tutuna i sapihai. ⁵¹ Iesu arinadi i heuio, i ene, “Besi!” Ia beana i abiitalaei eo i hemaui. ⁵² Iesu abo i ribalau kohena lailaidi, eo numa uura kapenadi, eo babadadi aridi eai, isi ede se laoma ia arinai, i ene, “Au laoma, ma elepamiau eo ma alahiamiu, doha eau tauaiayahari?” ⁵³ Asubena gamagamagari eau maemiu numa uura alona eai, nimamiau nige au heleleama arigu eai: emi huia ede ina ta, eo masigiri gigiborina hinage.”

Iesu se toai: Petero i halele

Mt. 26.57, 69-75; Mk. 14.53, 54, 66-72; Io. 18.12, 15-18, 25-27

⁵⁴ Isi ia abo se woeai, se laei, kohena lailai ena numa eai se lage. Na Petero isi muriariridi eai i laolaoma. ⁵⁵ Isi oeagi se iuhi numa lailai alona eai, eo se bawagogo, Petero hinage maedi se bawa. ⁵⁶ Sine esau ia ie ita, oeagi gegesina eai ie bawa wa, i itaitasipoilaei, eo i ene, “Teina tau ta ia

hinage maena.” ⁵⁷ Ia abo i halele, i ene, “Sine e, ia nige ea itaitai.” ⁵⁸ Nige baeaona abo tau esau hinage ia ie ita, eo i ene, “Oa hinage adi sagu esau.” Petero abo i ene, “Tau e, eau nige’e.” ⁵⁹ I lau e, doha mahana esega, tau esau hinage i riba adidirilau, i ene, “Mamohoi ina tau ta ia hinage maena: ia Galilaia tauna.” ⁶⁰ Petero abo i ene, “Tau e, em riba me ea hekau.” Ma esega abo, ma ribaribana, na kamkam ie dou. ⁶¹ Guiau abo i sinibui, i italau Petero arinai. Petero Guiau ena riba wa abo i henuaisini, doha i ribalau ia arinai, i ene, “Kamkam sora nige ie dou, oa ma haiona abo u halelegu.” ⁶² Petero abo ie pesa murimuri eai, ie dou ma gado kalapina.

Iesu se lubilubini

Mt. 26.67-68; Mk. 14.65; Io. 18.22-23

⁶³ Tatao wa Iesu se abididini ia se talatalawasiei, eo se laulauwapai. ⁶⁴ Isi ia matana abo se suma, pareana se wa’i, ia se oimurini, si ene, “U riba peroveta, eai i lubilubim?” ⁶⁵ Eo riba baaea gamagamagari hinage ia arinai se hebaaea.

Iesu i lau sunederi matadi eai

Mt. 26.59-68; Mk. 14.55-65; Io. 18.19-24

⁶⁶ Mara- ie- tom, tatao babadadi, eo kohena lailaidi, eo tauuriuri tataodi hinage se oigogo esega, ia se woelaei edi sunederi alona eai, si ene, ⁶⁷ “Oa Keriso ede? Hage u heribamai.” I ribalau aridi eai, i ene, “Taba ea heribamiu, nige au ataiei: ⁶⁸ ena ea hesioemiu hinage arinagu taba nige au heuioyama, eo taba nige au eairihaigu. ⁶⁹ Maraitom asubena Tau Natuna abo i bawabigabiga Eaubada ena gigibori nima tutuna eai.” ⁷⁰ Isi gamagaridi abo si ene, “Oa Eaubada Natuna ede?” I ribalau aridi eai, i ene, “Au ene eau ede.” ⁷¹ Isi si ene, “Mata esau abo ta eooi? Iabom awana eai ena riba ta ataieiyao.”

23

Iesu se laei Pilato matana eai

Mt. 27.2, 11-14; Mk. 15.1-5; Io. 18.28-38

¹ Isi moutuana se ohiaiesega se torohai Iesu se woelaei Pilato arinai. ² Isi ia se hegiru, si ene, “Tau ta ai lobai ema eanua tataodi i hegegaridi, eo i heribadi, i ene, tabu Kaisara enana se mosei, eo hinage i ene, iabom mo Keriso ede, ia Wasawasa.” ³ Pilato ia i oimurini, i ene, “Oa Iudea edi Wasawasa?” Iesu ia arinana i heuiio, i ene, “Oa u ene doha meta.” ⁴ Pilato abo i ribalau kohena lailaidi, eo tatao aridi eai, i ene, “Teina tau ta ena baaea nige ea lobai.” ⁵ Isi abo se ouialaiala ariri, si ene, “Eanua tataodi i heasiworeworedi. Galilaia i lauheata hetubu, eo eanua gamagamagari i laoma hinage ina eanua eai ta.”

Iesu se hetamari Heroda matana eai.

⁶ Galilaia esana se atai, Pilato i ataiei, abo i hesio aridi eai, i ene, “Tau ta Galilaia tauna?” ⁷ Abo i nuatui Iesu Heroda ena tupo eai i laoma, arinai i hetamari Heroda arinai, Heroda wa nei huihana ne Ierusalem eai. ⁸ Heroda Iesu ie ita nuana i lolo ariri: nabada wa ena gadosisi bena ia i ita, paana ia wasana gamagaridi i ataiedio; eo ena nuatu i ene bena ena laulau gigibori esau abo i ita. ⁹ Riba gamagamagari aridi eai i hesiolau Iesu arinai: ia arinana nige i heuio. ¹⁰ Kohena lailaidi eo tauuriuri tataodi se toro ia se hegihegirudaoi. ¹¹ Heroda, ma ena iala tataodi ia se isugaraei, eo se talatalawasiei, eo lulu balebalelemn eai ia se helui, ia abo se hetamari uio Pilato arinai. ¹² Nei asubenana ne Pilato eo Heroda se awaheriam, nabada wa taudi labui se heiheisugara.

Iesu i uio Pilato matana eai: Baraba se eairigabaei, Iesu se awamatei

Mt. 27.15-26; Mk. 15.6-15; Io. 18.39-40

¹³ Pilato, kohena lailaidi eo babadadi eo eanua tataodi i eogagogoidi, ¹⁴ abo i ribalau aridi eai, i ene, “Ina tau ta au woelaiama arigu eai ta, au ene tatao i hegegewardi: ia matamui eai ana mata ea eoodadaasa eai, riba wa emi abahegiruna wa ina tau ta nige baaeana saha ea lobai: ¹⁵ nige’e, hinage Heroda nige i lobai: paana ede ea hetamarimui Heroda arinai; nige mate laulauna esau i laulauei. ¹⁶ Ia abo ea lubilubini, eo ea eairigabaei.” ¹⁷ (Mataasi huiadi eai ne kamanidi, tau esau se eairigabaei.)

¹⁸ Ma esega se eogayogalau, si ene, “Ina tau ta au abiyawa, na Baraba au eairigabaeyama arimai eai.” ¹⁹ (Tau ta eanua i heasibuibuidi, eo i aiainu, arinai ia se tore numa masigiri eai.) ²⁰ Pilato, bena Iesu i eairigabaeuioi, arinai i riba uio aridi eai. ²¹ Na isi abo se eogayoga, si ene, “Ia au hesatauroeawa, ia au hesatauroeawa!” ²² Ma haiona hinage i ribalau aridi eai, i ene, “Ie saha, baaea esana ie abi? Ena mate paana nige ea lobai: abo ea lubilubini, eo ea eairigabaei.” ²³ Se samadudui ma arina lailaidi si ene ia bena se hesatauro. Isi arinadi eo kohena lailai arinadi abo se hebigawatai. ²⁴ Pilato abo i heribadi isibom edi nuatu abo se abiyawa. ²⁵ Tau wa se tore numa masigiri eai paana tatao i heasibuibuidi eo i aiunu wa i eairigabaei, isi edi gadosisi wa i lauwatai: Iesu i moselaei edi samadudu eai wa. ²⁶ Isi Iesu se woelaei, Kurene tauna esau esana Simona se toai, ealeba eai i laolaoma, satauro se toresae ia dabaearona eai, bena i bahei Iesu murina eai i laulauwatai.

Iesu se hesatauro

Mt. 27.33-38; Mk. 15.22-28; Io. 19.17-19

27 Tatao peledi lailai ia se lauwatai, eo sisine, isi hinage ia se doudoui, eo se laulaukaporei. 28 Na Iesu i torobui aridi eai, i ene, "Jerusalem nanatunayao sisine e, tabu au doudouigu, omibom au doudouiuoimiu, eo nanatumiuyao au doudouidi. 29 Na asubenadi abo se lagema aridi eai abo si ene, 'Isi sisine se agaagari, eo nige se haihaisu, eo susudi nige se hemahemadoedi, se lolo ede.' 30 Isi abo se ribahetubu oea tupidi aridi eai, si ene, 'Au buima potamai eai'; eo oea tupi gagiridi aridi eai abo si ene, 'Au bubulitawaimai.' 31 Paana ena teina ginauridi ta se ginauridi oegi idaidaina eai, saha abo se abi oegi kokoiagina eai?"

32 Tatao baaea labui hinage ia maenayao se woeaesegaidi se laedi bena se unuidi. 33 Isi se lage dimo wa arinai, ia ede esana se tore Moiyaru, metai ia abo se hesatauro tatao baaea labui wa maenayao, esau ia nima tutuna eai, eo esau ia nima seuseurina eai. 34 Iesu abo i ene, "Tamagu e, edi baaea ta u nuatugabaei; edi abiabi ta nige abina se ata." Ana lulu se soi: keleru eai se ginauri. 35 Tatao wa se totoro se itaitalau. Tanuagayao hinage maedi ia se liuliuaei, si ene, "Hari tatao mo i hemauidi: ena ia Keriso, Eaubada i hineri, taba iabom mo i hemauidi." 36 Iala tataodi ia hinage se liuliuaei, se laoma ia arinai vinega se helelesae arinai. 37 Eo si ene, "Ena oa Iudea edi wasawasa oabom u hemauidi." 38 Uriuri esau hinage se urisae ia potana eai, Heleni, eo Roma, eo Heberu arinadi, si ene, "IA EDE TEINA TA IUDEA EDI WASAWASA."

Tau aiyahari nuana i bui

Mt. 27.44; Mk. 15.32

39 Tau baaea esau wa, se heabasi wa, Iesu i riba baaeaei, i ene, "Ena oa Keriso u hemauidi, eo ai taumai labui hinage u hemauidi." 40 Ana sagu wa arinana i heuio i ribasuui, i ene, "Eaubada nige u matausiei, eda mate esega ta hearo ta? 41 Ita ta mate i lolo; eda laulau maisana ia ede: teina tau ta nige ena baaea." 42 I ribalau Iesu arinai, i ene, "Guiau e, oa u laoma em basileia u abi abo u nuatui." 43 Iesu i ribalau ia arinai, i ene, "Mamohoi, ea ribalaowa arim eai, wau ta oa abo maegu paradaiso eai."

44 Huia wa doha mahana haligigi-esegana, eo tanoubu i masigirigudui ie lau e mahana haligigi-hasina eai. 45 Mahana i wahuwahuhuri, eo numa tabuna woona duaduari eai i tapurisi-helabuini.

Iesu earuana i torehebiga

Mt. 27.50; Mk. 15.37; Io. 19.30

46 Iesu abo ie eaba ma arina lailaina, i ene, "Tamagu e, earu-ga ta ea leawa oa nimam eai". Ena ribariba nei doha, abo i

tubahai. ⁴⁷ Na Senturion wa, wau laulau wa ie ita, Eaubada abo i aihelahui, i ene, “Mamohoi teina ta taulaulaududuraina ede.” ⁴⁸ Tatao gamagamagari se oigogo wa bena se aiewai ginauri wa se itadi, nuapoudi se tubidi, eo se uiouio. ⁴⁹ Ia ehanayao gamagamagari, eo sisine hinage Galilaia eai ia se hemuriwataiyama, eda lohaloha eai se tororo, teina ginauri se itaitalaedi.

Se toretau

Mt. 27.57-61; Mk. 15.42-47; Io. 19.38-42

⁵⁰ Na, tau esau esana Iosepa, sunederi tauna esau, ia tau lolona, eo ena nuatu se dudurai: ⁵¹ (Ia ede sunederi eai wa edi laulau nige i saguidi;) ia Arimataia tauna, ludea edi eanua esau: ia hinage Eaubada ena basileia i bagibagiei. ⁵² Wau tau wa ie lau Pilato arinai, Iesu sinarena i awanorini. ⁵³ Ia sinarena wa i taruhidobeiyama, lulu linen arinai i suma-sumaei, bousa eai ie tore, we’u se eatui wa gudana eai, sora nige tau esau arinai se tore. ⁵⁴ Nei asubenana ne esana ede Abinonoha, sabate hinage i hanahanauma. ⁵⁵ Eo sisine hinage, ia maenayao Galilaia eai se laoma, dobila se lau watai, bousa wa eo sinarena edi abatorena se ita. ⁵⁶ Isi se uio, oeagi panepanedi eo eausi se ginauri nonohaidi; asubena sabate se aiyawasi doha edi laugagaeo wa.

24

Parabole: Iesu Keriso toroiona

Mt. 28.1-6; Mk. 16.1-8; Io. 20.1-17

¹ Na, asubena bagubagunana eai, sora nige mara ie tom, isi se laoma bousa eai, muramura wa se ginauri nonohaidi se ledima, eo hinage headi maedi. ² We’u wa bousa eai se ita se buihaiyao. ³ Isi se lulau, Guiau Iesu sinarena wa nige se lobai. ⁴ Isi nuadi se ponopono ariri, na tatao labui gegesidi eai se totoro adi lulu se namanamari: ⁵ isi ma matausidi, to matadi se durudurudobi tano eai, se ribalau aridi eai, si ene, “Aue saha maumaurina au eoi matematedi boeadi eai?” ⁶ Ia inai nige’e, na i toroo: omi Galilaia sora nige au laugabaei ena riba i ribalaowa arimiu eai au nuatui wa, ⁷ i ene, Tau Natuna abo se moselaie tatao baaea nimadi eai, abo se hesatauro, eo asubena hehaionana eai abo i torouio.” ⁸ Ena riba wa abo se henuaisinidi. ⁹ Bousa eai se uio, teina ginauri gamagaridi saudoudoi-esega se heribadi, eo tatao headiyao hinage. ¹⁰ Ia ede Maria Magadala, eo Ioane, eo Maria, Iamesi sinana, eo sisine headi maediyao, isi teina ginauri gamagaridi aposotolo tauheribadi ede. ¹¹ Edi riba si ene doha piripiridai mo, isi nige se nuatuwataidi. ¹² Petero abo i toro, i aिताutau ie lau bousa eai; ie durudobi nige ginauri esau i ita, lulu linen wa isibom

se torehesuaradi i itadi, abo ie uio, ginauri wa se tubu wa i noonooedi.

¹³ Na, nei asubenana ne adi sasaguyao labui se lau eanua esau esana Emausa, Ierusalemama i laoma eanua wa edana lohana maila haligigi-esega. ¹⁴ Taudi labui edi ribariba paana ede teina ginauri gamagaridi se tubu wa. ¹⁵ Na, isi ma ribaribadi eo ma nuanuatuidi, Iesu iabom i laoma maedi se laulau esega. ¹⁶ Isi matadi nige se lala arinai ia nige se ita lobai. ¹⁷ Ia i ribalau aridi eai, i ene, “Emi ribariba saha ina omi au ribariba ma laulaumi, eo ma nuadubumi hinage?” ¹⁸ Esau, esana Kaleopa, ia arinana i heuio, i ene, “Oa laolaoma tauna mo Ierusalemama eai, ginauri wa nei eai se tubu teina asubenadi eai nige u nuatuidi?” ¹⁹ Ia ie ribalau aridi eai, i ene, “Ginauridi saha?” Isi se heriba si ene, “Iesu, Nasareta tauna, ribana, ia ede peroveta tauna Eaubada matana eai, eo tatao gamagaridi matadi eai, ena laulau eo ena riba se gigibori ariri. ²⁰ Hinage kohena lailaidi eo ada tanuagao ia se moselaei, abo se unuhemate, eo ia se hesatauroyao. ²¹ Na, ai ema nuatu ai ene ia Isaraela abo i hemauidi: hinage ginauri wa se tubu wa i laoma e wau ta asubena hehaionana. ²² Mamohoi, ema pele sisinedi headi hinage se henoonoemai, isi maratomtomi eai se lau bousa eai; ²³ ia sinarena nige se lobai, se laoma, si ene, aneru headi hinage se itadi, isi si ene ia i maurio. ²⁴ Isi headi maemai se mia se lau bousa eai, hinage se ita doha hinage sisine wa se ribaei: ia mo nige se ita.” ²⁵ Ia abo i ribalau isi aridi eai, i ene, “Omi eayauure, eo nuamiu tai se porohe, riba gamagamagaridi peroveta se ribaedi nige au ataiedi: ²⁶ Keriso teina ginauridi taba i hearodi abo i lu ena namanamari eai, e nige’e?” ²⁷ Mose arinai ie tubu, eo peroveta gamagamagaridi, uriuri tabudi gamagamagaridi eai iabom mo ribana i ribahasahasaidi.

²⁸ Eanua wa, arinai se laulau wa, se lage hanahanau: ia ana ao doha i taudaru mo. ²⁹ Isi mo ia se nuahi si ene, “U bawa maemai: paana i maimailahio, asubena i lauo.” Ia i awasae numa eai ie bawa maedi. ³⁰ Na ia ie bawa hatahata eai maedi se aiai, falawa ie abi, eo i aihelahui, eo i ihi, abo i mosei aridi eai. ³¹ Isi matadi abo se lala, ia se italobai, ia matadi eai i tauyamui. ³² Taudi labui edi ribariba si ene, “Nuaboeadia eai se alaalasi, ia dobila eai maeda ta ribariba wa, eo ia buka tabuna i hemasarahadi, e nige’e?” ³³ Nei mahanana eai ne isi se torohai, se uio Ierusalemama, saudoudoi-esega se lobaidi se oigogo esega, eo adi sasaguyao hinage maediyao. ³⁴ Si ene, “Mamohoi, Guiau i toroo i taumasaraha Simona arinai.” ³⁵ Wau dobila eai wa wasana se heriheribadi, eo hinage areto ihina arinai ia se italobai.

³⁶ Ribana sora ma ribaribadi, na Iesu i toro isi boedi eai,

i ribalau aridi eai, i ene, “Loni au abi.” ³⁷ Na isi se matausi ariri, eo se tagugu, edi nuatu si ene earuyarua se ita. ³⁸ Ia i ribalau aridi eai, i ene, “Omi saha au nuadubuei? Hari nuatu, hari nuatu, se saha nuamiu eai se saesae? ³⁹ Nimagu eo aegu au itadi: eau mo ede ina, au abiitagu abo au ita; earua wa nige bulumana eo nige siadana, doha au ita ea abi ta.” ⁴⁰ Ia ie riba ina doha ia nimana eo aena abo i heitadi. ⁴¹ Isi sora nige se awamamohoi paana se kode ariri, eo se noonoei, ia i ribalau aridi eai i ene, “Ami aiiai, e nige’e?” ⁴² Eama se ligauriyao tupona se mosei ia arinai, eo amoamo hinage. ⁴³ Ia ie abi, eo matadi eai i aiiai.

⁴⁴ Ia ie ribalau aridi eai i ene, “Teina riba ta ia ede lahinae wa ea heribamiuo, eau sora nige ea laugabaemiu, ea ’ne, ginauri gamagamagari enagu Mose ena laugagaeo bukana eai, eo peroveta, eo wana eai se uridi abo se hemamohoi.” ⁴⁵ Edi nuatu abo i hemasarahadi, isi bena uriuri tabudi aniodi abo se nuatulobaidi. ⁴⁶ I ribalau aridi eai, i ene, “Ina doha se uriyao, ina doha hinage bena Keriso i amamna, eo asubena hehaionana eai mate eai i torouio; ⁴⁷ ia esana debana eai basileia gamagamagari boeadi eai, nuabui eo baaea ribagigirina abo se lauguguaiei, na Ierusalem eai se hetubu. ⁴⁸ Omi teina ginauridi tauribaribaedi ede. ⁴⁹ Na Tamagu ena ribahesunuma ea hetamariawa ta omi potamiu eai; Ierusalem eanuana eai au bawa i lau e gigibori ewa eai i laoma, abo se leawa.”

Iesu Keriso i seuio

Mk. 16.19-20; A. adi H. 1.9-11

⁵⁰ Ia i woeaidi murimuri eai se lau Betania eai se lage, ia ni-mana i lauisinidi, i aihelahuidi. ⁵¹ Ia ma ribaribahelolodi na i tausuara, eo se abiisini galewa eai. ⁵² Isi ia se aihelahui, abo se uio Ierusalem eai, ma kode ariariridi. ⁵³ Isi numa tabuna eai se oigogo huia gamagamagari, Eaubada se hedebasae eo se aiiahelahui. Amen.

IOANE ENA, EVANELIA

Iesu Keriso ia Eaubada ede

Heb. 1.5-13

¹ Huia bagabaguna eai wa Riba ede, eo Riba wa Eaubada maena, eo Riba wa ia ede Eaubada. ² Ia ede huia bagabaguna eai wa Eaubada maena.

Ana paisoa, sora nige i hemalatau

Heb. 1

³ Ginauri gamagaridi ia tauginauridi ede; ginauri gamagaridi se hetubudi iabom mo tauhetubudi ede. ⁴ Mauri ia aloboeana eai; na mauri wa tatao edi mara ede. ⁵ Marana ie sina masigiri boeana eai; masigirina mara wa i heasaasaei.

Ioane Bapatiso ana paisoa

Mt. 3.1-17; Mk. 1.1-11; Lk. 3.1-23

⁶ Tau esau i laoma, Eaubada i hetamariama: ia esana ede Ioane. ⁷ Ia i loama, tauribahemasarahana, marana wa i hemasaraha, ia arinai abo tatao gamagaridi se nuatudidini. ⁸ Wau marana ia nige'e; i laoma mo bena marana i riba hemasaraha.

Iesu Keriso Marana mamohoi

Io. 8.12; 9.5; 12.46

⁹ Mara tahunuana i laolaoma ede, ia ede tatao gamagaridi tanoubu eai ta i hemaradi. ¹⁰ Ia tanoubu eai ta ie mia; ia tanoubu tauginaurina ede; tanoubu hinage ia nige se nuatui.

Pei labui: nanatunayao eo tauawayagara

1Io. 3.1, 2; 5.11, 12

¹¹ Ia i laoma enanayao mamohoi aridi eai, enanayao mamohoi ia se otaotaei. ¹² Headi ia se awaabiei, arinai i hegigiboridi isi se hemala Eaubada nanatunayao; isi wa ia se sogohididini; ¹³ isi osina eai nige se hetubudi, hinage buluma dobilana eai nige'e; hinage tau nuana eai nige'e; Eaubada iabom i hetubudi.

I hemalatau

Mt. 1.18-23; Lk. 1.30-35; Rom. 1.4

¹⁴ Riba wa abo i hemala buluma, maeda ta miaesega, (ena lolo ai itayao doha Tamana natueseesegana ena lolo), ain-ai, eo riba mamohoina i monau.

Ioane Bapatiso ena ribahemasaraha

Mt. 3.1-17; Mk. 1.1-11; Lk. 3.1-18

¹⁵ Ioane ia i ribahemasaraha, i eogayoga, i ene, "Ia ede nei lahinae ea ribaei wa, 'Esau murigu eai i laoma, ia abo i bagubagunaegu: ia taubagunaegu mamohoina ede.'" ¹⁶ Ia

nuana gigibori i monau, arinai ai gamagarimai enamai ai abi, i ainauia to i ainauia. ¹⁷ Mose laugagaeo i ledima: na ainauia eo riba mamohoina Iesu Keriso i ledima. ¹⁸ Nige sora huia esau tau esau Eaubada ie ita; Natueseesegana Tamana nuapouna eai ie mia, ia mo i hemasaraha.

¹⁹ Ioane ena riba ede ina, Iudea tataodi Ierusalem eai, kohena eo Levi tataodi headi se hetamaridi ia arinai, se hesio, si ene, "Oa ede eai?" ²⁰ Ia abo i ribahemasaraha, nige i harere: i ribamasaraha mo, "Eau ta nige Keriso." ²¹ Se oimuri arinai, si ene, "Oa ede saha? Oa Elia ede?" I ene "Nige'e." "Oa peroveta wa?" I ene "Nige'e." ²² Abo se ribalau ia arinai, si ene, "Oa ede eai? tauhetamarimai se hesio wa abo ai lau ai heribadi. Oa edoha u ribaeuioim?" ²³ I ene, "Eau esau arinana barabara eai i eogayoga, 'Guiiau ena eda au hedudurai,' doha Isaia peroveta i ribaei."

²⁴ Tauhetamaridi wa, isi ede Parisea peledi. ²⁵ Isi se hesiolau ia arinai, si ene, "U ene oa nige Keriso, oa nige Elia, oa nige peroveta esau, ue saha u hebahebapatiso?" ²⁶ Ioane i heribadi i ene, "Eau goila eai ea hebapatiso: esau boeamiu eai i totoro omi nige au ita. ²⁷ Ia ede teina wa murigu eai i laoma, eau nige ea lolo ia aena umna mainana ea eairi." ²⁸ Ina ginauri ta se tubutubu Betania eai, Ioridana hari tehana eai, Ioane ena aba hebahebapatiso.

²⁹ Mara-ie-tom Ioane Iesu i italaei i laoma ia hesabana, i ene, "Au ita, Eaubada ena * Arenio tanoubu edi baeae i abihaidi. ³⁰ Ia ede lahinae ea ribaei wa, ea ene, 'Esau murigu eai i laoma, ia i bagunaegu, ia taubagunaegu mamohoina ede.' ³¹ Eau hinage ia nige ea ita: egu nuatu mo Isaraela eai abo i taumasaraha, paana ede ea laoma ta, goila eai ea hebahebapatiso." ³² Ioane i wasawasaei, i ene, "Eau Earua ea iita galewa eai i dobidobima doha bunebune, i mia ia potana eai. ³³ Ia nige ea nuatui: goila eai ea hebapatisoi ta tauhetamariguma i heribagu i ene, 'Ena Earua u ita i dobima, i taru tau esau potana eai, ia ede Earua Tabuna arinai abo i hebahebapatiso.' ³⁴ Ea itayao, eo ea ribahemasaraha, teina ia Eaubada Natuna ede."

Iesu Keriso ana paisoa i hetubu tatao matadi eai

Io. 1.35-12.50

³⁵ Mara-ie-tom abo hinage Ioane eo ena heaheata labui maena se totoro. ³⁶ I itaitalau Iesu i laulau, i ene, "Au ita, Eaubada ena Arenio!" ³⁷ Heaheata labui wa ena riba se ataiei, Iesu se hemuriwatai. ³⁸ Iesu abo i torobui, i itadi se hemuriwataiyama, ie ribalau isi aridi eai i ene, "Saha au eooi?" Si ene, "Rabi e, (heaheasonina ede doha si ene, Tauheata e),

* 1:29: Mamoe natuna, English: Lamb.

haedi ue mia?" ³⁹ I ribalau isi aridi eai, i ene, "Au laoma au ita." Se lau ena aba mia se ita, nei asubenana ne maedi se mia: paana mahana hesaudoudoina eai. ⁴⁰ Wau taudi labui wa Ioane ena riba se ataiei, eo ia se hemuriwatai wa, esau Anederea, Simona Petero ena tau. ⁴¹ Ia ena tau mamohoi Simona i lobai bagunai, i ribalau ia arinai i ene, "Mesia ai lobaiyao" (heaheasonina ede Keriso). ⁴² Ia i woalaei Iesu arinai. Iesu ia i ita abo i ene, "Oa Simona, Iona natuna? esam abo se torebui Kipasi, heaheasonina ede † Petero."

⁴³ Mara-ie-tom Iesu bena i lau Galilaia eai, ia Pilipo i lobai, i ribalau ia arinai i ene, "U hemuriwataiguma." ⁴⁴ Pilipo Betesaida tauna, Anederea eo Petero edi eanua ede. ⁴⁵ Pilipo Natanaela i lobai, i ribalau ia arinai, i ene, "Ia Mose ena laugagaao eai, eo peroveta se uriuriyao wa, ai lobaiyao, Iesu Nasareta, Iosepa natuna." ⁴⁶ Natanaela i ribalau ia arinai i ene, "Ginauri lolona saha Nasareta eai abo i masaraha wa?" Pilipo i ene, "Hage u laoma u ita." ⁴⁷ Iesu Natanaela ie ita i laolaoma ia arinai, i ene, "Au ita, Isaraela tauna tahunuana nei, ia arinai nige borabora!" ⁴⁸ Natanaela ia i heriba i ene, "Oa haedi u itagu?" Iesu i ribalau ia arinai, i ene, "Pilipo sora nige i eogaim, oa kuhou paana eai wa, ea itamo." ⁴⁹ Natanaela i ribalau ia arinai, i ene, "Rabi e, Oa Eaubada natuna ede; oa Isaraela wasawasana ede." ⁵⁰ Iesu ie ribalau ia arinai, i ene, "Wau ea 'ne kuhou paana eai ea itam wa, arinai u awamamohoiegu ede? Sora ginauri tahutahunuadi abo u itadi." ⁵¹ Ia i ribalau ia arinai, i ene, "Mamohoi, mamohoi, ea heribam ta, sora abo u ita galewa i taigari, Eaubada ena aneru se sae eo se dobima Tau Natuna potana eai."

2

Tawasora Kana eai: laulau gigibori bagubaguna.

¹ Asubena hehaionana eai, Kana Galilaia eai, tawasora mataasina se mataasi: Iesu sinana hinage nei eai: ² Iesu maena heaheatayao hinage se eogaidi, nei tawasora eai ne. ³ Na waina ie ohi, Iesu sinana ia i heriba i ene, "Nige adi waina." ⁴ Iesu ia i heriba, i ene, "Sine e, saha abo u abi arigu eai? Egu huia sora nige i lagema." ⁵ Sinana tau heaheari i heribadi, i ene, "Ena saha eo saha i heribamiu, au ginauridi." ⁶ We'u ledudi haligigi-esega se hebawadi, Iudea tataodi edi aba heaa laulauna, lailaidi headi nonoi labui, headi nonoi haiona. ⁷ Iesu i heribadi, i ene, "Ledu goila eai au inihemonaudi." Se inihemonauboriboriridi. ⁸ Ia i heribadi, i ene, "Abo au eai, au laei mataasi tanuagana arinai." Isi abo se laei. ⁹ Mataasi tanuagana goila i hemala waina wa i nom-ita, edi aba eaina nige ie ita, (taupaisoa goila tau eaina mo se

† 1:42: we'u-tau

ita) mataasi tanuagana tautawasora abo i eogai. ¹⁰ I heriba, i ene, “Tatao gamagaridi waina lolona se hegoiauri nonohai: tatao se nomnomdaoi abo waina esau se hegoi, amnana udoi: oa waina lolona u mahihiei, e aboina u hemasaraha ta.” ¹¹ Heiheinoi gigiboridi Iesu i hetubumugaiedi Kana Galilaia eai, arinai ia lolona i hemasaraha: ena heaheatayao ia se awamamohoiei.

¹² Wau wa murina eai abo ie dobi Kaperenauma eai ia eo, sinana eo, ena tataoyao eo, ena heaheatayao: nei eai se mia asubena eseesejadi.

Pasova bagubaguna

Io. 13.23; Io. 6.4; 11.55

¹³ Iudea adi pasova i hanahanaumao, Iesu abo ie sae Ierusalem eai. ¹⁴ Dubu tabuna alona eai bulumakau eo, mamoe eo, bunebune tauunedi i lobaidi: eo moni tauheduhedududi hinage se bawa. ¹⁵ Ia maina gagiridi i abidi pidi-pidiri i audi abo numa tabuna alona eai i aiduiedi murimuri eai, eo mamoe, eo bulumakau hinage, eo moni-tauheduhe-dududi edi moni i hegoigabaedi, eo edi hatahata i ahalabuidi. ¹⁶ Bunebune tau uneunedi i heribadi i ene, “Teina ginauri au uioidi: Tamagu ena numa tabu bena au abi i hemala emi aba uneune.” ¹⁷ Ena heaheatayao uriuri wa nuadi ie sae, doha si ene, “Em numa nuagigiborina nuagu ie gabu.” ¹⁸ Iudea tataodi abo se ribalau ia arinai, si ene, “Heiheinoina saha u heitamai, ina laulau ta u laulauei?” ¹⁹ Iesu i heuioidi, i ene, “Numa tabuna ta au lopagorigori, asubena haiona abo ea heterouioi.” ²⁰ Abo Iudea tataodi si ene, “Ina dubu tabuna ta borimai tatao-labui-si-mate-haligigiesega se ginaginauri: bena asubena haiona mo oa abo u hetoro wa?” ²¹ Doha tauna ia ede numa tabunana i ribaei. ²² Huia murina eai, mate eai i torouio, riba wa i heribadi wa ena heaheatayao se henuaisini, eo uriuri tabuna se awamamohoiei, eo riba wa Iesu i ribaei.

²³ Pasova mataasina huiana eai, Iesu ie lau Ierusalem, nei eai tatao gamagaridi ia esana se awamamohoiei, paana heiheinoi gamagaridi se itadi; ²⁴ na Iesu nuana nige i lauedi, paana ede tatao gamagaridi i nuatulobaidio; ²⁵ nige esau bena tatao nuadi Iesu i heita, paana tau nuana ia abina i atao.

3

Iesu maena Nikodemo: laba harihariu

¹ Parisea tauna esau, esana ede Nikodemo, Iudea tataodi, adi tanuaga esau. ² Maiona esau eai ie lau Iesu arinai, i ribalau, i ene, “Rabi e, ai itayao oa hetabu tauna Eaubada arinai u laoma: paana teina laulau gigiboridi u laulauedi wa, nige tau esau i ginauridi, Eaubada mo maena.” ³ Iesu i ribalau ia arinai i ene, “Mamohoi, mamohoi, ea heribam

ta, ena tau nige se labasiuioi, Eaubada ena basileia taba nige i ita.”⁴ Nikodemo ia i heriba i ene, “Taba tau edoha edi labalabasiuioina ena ia i tautaubadao? Ia abo i luuio sinana bogana eai, abo i labauioi?”⁵ Iesu i ribalau i ene, “Mamohoi, mamohoi, ea heribam ta, ena nige se laba goila eai, eo Earua arinai, taba nige i lusora Eaubada ena basileia eai.”⁶ Ginauri buluma eai se labasi buluma ede; ginauri Earua eai se labasi earua ede.⁷ Tabu aruam i loi wau ea heribam wa ea ’ne, “Taba se labasiuioimiu.”⁸ Mana i toatoa gaibu, easasana u ataiei, ena aba laoma, eo ena aba lau nige u ita: tau esau, tau esau Earua eai se labasidi doha ede.”⁹ Nikodemo ie ribalau ia arinai i ene, “Teina ginauri ta edoha edi abiabidi?”¹⁰ Iesu ia i heriba i ene, “Oa Isaraela adi tanuga esau ina ginauridi ta nige u nuatuidi wa?”¹¹ Mamohoi, mamohoi, ea heribam ta, ginauri ai nuatuidio ia ede ai ribaedi ta, eo ginauri hinage ai itadio ai hemasarahadi: ema ribahemasaraha nige au ataiei.¹² Taba tanoubu ribadi ea heribamiu nige au nuatuidi: abo edoha emi nuanuatuina taba galewa ribadi ea heribamiu?¹³ Nige tau esau i awasae galewa eai, iabom mo galewa eai i dobima, iaede Tau Natuna.¹⁴ Doha hinage Mose mota i ueisini barabara eai wa, doha ede Tau Natuna taba hinage se ueisini.¹⁵ Eai to eai ia se nuatui nige se mate, na mauri nige nosina abo se abi.

¹⁶ “Eaubada tanoubu i gadosisiedi doha ede ina, ia Natueeseegana i moseyao tau esa, tau esa ia i nuatui taba nige i mate, na abo i mauri nige nosina.¹⁷ Eaubada, Natuna nige i hetamariama tanoubu eai ta, bena tanoubu i hegiru: na ena nuatu mo bena tanoubu i tuahemaui.¹⁸ Tau esau ia i sunusunumaei nige se hegiru: ia nige i sunumaei se hegiru nonohaiyao paana ede Eaubada Natueeseegana esana nige i nuatui.¹⁹ Hegeruna wa, ia ede ina, marana i lagemao tanoubu eai ta, tatao masigiri gadohina se gadohi, marana wa nige se henua, paana ede edi laulau se baaea mo.²⁰ Tatao gamagaridi edi laulau se baaea marana se halanuiniuie, eo nige se laoma marana eai, edi laulau ata se hemasarahadi.²¹ Ena tau esau riba mamohoi laulauna i laulauedi, ia marana eai i laoma, ena laulau abo se masaraha, paana ede Eaubada maena.”

Ioane Bapatiso ena aba ribalautom.

²² Ina ginauri ta muridi eai Iesu ena heaheata maenayao se lau Iudea oana eai; nei eai maedi se mia, eo se hebahebatiso.²³ Ioane hinage i hebapatiso Enona eai Salima hanahanauna eai, paana goila lailai nei eai; tatao se laolaoma arinai se hebapatisoidi.²⁴ Ioane sora numa masigiri eai nige se tutugudui.

²⁵ Ioane ena heaheatayao headi maedi Iudea tauna esau edi hea laulauna se haiawayagaraei. ²⁶ Abo se laoma Ioane arinai se heriba, si ene, “Rabi e, lahinae tau wa maem Ioridana hari teha eai, ia u wasaduaiei wa, ia ede i bapatiso eo tatao gamagaridi se laoma ia arinai.” ²⁷ Ioane i heribadi, i ene, “Nige tau esau ginauri i abigaibui, galewa eai mo se mosei abo i abi. ²⁸ Omi au nuatui lahinae ea riba hemasarahago, ea ‘ne, ‘Eau nige Keriso, eau se hetamarigu ia ea bagubagunaei.’ ²⁹ Ia sinetawasora ie abi ia ede tautawasora: tautawasora ena heriam i totoro, eo arinana i ataiei, ie kode ariri paana ede tautawasora arinana i ataiei: egu kode teina arinai se hemamohoei. ³⁰ Ia abo ie sae, eau abo ea dobidobi.”

³¹ Ia ewa eai i dobima gamagaridi i saetawatawaidi: tanoubu tauna tanoubu ginaurina ede, ena riba tanoubu ribana: ia galewa eai i dobima isi gamagaridi i saetawatawaidi. ³² Ginauri i itadi wa eo i ataiedi wa, i ribahemasarahadi: ena riba nige tau esau i abi. ³³ Tau esau ia ena riba i ataiei, i nuatulobai Eaubada mamohoi mo ede. ³⁴ Ia Eaubada i hetamariama Eaubada ena riba i ribaedi; paana ede Earua i mosegabaei, nige i nuahi. ³⁵ Tamana, Natuna i gadosisie, ginauri gamagaridi i mosedi ia nimana eai. ³⁶ Ia Natuna taunuatudidinina mauri nige nosina abo i abi, ia Natuna nige i sunumaei mauri taba nige i ita; Eaubada ena ouyalayala i ota ia potana eai.

4

Iesu i laoma Galilaia eai.

¹ Guiau i nuatuiyao Parisea tataodi wasana se ataiei Iesu heaheata moutuadi i hebapatisoidi, Ioane enana hisahisawaidi. ² (Iesu nige i hebapatiso, ena heaheata mo). ³ Ia abo Iudea i laugabaei ie uio Galilaia. ⁴ Ia abo ie dio Samaria eai. ⁵ I lau e, i lagema eanua esau Samaria eai, esana ede Saeka, tano wa Iakobo i mosei natuna Iosepa arinai, hanahanauna eai. ⁶ Iakobo ana goila huana nei eai. Iesu ena tautausi eai e tauna se beruberu, arinai i bawabigabiga goila hasarina eai. Huiana ne mahana haligigi-esega.

Iesu maena Samaria sinena.

⁷ Samaria sinena esau i laoma goila ie ledu: Iesu i ribalau ia arinai i ene, “Goila u leama, ea nom.” ⁸ (Ia ena heaheata se lauo eanua eai, aiai adi se uneune). ⁹ Samaria sinena wa abo i ribalau ia arinai i ene, “Edoham, oa Iudea tauna, goila u aiboda arigu eai, eau Samaria sinena? Iudea tataodi eo Samaria tataodi se heiheisugara.” ¹⁰ Iesu i ribalau ia arinai, i ene, “Eaubada ena ainauia taba u nuatui, eo eai i heribam me, i ene, ‘Goila u leama ea nom.’ oa abo u aiboda ia arinai eo goila maumaurina abo i leawa.” ¹¹ Sine wa i ribalau ia

arinai i ene, “Taubada e, em ledu nige aba hedawedobena, hua hinage i dobi ariri: wau goila maumaurina wa haedi aba abina ede? ¹² Bena tamamai Iakobo u saetawatawai wa, goila sarana wa ia tauleamana ede, arinai ia i nomnom; eo nanatunayao eo ena suisui hinage?” ¹³ Iesu i ribalau ia arinai i ene, “Eai to eai ina goila ta taba ie nom abo i gadomaguuo. ¹⁴ Eai to eai goila wa eau ea mosei ie nom taba nige i gadomagu, goila wa ea mosei ia arinai, nuaboena eai abo i hemala goila huana i bunubunuasima mauri nige nosina arinai.” ¹⁵ Sine wa i ribalau ia arinai i ene, “Taubada e, wau goila wa u leama, abo nige ea gadomagu, eo abo hinage nige ea laoma eda lohaloha eai goila ea ledu.”

¹⁶ Iesu ia i heriba i ene, “U lau monem u eogaiama, au laoma inai.” ¹⁷ Sine wa i ribalau ia arinai i ene, “Eau nige monegu.” Iesu i ribalau ia arinai i ene, “U riba dudurai u ene ‘Eau nige monegu.’ ¹⁸ Monemyao haligigi u abidio; esau wa maem aue mia ia nige monem, wau em riba wa i dudurai.” ¹⁹ Sine wa i ribalau ia arinai i ene, “Taubada e, nuana oa peroveta. ²⁰ Tubutubumaiyao ina oea tupina eai ta se tabaohu; omi au ene Ierusalematao eda aba tabaohu mamohoina ede.” ²¹ Iesu i ribalau ia arinai i ene, “Sine e, mamohoi, huiana abo i lagema omi ina oea tupina eai ta, Tamana abo nige au tabaohui, eo Ierusalematao eai nige’e. ²² Emi tabaohu omi nige au nuatui: ai ema tabaohu ai nuatuiyao, abihemauri Iudea tataodi aridi eai i laoma. ²³ Huiana abo i lagema, hinage i lagema, tautabaohu tataodi tahunuadi earua eai eo nuatu mamohoina eai Tamana se tabaohui: doha ede nei Tamana tautabaohuina i eoidi. ²⁴ Eaubada Earuana ede: isi ia se tabaohui abo se tabaohui earua eai eo nuatu mamohoina eai.” ²⁵ Sine wa i ribalau ia arinai i ene, “Ea nuatui Mesia abo i lagema, esana ede Keriso: ia i laoma ginauri gamagaridi abo i heribamai.” ²⁶ Iesu ia i heriba i ene, “Eau ede, maem ta ribariba.”

²⁷ Isi ma ribaribadi na ena heaheatayao se lagetawaidi, sine ne maena se ribariba se ita se tagugu, ede nige esau i ene, “Saha u eooi?” eo “Ue saha u ribalau sine ne arinai?” ²⁸ Sine wa ena ledu i laugabaei, ie lau eanua eai, i ribalau tatao aridi eai, ²⁹ i ene, “Au laoma tau esau au ita, egu laulau gamagaridi ea laulauedi wa ia i hemasarahadi arigu eai: ia Keriso e nige’e?” ³⁰ Isi eanua se laugabaei se oigogo se lau ia arinai.

³¹ Isi soradi, ena heaheata se ribaribadaoi, si ene, “Tanuagamai e, u aiai.” ³² Ia i ribalau isi aridi eai i ene, “Agu aiai nonohana, nige au nuatui.” ³³ Arinai abo heaheata wa se heunaboisaha si ene, “Tau esau ana aiai i leama wa?” ³⁴ Iesu i heribadi i ene, “Agu aiai ede ina, tauhetamariguma ena nuatu bena ea abi, eo ana paisoa ea ginauriheohi. ³⁵ Omi

nige au ene, nawalai hasi abo boreboreha huiana wa? Au ita ea heribamiu ta, Matamiu au tusaedi, oead i ne au italaedi, masuri se pogalao. ³⁶ Sitona tautomtomna se hemaisadi, ai ai se peigogo mauri nige nosina arinai, lie tauumaina eo ai ai tauabina isi abo taudi labui se kodelabulabui. ³⁷ Arinai ede riba wa se ribaei riba mamohoina ede, 'Esau i umauma, esau ai ai i abiabi.' ³⁸ Ea hetamarimiu aiaina bena au abi hari tatao adi paisoa wa se umaiyao, adi paisoa au helaudamai."

³⁹ Samaria tataodi gamagaridi nei eanua eai ne ia se atai-watai sine wa ena riba eai, i ribahemasaraha wa, i ene, "Egu laulau gamagaridi ea laulauedi i ribahemasarahadi arigu eai." ⁴⁰ Samaria tataodi se lagema se ribagadogadora ia arinai bena i mia, arinai asubena labui aridi eai ie mia. ⁴¹ Ia ena riba arinai abo gamagaridi se sunusunumaei. ⁴² Isi se ribalau sine wa arinai, si ene, "Ai abo ai sunumaei hedeomi oa nige em riba arinai, ia hinage ai itayao eo ai nuatuiyao ia Keriso, tanoubu Tauhemaui mamohoina ede."

⁴³ Asubena labui wa i miaedi abo i laugabaedi ie lau Galilaia. ⁴⁴ Iesu i ribahemasaraha i ene, "Peroveta tauna nige se heasisiei ena eanua mamohoina eai." ⁴⁵ Ia abo ie lage Galilaia eai, Galilaia tataodi ia se taubigai, paana ede ginauri gamagaridi i hetubudi Ierusalemataasina eai isi se itadio: isi hinage se lau mataasi eai wa.

Wasawasa natuna-tau i hemaui.

⁴⁶ Arinai abo Iesu ie uio Kana Galilaia eai, lahinae nei eai goila ena aba hemala waina wa. Wasawasa esau Kapere-nauma eai natuna-tau i asiebo. ⁴⁷ Tau wa wasa i ataiei Iesu Iudea i laugabaei i laoma Galilaia eai, ie lau Iesu arinai i awanori bena i dobi ia natuna-tau i hemaui: ia matena i hanahanau. ⁴⁸ Iesu i ribalau ia arinai i ene, "Taba heiheinoidi eo gigiboridi nige au itadi taba nige au sunusunumaei." ⁴⁹ Wasawasa wa ia i heriba i ene, "Taubada e, u dobima natugu ata i mate." ⁵⁰ Iesu ia i heriba i ene, "U dobi; natum wa i maurio." Tau wa Iesu ena riba i sunumaei, to ie lau. ⁵¹ Ia dobila eai, ma launa, ena heaheari maenayao se hailobai, ia se heriba si ene, "Natum wa i maurio." ⁵² Ia abo i hesio aridi eai i ene mahana hisa i hetubu i lolo. Isi si ene, "Lahi mahana haligigilabui arinai gigiborina i lautom." ⁵³ Arinai tamana i nuatuiyao ia ede huiana wa Iesu ia i heriba i ene, "Natum i maurio;" tau wa abo i sunusunumaei, maena numa tataodi gamagaridi hinage. ⁵⁴ Gigibori heiheinoina helabuina ede ina Iesu i ginauri, huia ne ia Iudea i laugabaei i laoma Galilaia eai.

5

Beteseda goilana.

¹ Ina ta murina eai abo Iudea tataodi se mataasi; to Iesu ie sae Ierusalem. ² Goila esau Ierusalem eai, mamoe edi aba sorasora hasarina eai, Heberu arinadi si ene Beteseda, sorasorana haligigi. ³ Sorasoradi wa alodi eai tauasiasiebo tataodi gamagaridi arinai se ota; tatao matagibubudi eo, tatao laulaudaedi eo tatao taudi se matemate, goila wa tabutabubuna se bagibagiei. ⁴ Huia headi, Guiau ena aneru esau i gaeopesadobi ipuna eai, goila wa abo i hetabutabubu; goila wa i tabutabubu wa, tau esau i daladobi baguna i aiduidui, ana iwala saha abo se lautom. ⁵ Tau esau nei eai borimai tau-imate-saudoudoi-haligigi-haiona i aiiwala. ⁶ Iesu tau wa i ita ie ota, i nuatuiyao ana iwala huiana ie loha, i ribalau ia arinai i ene, “U henua bena se hemaaurim?” ⁷ Tauaiiwala wa, ia i heuio i ene, “Taubada e, goila wa ma tabutabubuna eau nige tauhesosoaeu abo i laegu ipuna eai, ma laugu na esau i aiduibaguna.” ⁸ Iesu ia i heriba i ene, “U torohai em eba u abidi, u lau.” ⁹ Arinai abo tau wa ana iwala i tatapesa, ena eba i launou abo ie lau.

Nei huiana ne Sabati. ¹⁰ Iudea tataodi se ribalau tau se hemaauri wa arinai, si ene, “Wau Sabati ina: em aba-eno u baheidi arinai laugagaeo u utusi.” ¹¹ Ia i ribalau isi aridi eai i ene, “Tauhemaaurigu i ene, ‘Em eba u abidi, u lau.’” ¹² Isi se oimurilau ia arinai si ene, “Aitea tau i heribam i ene, ‘Em eba u abidi, u lau?’” ¹³ Tau se hemaauri wa tauhemaaurina nige i nuatui: na Iesu i lausuarao, paana ede moutuadi nei eai. ¹⁴ Abotai Iesu tau wa numa tabuna alona eai i lobai, to i ribalau ia arinai i ene, “Hage! oa se helolom wa: baaea tabu u abiuioi, ata ginauri baabaaea ariri se hearom.” ¹⁵ Tau wa abo ie lau Iudea tataodi i heribadi, i ene, “Tauhemaaurigu ede Iesu.” ¹⁶ Arinai Iudea tataodi Iesu bena se heamamna, eo se eooi bena si unui, paana ede teina laulau ta Sabati eai i laulauei. ¹⁷ Iesu i heribadi i ene, “Tamagu i paipaisoa, eau hinage ea paisoa ta.” ¹⁸ Arinai Iudea tataodi se eoodaoi ia bena se unui, paana ede Sabati laugagaeona i utusi, eo paana hinage i ene Eaubada ia Tamana ede, doha hinage i ene ia eo Eaubada gonogonoadi.

¹⁹ Arinai Iesu i ribalau aridi eai i ene, “Mamohoi, mamohoi, ea heribamiu ta, Natuna iabom taba nige saha abina i ata i ginauri, Tamana ana paisoa ie ita meta mo abina i ata: eo ginauri gamagaridi Tamana i ginauridi doha ede Natuna i ginauridi hinage. ²⁰ Tamana, Natuna i gadosisie, ginauri gamagaridi ia i ginauridi ia i heita: hinage ginauri se gigibori ariri abo ia i heita bena abo au nooedi. ²¹ Doha Tamana tatao se mate i hetorouioidi eo i hemaauridi, Natuna hinage headi i henua abo i hemaauridi. ²² Tamana nige tau esau i hedudurai, hedudurai gamagaridi i moselaei Natuna

arinai. ²³ Bena tatao gamagaridi abo Natuna se heasisiei doha hinage Tamana se heasisiei. Esau Natuna nige i heasisiei, ia Tamana, tauhetamariamana nige i heasisiei hinage. ²⁴ Mamohoi, mamohoi, ea heribamiu ta, egu riba tauataiena, eo ia tauhetamariguma hinage i sunusunumaei, mauri nige nosina i abiyao, eo ia taba nige se hemaisa, ia mate i diogabaei, ie lage mauri eai.

²⁵ “Mamohoi, mamohoi, ea heribamiu ta, huiana i lagema, hinage i lagema, taumatemate tataodi Eaubada Natuna arinana abo se ataiei; isi hinage tauataiena abo se mauri.

²⁶ Doha ede Tamana ena mauri i abi ia boeana eai, i moseheawa Natuna arinai, hinage ia mauri i abi ia boeana eai; ²⁷ ia hinage i hetoro ma gigiborina ia tauhedudurai, paana ia Tau Natunamohoina ede. ²⁸ Ina ta tabu au nooei: huiana abo i lagema isi gamagaridi bousa eai arinana abo se ataiei. ²⁹ Abo se lulagema; isi laulaulolo-tauabina mauri torouiona eai abo se torouio; isi laulaubaeae-tauabina baeae torouiona eai se torouio.

³⁰ “Eaubom mo egu gigibori eai taba nige saha ea ginauri; taba riba ea ataiei ea hedudurai, egu hedudurai hinage i dudurai; paana eau nige egu gadosisi ea eooi, Tamana, Tauhetamariguma, ena gadosisi ea eooi. ³¹ Taba eaubom ea ribahemasarahauioigu mo egu ribahemasarahana taba nige riba mamohoina. ³² Esau mo ia tauribahemasarahagu ede; ea nuatui ribana arinai i ribahemasarahagu riba mamohoina ede.

Ginauri hasi Iesu se hemasarahā: (1) Ioane bapatiso.

³³ “Au lauhetamari wa Ioane arinai, riba mamohoina i ribahemasarahā. ³⁴ Tatao edi riba nige ea nuatuidi; teina ginauri ea heribamiu ta aridi eai bena au mauri. ³⁵ Ioane doha lamepa i alaalasi i balebalelem: omi huiana wa aue kode ia marana eai.

(2) Paisoa.

³⁶ “Na esau i ribahemasarahagu ia Ioane i saetawatawai: paisoa Tamana i ledima arigu eai bena ea ginauriheohidi, paisoa wa ia ede ea ginaginauridi se ribahemasarahagu Tamana i hetamarigu ede.

(3) Tamana

Mt. 3.17

³⁷ “Tamana, tauhetamariguma, i ribahemasarahagu hinage. Nige huia esau ia arinana au ataiei, eo ana ao hinage nige au ita. ³⁸ Ia ena riba nige i miatahitahi nuamiu eai, paana ia i hetamariama wa omi nige au ataiei.

(4) Uriuri Tabudi

Lk. 24.27, 44-46

³⁹ “Uriuri tabudi au eooidi; paana emi nuatu au ene boeadi eai mauri nige nosina au abi, na isi se riba hemasarahagu ede. ⁴⁰ Omi nige au henua au laoma arigu eai, mauri nige nosina au abi. ⁴¹ Tatao edi hedebasae taba nige ea lauwaitai. ⁴² Ea itamiuo, Eaubada ena gadosisi nige i ota nuamiu eai. ⁴³ Ea laoma ta Tamagu esana eai, omi nige au oiyamigu: taba esau i laoma iabom esana i ataiuioi, ia abo au oiyami. ⁴⁴ Omi edoha emi sunusunumaena, omibom au haihedebasaeuioimiu, eo hedebasae mamohoina, Eaubada mo arinai i laoma, nige au eooi? ⁴⁵ Tabu au ene, Tamana matana eai abo ea hegirumiu, esau tauhegirumiu ede, Mose emi aba sunuma tauna wa. ⁴⁶ Taba Mose au sunumaei eau hinage abo au sunumaegu; paana ede i uri hemasarahagu. ⁴⁷ Taba ia ena uriuri nige au nuatuidi, eau egu riba edoha emi abasunumaedi?”

6

Tausani haligigi se heaidi

Mt. 14.13-21; Mk. 6.32-44; Lk. 9.10-17

¹ Ina ginauri ta muridi eai Iesu abo i awasi Galilaia gabogabona eai, gabogabo wa esana ede Tiberia. ² Moutuana lailai ia se hemuriwaitai, paana ede heiheinoi gigiboridi i ginauridi tauasiasiebo aridi eai, se itadio. ³ Iesu i dalasae oea esau deba pogana eai maena heaheatayao se bawa. ⁴ Pasova, Iudea adi mataasi esau, i hanahanau. ⁵ Iesu abo matana i tusaei, moutuana lailai i itadi se laolaoma ia arinai, to i ribalau Pilipo arinai, i ene, “Haedi falawa aba uneunena isi abo se aiai?” ⁶ Ia nei doha ena ribariba Pilipo i lauita ena nuatu bena i italobai, iabom ena laulau bena i abi i nuatuiyao. ⁷ Pilipo i ribalau ia arinai i ene, “Denari handere labui arinai taba falawa ta uneune taba nige ta hegonoahidi abo se heonabegana mo.” ⁸ Heaheata esau Anederea, Simona Petero ena tau, i ribalau ia arinai i ene, ⁹ “Gama esau inai, *barley* falawana haligigi i abidi, eo eama gagiridi labui, abo ta sahaidi, tatao se gamagari ariri?” ¹⁰ Iesu i ene, “Tatao au hebawabigabigadi.” Lei lailai nei dimo eai ne. Tatao abo se bawabigabiga, isi nuana tausani haligigi. ¹¹ Iesu falawa i abidi, i lautoi nonohai, abo i mosei heaheata aridi eai, heaheata hinage abo se soi wau tatao se bawabigabiga wa aridi eai; wau eama wa hinage doha, gonogonoadi. ¹² Se ai e bogadi se sese, Iesu abo i ribalau ena heaheata aridi eai, i ene, “Aiai otahaidi wa au peigogoi tabu begana au gabaei.” ¹³ Arinai abo se peigogoidi, *barley* falawana haligigi wa, otahaidi bosa saudoudoi-labui se hemonaudi, tatao se aiai e, aitoredi wa se toredi. ¹⁴ Teina tatao ta heiheinoi gigibori wa Iesu i ginauri se ita, si ene, “Mamohoi, Peroveta se ribaei wa ia ede ina: i lagemao tanoubu eai ta.”

Iesu gabogabo potana eai i laulau

Mt. 14.22-36; Mk. 6.45-56

¹⁵ Iesu i italobaidio isi edi adidiri eai mo ia bena se toai, abo se hedebasaei edi wasawasa, ia abo i lausuara, ie lau oea tupina esau eai, iabom.

¹⁶ I maimailahi ena heaheata se dobi gabogabo eai. ¹⁷ Waga esau eai se gerusae, gabogabo se tataawasi se lau Kapere-nauma tehana eai. I masigirigudui, Iesu sora nige i laoma aridi eai. ¹⁸ Mana lillai abo ie toa, arinai gabogabo i wowori. ¹⁹ Isi abo se eare e, doha maila haiona e hasi abotai abo Iesu se ita, gabogabo potana eai i laulau: i hanahanauidi abo se matausi. ²⁰ Ie ribalau isi aridi eai i ene, "Eau ede, tabu au matausi." ²¹ Ma nualolodi ia se abi waga eai; arinai waga wa ie duna edi aba lau wa geregerena eai.

Mauri aretona riba saesaena.

²² Mara-ie-tom moutuadi wa se totoro hari sana awasi eai, se ita nige waga esau metai, esega mo ede arinai heaheatayao wa se geru, hinage se ita Iesu maedi nige se lau waga eai, isibom mo se lau: ²³ (Taiede waga headi Tiberia eai se laoma se duna falawa edi aba aina eai wa, Guiau i lautoi wa murina eai). ²⁴ Moutuadi wa Iesu nei eai nige se ita, eo ena heaheatayao hinage nige se itadi, isi hinage edi waga eai se geru, se laoma Kaperenauma, Iesu se eooi.

²⁵ Abo se lobai hari sana awasi eai, ia se heriba, si ene, "Rabi e, huia esana u laoma inai?" ²⁶ Iesu ie ribalau isi aridi eai i ene, "Mamohoi, mamohoi, ea heribamiu ta, omi au eooigu ta heiheinoidi au itadi wa nige au nuatuidi, na paana ede falawa au aidi wa, eo bogamiu se sese hinage." ²⁷ Tabu au paisoa aiai posaposana bena au abi, na au paisoa aiai mia-tahitahina i lau e mauri nige nosina, au abi. Ia ede Tau Natuna abo i leawa, ia arinai Tamana, Eaubada, heiheinoina i toreyao." ²⁸ Isi ia se heriba si ene, "Saha abo ai abi Eaubada ana paisoa abo ai paisoaei?" ²⁹ Iesu ie ribalau isi aridi eai i ene, "Eaubada ana paisoa ede ina, ia i hetamariama au sunusunumaei." ³⁰ Isi ia se heriba si ene, "Heiheinoi saha hage u heitamai abo ai ita abo ai sunusunumaei? Saha abo u ginauri?" ³¹ Tamamaiyao barabara eai *manna* se ai wa; doha se uri, si ene, 'Galewa aretona i mosedi se ai.' ³² Iesu abo i ribalau isi aridi eai, i ene, dobima wa, Mose nige i leawa: areto tahunuana Tamagu "Mamohoi, mamohoi, ea heribamiu ta, areto galewa eai i ami i leawa, galewa eai i laoma, ³³ Eaubada ana areto ia ede galewa eai i dobima, mauri hinage i mosei tanoubu aridi eai." ³⁴ Isi abo se ribalau ia arinai, si ene, "Guiiau e, wau areto wa, ama, u leama i lau e miamiana."

³⁵ Iesu i heribadi i ene, “Eau mauri aretona ede: esau i laoma arigu eai taba nige i guriam, eo esau i sunumaegu, taba nige i gadomagu. ³⁶ Ea heribamiu wa ea ’ne, omi hinage au itagu, eo nige au sunumaegu. ³⁷ Isi gamagaridi Tamana i ledima arigu eai, abo se laoma arigu eai; ia hinage i laoma arigu eai taba nige ea duiduiei. ³⁸ Galewa eai ea pesama nige eaubom egu gadosisi bena ea abi, tauhetamariguma mo ena gadosisi bena ea abi. ³⁹ Tamana tauhetamariguma ena gadosisi ede ina, isi gamagaridi i ledima arigu eai tabu esau ea hebeu, na asubena murina eai abo ea heterouioi. ⁴⁰ Ia i hetamariguma wa ena gadosisi ede ina, isi gamagaridi taba esa esa Natuna i ita, eo ia i sunumaei, mauri nige nosina abo i abi; asubena murina eai ia abo ea heterouioi.”

⁴¹ Iudea tataodi ia abo se monunuei paana ede i ene, “Eau areto galewa eai i dobima wa.” ⁴² Abo si ene, “Teina ta Iesu, e nige’e, Iosepa natuna, tamana, sinana ta nuatuidio? Edoha ena ribariba i ene, ‘Galewa eai ea dobima?’ ” ⁴³ Arinai abo Iesu i ribalau isi aridi eai i ene, “Tabu au monumounuuioimiu. ⁴⁴ Nige tau esau i laugaibuma mo arigu eai, Tamana tauhetamariguma mo ia i niuriyama; asubena murina eai hinage abo ea heterouioi. ⁴⁵ Peroveta edi buka eai se uri si ene, ‘Isi gamagaridi Eaubada abo i heatadi.’ Tatao gamagaridi, esau, esau se ataiei, eo Tamana i heatadi, se laoma arigu eai. ⁴⁶ Nige tau esau Tamana ie ita, iabom mo Eaubada arinai i laoma, ia Tamana i itayao. ⁴⁷ Mamohoi, mamohoi, ea heribamiu ta, ia i sunumaegu mauri nige nosina i abiyao. ⁴⁸ Eau wa mauri aretona ede. ⁴⁹ Tamamiuyao barabara eai *manna* se ai, eo se mateo. ⁵⁰ Ina areto ta galewa eai i dobima, ena tau esau i ai taba nige i mate. ⁵¹ Eau areto maumaurina galewa eai i dobima: taba tau esau ina areto ta i ai abo i mauri nige nosina: areto eau abo ea mosei ta bulumagu ede, ia ede abo ea mosei tanoubu edi aba mauri.”

⁵² Arinai Iudea tataodi isibom se haiawayagara, si ene, “Ina tau ta edohana, abo bulumana i leama ta ai wa?” ⁵³ Iesu abo i ribalau isi aridi eai i ene, “Mamohoi, mamohoi, ea heribamiu ta, taba Tau Natuna bulumana nige au ai, eo osinana nige au nom, taba nige mauri nuaboeamiu eai. ⁵⁴ Ia bulumagu i ai, eo osinagu i nom, i mauri nige nosina, asubena murina eai hinage abo ea heterouioi. ⁵⁵ Bulumagu aiai mamohoi ede, eo osinagu nomnom mamohoi ede. ⁵⁶ Ia bulumagu i ai, eo osinagu i nom, nuaboeagu eai i mia, eo nuaboeana eai ea mia. ⁵⁷ Doha Tamana maumaurina i hetamariguma, eo Tamana debana eai ea mauri; tau esau hinage bulumagu ta i ai, ia debagu eai abo i mauri.” ⁵⁸ Ina areto ta galewa eai i dobima; nige doha tamamiuyao *manna* se ai wa, eo se mate; ina areto

ta tauaina taba i mauri nige nosina.”⁵⁹ Ina ginauri ta sunago alona eai i ribaedi, Kaperenauma eai i lauheataedi.

*Ena lauheata arinai ena heaheata headi se lautom
Mt. 8.19-22; Mt. 10.36*

⁶⁰ Ena heaheata gamagari headi riba ta se ataiei si ene, “Riba ta i piripiri ariri; eai abo i ataiei?”⁶¹ Ena heaheata ina riba ta se monumonunuei Iesu i nuatulobaiyao, i ribalau isi aridi eai i ene, “Ina riba ta i healabesibesimiu wa?⁶² Edoha emi nuanuatu Tau Natuna ena au ita i awaseuio ena aba mia bagubagunana eai?⁶³ Earuana ede i abihemaurimiu; buluma nige aniona: riba ea heribamiu ta earua ede, eo mauri ede.⁶⁴ Taiede omi headi nige au sunusunumaei.” Iesu ena huia lage eai i nuatuiyao eai to eai nige se sunusunumaei, eo eai hinage abo i mauri eo eai abo i morui ede.⁶⁵ Ia hinage i ene, “Paana ede ina ea heribamiu ta ea ’ne, nige tau esau i laugaibuma mo arigu eai, Tamana iabom mo i heatanonohaiyao.”⁶⁶ Nei huiana ne ena heaheata gamagaridi headi se uio, ia nige se hemuriwatai.

*Petero ena sunuma i wasawasaei
Mt. 16.13-20; Mk. 7.27-30; Lk. 9.18-21*

⁶⁷ Iesu saudoudoi-labui i heribadi, i ene, “Omi hinage abo au lausuaara wa?”⁶⁸ Simona Petero i ribalau i ene, “Guiau e, abo ai lau eai arinai? Mauri nige nosina ribana oa ede arim eai.⁶⁹ Ai sunumaei eo ai nuatuiyao, ai ene oa Keriso ede, Eaubada maumaurina Natuna.”⁷⁰ Iesu i heribadi i ene, “Omi saudoudoi-labui ea ribahinehinerimiu wa, hinage omi esau i hemala diaboloo?”⁷¹ Ia ede i ribaei wa, Iuda Isakariota, Simona natuna, ia abo Iesu taumoruina, ia hesaudoudoilabuidi wa esau.

7

*Iesu se heriba bena i sae mataasi arinai.
Lk. 9.51-62*

¹ Teina ginauri ta muridi eai, Iesu Galilaia eai i tautausi; na nige i tautausi Iudea eai paana Iudea tataodi ia bena se unui. ² Iudea adi mataasi esau go’u numadi mataasina i hanahanau. ³ Arinai ede ena tataoyao se ribalau ia arinai si ene, “Dimo ta u laugabaei u lau Iudea, am paisoa wa u abidi em heaheata hinage abo se itadi. ⁴ Taba tau i henua ia i hemasarahauioi ginauri nige i ginauri-yamuyamui. Ena ginauri u ginauridi u hemasaraham, tanoubu abo se itam.”⁵ Ena tataoyao hinage ia nige se sunumaei. ⁶ Iesu abo i ribalau isi aridi eai, i ene, “Egu huia sora nige i lagema: huia gamagamagari ta omi emi huia. ⁷ Tanoubu nige i hewaiunuemiu; eau i hewaiunuegu, paana ede ea ribahemasaraha ta ena abi se baaea. ⁸ Mataasi ne omi au lau arinai: eau sora taba nige ea

sae mataasina arinai paana ede egu huia sora nige i lagema.”
 9 Ina riba ta i heribadi, ia Galilaia eai miana.

Galilaia se laugabaei.

10 Ena tataoyao se laolao'o, abotai abo ia hinage ie sae mataasi arinai; nige i laumasaraha, ilauyamuyamui. 11 Iudea tataodi aba mataasi eai ia abo se eooi, si ene, “Ia haedi?” 12 Tatao ia se monunuei: headi si ene, “Ia tau lolo:” headi si ene, “Nige'e; tatao i boraboraidi.” 13 Taiede nige tau esau riba ne i hemasaraha, paana Iudea tataodi se matausiedi.

Iesu mataasi eai.

14 Mataasi duaduarina eai Iesu i awasae numa uura alona eai, abo i lauheata. 15 Iudea tataodi se nooei si ene, “Ina tau ta sonoga edoha ena abiabina, ia nige se heata?” 16 Iesu i ribalau isi aridi eai i ene, “Riba ta eau nige egu riba, tauhetamariguma ia ena riba ede ina. 17 Ena tau esau Eaubada ena nuatu i abiwatai, riba wa abo i nuatulobai, Eaubada ena riba, e, eaubom enagu ea ribaei. 18 Taba tau esau iabom enana i ribaei, i ribatausaeuioi: ia tauhetamariamana i ribatausaei ia mo i dudurai, taba nige baaea ia arinai. 19 Mose laugagaeo i leawa, e nige'e? Omi arimiu eai nige esau laugagaeo i lauwatai. Aue saha bena au unuigu?” 20 Tatao wa abo se ribalau ia arinai si ene, “Diabolo esau i luim! Eai bena i unuim?” 21 Iesu i ribalau isi aridi eai i ene, “Agu paisoa esega ea ginauri, eo omi gamagarimiu au nooei. 22 Mose peritome i leawa; (hinage nige Mose enana, tamamiuyao enadi;) omi hinage asubena Sabati eai tatao au heperitome. 23 Taba asubena Sabati eai tau esau au heperitome, ata Mose ena laugagaeo au utusi; aue saha au ouyalayalaegu, paana ede asubena Sabati eai tau esau tauna maudoina ea hemaurokoma? 24 Ginauri adi ao mo aridi eai tabu au nonoiedi, nonoi duduraidi eai au nonoiedi.”

25 Ierusalemata tataodi headi si ene, “Ina tau ta ia ede, e nige'e, isi se eooi bena se unui wa? 26 Au ita i riba masaraha, hinage nige riba esau se ribalau ia arinai. Tanuagada se italobaiyao ia mamohoi Keriso ede? 27 Ina tau ta ena aba laoma ta itayao: na Keriso i laoma, ena aba laoma nige tau esau ie ita.” 28 Iesu numa uura eai i lauheata abo i eogayoga i ene, “Au italobaiguo, egu aba laoma hinage au itayao, nige eaubom ea laoma, ia i hetamariguma ia mamohoina ede; ia au hekau. 29 Ia ea nuatuiyao paana ia arinai ea laoma, eo ia hinage i hetamariguma.” 30 Arinai ia bena se toai: taiede nige tau esau i abilau ia arinai, paana ena huia sora nige i lagema. 31 Tatao gamagaridi ia se sunusunumaei, eo si ene, “Keriso i laoma ia heiheinoi gigibori gamagamagaridi i ginauridi, abo nige doha ina tau ta?”

³² Parisea se ataiei, ina ginauri ta Iesu arinai tatao se monunuei; Parisea eo kohena babadadi iala tataodi se hetamaridi ia bena se toai. ³³ Iesu abo i ribalau isi aridi eai i ene, “Huia kuukuu eau maemiu, e, abo hinage ea lau tauhetamariguma arinai. ³⁴ Abo au eooigu, taba nige au lobaigu; egu aba mia hinage taba nige au laoma arinai.” ³⁵ Iudea tataodi isibom abo se hetahetalapili, ie ene, “Ina tau ta abo i lau aidimo, ita abo nige ta lobai? Abo i lau isi se tatagorigori wa aridi eai, Heleni boeadi eai. Heleni abo i heatadi wa? ³⁶ Riba sahasaha ina ie ribaei ta, i ene, ‘Abo au eooigu, taba nige au lobaigu: egu aba mia hinage, taba nige au laoma arinai?’ ”

Earua Tabuna ena gigibori ribana

A. adi H. 2.2-4; Io. 4.14

³⁷ Mataasi wa huiana i tauutusi asubena saesaena eai, Iesu ie toro i eogayoga i ene, “Ena tau esau gadona i magu, i laoma arigu eai, abo i nom. ³⁸ Ia i sunumaegu doha uriuri eai se ribaeyao, ‘Nuana eai abo goila maumaurina ie didima, doha sagasagadi.’ ” ³⁹ (Na teina i ribaei ta, Earua wa isi se sunusunumaei sora abo se abi; Earua Tabuna sora nige se mosei: paana ede Iesu sora nige se hedebaseai.)

Tatao nuadi labui.

⁴⁰ Tatao gamagaridi teina riba ta se ataiei, si ene, “Mamohoi, Peroveta wa ina.” ⁴¹ Headi si ene, “Teina Keriso ede.” Na headi si ene, “Keriso Galilaia eai abo i laoma wa? ⁴² Uriuri eai si ribaei Keriso Davida tumana eai se labasi, eo Betelehema eanuana eai abo i laoma, Davida nei eai ie mia, wa?” ⁴³ Ia arinai tatao nuadi se labulabui. ⁴⁴ Eo headi ia bena se toai; taiede nige tau esau i abilau ia arinai.

⁴⁵ Iala tataodi wa abo se uio kohena babadadi eo Parisea aridi eai, isi si ene, “Ie saha nige au woeaiama?” ⁴⁶ Iala tataodi se heribadi si ene, “Nige tau esau i riba doha ina tau ta.” ⁴⁷ Parisea abo se heribadi si ene, “Omi hinage se boraboraimiu wa? ⁴⁸ Wasawasa headi, e Parisea headi ia se sunumaei wa? ⁴⁹ Teina tatao ta laugagaeo se hekau, se ribahebaaeadio.” ⁵⁰ Nikodemo, adi sagu esau, i ribalau isi aridi eai (tau wa maiona esau eai ie lau Iesu arinai), ⁵¹ i ene, “Ita eda laugagaeo taba nige tau esau i hegiru, ena riba eo ena laulau se ataieibagunai, e nige’e?” ⁵² Isi se ribalau ia arinai si ene, “Oa hinage Galilaia wa? U eooi, u ita: Galilaia eai taba nige peroveta esau i tubu.” ⁵³ To tatao gamagaridi se lau, esau ena numa, esau ena numa.

8

Sine wa i abiabitawatawa ribana.

¹ Iesu abo ie lau Oliveta oea-tupina eai. ² Ma mara mogomogona eai i uio numa uura eai, tatao gamagaridi se

tupagogoma ia arinai, ia abo i bawabigabiga, eo i lauheatadi. ³ Tauuriuri eo Parisea, sine esau i abiabitawatawa se woearama ia arinai; sine wa se hebawabigabiga boeadi eai. ⁴ Isi ia se heriba, si ene, “Tanuagamai e, ina sine ta se lobai i abiabitawatawa, se italapai. ⁵ Mose ena laugagaeo eai i lauhesomda, i ene, teina doha se lauwe’ui: oa u ene edoha?” ⁶ Se riba nei doha ia bena se nohoi, bena abo se hegiru. Na Iesu ie duru nimagigina eai tano eai i uriuri. ⁷ Isi se hesihesio daoi abo i tamaisima, eo i ribalau isi aridi eai, i ene, “Esau arimiu eai nige ena baaea wa ia we’u i tu baguna.” ⁸ Abo i duruuio, tano eai i uriuri. ⁹ Isi nei riba ne se ataiei abo nuadi se buibuiuioidi, esa, esa se torohai se lau, tau-baguna i baguna i lau e tau-murita: Iesu iabom ie bawa, sine wa i totoro matana eai. ¹⁰ Iesu abo i tamaisima, nige tau esau i ita, sine wa iabom mo, ie ribalau ia arinai, i ene, “Sine e, wau tauhegirum wa haedi? Nige tau esau i hegirum wa?” ¹¹ I ene, “Guiiau e, nige tau esau.” Iesu i heriba i ene, “Eau hinage taba nige ea ribahematem: u lau, tabu u baaeauio.”

Gugua mataasi murina eai: Iesu tanoubu marana.

Io. 1.9

¹² Iesu abo i ribauio isi aridi eai i ene, “Eau tanoubu marana ede: ena esau i hemuriwataiguma taba nige masigiri eai i laulau, na mauri marana abo i abi.” ¹³ Arinai Parisea ia se heriba si ene, “Oabom u ribatausaem, em riba me nige riba mamohoina ede.” ¹⁴ Iesu i ribalau isi aridi eai i ene, “Eau ea ribahemasarahauioigu, hinage egu riba riba mamohoina mo: egu aba laoma ea nuatuiyao eo egu aba lau hinage ea nuatuiyao; egu aba laoma nige au nuatui, eo egu aba lau hinage nige au nuatui. ¹⁵ Omi buluma eai au lauhegiru; eau nige tau esau ea hegiru. ¹⁶ Taba esau ea hegiru, hinage egu lauhegiru i dudurai ariri; paana ede nige eaubom, Tamana maegu, ia i hetamariguma. ¹⁷ Hinage omi emi laugagaeo eai se uri ede ina doha, si ene, ‘Taba tatao labui edi riba esega mo, riba wa i dudurai ede.’ ¹⁸ Eau eaubom ea ribahemasarahagu, eo Tamana tauhetamariguma, i ribahemasarahagu hinage.” ¹⁹ Isi se ribalau ia arinai si ene, “Tamana ede haedi?” Iesu i heribadi, i ene, “Omi nige au nuatulobaigu, eo Tamagu hinage nige au nuatulobai: taba au nuatulobaigu, Tamagu hinage abo au nuatulobai.” ²⁰ Teina riba ta Iesu i ribaei moni abapeiauri eai, numa uura alona eai i lauheatadi: nige tau esau nimana eai i abilau ia arinai, paana huiana sora nige i lagema.

²¹ Iesu abo i heribauioidi i ene, “Ea lau egu dobila, omi abo au eooigu, baaeamiu eai abo sora au mate: egu aba lau nige emi aba laoma.” ²² Iudea tataodi abo si ene, “Ia abo i unuuioi? paana ede i ene, ‘Egu aba lau eai nige emi aba laoma.’ ” ²³ Ie

ribalau isi aridi eai i ene, “Omi ubu eai au saema; eau ewa eai ea dobima: eo omi tanoubu tataomiu: eau nige tanoubu tauna. ²⁴ Arinai ea heribamiu ta ea 'ne, omi baaeamiu eai abo sora au mate: ena taba nige au nuatuwatawataigu eau ede ia, omi baaeamiu eai sora abo au mate.” ²⁵ Isi abo se ribalau ia arinai si ene, “Oa eai?” Iesu i heribadi i ene, “Eau ia ede, doha lahinae ea heribabagubagunaemiu wa. ²⁶ Riba gamagaridi bena ea heribamiu eo bena ea heduduraimiu, na tauhetamariguma ia mamohoina ede: eo ginauri ia arinai ea ataiedi tanoubu abo ea heribadi hinage.” ²⁷ Isi nige se nuatui riba wa i heribadi ede Tamana ribana. ²⁸ Iesu abo i ribalau isi aridi eai i ene, “Sora abo Tau Natuna au abiisinisaei, abo au nuatulobai eau ede ia, eo eaubom nige ginauri esau ea ginauri, doha ede Tamagu i heatagu ina riba ta ea ribaedi ta. ²⁹ Tauhetamariguma ia hinage maidagu; Tamana nige i laugabaegu; paana ede huia gamagamagari egu paisoa eai ia nuana ea helolo.” ³⁰ Ina riba ta i ribaedi moutuana ia se sunumaei.

³¹ Iesu i ribalau Iudea tataodi aridi eai, isi tausunuma wa, i ene, “Taba egu riba au sogohididini, omi mamohoi egu heaheatayao ede. ³² Riba mamohoina hinage abo au ita, mamohoina wa abo i eairigabaemiu.” ³³ Isi ia se heuio si ene, “Ai Aberahama tumanayao, nige tau esau i aumai: ue saha u ribaei u ene, ‘Abo se eairigabaemiu?’ ”

³⁴ Iesu i heuioidi i ene, “Mamohoi, mamohoi ea heribamiu ta, eai to eai baaea i abi, ia abo baaea ena heaheari eai i lau. ³⁵ Heaheari tauna nige i miatahitahi numa eai: Natuna mo ie miahai nige nosina. ³⁶ Taba Natuna i eairihaimiu abo i eairihaimamohoiemiu. ³⁷ Ea nuatuiyao omi Aberahama tumanayao; au eoo bena au unuigu, paana ede egu riba nige ena aba ota nuamiu eai. ³⁸ Ginauri wa ea itadio Tamana maidagu, iaede ea ribaedi, omi hinage ma tamamiu ginauri wa au itadi meta au ginauridi.”

³⁹ Ia arinai se heuio si ene, “Ai tamamai ede Aberahama.” Iesu i heribadi i ene, “Taba omi Aberahama nanatunayao, Aberahama ana hewau abo au abidi. ⁴⁰ Eau riba mamohoina ea heribamiu ta, riba wa Eaubada arinai ea ataiei: na omi au oiriba, bena au unuigu, Aberahama nige ena laulau doha nei. ⁴¹ Tamamiu ena laulau mo omi au abiwataidi.” Isi ia abo se heriba si ene, “Ai nige se hetubumai laulau baaea boeana eai; ai Tamamai esega mo, iaede Eaubada.” ⁴² Iesu i heribadi i ene, “Taba tamamiu Eaubada, abo au gadosisiegu; paana ede Eaubada arinai ea laoma ta, eaubom nige ea laoma, na ia i hetamariguma. ⁴³ Aue saha egu riba nige au nuatui? Paana ede egu riba taba nige au ataiei. ⁴⁴ Omi tamamiu diabololo enana, tamamiu ena baaea hinage abo au abiwataidi. Huia bagubaguna eai i laoma e ia tauaiainu,

nige ie mia riba mamohoina boeana eai, paana ede nige riba mamohoina ia nuaboeana eai. Riba borabora ie ribaei, enana ie riba: paana ede ia tauboraborasom, eo borabora tamana. ⁴⁵ Eau riba mamohoina ea heribamiu arinai nige au nuatuigu. ⁴⁶ Eai arimiu eai i hegirugu i ene ea baaea? Taba eau riba mamohoina ea ribaei aue saha nige au nuatuigu? ⁴⁷ Ia Eaubada enana Eaubada arinana i ataiei: omi nige au ataiei paana ede omi Eaubada enana nige'e."

⁴⁸ Iudea tataodi abo se ribalau ia arinai se heuio si ene, "Ai riba dudurai e nige'e, ai ene oa Samaria tauna, eo nuam eai demoni esau ie mia?" ⁴⁹ Iesu i heuioidi i ene, "Nige demoni esau nuagu eai; Tamagu ea hedebasaei, eo omi au itadobidobiegu. ⁵⁰ Nige ea laoma ea ribatausaueuioigu: esau mo ia hedebasaegu i eooi, eo ia tau-heduhedudurai hinage. ⁵¹ Mamohoi, mamohoi, ea heribamiu ta, ea 'ne, ena tau esau egu riba i sogohi, ia mate taba nige i ita." ⁵² Iudea tataodi ia se heriba si ene, "E abo aie ita, diabolo esau nuam eai. Aberahama i mateo, eo peroveta tataodi hinage, eo oa u ene, 'Ena tau esau egu riba i sogohi mate amnana taba nige i ataiei.' ⁵³ Tamamai Aberahama i mateo, oa bena u saetawatawai wa? Eo peroveta se mateo hinage: oa eai, u ribapasipasiuioim?" ⁵⁴ Iesu i heuioidi i ene, "Taba ea hedebasaueuioigu, ea hedebasaenapa mo: Tamagu iabom i hedebasaegu; iaede omi au ribaei, au ene emi Eaubada. ⁵⁵ Omi ia nige au nuatui: eau ia ea nuatuiyao: taba ea 'ne ia nige ea nuatui, eau abo doha omi, tauborabora: na ia ea nuatuiyao, eo ena riba ea sogohi. ⁵⁶ Tamamiu Aberahama asubenagu i henua bena i ita: eo i itayao, hinage ie kode." ⁵⁷ Iudea tataodi ia se heriba si ene, "Oa nige borimaim tatao-labui-se-mate-saudoudoi, hinage Aberahama u itayao wa?" ⁵⁸ Iesu i heribadi i ene, "Mamohoi, mamohoi, ea heribamiu ta, ea 'ne, Aberahama sora, na Eau miagu." ⁵⁹ Arinai we'u se abidi, ia bena se lauwe'ui; na Iesu i tauyamui, ie pesa numa uura murimurina eai, boedi eai ie lau e, i laugabaedi.

9

Taumatagibugibu se hemaui.

¹ Iesu dobila eai ie lau, e tau esau ie ita, ia se labasiamama matagibugibuna. ² Ena heaheatayao ia se oimurini si ene, "Tanuagamai e, eai i baaea, wau tau wa, e tamana, sinana, ia se labasiamama matagibugibuna?" ³ Iesu i heuioidi i ene, "Ina tau ta nige i baaea, eo tamana sinana hinage nige se baaea: Eaubada ana paisoa ia arinai mo bena se hemasaraha. ⁴ Tauhetamariguma ana paisoa asubena eai taba ta paisoaei: e, maiona abo i laoma, nige tau esau abo i

paisoa. ⁵ Tanoubu eai ea miamia ta, eau tanoubu marana.”
⁶ Riba wa i ribalautom, abo i gariso tano eai, garisona eai tano i helamo, tano wa i saulaei tau matagibugibu matana eai. ⁷ Eo i heriba i ene, “U lau Siloama goilana eai u deuri” (Siloama wa heaheasonina ede, Hetamari). Tau wa abo ie lau i deuri, e, i uioma matana se nega. ⁸ Helena taumia, eo headi hinage nabada wa se ita ia matana se gibu, si ene, “Tau ta ia ede lahinae i babawa i awaawanori wa, e nige’e?” ⁹ Headi si ene, “Iaede:” eo headi hinage si ene. “Ana ao doha ede:” na ia mo i ene, “Eau ede.” ¹⁰ Arinai ia abo se heriba si ene, “Matam edoha edi lalala?” ¹¹ I heuioidi i ene, “Tau esau esana Iesu, tano i helamo, i sauleama matagu eai, eo i heribagu i ene, ‘U lau Siloama goilana eai, u deuri,’ to ea lalau ea deuri, matagu abo se nega ta.” ¹² Ia se heriba, si ene, “Ia ede haedi?” I ene, “Ibai, nige ea nuatui.”

¹³ Tau wa lahinae matana se gibu wa abo se woeai Parisea tataodi aridi eai. ¹⁴ Asubena Sabati eai, Iesu tano i helamo tau matana i helaladi. ¹⁵ Parisea hinage ia se oimuriuioi saha arinai matana se helaladi. Abo i heribadi i ene, “Tano i sauleama matagu eai, eo ea deuri, to ea itaita.” ¹⁶ Parisea headi si ene, “Ina tau ta nige Eaubada arinai i laoma paana ede asubena Sabati nige i nuatui.” Headi si ene, “Ia taba tau baaea, heiheinoi gigiboridi edoha ena ginaginauridi?” arinai nuadi se labulabui. ¹⁷ Isi abo taumatagibugibuna wa se heribauioi, si ene, “Oa u ene edoha, mamohoi wa, paana u ene ia matam i helaladi?” I ene, “Ia peroveta.”

¹⁸ Iudea tataodi nige se nuatui ia matana nabada wa se gibu eo se helaladi i lau e abo tau wa matana se helala wa tamana sinana se eogaidi. ¹⁹ Se oimuriedi, si ene, “Ina ta natumiu wa, au ene ia au labasiamama ma matagibugibuna wa? Matana edoha edi lalala?” ²⁰ Tamana sinana arinadi se heuio, si ene, “Ai nuatuiyao ina ta natumai, eo ai labasiamama ma matagibugibuna. ²¹ Na ia matana edoha edi lalala ai nige ai nuatui: eai hinage matana i helaladi ai nige ai nuatui: i lailaio au oimuri ia arinai, iabom abo enamiu i riba.” ²² Tamana sinana se riba ina doha, paana ede Iudea tataodi se matausiedi: Iudea tataodi se oiribanonohaiyao, taba tau esau i ene, ia Keriso, abo sunago eai ia se aiduiei. ²³ Arinai tamana sinana si ene, “I lailaio, au oimuri ia arinai.”

²⁴ Taumatagibugibuna abo se eogauioi, se ribalau ia arinai si ene, “Eaubada u hedebasaiei: ai itayao ina tau ta tau baaea.” ²⁵ I heuioidi i ene, “Ibai nige ea nuatui, ia tau baaea e nige’e: ginauri esega mo ea nuatui ede, lahinae wa matagu se gibu, abo ina ta matagu se lala.” ²⁶ Abo se ribauio ia arinai, si ene, “Ia edoha ena abiabim? Matam edoha ena helahelaladi?” ²⁷ I heuioidi, i ene, “Ea heribamiuo, na nige au ataiei: abo

au ataataiuioi mo, omi hinage abo ena heaheata eai au lau?"
²⁸ To ia se manabaaeaei, si ene, "Oa ena heaheata, na ai ina Mose ena heaheatayao. ²⁹ Ai nuatuiyao Eaubada i ribalau Mose arinai: dogo me ena aba laoma nige ai ita." ³⁰ Tau wa i heuio isi aridi eai i ene, "Ina ginauri ta nooei ta, ena aba laoma nige aue ita, ia mo matagu i helaladi. ³¹ Ta itayao baaea tataodi Eaubada nige i ataiedi: ena tau esau Eaubada i tabaohui, eo gadohina i gadohi, Eaubada ia i ataiei. ³² Tanoubu edi huia hetubuna eai wa, i laoma ina huia ta, tau ma-matagibugibuna se labasiama nige tau esau matana i helaladi. ³³ Taba ina tau ta nige Eaubada arinai i laoma, taba nige ginauri esau abina i ata." ³⁴ Se heuio ia arinai si ene, "Oa baaea boeadi eai se labasim, hinage bena u heatamai wa?" To ia se aiduiei.

³⁵ Iesu wasana i ataiei ia se aiduiei; ia abo i lobai, i heriba i ene, "Eaubada Natuna oa u nuatui?" ³⁶ I heuio i ene, "Guiau e, ia eai, ia abo ea nuatui?" ³⁷ Iesu ia i heriba i ene, "Ia u itayao, eo ia ede maidam ta ribariba." ³⁸ I ene, "Guiau e, abo ea nuatui." Abo ia i tabaohui. ³⁹ Iesu i ene, "Heduhedudurai hesabana ede ea laoma tanoubu eai ta, ena isi nige se itaita, abo se ita; isi hinage se itaita, matadi abo se hegibudi." ⁴⁰ Parisea headi ia maenayao ina riba ta se ataiedi, ia se heriba si ene, "Ai hinage matamai se gibu wa?" ⁴¹ Iesu i heribadi i ene, "Taba matamiu se gibu, omi nige ami giru: na au ene, ai matamai se lala, arinai abo ami giru i otahai nuamiu eai."

10

Mamoe tautawata lolona.

Sal. 23; Heb. 13.20; 1 Pet. 5.4

¹ "Mamohoi, mamohoi, ea heribamiu ta, ia mamoe ganadi ena nige i lusora dobilana sorasorana eai, na hari tupo eai ie dio, meta tauaiyahari eo tauaigirihai. ² Na ia dobila eai i lusora iaede mamoe tautawataina. ³ Ia i laoma abo dobila tautawataina guduna ie soe; mamoe ia arinana hinage se ataiei: eo ena mamoe, ia mo enana esa esana, esa esana i ataidi, eo i woalageedi murimuri eai. ⁴ E, ena mamoe iabom mo enana, gamagaridi i woalaedi abo i bagubagunaedi, mamoe wa ia se hemuriwatai: paana ede ia arinana se manasaeyao. ⁵ Hari tau taba nige se hemuriwatai, ia abo se dagogabaei: paana ede hari tatao arinadi nige se ataiedi. ⁶ Teina parabole ta Iesu i ribalau aridi eai, riba wa i ribaei isi aridi eai nige abina se ata."

⁷ Iesu abo i heribauioidi i ene, "Mamohoi, mamohoi, ea heribamiu ta, Eau mamoe dobiladi ede. ⁸ Gamagaridi se bagubagunaegu isi tauaiyahari, eo tauaigirihai: arinadi

mamoe nige se ataiedi. ⁹ Eau dobilana ede: ena tau esau i lusora, abo i mauri, e, abo i lulage, i lusae, ia abo i aibai. ¹⁰ Tauaiyahari i laoma, aiyahari eo unu eo hebaaea hesabadi. Eau ea laoma ta mauri bena se abi, mauri monau-boriboririna bena se abi. ¹¹ Eau mamoe taitawataina lolona ede: mamoe taitawataina lolona ena mauri i mosei ena mamoe enadi. ¹² Taupaisoa se hemaisa mo, ia mamoe-taitawataina nige'e, mamoe ia nige enana, ia * luko ie ita i laoma, mamoe abo i laugabaedi, ie dago: luko wa mamoe i toaidi, eo i hetatagorigoridi. ¹³ Taupaisoa se hemaisa abo ie dago, paana ede ia taupaisoa se hemaisa mo, mamoe nige i nuatuidi. ¹⁴ Eau mamoe taitawataina lolona ede, egu mamoe hinage ea nuatuidi, isi hinage se manasaegu. ¹⁵ Doha Tamana i nuatuigu, eau hinage Tamana ea nuatui: eo egu mauri ea torehebiga mamoe debadi eai. ¹⁶ Egu mamoe headi hinage udodoi, isi nige gana ta pelena: isi hinage abo ea woeaidima, isi arinagu abo se ataiei; abo gana esega mo, eo mamoe taitawataina esega. ¹⁷ Arinai ede Tamagu i gadosisiaririegu, paana ede egu mauri ea torehebiga, arinai abo ea abiuioi. ¹⁸ Egu mauri taba nige tau esau i abihai, eaubom mo ea torehebiga, egu gigibori eai hinage ea abiuioi. Teina laugagaao ta Tamagu arinai ea abi.”

¹⁹ Teina riba ta aridi eai Iudea tataodi nuadi se labulabuiuo. ²⁰ Gamagaridi si ene, “Demoni esau ia i lui, eo i koakoalele; aue saha ia arinana au ataiei?” ²¹ Headi si ene, “Ina riba ta demoni-tau-luina taba nige i ribaedi. Demoni taumatagibugibuna mata helalana abina ie ata?”

Iesu i ene ia Eaubada.

Io. 14.9; 20.28, 29

²² Ierusalemata eai, mataasi esau se mataasiei, dubu mataasina, wa'oo huiana. ²³ Iesu i tautausi numa uura alona eai, Solomona ena awamata sorasorana eai. ²⁴ Iudea tataodi abo se laoma, ia se toro hetaiiri, se heriba si ene, “I lau e ana sigasiga abo oa nuamai u heponoponodi? Ena oa Keriso, u ribahemasaraha komakomani arimai eai.” ²⁵ Iesu i heuioidi i ene, “Ea heribamio, eo nige au nuatui; paisoa gamagaridi ea abidi ta Tamagu esana eai, isi ede se hemahemasarahagu. ²⁶ Omi nige au nuatui paana ede omi nige egu mamoe, doha ea ribaei arimiu eai. ²⁷ Egu mamoe arinagu se ataiei, ea nuatuidi hinage, eo se hemuriwataigu. ²⁸ Mauri nige nosina hinage ea mosei isi aridi eai; isi taba nige se mate, eo nige tau esau nimagu eai abo i girihaidi. ²⁹ Tamagu, i ledima arigu eai, tatao gamagaridi i saetawatawaidi; nige tau esau abina i ata Tamagu nimana eai i girihaidi. ³⁰ Eau ma Tamagu ma tauesegamai mo.”

* 10:12: Wolf

³¹ Arinai abo Iudea tataodi we'u se abidi ia bena se lauwe'ui. ³² Iesu i heuioidi i ene, "Paisoa lolo gamagaridi Tamagu arinai ea abidi ea heitamiu ta; aitea paisoa lolona ede arinai au lauwe'uigu ta?" ³³ Iudea tataodi ia se heuio si ene, "Nige paisoa lolona arinai ai lauwe'uim; na Eaubada u riba baaeaei; eo, paana ede oa, tau mo, u awa-ebaadauioim." ³⁴ Iesu i heuioidi, i ene, "Emi laugagaeo eai si uri ina doha, e nige'e wa, si ene, 'Abo ea 'ne, omi eaubada?' ³⁵ Ena isi, Eaubada ena riba aridi eai i laoma, i heawaeaubadaeidi (eo uriuri tabuna taba nige se utusi); ³⁶ Tamana, esau i hetabuei eo i hetamariama tanoubu eai, arinai abo au ribaei wa au ene, Eaubada u riba baaeai, paana ede ea 'ne, 'Eau Eaubada natuna?' ³⁷ Tamagu ana hewau ta ena nige ea abidi, abo tabu au sunumaigu. ³⁸ Na taba ea abidi, hinage eau nige au sunumaigu agu hewau mo au sunumaidi; arinai abo au nuatui, eo au ita. Tamana eau boeagu eai, eo eau hinage ia boeana eai." ³⁹ Arinai abo se eouioi ia bena se toai: ia mo nimadi eai ie dago ie lau.

Iesu i uio aba bapatiso eai wa

Mt. 3.1, 13, 17

⁴⁰ I lageuio Ioridana hari tehana eai, Ioane ena aba heba-hebapatiso bagubaguna eai wa; eo nei eai ie mia. ⁴¹ Tatao gamagaridi se lau ia arinai, si ene, "Ioane nige heiheinoi gigibori esau i ginauri: riba gamagaridi ina tau ta ribana Ioane i ribaedi, se hemamohoiei." ⁴² Nei eai gamagaridi ia se awamamohoiei.

11

Lasaro hetorouioina.

¹ Na tau esau esana Lasaro i asiebo, ia Betania tauna, Maria maena doga Mareta edi eanua ede. ² (Maria wa ia ede Guiau bunama eai i heyausi wa, eo uruna maiawana eai aena i saudi, ia louna Lasaro i asiebo). ³ Arinai abo lounayao se lauhetamari, ia se heriba si ene, "Guiau e, ia u gadosisiei wa i asiebo." ⁴ Iesu riba wa i ataiei i ene, "Asiebo ta arinai taba nige i mate, na Eaubada hedebaseaena debana eai, Eaubada Natuna arinai bena se hedebaseai."

⁵ Iesu Mareta maena doga, eo Lasaro, i gadosisiedi. ⁶ Wasana wa i ataiei i asiebo, asubena labui ena aba mia eai ie mia. ⁷ Abotai abo i ribalau ena heaheatayao aridi eai i ene, "Ta uio Iudea eai." ⁸ Ena heaheata ia se heriba, si ene, Tanuagamai e, lahinau wa Iueda tataodi se eooim bena se lauwe'uim, abo u uio nei eai?" ⁹ Iesu i heuioidi, i ene, "Asubena esega mahana saudoudoi labui, e nige'e wa? Taba tau esau asubena eai i tautausi, nige i alabesibesi, paana ede tanoubu marana ie ita. ¹⁰ Na taba tau esau maiona eai

i tautausi abo i alabesibesi, paana ede nige marana i ota ia nuaboeana eai.” ¹¹ Teina riba ta i ribaedi, abotai abo i heribadi i ene, “Ehada Lasaro ie eno; ea lau ia abo ea hanoi.” ¹² Ena heaheatayao si ene, “Guiau e, ena ie eno, abo i lolouio.” ¹³ Iesu ena mate ribana i ribaei: isi si ene bena eno eo aiyawasi ribadi i ribaedi. ¹⁴ Iesu abo i heribakomakomanidi, i ene, “Lasaro i odalele. ¹⁵ Nuagu i lolo hinage, eau nei eai nige’e, bena abo au awamamohoi; taiede, ta lau ia arinai.” ¹⁶ Toma, esana esau Godegode, ana sasaguyao i heribadi i ene, “Ita hinage ta lau, ia maeda ta mate esega.”

¹⁷ Iesu abo ie lage, i itayao Lasaro asubena hasi bousa eai ie ota. ¹⁸ Betania eo Ierusalem eaaawadi nige se loha, doha hinage maila labui. ¹⁹ Iudea tataodi gamagaridi se laoma Mareta eo Maria aridi eai, loudi ie mate wa bena nuadi se ribahebigabigadi. ²⁰ Mareta wasana i ataiei Iesu i laolaoma, i laubagibagiei bena se hailobai: na Maria numa eai i bawabigabiga. ²¹ Mareta Iesu abo i heriba i ene, “Guiau e, oa taba inai, lougu taba nige i mate. ²² Na taiede ea nuatui wau ta saha saha u awanori Eaubada arinai Eaubada abo i leawa.” ²³ Iesu ia i heriba, i ene, “Sora loum abo i torouio.” ²⁴ Mareta ia i heriba i ene, “Ea nuatuiyao huia murimuritana eai torouio asubenana eai abo i torouio.” ²⁵ Iesu ia i heriba i ene, “Eau torouiona, eo maurina ede: ia i awamamohoiegu, ena i matearirio, abo i mauri. ²⁶ Esau ma maumaurina eai i awamamohoiegu taba nige i mate. Meta wa u awamamohoie?” ²⁷ Mareta abo i heriba i ene, “Guiau e, e: ea awamamohoie oi Keriso, Eaubada Natuna, iaede wa si ene ia abo i laoma tanoubu eai ta.”

²⁸ Ie riba ina doha, abo ie lau ena dogo Maria i eogamahimahihiei, i ene, “Tanuaga i lagema, i hetalam.” ²⁹ Riba wa i ataiei, i toroheuheula ie lau ia arinai. ³⁰ (Iesu sora nige i lagema eanua, Mareta ena aba laubagibagiena wa, arinai mo ma bawana). ³¹ Iudea tataodi wa maedi Maria numa eai se babawa, ia nuana se ribahebigabiga wa, Maria se ita i toroheuheula i lulage murimuri eai, se hemuriwatai si ene, “Abo i lau bousa eai ne, i doudou.” ³² Maria abo i lage Iesu ena aba bawa eai, ia ie ita i guridobi aena eai, i ribalau ia arinai i ene, “Guiau e, oa taba inai, lougu taba nige i mate.” ³³ Iesu ia ie ita i doudou, Iudea tataodi maenayao se laoma wa hinage se dou, arinai nuana i amamna ariri, eo i nuadubu hinage. ³⁴ I ene, “Haedi edi abatorena ede?” Se heriba si ene, “Guiau e, u laoma u ita.” ³⁵ Iesu abo ie dou. ³⁶ Iudea tataodi abo si ene, “I gadosisidumadumai wa?” ³⁷ Isi headi si ene, “Teina tau ta taumatagibugibuna wa matana i helaladi, nige ena gigorori gonoana ina tau ta matana abo i ribanuahi wa?”

Iesu Lasaro ena bousa eai.

³⁸ Iesu nuana i hisihisiliuio i lagema bousa eai. Bousa wa duhana ede, we'u esau i ota-tawai. ³⁹ Iesu i ene, "We'u me au buihesuara." Mareta, taumatematena louna wa, ia i heriba i ene, "Guiiau e, nuana abo i boha'o; paana i mateo asubena hasi." ⁴⁰ Iesu ia heriba i ene, "Ea heribam e nige'e, ea 'ne, taba u sunumaei, Eaubada hedebaseaena abo u ita?" ⁴¹ Arinai abo we'u wa se buihesuara. Iesu matana i helabaisini i ene, "Tamagu e, ea lautoiem ta, egu riba u ataieyao. ⁴² Eo ea nuatuiyao huia gamagamagari u ataiegu: taiede ina tatao se torohetairigu ta arinai ea 'ne ina doha, isi abo se sunumaei, abo si ene oa u hetamarigu ede." ⁴³ Ie riba ina doha abo ie eogalau ma arina lailaina i ene, "Lasaro e, u pesama." ⁴⁴ Taumatemate wa abo i taulagema, sinare wa sumana aena eo nimana se audidinidi: matana hinage se umui. Iesu i heribadi i ene, "Au eairi, abo i lau."

Maria ehanayao nuadi se buidi.

Lk. 10.38-42; Io. 12.1-7

⁴⁵ Iudea tataodi gamagaridi se laoma Maria arinai wa, eo Iesu ena laulau wa se ita abo se awamamohoei. ⁴⁶ Na headi abo se lau Parisea tataodi aridi eai, ginauri Iesu i ginauridi wa se heribadi.

Parisea se oioiriba bena Iesu si unui.

⁴⁷ Kohena lailaidi eo Parisea tataodi sunederi eai se oigogo, si ene, "Edoha eda abiabina? Teina tau ta heiheinoi gigibori gamagaridi i ginauridi ta. ⁴⁸ Ena iabom, ena ia nige ta ribanuahi, tatao gamagaridi ia abo se awamamohoei: Roma tataodi ata hinage se laoma eda aba oigogo tabuna eo eda basileia ta se girihaidi." ⁴⁹ Adi sagu esau, esana Kaiapa, nei borimaina eai ne ia kohena lailaina, i heribadi i ene, "Omi nige ginauri esau abina au ata. ⁵⁰ Eo nige au nuatui i lolo tau esega i mate tatao gamagaridi debadi eai, eda basileia eai tatao gamagaridi abo nige se mateohi." ⁵¹ Ina riba ta iabom nige i ribaei, nei borimaina eai ne ia kohena lailaina, arinai i riba-peroveta i ene, Iesu abo i mate nei basileiana ne debadi eai. ⁵² Eo nige nei basileiana mo debadi eai, hinage Eaubada nanatunayao se tatagorigori, hari eanua, hari eanua, eai, abo i heigogoidima. ⁵³ Nei asubenana ne edi oiriba aba hetubuna ede, ia bena abo se unui.

⁵⁴ Arinai abo Iesu nige i laulau masarahauio Iudea tataodi boeadi eai; i lau oea esau arinai, barabara hasarina eai, eanua esana ede Eparaima, ena heaheatayao maena nei eai se miamia.

⁵⁵ Iudea adi pasova i hanahanau: ealeba gamagaridi pasova hesabana se saesaemao Ierusalem eai, se hedeboy-awasiuioi. ⁵⁶ Iesu abo se eooi, se totoro numa uura alona eai, isibom se ribariba si ene, "Au ene edoha, abo i laoma

mataasi eai ta, e nige'e wa?" ⁵⁷ Kohena lailaidi eo Parisea tataodi, laugagaeo esau se ribaei, si ene, ena tau esau Iesu ena aba mia i ita, abo i ribahemasaraha, ia bena abo se toai.

12

Aieaugogo Betania eai.

Mt. 26.6-13; Mk. 14.3-9; Lk. 7.37, 38

¹ Asubena haligigi-esega sora pasova abo se abi, Iesu Betania eai ie lage, Lasaro wa ie mateo, eo mate eai Iesu i hetorouioi wa, ena aba mia. ² Nei eai maimailahi eai aiaigogo ia enana se ginauri; Mareta ia adi tau soi: Lasaro isi maedi se bawasega hatahata eai. ³ Maria nado pauna esega ie abi, maisana i lai ariri, Iesu aena arinai i heyausidi, aena hinage uruna maiawana arinai i saudi: nado panena numa i laugirihai. ⁴ Ena heaheata esau Iuda Isakariota, Simona natuna, ia abo taumoruina ede, i ene. ⁵ "Ina nado ta ie saha nige se uneunei, denari handere haiona se abidi, abo si mosei gogogesagesa aridi eai?" ⁶ Gogogesagesa wa nige i nuatuidi; ina riba ta ie ribaei paana ia tauaiayahari, eo edi tobo tauabina, eo ginauri tobo alona eai tautawataina. ⁷ Iesu abo i ene, "Sine me i otawa: edi huia toregu asubenana i nuatunonohai. ⁸ Gogogesagesa wa huia gamagari arimiu eai se mia: eau nige ea miamiadaoi maidamiu."

⁹ Iudea tataodi gamagaridi abo se nuatui Iesu nei eai ie mia: nige se laoma Iesu mo debana eai, na bena hinage Lasaro se ita, iaede Iesu mate eai i hetorouioi wa. ¹⁰ Kohena lailaidi se oioiriba bena Lasaro hinage se unui. ¹¹ Paana ede ia debana eai Iudea gamagaridi se lausuara, eo Iesu se awamamohoiei hinage.

¹² Mara- ie- tom tatao gamagaridi mataasi hesabana se laolaoma, wasa se ataiei Iesu abo i laoma Ierusalem eai. ¹³ Bagadi se worahaidi, se abidi ia se laubagibagini, se eogayoga, si ene, "Hosana! Isaraela edi wasawasa i lolo ariri, Guiau esana eai i loama." ¹⁴ Iesu asini natuna i lobai, abo i bawasae potana eai, doha se uriyao, si ene. ¹⁵ "Siona natuna siu e, tabu u matausi: em Wasawasa i laoma, i bawasae asini natuna potana eai." ¹⁶ Teina ginauri ta ena heaheatayao huia ne nige se nuatukomakomani: sora Iesu se hedebasae, abo nuadi se sae teina ginauri ta nabada wa se urinonohaidio, ia ede se ginauridi ia arinai hinage. ¹⁷ Tatao wa, ia maenayao lahinae Lasaro bousa eai i eogahai, eo mate eai i hetorouioi wa, isi ede ribana se wasaduaiei. ¹⁸ Arinai abo tatao ia se laubagibagini paana se ataiei teina heiheinoi gigiborina i ginauri wa. ¹⁹ Arinai Parisea tataodi isibom se ribariba si ene, "Au ita au ribariba awa mo? tanoubu ia abo se laugogoi."

Heleni headi bena Iesu se ita.

²⁰ Heleni tataodi headi se laoma, bena mataasi eai ne se tabaohu. ²¹ Se laoma Pilipo arinai, ia Betesaida tauna, Galilaia tehana eai, edi gadosisi si ene, “Taubada e, ai henua bena Iesu ai ita.” ²² Pilipo i lau Anederea i heriba: eo Anederea maena Pilipo Iesu abo se heriba. ²³ Iesu i heuioidi i ene, “Huiana i lagemao, Tau Natuna abo se hedebasaei. ²⁴ Mamohoi, mamohoi ea heribamiau ta ea ’ne, Sitona uauana ena nige i beu tano boeana eai, eo i mate, iabom mo i ota: ena i mate, abo aiaina gamagaridi i toredi. ²⁵ Ia maurina i gadosisie i maurina abo i tauyamui: ia tanoubu eai ta maurina i nuagabaei, mauri abo i abi i lau e nige nosina. ²⁶ Taba tau esau i heaeaiegu, ia abo i hemuriwataigu: eau haedi egu aba mia, egu heaheari wa nei eai abo i mia hinage: taba tau esau i heaeaiegu Tamagu ia abo i hedebasaei.

²⁷ “Abo ina mo ea nuadubu ariri; abo ea ’ne aisana? ‘Tamagu e, ina awa eai ta u hemaorigu?’ na nige’e, hesabana ede teina awa ta ea hearo. ²⁸ Tamagu e, esam u hedebasaei.” Arina esau galewa eai i dobima i ene, “Ea hedebasaei, eo abo hinage ea hedebasaei.” ²⁹ Tatao wa, isi nei eai se totoro, se ataiei si ene parere ie oi: headi si ene “Aneru esau i ribalau ia arinai.” ³⁰ Iesu i ribalau isi aridi eai i ene, “Wau arina wa eau nige agu riba, na omi debamiau eai i laoma. ³¹ Abo ina mo tanoubu ta se hekiraino: tanoubu ta wasawasana hinage abo se aiduei. ³² Eau, tanoubu eai taba se abiisingu, tatao gamagaridi abo ea niurigogoidima arigu eai.” ³³ Ie riba ina doha, ia matena i hemasaraha. ³⁴ Tatao se ribalau ia arinai si ene, “Laugagaeo eai ai ataieyao si ene, Keriso i mia mo i lau e, nige nosina: u ene edoha Tau Natuna abo se abiisini? Tau Natuna ne eai?” ³⁵ Iesu abo i heribadi i ene, “Huia kuukuu mo marana i ota arimiu eai. Marana ma otana arimiu eai au laulau ata masigiri i hearomiu: paana ede ia masigiri boeana eai i laulau ena aba lau nige i nuatui. ³⁶ Mara ma otana arimiu eai wa, marana au awamamohoei, arinai abo doha mara nanatunayao au laulau.”

Teina riba ta Iesu i ribaedi, abo i laugabaedi, i tauyamui. ³⁷ Ia heiheinoi gigibori gamagaridi i ginauridi isi matadi eai, taiede ia nige se awamamohoei. ³⁸ Arinai abo riba wa Isaia peroveta i ribaei se hemamohoei, i ene, “Guiiau e, ema wasa eai i awamamohoei? eo eai arinai Guiiau nimana se hemasaraha?” ³⁹ Arinai sunumana nige abina se ata, paana Isaia i ribauio, i ene: ⁴⁰ “Matadi i hegibudi, eo nuadi hinage i heoiuradi; arinai matadi eai taba nige se ita, eo nuadi eai taba nige se nuatulobai, ata nuadi se buidi, eo ea hemauidi.” ⁴¹ Teina riba ta Isaia i ribaedi, ena hedebasae i itayao eo ia ede i ribaribaei. ⁴² Babada udodoi mo peledi

boeadi eai se gamagari ia se awamamohoiei; taiede nige se wasawasaei paana ede Parisea tataodi, ata sunago eai se aiduedi: ⁴³isi tatao mo edi ribatausae se gadosisiei: Eaubada ena ribatausae nige se gadosisiei doha.

⁴⁴ Iesu abo i eoga i ene, “Ia i awamamohoiegu, eau nige i awamamohoiegu, na tauhetamariguma i awamamohoiei. ⁴⁵ Eo ia i itagu, tauhetamariguma ie ita hinage. ⁴⁶ Ea laoma ta tanoubu tautuihemarana ede, arinai ena esa esa i awamamohoiegu taba nige i miahai masigiri eai. ⁴⁷ Ena tau esau egu riba i ataiedi, hinage nige i awamamohoiedi, ia nige ea hegiru: nige ea laoma tanoubu hegiruna hesabana, ea laoma tanoubu bena ea hemaui. ⁴⁸ Ia i otaotaegu, eo egu riba hinage nige i abidi, esau ia abo i hegiru: riba ea ribaei wa asubena murimuritana eai ia abo i hegiru. ⁴⁹ Paana ede eaubom egu riba nige ea ribaei; Tamana tauhetamariguma laugagaao i leama i ene, u ene ina doha, u riba doha nei. ⁵⁰ Ea nuatuiyao ena laugagaao ta mauri nige nosina: arinai ede saha saha ea ribaedi, doha Tamana i heribagu, doha ede ea ribaei.”

13

Pasova murimurita aririna.

Mt. 26.7-30; Mk. 14.17-26; Lk. 22.14-39

¹ Pasova mataasina sora, Iesu i nuatuiyao ena huia i lage-mao, tanoubu abo i laugabaei i lau Tamana arinai, enanayao mamohoi tanoubu eai se mia i gadosisiedi, abo i gadosisiedi i lau e, anasiga eai. ² Isi se aieaugogo lautom, diabololo Iuda Isakariota, Simona natuna, nuana eai moru ie tore. ³ Iesu i nuatuiyao Tamana ginauri gamagaridi i toredi ia nimana eai, eo i nuatuiyao Eaubada arinai i laoma, eo i uiuio hinage Eaubada arinai. ⁴ I aiai nonoha abo i toro, ana lulu i torehesuaradi; tawela ie abi, abo ie lio. ⁵ Goila gaeba eai abo i hegoiauri, heaheata aedi i deuridi, tawela ie lio wa arinai i saudi. ⁶ Abo i laoma Simona Petero arinai: Petero i ribalau ia arinai i ene, “Guiiau e, aegu abo u deuri wa?” ⁷ Iesu i heuio ia arinai i ene, “Laulau ta ea laulauei abo ina ta nige u nuatulobai: sora maraitom asubena abo u ita.” ⁸ Petero ia i heriba i ene, “Aegu taba nige u deuridi.” Iesu ia i heuio i ene, “Ena nige ea deurim oa taba nige tupona u abi arigu eai.” ⁹ Simona Petero ia i heriba i ene, “Guiiau e, aegu mo nige’e nimagu eo urugu hinage.” ¹⁰ Iesu ia i heriba i ene, “Ia se deuriyao aena mo abo se deuri, na tauna maudoina i aa’o: hinage omi au aa’o, gamagarimiu mo nige’e.” ¹¹ Paana i nuanuatui eai abo ia i morui: arinai i ene, “Omi gamagarimiu nige au aa.”

¹² Ia aedi i deuri nonohaidi, ana lulu i abidi, eo i bawabigabigauio, abo i heribadi i ene, “Wau egu abiabi wa au nuatui?”
¹³ Omi au awatanuagaegu eo au awaguiauegu: hinage au riba mamohoi; eau ede. ¹⁴ Eau ina emi Guiau, eo Tanuagamiu aemiu ea deuridi ta; omi hinage aemiu au haideuri abo i lolo. ¹⁵ Iilagu ea heitamio, omi bena au laulauei doha egu abiabimiu wa. ¹⁶ Mamohoi, mamohoi, ea heribamiu ta, Tauheaheari ana tanuaga nige i saepoi; ia se hetamari, tauhetamarina hinage nige i saepoi. ¹⁷ Ena wau riba wa au nuatuidi, au abidi hinage abo au nualolo. ¹⁸ Egu riba wa omi gamagarimiu nige ami riba: isi ea hineridio wa ea nuatuidi: taiede, bena uriuri tabuna se hemamohoiei, si ene, ‘Esau maegu falawa ai ai esega, ia aegedurina eai i utuigu.’ ¹⁹ Ea heribanonohaimiu ta, e ie tubu, abo au nuatui iaede eau. ²⁰ Mamohoi, mamohoi, ea heribamiu ta, ia esa ea lauhetamaridi i oiyamidi i oiyamigu hinage; ia i oiyamigu tauhetamariguma hinage i oiyami.”

Iesu ena moru i riba nonohai.

Mt. 26.20-25; Mk. 14.17-21; Lk. 22.21-22

²¹ Iesu nei riba ne ie ribanonohai, earuana abo i nuadubu, i ribamasaraha, i ene, “Mamohoi, mamohoi, ea heribamiu ta, ami sagu esau abo i moruigu.” ²² Ena heaheatayao abo se haimatainoino, nuadi se ponopono, se heunaboisaha, si ene, eai ie ribaei. ²³ Iesu nuapouna eai heaheata esau i otabigabiga, Iesu ia i gadosisie i wa. ²⁴ Arinai Simona Petero i nimaoini, doha i ene, “U oimuri eai i ribaei wa?” ²⁵ Ia wa Iesu nuapouna eai i otabigabiga i heriba i ene, “Guiau e, eai wa?” ²⁶ Iesu i heiuo i ene, “Taba aiai begana ea hedatudobei, esau arinai abo ea mosei, iaede.” Aiai begana i hedatudobei, abo i mosei Iuda Isakariota arinai, Simona natuna. ²⁷ Wau aiai wa ie abi abotai Satani nuana eai ie lu. Iesu abo i heriba i ene, “Em nuatu saha, u abi heuheulai.” ²⁸ Nige tau esau hatahata eai ina riba ta aniona i nuatulobai. ²⁹ Headi edi nuatu si ene, paana Iuda moni tobona tauabina Iesu ia i heriba, i ene, “Ada mataasi aiaina u lau u uneunema;” e gogogesagesa tataodi ginauri headi i mosei isi aridi eai. ³⁰ Ia aiai begana wa ie abi, abo i lulage murimuri eai: i maionao.

³¹ I lulage murimuri eai, Iesu abo i ene, “Abo ina Tau Natuna se hedebasaei, Eaubada ia arinai hinage se hedebasaei. ³² Taba ia arinai abo Eaubada se hedebasaei, Eaubada ia hinage abo i hedebasaeuioi, eo ia i hedebasaei ma esega. ³³ Merumeru e, egu huia arimiu eai begana mo ie ota. Sora abo au eooigu: doha lahinae Iudea tataodi ea heribadi wa, ea 'ne, ‘Egu aba lau, taba nige au laoma arinai;’ hinage ea heribamiu ta. ³⁴ Laugagaeo harihariuna ea leawa. Esau

esau au haigadosisiuioimiu; doha eau ea gadosisiemiu, omi hinage au haigadosisiuioimiu. ³⁵ Taba omi au haigadosisiuioimiu, arinai tatao gamagaridi abo se ita, si ene, omi egu heaheatayao eai aue lau.”

Iesu Petero ena uhara i riba nonohai.

Mt. 26.33-35; Mk. 14.29-31; Lk. 22.33, 34

³⁶ Simona Petero ia i heriba i ene, “Guiau e, haedi u lau?” Iesu ia i heriba i ene, “Egu aba lau wau ta taba nige u hemuriwataigu: taiede abotai abo u hemuriwataigu.” ³⁷ Petero ia i heriba, i ene, “Guiau e, ie saha wau ta nige ea hemuriwataim? Oa debam eai, egu mauri abo ea torehebiga.” ³⁸ Iesu ia i heuio i ene, “Eau debagu eai, em mauri abo u torehebiga wa? Mamohoi, mamohoi, ea heribam ta, kamkam sora nige ie dou, oa ma haiona abo u uhara bagunaigu.”

14

Pasova birina eai Iesu ena laoma enanayao hesabadi i riba nonohai

1 Tes. 4.14-17

¹ “Tabu au nuadubu, Eaubada au awamamohoei, au awamamohoeigu hinage. ² Tamagu ena numa alona eai aba aiyawasidi se gamagari: ena nige’e, ea heribamiuo. Ea lau emi aba mia ea taubiga nonohai. ³ Taba ea lau emi aba mia ea taubiga nonohai, abo hinage ea uioma, abo ea abimiu eau arigu eai; eau egu aba mia eai arinai hinage omi abo au mia. ⁴ Egu aba lau au nuatuiyao, eo dobilana hinage au nuatuiyao.” ⁵ Toma ia i heriba i ene, “Guiau e, em aba lau nige ai nuatui; dobila wa edoha ema nuanuatuina?” ⁶ Iesu ia i heriba i ene, “Dobilana ede eau, riba mamohoina ede eau, maurina ede eau: nige esau i laoma Tamana arinai, eau mo ena dobila ede. ⁷ Taba au italobaiguo Tamagu hinage abo au nuatui: e, maraitom asubena ia au nuatui, eo ia hinage au ita.”

⁸ Pilipo ia i heriba i ene, “Guiau e, Tamana u heitamai, abo besi.” ⁹ Iesu ia i heriba i ene, “Pilipo e huiagu i loha arimiu eai ea mimia, sora nige u italobaigu wa? Ia i itagu, Tamana hinage i itayao: edoha em ribariba u ene, ‘Tamana u heitamai?’ ¹⁰ U awamamohoei e nige’e, eau Tamana boeana eai, eo Tamana hinage eau boeagu eai? Riba wa ea heribamiu nige eaubom egu riba ea ribaedi: Tamana eau boeagu eai ie mia, ana paisoa i paisoaei. ¹¹ Au awamamohoeigu, eau Tamana boeana eai, eo Tamana eau boeagu eai hinage: e egu abi gamagaridi debadi eai au awamamohoeigu.

¹² “Mamohoi, mamohoi, ea heribamiu ta, ia i awamamohoeigu egu abi wa ea ginauridi ia hinage abo i ginauridi: ena abi hinage abo se sae ariri; paana ede ea lau Tamagu

arinai. ¹³ Saha eo saha au aibodaidi eau esagu eai, meta abo ea lauwatai, Natuna arinai Tamana se hedebasaei. ¹⁴ Taba ginauri esau au aibodai eau esagu eai, meta abo ea lauwatai.

Earua riba-hesunumana.

¹⁵ “Ena au gadosisiegu, egu laugaga eo au sogohidi. ¹⁶ Abo ea lau-uura Tamana arinai bena Tauhenuabigamiu esau abo i leawa, ia arimiu eai abo i miahai, e, nige nosina. ¹⁷ Iaede riba-mamohoina Earuana: ia tanoubu taba nige se oiyami, paana ia nige se ita, eo ia nige se nuatui: na omi ia au nuatuiyao: paana ede ia maidamiu aue mia, ia hinage nuaboemiu eai abo i mia.

¹⁸ “Taba nige ea laugabaemiu doha dabudabure: eau abo ea laowa arimiu eai. ¹⁹ Huia begana mo, e, tanoubu nige se itauiougu: taiede omi au itagu: eau ea mauri, omi hinage abo au mauri. ²⁰ Nei asubenana ne abo au nuatui, eau Tamana boeana eai, eo omi boeagu eai, eo eau boemiu eai. ²¹ Ia egu laugaga eo i abidi, eo i sogohidi hinage, ia i gadosisiegu: ia i gadosisiegu Tamagu hinage ia abo i gadosisie, eo eau hinage ea gadosisie, eo ia arinai abo ea hemasarahauioigu.” ²² Iuda (nige Isakariota) ia i heriba i ene, “Guiau e, ue saha arimai eai abo u hemasarahauioim, tanoubu aridi eai nige u hemasarahauioim?” ²³ Iesu i heuio ia arinai, i ene, “Ena tau esau i gadosisiegu, egu riba i sogohidi: Tamagu ia abo i gadosisie, ai abo ai lau ia arinai, maemai aie miaesega. ²⁴ Ia nige i gadosisiegu egu riba nige i sogohidi: riba wa au ataiei enagu nige’e, na Tamana tauhetamariguma ena riba.

²⁵ “Teina riba ta ea heribamiu ta, sora arimiu eai mi-
agu. ²⁶ Tauhenuabigamiu iaede Earua Tabuna, Tamana eau esagu eai abo i hetamariyawa, ia ginauri gamagaridi abo i heatamiu, eo ginauri gamagaridi ea heribamiu wa abo nu-
amiu eai i hesaedi. ²⁷ Nuabiga ea tore arimiu eai, egu nuabiga ea leawa enamiu: ginauri ea leawa ta nige doha tanoubu se leawa. Tabu au nuadubu, eo tabu hinage au matausi. ²⁸ Au ataieyao ea ’ne abo ea laugabaemiu, hinage ea uioma arimiu eai. Ena au gadosisiegu abo au kode, paana ea ’ne, ‘Ea lau Tamana arinai:’ paana ede Tamagu i saetawatawaigu. ²⁹ Sora nige ie tubu ea heribanonohaimiuo ta, e, ie tubu abo au awamamohoiegu. ³⁰ Maraitom-asubena arimiu eai egu riba abo nige se gamagari: paana ede tanoubu ta wasawasana abo i laoma, eo boeagu eai nige ana saha. ³¹ Na tanoubu bena abo se ita Tamana ea gadosisie; doha Tamana hinage laugaga eo i leama arigu eai, iaede ea abiwatawatai. Au torohai, ta lau.”

¹ “Eau *vine* mamohoina, eo Tamagu oea tautawataina ede. ² Lagadi gamagaridi boeagu eai aiadi nige se toredi i abihaidi: lagadi gamagaridi se ua abo i headi, bena aiadi abo se gamagari. ³ Omi au aa’o, riba wa ea heribamio iaede debana eai. ⁴ Au miatahitahigu, abo hinage ea miatahitahimiu. Doha lagana, iabom nige i ua ena nige i ota *vine* paana eai, omi hinage taba nige au ua, ena nige au miatahitahigu. ⁵ Eau *vine* wa, omi laganayao: ia i miatahitahigu, eau hinage ia ea miatahitahini, iaede aiaina gamagaridi i toredi: ena au miasuaraegu taba nige ginauri esau abina au ata. ⁶ Ena tau esau nige i miatahitahigu, ia abo se abigabaei doha lagana, abo i wowoea; eo tatao se tanogogodi, se gabalaedi oegi alaalasina eai, abo se alagorugoru. ⁷ Na ena au miatahitahigu eo egu riba se miatahitahimiu, ginauri gamagaridi au gadosisiedi au aibodaidi abo se tubu arimiu eai. ⁸ Teina mo arinai Tamagu abo se hedebasaei, omi aiaimiu gamagaridi au toredi; doha ede egu heaheata eai au lau. ⁹ Tamagu i gadosisiegu, doha ede hinage ea gadosisiemiu: au miatahitahi egu gadosisi boeana eai. ¹⁰ Taba egu laugagaeo au sogohidi, egu gadosisi boeana eai abo au miatahitahi: doha hinage Tamagu ena laugagaeo ea sogohidi, eo ena gadosisi boeana eai ea miatahitahi. ¹¹ Teina riba ta ea heribamio ta, bena arinai egu nualolo i ota nuaboeamio eai, eo emi nualolo bena se hemotula.

¹² “Egu laugagaeo ede teina, Esau esau au haigadosisiuioimiu, doha eau ea gadosisiemiu. ¹³ Nige gadosisi esau i sae ina doha, tau esau ena mauri i torehebiga ehanayao debadi eai. ¹⁴ Ena ginauri saha eo saha ea lauhesommio au abiwataidi, omi ehaguyao eai abo au lau. ¹⁵ Maraitomasubena nige ea awaheaeaiemiu; paana ede heaeai tauna ana tanuaga ena abiabi nige i nuatui: na ea awaheriam’mio; paana ede riba gamagaridi Tamagu arinai ea ataidio ea heatamio. ¹⁶ Omi nige au hinerigu, na eau ea hinerimio, eo ea heteromio, bena au lau ai ai au tore, eo aiaimio bena se mia mo: arinai ginauri saha eo saha Tamagu au aibodai, eau esagu eai ia abo i leawa. ¹⁷ Teina riba ta ea lauhesommio, omi esau esau au haigadosisiuioimiu.

Tauawamamohoiena eo tanoubu.

¹⁸ “Taba tanoubu se hewaiunuemio au nuatui eau hinage se hewaiunubagunaegu. ¹⁹ Taba omi tanoubu enana, tanoubu enana abo i gadosisiedi: na paana omi tanoubu enana nige’e, eau tanoubu eai ea abihinehinerimio, arinai ede tanoubu i hewaiunumio. ²⁰ Riba wa ea heribamio wa au henuhenuaisini, ea ’ne, ‘Tauheaheri ena Guiau taba nige i saepoi.’ Taba se heamamnagu abo hinage se heamamnamiu; taba egu riba se sogohidi enamio abo se sogohidi hinage.

²¹ Na teina ginauri gamagaridi ta isi abo se hetubudi omi arimiu eai eau esagu eai, paana ede tauhetamariguma nige se nuatui. ²² Taba eau nige ea laoma eo ea ribalau aridi eai, abo nige edi baaea: ina ea laoma ta arinai edi baaea nige aba sumana. ²³ Ia hewaiunuegu, Tamagu hinage i hewaiunuei. ²⁴ Ena isi matadi eai abi headi ea abidi nige tau esau i abi doha, nige edi baaea: taiede se itaguo, eo se hewaiunueguo, eo Tamagu se hewaiunuei hinage. ²⁵ Riba wa edi laugagaeo eai se uri wa arinai abo se hemamohoiei, si ene, ‘Se hewaiunuegu nige mata-paana.’

Tauawamamohoiena eo Earua Tabuna.

²⁶ “Na tauhenuabigamiu sora abo i laoma, ia Tamana arinai abo ea hetamariawa, iaede mamohoina Earuana, ia Tamana arinai i laoma, ia abo i ribahemasarahagu. ²⁷ Omi hinage abo au ribahemasaraha, paana ede omi maidaguyao ta mi-aesegaida huia bagubaguna eai wa i lau e, huia ta.”

16

Heaheata heamamna abo se hearo se heriba hesana-punonohaidi

Mt. 24.9, 10; Lk. 21.16-19

¹ “Teina riba ta ea heribamiuo bena nuamiu tabu se beru-beru. ² Sunago eai abo se aiduiemiu: mamohoi, huiana i lagema, esa esa i unuimiu, abo i ene Eaubada ana paisoa i abi. ³ Teina laulaudi abo se abidi arimiu eai, paana ede Tamana wa nige se nuatui, eo eau hinage nige se nuatuigu. ⁴ Na teina riba ta ea heribamiuo, huiana abo i lagema, bena nuamiu se sae, nabada wa ea heribamiuo.

“Teina riba ta huia eai wa nige ea heribamiu, paana ede eau maidamiu ta miamia. ⁵ Ina huia eai ta egu dohila eai ea lau tauhetamariguma arinai; nige ami sagu esau i oimuriegu, i ene, ‘Haedi ue lau?’ ⁶ Teina riba ta ea heribamiuo arinai ede nuamiu se hisihisili.

Earua Tabuna ana paisoa haiona tanoubu arinai abo i abi.

⁷ “Taiede, riba-mamohoina ea heribamiu; i lolo debamiu eai ea lausudara; ena nige ea lausudara, Tauhenuabigamiu taba nige i lagema arimiu eai; ena ea lau, ia abo ea hetamariawa arimiu eai. ⁸ Ia i lagema, laulau-baaea, eo laulau-dudurai, eo hedudurai aridi eai tanoubu abo i hegirudi. ⁹ Laulau-baaea wa arinai, paana ede nige se awamamohoiegu. ¹⁰ Laulau dudurai wa arinai, paana ede ea lau Tamagu arinai, eo nige au itauioigu. ¹¹ Hedudurai arinai, paana ede tanoubu ta wasawasana se heduduraiyao.

Riba mamohoina harihariuna Earua Tabuna abo i hemasaraha.

12 “Riba gamagaridi hinage bena ea heribamiu, na sora nige au adidiri, taba nige au nuatuidi. 13 Taiede abotai ia, riba-hemamohoina Earuana i lagema, ia riba-mamohoina maudoina arinai abo i woeaimiu: paana ede iabom enana abo nige i ribaedi; riba gamagaridi wa i ataiedi abo i ribaedi: eo ginauri abotai abo se tubu abo i heitanonohaimiu. 14 Ia abo i hedebaseagu: paana ede enagu abo i abi, eo abo i heitamiu. 15 Ginauri gamagaridi Tamana i abidi eau enagu: arinai ede ea 'ne enagu abo i abi eo abo i heitamiu.

Iesu ena mate eo ena torouio, eo ena huia uioma ribadi i ribaribaedi.

16 “Huia kuukuu taba nige au itagu: eo nige baeiona hinage abo au itagu, paana ede ea lau Tamana arinai.” 17 Ena heaheata headi abo isibom se ribariba si ene, “Saha i ribama arida eai i ene, ‘Huia kuukuu nige au itagu,’ eo ‘nige baeiona hinage abo au itagu:’ eo ‘paana ede ea lau Tamana arinai?’ ” 18 Arinai abo si ene, “Saha i ribama i ene, Nige baeiona? Ena riba nige abina ta ata.” 19 Iesu i nuatulobai isi bena ia se oimurini, arinai i heribadi i ene, “Wau riba wa omibom au eooi ea 'ne, “Huia kuukuu abo nige au itagu: eo nige baeiona hinage abo au itagu?” 20 Mamohoi, mamohoi, ea heribamiu ta, sora abo au dou eo au nuadubu, na tanoubu abo se kode: omi abo au nuadubu, emi nuadubu sora abo i hemala kode. 21 Sine esau ena i haisu i nuadubu paana ede ena huia i lagema: e, natuna i labasi huia baabaaea nige i nuatuiuioi, ie kode mo paana ede tau esau i hetubu tanoubu eai ta. 22 Huia ta hinage omi au nuadubu: sora abo ea itauioimiu nuamiu abo se kode, emi nualolo taba nige tau esau i girihai. 23 Nei asubena eai ne, taba nige riba esau au hesioigu. Mamohoi, mamohoi, ea heribamiu ta, saha eo saha au aibodai Tamana arinai, ia abo i leawa. 24 Nabada wa i laoma e huia ta nige ginauri esau au aibodai esagu eai: au aiboda abo au abi, arinai emi kode abo i lai ariri.

25 “Teina riba ta ea heribaparabolemiu, na huiana i lagema, nige ea heribaparaboleuioimiu: Tamana enana abo ea ribahemasaraha arimiu eai. 26 Nei asubena eai ne esagu eai abo au aibodai: eo nige ea 'ne Tamana arinai abo ea aiboda enamiu. 27 Tamana iabom i gadosisiemi, paana au gadosisiegu eo au awamamohoiyao hede Tamana arinai ea laoma ta. 28 Tamana arinai ea laoma, eo tanoubu eai ea lagema ta: hinage tanoubu ea laugabaei, ea lau Tamana arinai.”

29 Ena heaheata ia se heriba si ene, “Abotai u ribamasaraha, nige u ribaparabole. 30 Aboina hinage ai nuatui ginauri gamagaridi abidi u ata, nige esau bena i oimurim: arinai ai nuatui oa Eaubada arinai u laoma ta.” 31 Iesu i heuiodi i ene, “Abo au awamamohoi ei wa? 32 Huiana abo i lagema,

mamohoi i lagemao abo au tatagorigori, esa ena numa, esa ena numa, abo au laugabaegu eaubom mo ea mia: taiede eaubom mo nige'e, paana Tamana maidagu. ³³ Teina riba ta ea ribaedi arimiu eai ta, bena eau boeagu eai au nuabiga. Tanoubu eai amamna abo au hearo: taiede au nua-adidiri mo; eau tanoubu ea saetawatawaiyao."

17

¹ Teina riba ta Iesu i ribaedi, abo matana i helabaisinidi galewa eai, i ene, "Tamagu e, huiana i lageo; Natum u hedebasaei arinai hinage Natum abo i hedebasaem. ² Doha ia u hetoro ma gigiborina tatao gamagaridi potadi eai, isi gamagaridi hinage u mosedi ia arinai mauri nige nosina abo i mosei aridi eai. ³ Mauri nige nosina ia ede teina, bena oa se nuatuim, Eaubada tahunuana, esegana mo, eo Iesu Keriso, ia u hetamariama wa. ⁴ Eau tanoubu eai ea hedebasaem: paisoa oa u leama wa, ea abiheohiyao. ⁵ Tamagu e, oa abo u hedebasaegu, doha nabada wa egu hedebasae maidam ea abi wa, huiana tanoubu sora.

⁶ "Oa esam ea ribahemasarahao tatao tanoubu eai u ledima wa aridi eai: isi enamyao: oa u ledima arigu eai; isi hinage em riba se sogohidio. ⁷ Isi se nuatuiyao ginauri gamagaridi u ledima arigu eai oa mo arim eai se tubuma. ⁸ Riba wa oa u ledima arigu eai wa, ea mosedio; isi hinage se abidio, eo se nuatulobaiyao, si ene, oa arim eai ea laomao, eo se nuatuiyao oa u hetamarigumao. ⁹ Enadi ea lau-uura wa: tanoubu enana nige ea lau-uura, isi mo u ledima wa; paana ede isi enamyao. ¹⁰ Enagu gamagaridi hinage oa enamyao ede; eo enamyao hinage enagu; hinage isi debadi eai se hedebasaegu ta. ¹¹ Eau abo ea mia lautom tanoubu eai ta, isi mo abo se mia tanoubu eai ta, eo eau abo ea laowa arim eai. Tamana Tabuna e, isi u ledimao oa mo esam debana eai u sogohidi, isi abo nuadi esega mo, doha hinage ita. ¹² Tanoubu eai sora ma miagu isi maedi, isi ea sogohidi oa esam debana eai: isi u ledimao arigu eai ea sogohidio, nige esau i tauyamui, na gehena natuna iabom mo; arinai ede uriuri tabuna wa se hemamohoei. ¹³ Eau ea laowa arim eai; teina riba ta tanoubu eai ea ribaedi ta, arinai egu nualolo isi nuaboeadi eai abo se hemamohoei. ¹⁴ Em riba ea moseyao isi aridi eai: eo tanoubu se hewaiunuedi, paana ede isi nige tanoubu enadi, doha hinage eau nige tanoubu enana. ¹⁵ Nige ea uura, ea 'ne oa bena tanoubu eai u abihaidi, na ea 'ne, bena tanoubu baaeana eai abo u guduguidi. ¹⁶ Isi tanoubu enana nige'e, doha hinage eau tanoubu enana nige'e. ¹⁷ Em riba mamohoina arinai u hetabuedi: em riba riba-mamohoina ede. ¹⁸ Doha u hetamariguma tanoubu eai ta, eau hinage tanoubu eai ea hetamaridi. ¹⁹ Isi debadi eai

ea hetabuuiogiu, ribamamohoina arinai isi hinage bena se hetabuedi.

²⁰ “Hinage nige ea lau-uura isibom mo enadi, na isi wa hinage edi riba arinai abo se sunusunumaegu, enadi ea lau-uura. ²¹ Isi gamagaridi bena nuadi esega; doha oa Tamagu boeagu eai, eo eau hinage boeam eai, isi hinage abo nuadi esega boeada eai: tanoubu abo se nuatui oa u hetamarigumao. ²² Hedebasaena oa u leama arigu eai wa, ea mosei isi aridi eai; isi abo nuadi esega, doha hinage ita nuada esega. ²³ Eau isi boeadi eai, eo oa boeagu eai, nua-esega mo arinai isi abo se loloesegai: arinai abo tanoubu se nuatui oa u hetamarigumao, eo u gadosisiedi, doha hinage u gadosisiegu. ²⁴ Tamagu e, ea henua isi u ledima wa, egu aba mia eai abo se mia arigu eai: egu hedebasae u leama wa abo se ita; paana ede tanoubu paana sora nige se hetubu oa u gadosisieguo. ²⁵ Tamagu laulau duduraina e, tanoubu nige se nuatuim: na eau ea nuatuim mo, isi hinage se nuatuiyao oa u hetamarigumao. ²⁶ Esam hinage ea hemasarahayao isi aridi eai, hinage abo ea hemasara; abo em gadosisi arinai u gadosisiegu wa bena isi boeadi eai i ota, eau hinage boeadi eai.”

18

Iesu ie lage Getesemani eai

Mt. 26.36-46; Mk. 14.32-42

¹ Teina riba ta Iesu i ribanonohaidio, ia maena heaheatayao abo se lau se gaeoawasi saga gagirina eai, esana Kiderona, oea esau nei eai, ia i lusora alona eai, maena heaheatayao.

Moruina eo toaina ribadi

Mt. 26.47-56; Mk. 14.43-50; Lk. 22.47-53

² Iudasi hinage, ia taumoruina, wau dimo wa i nuatuiyao: paana huia gamagari Iesu maena heaheatayao se uiouio nei eai. ³ Arinai Iudasi, iala bodadi esau, eo polisimani headi kohena lailaidi, eo Parisea wa aridi eai i abidi, abo se lage nei eai ma lamelamepadi, ma osiosiridi, eo ma adi nimaabia gamagaridi. ⁴ Iesu i nuatuiyao ginauri gamagaridi abo i hearodi, arinai ie lau i ribalau aridi eai, i ene, “Eai au eooi?” ⁵ Isi ia se heuio, si ene, “Iesu Nasareta.” Iesu abo i heribadi i ene, “Eau ede ia.” Iudasi hinage ia taumoruina, isi maedi se totoroesega. ⁶ Wau riba wa i heribadi i ene, “Eau ede ia,” arinai abo se uio muridi eai eo se guri tano eai. ⁷ Abo i oimuriuioidi, i ene, “Eai au eooi?” Si ene, “Iesu Nasareta.” ⁸ Iesu i heuioidi, i ene, “Ea heribamiuo ea 'ne, 'Eau ede ia:’ ena au eooigu, isi ina ta se otawa, se lau:” ⁹ Bena riba esau se hemamohoiei, doha si ene, “Isi tatao u ledima wa nige esau i tauyamui.” ¹⁰ Simona Petero ia elepa ie abi abo i niusihai,

kohena lailai ena heaheari i lauelepai, bea tutuna i sapihai. Heaheari wa esana Malako. ¹¹ Iesu Petero i heriba i ene, “Em elepa me u sumauioi; bianomnom Tamagu i leama, abo ea nonom, e nige’e?”

Iesu se woealaei kohena matana eai
Mt. 26.57-68; Mk. 14.53-56; Lk. 22.66-71

¹² Iala bodadi, eo edi kapena, eo Iudea polisimanidi Iesu se toai, se auai. ¹³ Se woeabagunai Ana arinai; ia Kaiapa bosiana: Kaiapa wa nei borimaina eai ne ia kohena lailaina. ¹⁴ Kaiapa wa iaede lahinae Iudea tataodi i heribadio, i ene, “I lolo tau esega i mate tatao gamagaridi debadi eai.”

Petero ena uhara
Mt. 26.69-75; Mk. 14.66-72; Lk. 22.54-62

¹⁵ Simona Petero Iesu i hemuriwatai, eo heaheata esau hinage maena: wau heaheata wa kohena lailai ana boda esau, ia maena Iesu se lusora kohena lailai ena numa alona eai. ¹⁶ Na Petero i totoro dobila murimurina eai. Wau heaheata esau wa kohena ana boda hewarina wa, abo ie pesa, i ribalau siu dobila tautawataina arinai, abo Petero i woeaiyama numa alona eai. ¹⁷ Siu wa dobila tautawataina, abo Petero i heriba, i ene, “Wau tau wa oa ena heaheari esau wa, e nige’e?” I ene, “Eau nige’e.” ¹⁸ Heaheari, eo polisimani nei eai se totoro mutuari se healasi: i wa’oo ariri; to se aimoiga: Petero maedi se totoro esega, ia hinage i aimoiga.

Iesu Kohena lailai matana eai.

¹⁹ Kohena lailai Iesu i oimurini ena heaheata ribadi, eo ena lauheata. ²⁰ Iesu ia i heuio, i ene, “Tanoubu eai ta masaraha eai ea ribariba: huia gamagari sunago alodi eai ea laulauheata, eo numa uura eai hinage, Iudea tataodi edi aba oigogo; nige riba esau ea ribayamui. ²¹ Ue saha u oimurigu ta? Egu riba tauataiedi u oimuridi saha saha ea ribaedi; egu riba se nuatuiyao.” ²² I riba ina doha polisimani esau i totoro hasarina eai nima aloalona eai Iesu i lubilaei, i ene, “Kohena lailai arinai u heuio doha nei wa?” ²³ Iesu ia i heuio i ene, “Taba ea riba baaea, baaea wa u hemasaraha: na taba ea riba lolo ie saha u lubigu ta?” ²⁴ Na Ana Iesu i hetamariyao Kaiapa, kohena lailaina arinai.

²⁵ Simona Petero i totoro i aiainoiga. To ia se heriba, si ene, “Oa hinage ena heaheata esau, e nige’e?” I harere, i ene, “Eau nige’e.” ²⁶ Kohena lailaina ena heaheari esau, tau wa beana Petero i talahai wa ehana esau, i ene, “Ea itam’o oea eai wa, oa maidana, e nige’e?” ²⁷ Arinai abo Petero i harereuio: e abotai kamkam ie dou.

Iesu se laei Pilato matana eai
Mt. 27.1-14; Mk. 15.1-5; Lk. 23.1-7

²⁸ Kaiapa se laugabaei, abo Iesu se woeai se laei hedudurai numana eai: mara i uiari; isi nige se awasae hedudurai numana eai, ata se bii na isi pasova bena abo se ai. ²⁹ Pilato i lulage isi aridi eai, i ene, “Teina tau ta emi hegiruna ede aisana?” ³⁰ Se heuio ia arinai si ene, “Ena ia nige taubaaeana, taba nige ai toai ai leawa.” ³¹ Pilato abo i heribadi i ene, “Ia abo au laei emi laugagaao eai wa au hedudurai.” Iudea tataodi ia se heriba si ene, “Bena tau esau ai unui, ema laugagaao se guduguduimai.” ³² Iesu ena riba esau arinai se hemamohoie, ia ena mate ribana ie ribanonohaiyao.

³³ Pilato abo i awaseuio numa hedudurai alona eai, Iesu i eogai, i ribalau ia arinai, i ene, “Oa Iudea edi Wasawasa wa?” ³⁴ Iesu ia i heriba i ene, “Riba ta oabom u hetubu, e headi wasagu se heribamo?” ³⁵ Pilato ia i heriba i ene, “Eau Iudea? Em basileia tataodi eo kohena lailaidi oa se woeaim arigu eai: edoha em laulau?” ³⁶ Iesu i heuio, i ene, “Egu basileia nige tanoubu ta ginaurina: taba egu basileia tanoubu ta ginaurina ata egu heaheri se iala. Iudea tataodi abo nige se toaigu: eau egu basileia nige doha nei.” ³⁷ Pilato abo i ribalau ia arinai i ene, “Oa wasawasa wa?” Iesu ia i heuio, i ene, “Oa u ene eau wasawasa. Egu tubu paana ia ede ina, eo arinai ede ea laoma tanoubu eai ta riba-mamohoina bena ea hemasaraha. Esa, esa, riba-mamohoina enana, arinagu se ataiei.” ³⁸ Pilato i ene, “Riba-mamohoina ede saha?”

Iesu se hekiraino: Baraba se eairigabaei

Mt. 27.15-26; Mk. 15.6-15; Lk. 23.18-25

Ina riba ta i riba lautom, abo i lulageuio Iudea tataodi aridi eai, i ene, “Nige giruna begana ia arinai ea lobai.

³⁹ “Taiede, emi laulau esau pasova huiana eai, tau esau abo ea eairigabaei: Iudea edi Wasawasa au ene bena ea eairigabaei wa?” ⁴⁰ Arinai abo gamagaridi se eogayogauio si ene, “Meta tau me nige’e, na Baraba u eairi!” Baraba wa ia tauaiyahari.

19

Iesu oeagi nurinuridi eai se hekorona

Mt. 27.27-30; Mk. 15.16-20

¹ Arinai ede Pilato Iesu i laei, i lubilubini. ² Iala tataodi oeagi nurinuridi se haturidi, korona se ginauri se heousaei ia uruna eai; lulu buiabuia se abi hinage ia se helui. ³ Si ene, “Iei, Iudea edi Wasawasa e!” nimadi eai se lubilubini. ⁴ Pilato abo i lulageuio, i heribadi, i ene, “Ia ea woeaiyawa; arinai abo au ita nige giruna esau ea lobai.” ⁵ Iesu abo i taumasaraha, korona nurinurina wa ie ou, eo lulu buiabuiana ie lui. Pilato i ribalau isi aridi eai i ene, “Tau ta, au ita!” ⁶ Kohena lailaidi eo polisimani ia se ita abo se eogayoga, si ene, “U

hesatauro mo, U hesatauro mo!” Pilato i heribadi i ene, “Omi ia au laei, au hesatauroyawa; nige ena baaea esau ea lobai.”⁷ Iudea tataodi ia se heuio si ene, “Laugagaeo esau ai abi, ema laugagaeo eai taba mo i mate, paana ede i ene ia Eaubada Natuna.”⁸ Teina riba ta Pilato i ataiei, abo i matausi ariri.⁹ Abo i awaseuio hedudurai numana alona eai, i ribalau Iesu arinai, i ene, “Haedi eai u laoma?” Na Iesu nige arinana.¹⁰ Pilato ia i heriba, i ene, “Nige u ribalaoma arigu eai wa? Nige u nuatui egu gigibori eai taba ea hesataurom, e taba ea eairigabaem?”¹¹ Iesu ia i heuio i ene, “Taba nige em gigibori esau arigu eai, ewa eai mo se leawa: arinai ia i woeaigu arim eai wa ena baaea mo ie lai ariri.”

¹² Arinai abo Pilato ena eairigabaena paana i eoodadaasaeai: Iudea tataodi se eogayoga si ene, “Taba tau ta u eairigabaei, oa nige Kaisara ehana: esa, esa i ene ia wasawasa, Kaisara i ribahebaaea.”¹³ Riba wa Pilato i ataiei, Iesu abo i woeahemasaraha, aba hedudurai aba babawana eai ie bawa, dimo wa esana ede We’u-matuna, Heberu arinadi si ene, Gabata.

Iudea adi tanuaga eo Iudea tataodi edi Wasawasa se otao-taei.

¹⁴ Pasova se abinonohai doha mahana hehaligigi-esegana eai: Pilato Iudea tataodi i heribadi, i ene, “Emi Wasawasa au ita!”¹⁵ Isi se eogayoga si ene, “Ia u laei, u laei, u hesatauro!” Pilato i heribadi i ene, “Emi Wasawasa abo ea hesatauro wa?” Kohena lailaidi se heuio, si ene, “Ai nige ema wasawasa esau, Kaisara iabom mo.”¹⁶ Arinai Iesu i mosei isi nimadi eai, ia bena se hesatauro. Iesu se laei se woeahesuara.

Iesu Keriso se hesatauro

Mt. 27.33-54; Mk. 15.22-39; Lk. 23.33-47

¹⁷ Ia satauro i bahei i lau dimo esau eai se lage esana ede Moiaru, Heberu arinadi si ene, Golagota: ¹⁸ nei eai ia se hesatauro, tatao labui hinage maenayao, esa hari tupo, esa hari tupo, Iesu duaduaridi eai.¹⁹ Pilato riba heiheinoi esau ie uri, se torehepatusaei satauro ewana eai. Uriuri wa si ene, “IESU NASARETA, IUDEA EDI WASAWASA.”²⁰ Iudea tataodi gamagaridi uriuri wa se hasihasiri: paana ede Iesu edi aba hesataurona eanua i hanahanau. Heberu, eo Heleni, eo Roma arinadi wau uriuri wa arinai se uri.²¹ Iudea edi kohena lailaidi se ribalau Pilato arinai si ene, “Tabu u uri u ene, ‘Iudea edi Wasawasa;’ u ene, ‘Ia i ene, Eau Iudea edi Wasawasa.’”²² Pilato i heuioidi i ene, “Uriuri ea uri wa, besi ea uriyao.”

²³ Iala tataodi Iesu se hesatauro nonohai, ana lulu se abidi, se peihasini, tau iala esau pei esau i abi, tau iala esau pei esau; ena pereue hinage doha: pereue wa nige se boditubei, se ginauri esegai.²⁴ Arinai edi ribariba si ene, “Tabu ta purisi,

kelero ta ginauri, abo eai enana.” Arinai uriuri tabuna se hemamohoiei, si ene, “Agu lulu se soiei, agu pereue hinage arinai se hekelero.” Teina laulaudi ta hinage iala tataodi se abidi.

²⁵ Iesu ena satauro hasarina eai ia sinana i totoro, eo sinana ena doga hinage, Maria Kelopa monena, maena Maria Magadala. ²⁶ Iesu sinana ie ita eo ena gadosisi heaheatana i totoro hasarina eai, i ribalau sinana arinai, i ene, “Sine e, natum tau u ita!” ²⁷ Ia abo heaheata wa i heriba i ene, “Sinam u ita!” Nei huiana eai ne heaheata wa ia i woeai ena numa eai.

²⁸ Ina ta murina eai Iesu i nuatuiyao ginauri gamagaridi se ginauriheohidio, eo hinage uriuri tabuna bena arinai se hemamohoiei, i ene, “Gadogu ie magu.” ²⁹ Gaeba esau se tore vinega i monau: isi baro eai vinega se heboriri, hisopa eai se paihepatu, se helelesaei awana eai. ³⁰ Iesu vinega wa i abi, abo i ene, “I lautom’o:” ia abo uruna i tapoi, earuana abo i mosesaei.

“Ia siadana nige esau se eatugodu.”

³¹ Abinonoha asubenana eai arinai Iudea tataodi si ene, tabu sinare si ota satauro eai asubena Sabati eai, (paana nei asubena Sabati ne asubena saesae aririna), arinai se oimuri Pilato arinai, aedi siadadi bena si eatugodudi, bena abo se lae hesuaradi. ³² Iala tataodi abo se laoma esau aena se eatugodudi, esau hinage doha, isi maedi Iesu se hesatauroesegaidi wa. ³³ E, se lage Iesu arinai abo se italobai ia i matearirio, arinai ia aena nige se eatugodudi. ³⁴ Na iala tauna esau alahia ie abi i osomsaei Iesu lisilisina eai, arinai abo osina eo goila se dididobima. ³⁵ Tautitana ia ede i ribahemasaraha, ena riba wa riba mamohoina ede: eo i nuatuiyao riba wa i riba mamohoiei bena omi abo au awamamohoiei. ³⁶ Teina ginauri ta se ginauridi bena uriuri tabuna se hemamohoiei, si ene. “Ia siadana taba nige esau si eatugodu.” ³⁷ Doha hinage uriuri esau si ene, “Ia se osom wa abo se italau arinai.”

Se toretoretau

Mt. 27.57-60; Mk. 15.43-47; Lk. 23.50-56

³⁸ Abotai abo Iosepa Arimataia, Iesu ena heaheata esau, ia mo i lau eamuyamui paana Iudea tataodi i matausiedi, Pilato i awanorini Iesu sinarena bena i abi i laei. Pilato ie eari. Arinai abo ie lau Iesu sinarena ie abi i laei. ³⁹ Nikodemo hinage i lagema, iaede nabada wa maiona eai ie lau Iesu arinai, ia muro eo aloe se hebori-esegaidi i leama, porohena pauna handere esega. ⁴⁰ Isi Iesu sinarena abo se abi, lulu linen ma eausina hinage arinai se suma, Iudea tataodi edi toretoretau laulauna doha ede. ⁴¹ Ia edi aba hesataurona eai, oea esau nei eai; eo oea wa alona eai bousa harihariuna se ginauri-auri, sora nige tau esau arinai se tore. ⁴² Nei eai

Iesu se tore, paana Iudea edi asubena abinonoha; bousa wa hinage i hanahanau.

20

¹ Sabati, asubena bagubagunana eai, mara-ie-tom sora ma amuamumuna eai, Maria Magadala i laoma bousa eai, we'u wa bousa eai ie ita se torehesuarayao. ² Ia abo i aitautau i laoma Simona Petero arinai, eo heaheata esau arinai, ia ede Iesu i gadosisie i wa, i heribadi i ene, "Guiiau bousa eai se abihaiyao, edi aba torena nige ai ita." ³ Arinai abo Petero ie lau, heaheata esau wa hinage maidana, abo se lagema bousa eai. ⁴ Taudi labui se aitautaesega heaheata esau wa Petero i taugabaei, i lage baguna bousa eai. ⁵ Ie duru, i itaitalau, lulu *linen* mo i itadi se ota; na nige i lulau alona eai. ⁶ Simona Petero abo hinage i lage muritama, i lulau bousa alona eai, lulu *linen* se ota wa i itadi. ⁷ Lulu uruna aba sumana wa nige i otaesega lulu *linen* aridi eai, na se nou, eo ie ota udoi. ⁸ Heaheata esau wa, iaede i lagebaguna bousa eai wa, abo hinage i lulau eo ie ita, eo i awamamohoei. ⁹ Sora uriuri tabuna nige se nuatukomakomani, ia mate eai taba i torouioma. ¹⁰ Tauheaheata wa abo se uio edi numa eai.

¹¹ Na Maria i totoro bousa murimurina eai, i doudou; ma doudouna ie durudobi, i italau bousa alona eai. ¹² Aneru labui i itadi adi lulu se posiposi, se bawabigabiga Iesu edi aba torena eai wa, esau uruna eai, esau aena eai. ¹³ Isi ia se heriba, si ene, "Sine e, saha u doui?" To i heribadi i ene, "Egu Guiiau se laehesuarayao, eo ia edi aba torena nige ea ita." ¹⁴ Ie riba ina doha, abo i sinibui Iesu ie ita i totoro; nige i nuatui i ene Iesu. ¹⁵ Iesu ia i heriba, i ene, "Sine e, saha u doui? Eai u eoi?" I ene bena oea tauitawataina, arinai enaba, "Taubada e, taba oa u laeudoiei em aba torena u heribagu, eau abo ea laehesuara." ¹⁶ Iesu ie riba i ene, "Maria e." I torobui, i ene, "Raboni e!" heaheasonina ede, Tanuagagu e. ¹⁷ Iesu ia i heriba, i ene, "Tabu u abiitagu; sora nige ea awasae Tamagu arinai: taiede u lau egu tataoyao aridi eai u ribaei, u ene, ea awasaelau Tamagu arinai, eo Tamamiu arinai; eo egu Eaubada arinai, eo emi Eaubada." ¹⁸ Maria Magadala abo i laoma heaheata i heribadi Guiiau i itayao eo, wau riba wa hinage ia i heriba.

Iesu ie taumasaraha ena heaheatayao aridi eai; Toma mo nige maedi

Lk. 24.36-49

¹⁹ Nei asubenana ne, e, i maimailahi, Sabati asubena bagubagunana eai, ena heaheatayao se oigogoesega numa eai, dobila hinage se gududi, paana ede Iudea tataodi se matausiedi, Iesu abo i lagema i totoro duaduaridi eai, i ribalau aridi eai i ene, "Nuamiu se taru." ²⁰ Ie riba ina doha,

nimana eo lisilisina i heitadi. Ena heaheatayao Guiau se ita nuadi se kode. ²¹ Iesu abo i heribauioidi, i ene, “Nuamiu se taru: doha Tamagu i hetamariguma, eau hinage ea hetamarimiu.” ²² Ie riba ina doha, abo i eahualau isi aridi eai, eo i ribalau aridi eai, i ene, “Earua Tabuna au abi. ²³ Eai to eai ena baaea au nuatugabaedi, baaea wa aridi eai se nuatugabaedio; eai to eai ena baaea au ene se otawa, taiede se otawa.”

Iesu ie taumasaraha ena heaheatayao aridi eai: Toma maedi.

²⁴ Na Toma, saudoudoi labui wa esau, esana Godegode, Iesu ena huia laoma eai wa, ia nige maedi. ²⁵ Heaheata headi ia se heriba si ene, “Guiiau ai itayao.” Ia abo i ene, “Ena nimana eai poasi gaidi nige ea itadi, eo ena nimagigigu nige ea tore poasi gaidi eai wa, eo ena nimagu nige ea torelaei lisilisina eai, taba nige ea awamamohoiei.”

²⁶ Asubena haligigi-haiona muridi eai ena heaheatayao numa alona eai se bawa Toma hinage maedi: dobila se gudio, Iesu i laoma isi duaduaridi eai i totoro, i ene, “Nuamiu se taru.” ²⁷ Ia Toma i heriba, i ene, “Nimagigim u heleleama, eo nimagu u itadi; nimam u heleleama u toreleama lisiligu eai: tabu nuam i labulabui, u awamamohoiei mo.” ²⁸ Toma abo i ribalau i ene, “Egu Guiau eo egu Eaubada!” ²⁹ Iesu ia i heriba, i ene, “Toma e, u itagu, arinai u awamamohoiegu, na isi mo nuadi se amna nige se itagu, taiede se awamamohoiei hinage.”

³⁰ Heiheinoi gamagamagaridi hinage Iesu i abiabiedi ena heaheatayao matadi eai, ina buka eai ta nige se uridi. ³¹ Na teina ta se uridi bena omi abo au awamamohoiei, au ene, Iesu ia ede Keriso, Eaubada Natuna: au awamamohoiei wa arinai ia esana eai abo au mauri.

21

Keriso i torouio i Tanuagaeda.

¹ Abotai abo Iesu ena heaheatayao matadi eai iabom i hemasarahauioi Tiberia gabogabona hasarina eai; i hemasarahauioi ina doha. ² Headi se oigogoesega, Simona Petero, eo Toma esana Didumo, eo Natanaela Kana Galilaiana, eo Sebedaiio nanatunayao, eo ena heaheatayao labui hinage.

³ Simona Petero i heribadi, i ene, “Ea lau ea eama.” Isi ia se heriba si ene, “Ai hinage maem ta lau.” Se lau se gurusae waga eai: maionana eai ne se eamaasa, se bo’au.

⁴ Maratontom eai Iesu i totoro geregere eai, ena heaheatayao Iesu nige se italobai. ⁵ Iesu abo i hesioidi, i ene, “Nanatuguyao e, ai ai ami e nige’e wa?” Ia se heriba si ene, “Nige’e.” ⁶ Abo i heribadi i ene, “Hiana au galaei waga ateanina eai, eama abo

au aitoa.” Se galanonohai bena se tabei, se tabeasa, eama se gamagari ariri. ⁷ Arinai abo heaheata Iesu i gadosisie i wa, i ribalau Petero arinai i ene, “Ia ede Guiauna!” Simona Petero abo i ataiei ia ede Guiauna, ena eama luluna ie lio, (ia tau ahaahana mo) abo i tubapesa gabogabo eai. ⁸ Heaheata headi waga gagirina eai se geru (geregere i hanahanau, nuana yada handere esega) hiana ma eamana se niuniuri.

⁹ Isi abo se dunsae geregere eai, oegi muapolina se ita i alaalasi, eama headi hinage se toredi, eo falawa. ¹⁰⁻¹¹ Iesu i heribadi i ene, “Eama au toaidi wa, headi au ledima.” “Simona Petero i awasae hiana i niurisaie geregere eai, eama lailaidi i monau handere esega eo tatao-labui-se-mate-saudoudoi-haiona; se gamagari ariri, hiana hinage nige se purisi. ¹² Iesu i heribadi i ene, “Au laoma ta aiai.” Taba nige heaheata esau i oimuri ia arinai i ene, “Oa ede eai?” Paana isi se nuatuiyao ia ede Guiauna. ¹³ Iesu abo i laoma, falawa ie abi i mosei isi aridi eai, eo eama hinage doha. ¹⁴ Ena mate eai i torouioma, teina ta abo ena taumasaraha hehaionana ena heaheatayao matadi eai.

¹⁵ Se aiai lautom, Iesu abo i ribalau Simona Petero arinai i ene, “Simona, Ioane natuna e, oa u gadosisiaririegu, nige doha ina headi ta?” Petero i ene, “E Guiau, u nuatuiyao ea gadosisiem.” Ia i heriba i ene. “Egu * arenio u suidi.” ¹⁶ Ma labui hinage i heriba, i ene, “Simona, Ioane natuna e, u gadosisiegu wa?” Ie ribalau ia arinai i ene, “E Guiau, u nuatuiyao ea gadosisiem.” Ie ribalau ia arinai i ene, “Egu mamoe u suidi.” ¹⁷ Ma haiona hinage i ribalau ia arinai, i ene, “Simona, Ioane natuna e, u gadosisiegu wa?” Petero abo nuana i baeea paana ma haiona Iesu i oimurini i ene, “U gadosisiegu wa?” Arinai abo ia i heriba i ene, “Guiiau e, nuatudi gamagaridi u nuatuidio: u nuatuiyao ea gadosisiem.” Iesu ia i heriba, i ene, “Egu mamoe u suidi. ¹⁸ Mamohoi, mamohoi, ea heribam ta, oa ma hewarim eai oabom u taididiniuiomim, u laulau gaibu mo; sora u tautaubada abo nimam u helelelaedi esau abo i auauim, ia abo hinage i laem dabila wa nige u henua arinai.” ¹⁹ Teina riba ta i ribaei, ia matena i ribahemasaraha, arinai Eaubada abo i hedebasaei. Riba wa i ribalautom, ia abo Petero i heriba, i ene, “U hemuriwataiguma.”

²⁰ Petero i torobui heaheatana Iesu i gadosisie i wa ie ita i laulauwataidi; ia ede ia ie ota Iesu nuapouna eai edi huia aiai eai wa, eo hinage i ene, “Guiiau e, eai abo i moruim?” ²¹ Petero ia ie ita Iesu arinai ie riba i ene, “Guiiau e, tau ta hinage abo edohana?” ²² Iesu ia i heriba, i ene, “Taba egu nuatu ea 'ne i mia i lau e ea uioma, oa u ene saha? Oa mo u hemuriwataigu.” ²³ Teina riba ta abo ehadiyao se hetubu se laei, si ene, “Teina

* 21:15: Lambs; mamoe gagiridi.

heaheata ta taba nige i mate:” taiede Iesu nige i ene, taba nige i mate; na i ene mo, “Taba egu nuatu ea ’ne i mia i lau e ea uioma, oa u ene saha?”

²⁴ Wau heaheata wa ia ede teina ginauridi i ribahemasarahadi, eo i uridi hinage; ta nuatui hinage ia ie riba mamohoi.

²⁵ Ginauri gamagaridi hinage Iesu i ginauridi, taba se uriheohidi nuana tanoubu ta abo abatorena nige gonoana, buka wa abo se gamagari ariri. Amen.

APOSOTOLO ADI HEWAU

¹ Teopilo e, buka bagubagunana eai wa, ginauri gamagaridi Iesu i ginauri-hetubudi eo i heata-hetubudi, ea uridiwa wa, ² i lau e nei asubenana eai ne ena lauhesom i ribaedio Aposotolo i hineridi wa aridi eai, Earua Tabuna debana eai, abotai ia se abiisini. ³ Ia i hetaumasarahauioi aridi eai, mamaumaurina ena amamna murina eai, aba-italobaina heiheinoidi se gamagari ariri, asubena tatao-labui-se-mate sorasoradi eai matadi eai i tautumasaraha, Eaubada ena basileia ribadi i ribaribaedi. ⁴ Maedi se miamiaesega i lauhesomdi i ene Ierusalema tabu se laugabaei, na Tamana ena ribahesunuma bena se bagibagiei mo, iaede i ene, “ea heribamio, ⁵ ea ene mamohoi Ioane goila eai i hebapatiso, na sora omi nige baeiona abo Earua Tabuna arinai se hebapatisoimiu.”

⁶ Arinai huia esau se bawagogo, ia se oimurilau si ene, “Guiiau e, huia ta abo Isaraela basileiana u heheliuioi e nige’e, wa?” ⁷ I ribalau aridi eai i ene, “Omi nige enamiu bena asubenadi eo huiadi abidi au ata, meta Tamana iabom ena gigibori eai i tauribaedio. ⁸ Na omi gigiborina abo au hearo sora Earua Tabuna abo i dobima potamio eai; eo omi abo tauwasawasaegu, Ierusalema eai, Iudea se hetaiiri, eo Samaria eai i lau e tanoubu sigasigana eai.”

Aposotolo se hetorodi.

Mt. 28.18-20; Mk. 16.15-18; Lk. 24.47, 48; Io. 20.21-23

⁹ Teina riba ta i ribaedio, ma-itaitalaudi, na ia se abiisini, eada boeana eai i tauyamui matadi eai.

Iesu ena uioma ribahesunumana.

¹⁰ Ma launa, se itaitawataisae galewa eai, na tatao labui hede se totoro gegesidi eai, adi lulu se posiposi ariariri, ¹¹ si ene, “Galilaia tataomiu e, saha au totoro au itaitasae galewa? Teina Iesu ta, arimio eai wau se abiisini galewa eai, sora abo i uioma, ena laolaoma doha wau aue ita ena lau galewa eai ta.”

Earua se bagibagiei.

¹² Abotai abo Oliveta tupina se laugabaei se uio Ierusalema. Oliveta Ierusalema i hanahanau doha hinage asubena sabati lauwasina; ¹³ isi se lage, se awasae numa isi-pota birina eai, Petero, eo Iamesi, eo Ioane, eo Anederea, eo Pilipo, eo Toma, eo Batolomaio, eo Mataio, Iamesi Alepaia natuna, eo Simona Selote, eo Iuda Iamesi ena tau, edi aba miamia. ¹⁴ Isi gamagaridi huia gamagari nuadi esega mo se lau-uura, eo se aiboda, sisine headi maediya, eo Maria Iesu sinana, eo ena dodogayao hinage.

Matatia se hineri

¹⁵ Nei asubenadi ne Petero i toro heaheata boeadi eai (isi esadi se hasiridi tataodi handere esega eo tau-esega-i-mate) i ene, ¹⁶ “Egu tataoyao e, teina uriuri tabuna ta se hemamhoiei ede ina, Earua Tabuna Davida awana eai i ribanonohai, Iuda ribana, ia ede Iesu tautoaina tauwoeaidi. ¹⁷ Paana ede ia hinage maemai se hasiriesegaimai, teina paisoa ta tupona ia tauabina hinage. ¹⁸ (Tau ta oea esau i uneunei, ena abi-baaea maisana monina eai; abotai ie beu, i hedonapile bogana i taigari, sinaena i dabalalagorigori. ¹⁹ Ierusalemata taumiaina gamagaridi wasana se ataieyao; isi arinadi mamohoi eai oea ta esana se tore Akeladama, arinai ede si ene, Osina Oeana). ²⁰ Paana ede se uriyao Wana bukana eai, si ene, ‘Ena numa dalabu tabu esau arinai i mia’; (Psa. 69.25) eo ‘Ana paisoa mo taba esau abo i abi.’ (Psa. 109, 8). ²¹ Arinai taba ada sasaguyao esau, huia gamagari maeda ta lau esega, huia ne Guiau Iesu maeda ta sae ta dobi, ²² Ioane ena bapatiso huia hetubuna eai i laoma e asubenana ne arida eai se abiisini wa — tatao ta aridi eai esau ta hetoro, ena torouio ribana maeda abo ta hemasaraaha.” ²³ Tatao labui abo se hetorodi, Iosepa Barasaba, ia esana lailai ede Iusetu, eo Matatia. ²⁴ Abo se lau uura si ene, “Guiiau e, oa tatao gamagaridi nuadi u itadio, taudi labui ta aitea u nuanuaiei ede, u heribamai, ²⁵ teina paisoa ta bena tupona abo i abi, abo i hemala aposotolo hinage; paisoa wa Iuda i nuagabaei, i lauo iabom ena abamia eai.” ²⁶ Edi kelero se ginauri, kelero ie taru Matatia arinai, ia abo se hasiri-esegai aposotolo saudoudoi-esega aridi eai.

2

Penetekoso: Petero ki wa i hepaisoaei
Mt. 16.18, 19

evanelia se mosei Iudea tataodi aridi eai
A. adi H. 10.1-48

¹ Penetekoso asubenana ie lage, dimo esau eai isi gamagaridi se oigogo esega, nuadi esega. ² Maesega dagugu galewa eai i laoma, doha mana lailai i nu’unu’u, edi aba bawa numana i monau boriboriri. ³ Memenadi se tai’igaigari doha oeagi alaalasi memenadi se taumasaraaha, esau eo esau potadi eai se taru. ⁴ Isi gamagaridi Earua Tabuna i hemonaudi, hari arina, hari arina, se ribaedi doha Earua awadi i hemamaladi.

⁵ Iudea tataodi Eaubada matausina taumatausi, Ierusalemata eai se miamia, eanua gamagaridi tanoubu eai ta se laolaoma. ⁶ Arinai abo wasana ie lau, moutuana lailai se oigogoma, aruadi se loi, paana ede esa, esa, riba se ataiedi doha arinadi mamohoi eai. ⁷ Isi gamagaridi se noo ariri, abo se heunaboisaha si ene, “Ina tatao gamagaridi se ribariba ta,

Galilaia tataodi, e nige'e wa? ⁸ Edohana gamagarida arinada mamohoi doha edi aba labasida arinada ta atailobai ta? ⁹ Peretia tataoda, eo Mede tataoda, eo Elama, eo Mesopotamia taumiaina, eo Iudea, eo Kapadokia, eo Ponoto, eo Asia, ¹⁰ Perugia eo Pamepulia, Aigupito, eo Libia tupona Kurene tehana eai, eo Roma tataodi inai se miahebohebori, isi headi Iudea eo headi se hemala Iudea, ¹¹ Kereta eo Arabi tataoda; isi Eaubada ena laulau gigibori se ribaribaedi, ita ta ataiei arinada mamohoi eai." ¹² Isi gamagaridi aruadi se loi, nuadi se ponopono, se heunaboisaha se oiriba si ene, "Aniona saha ina?" ¹³ Na headi se talawasi, si ene, "Isi waina harihariuna se nomdao i ede."

Petero ena guguia. Riba paana: Iesu Guiau ede, eo Keriso.

¹⁴ Na Petero, eo saudoudoi-esega se toro, ia i arina lailai, i ribalau aridi eai i ene, "Omi Iudea tataomiu e, eo Ierusalem taumiaina e, teina ta au nuatui, eo egu riba ta bena au ataiei. ¹⁵ Tatao ta nige se nom eauyaure, wau aue riba wa, abo ina asubena mahana hehaionana mo; ¹⁶ teina ta doha ede Ioela peroveta i ribaei wa:

¹⁷ 'Huia murimuritadi eai, Eaubada ie riba, Earuagu abo ea hegoi-auri buluma gamagari potadi eai, eo nanatumiu yao tatao eo sisine abo se riba-peroveta, ami hewahewari tautau matadi eai abo se ita, emi tautaubada enosuai abo se enosuaiei;

¹⁸ e, abo egu heaheari tatao, eo egu heaheari sisine potadi eai Earuagu ea hegoidobei, abo se riba-peroveta.

¹⁹ Nabutua galewa ewana eai abo ea torehemasarahadi, heiheinoidi tanoubu eai hinage, osina eo oeagi alaalasi, eo asu madagauna;

²⁰ Mahana abo i hemala masigiri, eo nawalai i hemala osina, abotai abo Guiau ena asubena i laoma, asubena lailai, wasana i lai ariri, abo i lage.

²¹ Arinai abo isi esa, eo esa, Guiau esana se ataatai, abo se mauri.'

²² "Isaraela tataomiu e, teina riba ta au ataiedi: Iesu Nasareta, ia tau wa arimiu eai Eaubada i hedebasae laulau gigiboridi eai, eo laulau noonoodi, eo heiheinoidi hinage ia nimana eai Eaubada i ginauridi boeamiu eai, doha hinage abina au atao wa— ²³ teina Iesu ta se moselaei, doha Eaubada mumuga eai dobilana i nuatunonohaiyao, ia aue abi, ni-mamiu baeadi eai au hesatauro, eo au unuhemate. ²⁴ Na Eaubada i hetorouioi mate amamnadi eai ie iairihai, paana ede mate ia taba nige i abididini. ²⁵ Doha Davida enana i ribao, i ene,

'Guiau matagu eai ea iita, huia gamagari,

ia nima-tutugu eai, arinai nige ea moimoiu;

²⁶ arinai nuagu i lolo, memenagu ie kode;
 egu sunuma eai bulumagu abo i aiyawasi.

²⁷ Paana taba nige earuagu u nuagabaei Hade eai,
 taba nige u eari em Hetabu Tauna bulumana i posa.

²⁸ Mauri dobilana oa u heitagu;
 oa nuanuam eai abo ea kode ariariri.'

(Psa. 16.8-11).

²⁹ "Egu tataoyao e, urutubuda Davida ribana bena ea heribakomakomanimiu, ia i mateo eo se toreyao, ia bousana ita arida eai, i laoma e huia ta. ³⁰ Paana ia peroveta, i nuatuiyao hinage Eaubada ia arinai i aigorayao i ene, ia bogana eai esau abo i tubuma, ena terona potana eai abo i bawa, ³¹ i itanonohaiyao Keriso ena torouio, ribana i ribaei hinage i ene ia Hade eai earuana taba nige se nuagabaei, ia bulumana taba nige i tatagorigori (Psa. 16.10).

I torouio arinai ta ene ia Guiau ede eo Keriso.

³² "Eaubada wau Iesu wa i hetorouioi, ai gamagarimai matamai eai ai itayao. ³³ Ia se hedebasae Eaubada nimatutuna eai ie bawa, Tamana ena ribahesunuma, Earua Tabuna wa, i abiyao, iaede i hegoidobeama, doha wau au itayao, eo au ataieyao. ³⁴ Davida sora nige i awasae galewa eai; na iabom mo i ene,

'Guiiau i ribalau egu Guiau arinai, Oa nimatutugu eai u bawa,
³⁵ i lau e am waiunuyao ea abidi se hemala aem ana bou.'

(Psa. 110.1).

³⁶ Arinai omi Isaraela numamiu gamagarimiu au nuatui komakomani wau Iesu omi au hesatauro wa, Eaubada i abi i hemala Guiau, eo i hemala Keriso hinage."

³⁷ Riba ne se ataiei, atedi se taigari, se ribalau Petero eo aposotolo aridi eai, si ene, "Omi tatao e, eo ema tataoyao e, ai abo ai saha?" ³⁸ Petero i ribalau isi aridi eai i ene, "Nuamiu au buidi, esau, esau, abo se hebapatisoimiu Iesu Keriso esana eai, baaea aba-ribagigirina ede, ainauia abo au abi, iaede Earua Tabuna. ³⁹ Paana ribahesunumana ede enamiu, eo nanatumiu yao enadi, eo isi taumia eda lohaloha eai enadi, isi gamagaridi esau, esau, Guiau eda Eaubada abo i eogai ia arinai." ⁴⁰ Riba gamagaridi hinage i ribaedi, arinai i heatadi eo i headidiridi, i ene, "Isina baaeana eai ta au hemauiuiomiu." ⁴¹ Arinai isi ena riba tauataiei se hebapatisoidi, ma nualolodi; nei asubenana ne doha tatao tausani haiona se patulau aridi eai.

Ekalesia bagubagunana.

A. adi H. 4.32-37

⁴² Se moseuioidi aposotolo edi laulauheata arinai, eo edi heoiesega abiabina, areto se ihiihi, eo se uura hinage, ma

nuaadidiridi. ⁴³ Isi gamagaridi, esa eo esa, matausi i hearodi; aposotolo gigibori gamagaridi, eo heiheinoidi, se ginauridi. ⁴⁴ Isi gamagaridi tauataiena se miagogo, edi ginauri gamagaridi se abidi gonogonoadi; ⁴⁵ edi oea se unedi, eo edi gogo hinage se soiedi tatao gamagaridi se heona gonogonoadi. ⁴⁶ Asubena gamagaridi se laulaugogo numa uura eai, eo se lau hari numa, hari numa, areto se ihi, aiai se ai, nuadi se lolo, eo nuadi esega. ⁴⁷ Eaubada se hedebasae, eo tatao gamagaridi se nualoloedi. Na asubena gamagamagari Guiau headi i hepatalaedi ekalesia eai, isi taumauri wa.

3

Aposotolo laulau gigibori se hetubu: taulaulaudae se hemaui.

¹ Na Petero eo Ioane se lau esega, se awasae numa uura eai, mahana haligigi-hasi eai, uura huiana ede. ² Taulaulaudaena esau, sinana bogana eai doha ede, se bahei, asubena gamagamagari se heota numa uura dohilana eai, dohila ne esana ede Lolona, tatao se laulau numa uura alona eai bena i awanorilau aridi eai. ³ Ia Petero eo Ioane i itadi bena se awasae numa uura alona eai, abo i awanorilau aridi eai. ⁴ Petero i ita-dudurai ia arinai, maena Ioane, si ene, “U italaoma arimai eai.” ⁵ Edi riba i ataiei paana i sunumawataidi bena abo ginauri esana se mosei enana. ⁶ Na Petero abo i ene, “Nige egu *silver*, eo nige egu *gold*, na ginauri arigu eai ea aabi ta abo ea leawa enam, Iesu Keriso Nasareta tauna esana eai u torohai, u laulau.” ⁷ I abilau ia nimatutuna eai, abo i abihetoro; ma-esega abo ia aelaulauna eo aematamatapouna se adidiri. ⁸ I lamposi i toro ie lau, maedi se awasae numa uura alona eai, i laulau, eo i lamposi, eo Eaubada i aihelahui. ⁹ Tatao gamagaridi se ita i laulau, eo hinage Eaubada i aiaihelahui, ¹⁰ se nuatuiyao ia tau awaawanori wa, numa uura dohilana Lolona eai huia gamagari i babawa, wau laulau ia arinai ie tubu, arinai aruadi se loi, eo se noo ariri. ¹¹ Taulaulaudaena se hemaui wa, Petero eo Ioane i abididinidi, tatao gamagaridi se aिताугого se lau aridi eai, Solomona ena dohila sorasorana eai, se noo ariariri.

Petero ena guguia helabuina. Riba paana: ribahesunuma wa abo se hemamohoei.

¹² Petero i itadi i ribalau tatao aridi eai, i ene, “Omi Isaraela tataomiu e, teina ta sahana au nooei? Au matabarabaraimai ta bena aibom ema gigibori eai, eo ema lolo eai, tau ta ai helaulau ta? ¹³ Aberahama ena Eaubada, eo Isaako, eo Iakobo, tamadayao edi Eaubada, ia Natuna Iesu i hedebasaei; ia au moselaei, eo Pilato matana eai au harerei, ena nuatu ia

bena i iairigabaei wa. ¹⁴ Na Hetabu Tauna eo Taulaulaududuraina au harerei, na tauaiununa au henua bena se leawa. ¹⁵ Mauri Paana au unui, mate eai Eaubada ia i hetorouioi; ai tauitana ede. ¹⁶ Ia esana, ema sunuma ia esana eai, tau ta arinai i adidiri, ia au itayao, eo au nuatuiyao: Iesu sunumaena arinai i adidiri ta omi gamagarimiu matamiu eai.

¹⁷ “Na ehaguyao e, ea nuatuiyao au supusupu, arinai ede ia au unui, ami tanuaga hinage ia se unui. ¹⁸ Mumuga eai Eaubada i ribaeyao ena peroveta gamagaridi awadi eai, i ene Keriso amamna abo i hearo, se hemamohoiyao. ¹⁹ Arinai ede nuamiu au buidi, abo au hemala tatao udoi, emi baaea abo se sauhaidi, abihemauriuio huiana abo Guiau matana eai i lagema; ²⁰ ia Iesu Keriso abo i hetamariama, ia ede se guguiabagunaimiuo. ²¹ Galewa i abididini, i lau e ginauri gamagamagaridi se heduduraiuioi, doha Eaubada peroveta tabudi gamagaridi awadi eai i ribaei, tanoubu ena huia hetubuna i laoma e, huia ta. ²² Riba mamohoina Mose i ribaei tamadayao aridi eai, i ene, ‘Peroveta esau arimiu eai Guiau emi Eaubada abo i hetoro, emi tau esau doha ede eau: riba gamagaridi ia i heribamiu abo au ataiedi. ²³ Abotai abo esa, eo esa, wau peroveta wa nige se ataiei, abo tatao boeadi eai se unuhinehineridi.’ ²⁴ Hinage peroveta gamagamagari Samuela arinai ie tubu eo isi gamagaridi hinage ia se helaudamai, ina asubenadi ta se ribanonohaidio. ²⁵ Omi peroveta nanatuidiyao, eo Eaubada tamamiu i guguiaidio, ie riba Aberahama arinai, i ene, ‘Tumamyao aridi eai tatao gamagaridi tanoubu eai ta abo ea helolodi.’ ²⁶ Omi se hebagnamiu, Eaubada ia natuna i hetoro abo i hetamariawa bena i helolomiu, ia arinai gamagarimiu emi baaea au sinibuiga-baedi.”

4

Heamamna bagubagunana.

¹ Taudi labui tatao se guguiaidi, kohena tataodi eo numa uura kapenana, eo Sadukea se laoma aridi eai, ² nuadi se baaea paana ede tatao se heatadi, eo tatao se guguiaidi, si ene, Iesu debana eai mate eai abo se torouio. ³ Isi nimadi eai se abilau aridi eai, i maimailahio arinai se toredi numa tutugudu eai i lau e mara ie tom. ⁴ Tatao gamagaridi riba wa se ataiei, se nuatuwatai; tatao se hasiridi, tausani haligigi.

Petero sunederi i guguiaidi.

⁵ Arinai i lau e mara-ie-tom, isi adi tanuaga headi, eo edi babada headi, tauuriuri tataodi maediyao Ierusalemia eai se oigogo, ⁶ Ana, kohena lailai hinage, eo Kaiapa eo Ioane, eo Alesana, isi gamagaridi hinage kohena lailai ana bogaoyao. ⁷ Taudi labui se hebawadi duaduaridi eai, se oimuridi, si ene,

“Gigibori esana, eo eai esana eai, wau laulau wa au laulauei?”
⁸ Petero Earua Tabuna arinai i monau, i ribalau aridi eai, i ene, “Omi tatao adi tanuagao, eo Isaraela babadadiyao.
⁹ Wau au oimurima taumai labui arimai eai teina abiabi lolo taulaulaudaena wa arinai, edoha ena maumauri; ¹⁰ omi gamagarimiu, eo Isaraela tataodi gamagaridi hinage, au nuatui, Iesu Keriso, Nasareta tauna debana eai, ia au hesatauroyao, mate eai hinage Eaubada ia i heterouioi, tau ta matamiu eai i toro, eo tauna se lolo. ¹¹ We’una ede ina omi tauabinuma au otaotaei, abo i hemala numa ewa isuna we’una. ¹² Hinage taba nige mauri se abi tau esau arinai: galewa ubuna eai ta nige esau esana se moselaei tatao aridi eai, arinai abo ta mauriei.”

Se ribaguduguidi, tabu Iesu wasana se guguiyai.

¹³ Petero eo Ioane edi adidiri se ita, eo isi se nuatui taudi labui nige tauheatadi, eo isi tatao supusupudi, se nooedi; se nuatulobaiyao isi Iesu maedi se miamia. ¹⁴ Wau tau wa se hemaui wa se ita, maedi se toroesega, arinai nige edi aba ribalau. ¹⁵ Isi se duiedi se lau numa murimurina eai, abo isibom se oioiriba, ¹⁶ si ene, “Tatao ta edoha eda abiabidi? Mamohoi tatao labui ta heiheinoi gigiborina se hemasarahayao Ierusalemataumaiaina gamagaridi matadi eai, taba nige eda aba harereedi. ¹⁷ Taudi labui ta ta ribahemahematausidi, ata wasa ta se helai, isi Iesu esana wa tabu se ataataiuioi tau esau arinai.” ¹⁸ Se eogaidi, abo se heribadi Iesu esana tabu se ribaei, eo tabu se laulauheataei. ¹⁹ Petero eo Ioane abo se ribalau isi aridi eai, si ene, “Aitea i dudurai ede Eaubada matana eai, emi riba me ai ataiei, e Eaubada ena riba ai ataiei, hage au ribama. ²⁰ Ginauri ai itadi eo ai ataiedi taba ai ribaribaedi hinage.” ²¹ Taudi labui se riba hemahematausiuioidi, abo se abigabaedi, bena se hemaisadi nige adi matapaana, paana ede tatao gamagaridi Eaubada se awamamohoei wau laulau wa arinai. ²² Tau wa, laulau gigiborina arinai se hemaui wa, ena borimai tatao-labuise mate eo hisa se lauo.

Earua i hemonauuioidi:

A. adi H. 2.1-4

²³ Isi se abigabaedi abo se lau ehadiyao aridi eai, kohena lailaidi, eo edi babada, edi riba gamagaridi se heribadi. ²⁴ Isi nei ribana ne se ataiei, ma nuaesegadi se eogasae Eaubada arinai, si ene, “Guiiau e, oa Eaubada ede, galewa tauginaurina, eo gabogabo hinage, eo ginauri gamagaridi boeadi eai, ²⁵ em heaheari tauna Davida awana eai u ribaei Earua Tabuna debana eai, u ene, ‘Etene se saha se ouyalayalaei, tatao se saha se nuanuatu gaibu mo?’

²⁶ Tanoubu wasawasadi se totoro-lele,
Tanutanuagadi se oigogoesega,
Guiau bena se laugudugudui,
eo ena Keriso hinage:’

²⁷ mamohoi, em heaheari tauna tabuna Iesu, ia u heyausiyao, ina eanua eai ta bena se laugudugudui; Heroda eo Ponotio Pilato, maedi Murimuri-tataodi hinage, eo Isaraela tataodi gamagaridi, se oigogoesegaidi, ²⁸ laulau gamagaridi bena se ginauridi, em nuatu eai eo em sonoga eai nabada wa se ribaedi abo se tubu. ²⁹ Guiau e, edi riba matamatausidi u nuatuidi: em heaheari tataodi u headidiridi, isi abo em riba se ribaei ma nuapaipaidi. ³⁰ Nimam u helelelaei u abihemauridi: em heaheari tauna tabuna Iesu esana eai heiheinoidi eo noo ginauridi abo se ginauridi.” ³¹ Isi se lau-uura lautom, abo edi aba oigogo wa i tabutabubu, isi gamagaridi Earua Tabuna se monau, Eaubada ribana abo se ribaei ma nuapaipaidi.

Ekalesia edi laulau Ierusalema eai

A. adi H. 2.42-47

³² Tauataiena gamagamagari nuadi esega mo, eo edi nuatu esega: nige esau i ene egu gogo ta ea heseriedi; se heona gonogonoadi mo. ³³ Aposotolo Guiau Iesu ena torouio ribana se riba hemasaraha ma gigiborina: ainauia lailai i ota isi gamagaridi potadi eai. ³⁴ Aridi eai hinage nige tau esau ie deha; gamagaridi edi oea eo edi numa se abidi, se uneunedi, ginauri se uneunedi wa maisadi se laedi, ³⁵ aposotolo aedi eai se peiauridi, abo se heona, esa enana, esa enana, arinai abo se hegonoahidi. ³⁶ Iosepa, aposotolo ia esana se tore Banaba (heaheasonina ede Nuabiga natuna), ia Kuperu tauna, boga Levi, ³⁷ ena oea i abi, i uneunei, monina abo i laei aposotolo aedi eai ie tore.

5

Anania eo Sapira edi baaea eo edi mate ribana.

¹ Na, tau esau esana ede Anania, ma monena esana ede Sapira, isi taudi labui edi oea se uneunei. ² Oea maisana tupona i nuahi, ma monena edi nuatu esega mo, tupona i laei i tore aposotolo aedi eai. ³ Petero i ene, “Anania e, ie saha Satani nuam i hemonau, eo Earua Tabuna u borai oea maisana wa tupona u nuahi? ⁴ Nabada wa oea enam otaotana e nige’e? U uneunei, maisana hinage oabom enam e nige’e? ue saha em nuatu doha ina ta? Tatao nige u boraidi, na Eaubada mo u borai.” ⁵ Anania teina riba ta i ataiei ia abo i guridobi, i niusigabaei ie mate: isi gamagaridi wasana se ataiei se matausi ariri. ⁶ Hewari headi se torohai, ia tauna se umui, se bahelaei, se tore.

⁷ Abotai mahana haiona murina eai, monena i lulagema; wau wasa sora nige i ataiei. ⁸ Petero i ribalau ia arinai, i ene, “Enagu u ribama oea au uneunei wa maisana ede ina?” Ia abo i ene, “E, iaede.” ⁹ Petero i ribalau ia arinai i ene, “Taumi labui aue saha au oiriba bena Guiau Earuana au nohoi? Isi monem tautorena dobila eai se totoro, oa hinage abo se bahelaem murimuri eai.” ¹⁰ Ma esega abo i guri dobi Petero aena eai, ie tubahai: hewari wa se laoma, se ita i mateo, to se bahelaei, monena hasarina eai se tore. ¹¹ Ekalesia gamagaridi, eo isi gamagaridi hinage teina wasa ta se ataiei, se matausi ariri.

Ekalesia tabuna ena gigibori

1 Tes. 1.1-10

¹² Heiheinoi gamagamagaridi, eo noo gamagamagaridi aposotolo nimadi eai se ginauridi tatao boeadi eai: (isi gamagaridi nuadi esega mo, se oigogo Solomona ena dobila eai. ¹³ Isi headi, hari tatao, se matausi, arinai nige se patulau aridi eai: tatao mo isi se ribatausaedi. ¹⁴ Tauataiena se patulau Guiau arinai, moutuadi tatao eo sisine). ¹⁵ Arinai tauasiasiebo tataodi abo se woeaidi eanua dobiladi eai: eo hatahata eo aba-eno potadi eai se heotadi; Petero i laulauhasaridi eai ia tautauna bena se ailoguloguei. ¹⁶ Eanuadi ne Ierusalem se hetaiiri moutuana se oigogoma, tauasiasiebo tataodi se ledima, eo isi earua biibii tauluidi se heouyalayalaedi: isi gamagaridi, esau eo esau, abo se hemauidi.

Heamamna helabuina.

¹⁷ Abotai abo kohena lailai i toro, isi gamagaridi maenayao hinage (isi ede Sadukea peledi), se aiaromagigiri-aririedi. ¹⁸ Apostolo se toaidi numa tutugudu eai, se toredi. ¹⁹ Guiau ena aneru esau maiona boeana eai, numa tutugudu dobiladi i soedi, i woeahaidi murimuri eai, i ene, ²⁰ “Au lau, au toro numa uura alona eai, teina mauri ta ribadi gamagaridi au ribaedi.” ²¹ Teina riba ta se ataiei, mara-ie-tom se lau numa uura alona eai, arinai se lauheata.

Kohena lailai i lagema ma ana sasaguyao sunederi se heoigogoidima, eo Isaraela nanatunayao edi babadayao gamagaridi, headi se hetamaridi se lau numa masigiri eai, aposotolo bena se woeahaidima. ²² Tatao wa se heterodi wa se lau nige se lobaidi numa tutugudu eai, abo se uio se heribadi, ²³ si ene, “Numa masigiri ai ita se gudu komakomanini, tautaitawata hinage dobila gegesidi eai se totoro: na aie soe, nige tau esau aie ita alona eai.” ²⁴ Kohena lailai eo numa uura kapenana eo kohena lailaidi headi teina riba ta se ataiedi, se nuatudadaasa, si ene, “Wasa ta nuana abo ie tubu.” ²⁵ Esau abo i lagema, i heribadi, i ene, “Tatao au tutuguidi wa isi ede numa uura alona eai se totoro, tatao

se lauheatadi.”²⁶ Kapenana eo tauitaitawata se lau aposotolo se woeakomakomanidima: na eanua tataodi se matausiedi si ene ata tatao se lauwe’uidi.

²⁷ Se woanonohaidima, abo se hebawadi sunederi nu-anuadi eai: kohena lailai i oimuridi,²⁸ i ene, “Lahinai ai heribakomakomanimiuo, e nige’e? ai ene, Tabu ia esana eai au lauheata? Emi riba Ierusalemia i lau girihaiyao, teina tau ta osinana giruna bena au hegeumai wa?”

Aposotolo se riba heuio.

²⁹ Petero eo aposotolo gamagaridi arinadi se heuio si ene, “Eaubada taba ai awaabiei, na tatao mo nige ai nuatuidi.³⁰ Ita tamadayao edi Eaubada Iesu i hetorouioi, iaede au unui wa, eo au heabasi oegi ewana eai.³¹ Eaubada nima-tutuna eai ia i hedebasaei abo i hemala Wasawasa, eo i hemala Tauhemaui, Isaraela bena abo i henuabuidi, baaedi abo i henuatugabaedi.³² Teina ginauridi ai tauribahemasarahadi ede: Earua Tabuna hinage ia ede Eaubada i mosei tauawaa-biena aridi eai.”

Gamaliela ena riba hesanapu.

³³ Teina riba ta se ataiei, atedi se taigari, se oioiriba bena abo se unuidi.³⁴ Na tau esau i toro sunederi eai, ia Parisea tauna esana ede Gamaliela, laugagaeo taulaulauheataina, tatao gamagaridi ia se heaheasisiei, i lauhesomdi i ene aposotolo au hebawasuaradi sora.³⁵ Abo ie ribalau aridi eai, i ene, “Isaraela tataomiu e, au komakomanimiu nei tatao ne aridi eai.³⁶ Doha nabada Tuida i toro, iabom i awatausaeuioi, tatao handere hasi se patulau ia arinai: ia abo se unuhemate, ia tauwaabiena gamagaridi hinage se tatagorigori, abo se lautom.³⁷ Wau tau wa murina eai eanua tataodi edi huia hasiridi eai wa, Iuda, Galilaia tauna, abo i toro tatao gamagaridi ia i niurigogoidima ia murina eai, hinage awana se abi, ia hinage abo se unui: isi hinage gamagaridi tauwaabiena abo se tatagorigori.³⁸ Ea heribamiu ta, ea ene, teina tatao ta tabu au hesabaidi, se otawa: ena teina riba ta eo paisoa ta tatao isibom se hetubu, abo i lautom.³⁹ Ena Eaubada i hetubu, taba nige au heguri, Eaubada ata au heialagudugudui.”

Aposotolo se pidiridi.

⁴⁰ Ena riba wa abo se nuatuwatai: aposotolo abo se eogauioidima se pidirinonohaidi, abo awadi se tawaidi, si ene Iesu esana tabu se ribaei, e abo se abigabaedi.⁴¹ Isi sunederi matadi eai se torohai se lau, se kode ariri paana ede Iesu debana eai baaea se hearo.⁴² Asubena gamagamagari numa uura eai, eo numa gamagaridi eai Iesu Keriso wasana se lauheataei eo se lauguguaei, nige edi aba lautom.

6

Diakona bagubagunadi.

¹ Nei asubenana ne tauataiena tataodi se hetadada, Heleni tataodi se gadigadiguguedi paana ede asubena gamagama-gari ai ai se soisoiei, Heleni wabuwabudi adi nige se mose-mosed. ² Saudoudoi-labui wa tauataiena tataodi moutuana se eogaidima, si ene, “Nige i dudurai Eaubada ena riba guguiaina ai abigabaei, na ai ai paisoana bena ai abi. ³ Ema tataoyao e, hage tatao haligigi-labui arimiu eai au itasipoidi, wasadi se lolo eo Earua Tabuna se monau, eo se sonoga hinage, abo ai heterodi teina paisoa ta abo se abi. ⁴ Na ai abo huia gamagari ai moseuioimai lau-uura eo riba paisoana arinai.” ⁵ Edi riba wa moutuana maudoina se ataiei, nuadi se lolo, isi abo Setepano se hineri, Eaubada tausunusunuma-adidirina esau, eo Earua Tabuna hinage i monau, eo Pilipo, eo Porokoro, eo Nikanora, eo Timona, eo Paramena, eo Nikolao, Anetioka tauna i hemala Iudea. ⁶ Tatao ta se hebawadi aposotolo matadi eai, se uura abotai abo nimadi se toresae isi potadi eai.

⁷ Eaubada ena riba i tadada lailai; tauataiena Ierusalem eai abo se gamagari ariariri; kohena tataodi se gamagari ariri isi hinage riba wa se awaabiei.

⁸ Sunuma eo gigibori Setepano i monau, arinai ede hei-heinoi eo noo i hetubudi tatao matadi eai. ⁹ Sunago tataodi headi se toro, sunagona ne esana ede Libetino edi sunago, eo Kurene tataodi hinage, eo Alesanederea tataodi hinage, eo headi Kilikia eai se laoma, eo Asia, isi hinage maedi Setepano se haiawaeagara. ¹⁰ Ia ena riba se sonoga, ma earuana i ribaei, isi bena se heuio nige abina se ata. ¹¹ Isi tatao headi se heterodi isi abo si ene, “Ai ataeyao ia i riba-baeae, Mose eo Eaubada i ribabaeaeidi.” ¹² Tatao, eo edi babada hinage eo tauuriuri nuadi se heasiwolewoledi, abo se lau ia hesabana, se toai, se woalaei sunederi aridi eai. ¹³ Tauboraborasom abo se heterodi, si ene, “Teina tau ta eda asa tabuna ta, eo eda laugagaeo ie riba baeaeidi, nige i riba-lautom. ¹⁴ Ena riba ai ataiei, i ene, Teina Iesu Nasareta tauna ta, dimo ta bena abo i hetatagorigori, laulau hinage Mose i ledima bena abo i abiudoiedi. ¹⁵ Isi gamagaridi sunederi eai se bawagogo ia se itaitai, ana ao doha aneru ana ao itaitana.

7

¹ Kohena lailai abo i ene, “Teina riba ta riba mamohoi wa?”

Setepano kaunisela i guguiaidi. Ena riba paana: Isaraela edi awaeagara.

² Setepano i ene, “Tatao e, egu dodogayao e, eo tamaguyao e, au ataiei, Eaubada namanamarina i hemasaraaauri tamada

Aberahama arinai, huiana Mesopotamia eai ie mia, sora nige ie mia Harana eai. ³ Ie ribalau ia arinai i ene, ‘Em eanua u laugabaei, eo am bogaoyao u laugabaedi, oea esau abo ea heitam abo u laoma arinai.’ ⁴ Kaleda oeano abo i laugabaei, Harana eai i mia: metai ia tamana ie mate, Eaubada abo i woaiyama ina oea eai ta, arinai au miahai. ⁵ Nige ena oea begana i mosei, nige aena ena aba utuutuena, nige ariariri: taiede ia i ribahesunumaauri, ia sora nige natuna, i ene abo i mosei enana, eo ia tumanayao enadi hinage. ⁶ Eaubada i ribalau ina doha, i ene ia tumanayao oea udoi eai abo se mia; isi abo se toaidi, eo se hepaisoaidi, eo borimai handere hasi abo se hebaaeadi. ⁷ Eaubada hinage i ene, ‘Eanua wa isi se hepaisoadi wa abo sora ea hegirudi: abotai abo se lulage ina dimo eai ta, egu heaheari eai abo se lau.’ ⁸ Peritome laugagaeona ia i mosei ia arinai: Aberahama Isaako i hetubu, asubena hehaligigi-haionana eai abo hinage se heperitomei; Isaako hinage Iakobo i hetubu; eo Iakobo tubudayao saudoudoi-labui i hetubudi. ⁹ Tubudayao Iosepa se aiaromagigiriei, ia abo se uneunei, se laei Aigupito eai; na Eaubada mo ia maena. ¹⁰ Ena nuadubu gamagamagari aridi eai Eaubada ia i hemaui; hinage lolona eo sonogana i mosei ia arinai Parao Aigupito wasawasana matana eai; Parao Iosepa abo i hetoro, Iosepa abo Aigupito edi gavana eai i lau, eo Parao ena numa tanuagana eai ie lau hinage. ¹¹ Aigupito gamagaridi eo Kanana oeadidi hinage, guriam lailai aridi eai ie tubu, se nuadubu ariri: tamadayao aiai nige adi aba lobaina. ¹² Iakobo aiai wasana i ataiei, Aigupito eai edi masuri se hesaeauri, arinai tamadayao i hetamaribagunaidi se lau. ¹³ Edi lau helabuina eai abo Iosepa iabom i hemasarahauioi ena tataoyao aridi eai, Iosepa ana bogao hinage Parao abo se heita. ¹⁴ Abotai abo Iosepa i hetamaridi se lau tamana Iakobo se heribayama, maena ana bogao gamagaridi, tataodi tatao-haiona-se-mate saudoudoihaligigi hinage; ¹⁵ arinai abo Iakobo i dobi Aigupito. Nei eai abo ie mate, ia eo tamadayao, ¹⁶ abo se baheuioidi se laedi Sekema eai, se toredi bousa eai wa Aberahama moni arinai i uneauriyao Emora nanatunayao aridi eai, Sekema eai.

¹⁷ “Huiana Eaubada Aberahama i ribahesunumaiei wa i hanahanauma, tatao se hetadada ariri Aigupito eai ¹⁸ i lau e edi wasawasa esau ie tubu, ia Iosepa nige i nuatuwatai. ¹⁹ Ia ada bogao wa i abibaeaidi, tamadayao i hetaladuidi nanatuidiyao gagiridi se gabagabaedi, ata si mauri. ²⁰ Nei huiane Mose se labasi, ana ao i lolo ariri Eaubada matana eai. Ia nawalai haiona numa eai se hemahemadoyamui; ²¹ ia se gabaeyao wa, Parao natuna siu i abiisinyama, abo i labahai doha himage ia natuna mamohoi. ²² Aigupito edi sonoga

gamagamagari Mose i ata heohidio; ena riba eo ena laulau hinage aridi eai i adidiri ariri.

²³ “Ena borimai tatao-labui-se-mate se ohi, ia nuana bena i lau ana bogao i itauioidi, Israela nanatunayao wa. ²⁴ Ia matana eai esau se abi-baaeai, ia abo i sagui, tau se hebaaea wa i hemaui, Aigupito tauna mo i unui. ²⁵ Nuana eai i ene ena tataoyao abo se italobai, Eaubada abo i hemauidi ia nimana eai, na isi nige se nuatui. ²⁶ Mara-ie-tom abo tatao labui se lululu, abo i taumasaraha bena i laubiriedi, i ene, ‘Tatao e, omi boga esega, aue saha au hebahebaeaeuioimiu?’ ²⁷ Esau wa ehana i hebaaea Mose i heduiahalai, i ene, ‘Eai i ribaei oa ama tanuaga, eo oa tauhekirainomai eai u lau? ²⁸ Bena u unuigu wa, doha lahi Aigupito tauna esau u unui wa?’ ²⁹ Teina riba ta Mose i ataiei abo ie dago, ia Midiana eai i miaheboheboriedi, nei eai nanatunayao labui i hetubudi.

³⁰ “Borimai tatao-labui-se-mate se lautom. Guiau ena aneru esau i taumasaraha ia arinai Sinai tupina barabarana eai, aneru wa oeagi alaalasina boeana eai i taumasaraha. ³¹ Mose i itaitalau, i noonooei; i lau gegesina eai, bena i itakomakomani, Guiau arinana i laoma ia arinai. ³² I ene, ‘Eau tamamyao edi Eaubada, Aberahama ena Eaubada, eo Isaako ena Eaubada, eo Iakobo ena Eaubada.’ Mose abo i tabutabubu, nige i itaitalau arinai. ³³ Guiau abo i ribalau ia arinai i ene, ‘Am ae’um aem eai me u abihaidi: em aba totoro me dimo tabuna. ³⁴ Egu tataoyao edi amamna Aigupito eai ea itayao, edi lepalepa ea ataieyao, hinage ea dobima bena ea hemauidi. U laoma, abo ea hetamarim u lau Aigupito.’

³⁵ “Teina Mose ta, ia se lauparihbaeyao wa doha si ene, ‘Eai i ribaei oa ama tanuaga, eo tauheduheduduraimai eai abo u lau wa?’ Ia ede Eaubada ia abo i hetamari adi tanuaga, eo tauhemauidi, aneru nimana eai i taumasaraha oeagi alaalasina alona eai. ³⁶ Ia i woelaedi, noo ginauridi i ginauridi, eo heiheinoi Aigupito eai, i heitadi Gabogabo esana Buiabuiana eai hinage, eo barabara eai hinage borimai tatao-labui-se-mate. ³⁷ Teina Mose ta ia ede i ribalau Israela nanatunayao aridi eai, i ene, ‘Peroveta esau Guiau emi Eaubada abo i hetoro omi arimiu eai, emi tau esau abo doha eau; ia taba au ataiei.’ ³⁸ Ia ede ina ekalesia boeadi eai barabara eai aneru maenayao Sinai tupina eai se ribariba, maedi tamadayao hinage; mauri ribadi hinage i abidi abo i ledima arida eai. ³⁹ Ena riba ita tamadayao nige se awaabiei, ia se heduiahalai, isi nuadi se uiouio mo Aigupito eai. ⁴⁰ Isi Arona se heriba si ene, ‘Eda eaubada headi oa u ginauridi abo se edabagubagunaeda: paana ede teina Mose Aigupito eai i woaidama wa ia haedi i laulau, nige ta itaitai.’ ⁴¹ Nei huiana ne isi bulumakau healana esau oitauna se ginauri,

oitau wa arinai se aitalasam; ginauri nimadi eai se ginauri wa abo se kodei. ⁴² Arinai abo Eaubada i lausuaaraedi, ia abo i nuatugabaedi, isibom abo galewa ginauridi se aihelahuidi; doha peroveta bukana eai se uriyao si ene:

‘Bulumakau gorigorinonohaidi, eo aitalasam ginauridi, matagu eai aue toredi, Isaraela numamiu e?

omi barabara eai wa, borimai tatao-labui?

⁴³ Edohana Moloka ena numa-lulu au abiabiusei,

eaubada esau esana Repana ena ipora hinage,

oitau au ginauridi, au aihelahuidi;

abo ea aiduiemiu au lau e Babulonia hari tehana eai.’

(Jer. 19.13).

⁴⁴ “Numa-uura bahebaheuseina, dubu tohonana ede, ita tamadayao se abi barabara eai, doha Eaubada Mose i riba-hasahasaiyao, tautaua i heita, iaede i ginauriwatai. ⁴⁵ Isi muri eai hinage, ita tamadayao maedi Iosua abo se abi, se laei Etene eanuadi eai, isi Eaubada i aiduiedi tamadayao matadi eai, i lau e Davida huiana eai; ⁴⁶ Eaubada Davida i henua aririei; ia i awanorini bena Iakobo ena Eaubada ena numa-abamia i abi. ⁴⁷ Na Solomona mo ia enana i abi numa.

⁴⁸ Taiede, numa nimadi eai se ginauridi Saesae-Aririna nige aridi eai i miahai; doha hinage peroveta ie ribaei,

⁴⁹ ‘Galewa egu terona ede,

eo tanoubu aegu ana bou ede.

Guiau i ene, egu numa sahasahaina abo au abi?

e egu abaiyawasi saha?

⁵⁰ Teina ginauri gamagaridi eau nimagu eai

ea ginauridi, e nige’e wa?’

(Isa 66.1-2).

⁵¹ “Omi tatao nuamiu se oiura, nuamiu eo beamiu nige se peritomedi, omi huia gamagamagari Earua Tabuna au laugudugudui. Tamamiuyao edi laulau mo au laulauedi.

⁵² Aitea peroveta tamamiuyao nige se hebaaea? Laulaududurai Tauna ena laoma wasana tauduaina isi se unuhematedi, ia ede omi abotai au ribagabaei eo au unui, ⁵³ omi laugagaeo tauabina ia ede aneru se leawa, na nige au sogohididini.”

Tau bagubaguna evanelia debana eai mate i hearo: Paulo wasana se hetubu.

⁵⁴ Teina riba ta se ataiedi, atedi se taigari, isi gadigadidi se taburuyahisidi. ⁵⁵ Na, ia Earua Tabuna i monau, galewa i itadidinisaei Eaubada namanamarina ie ita, eo Iesu hinage ie ita i totoro Eaubada nima-tutuna eai. ⁵⁶ I ene, “Galewa ea ita i taigari, Tau Natuna i totoro Eaubada nima-tutuna eai.” ⁵⁷ Isi se eabalailai, beadi se moinidi, isi abo se taugogo nuadi esega mo, ⁵⁸ ia se heduiahalai eanua murimurina eai se lauwe’ui: isi tatao taitana adi lulu se toredi hewari esau aena eai, ia

esana ede Saulo. ⁵⁹ Isi Setepano se lauwe'ui, ia Guiau i eogai, i ene, "Guiiau Iesu e, earuagu ta u abi." ⁶⁰ Ia ie turibono, i eabalailai, i ene, "Guiiau e, Teina baaea ta tabu u pipinilaei aridi eai." Riba ta ie ribalautom ia abo i guridobi ie eno."

8

Heamamna hehasina: Saulo tauheamamnadi.

¹ Saulo hinage ena mate arinai ie eari. Meta asubenana eai ne ekalesia Ierusalem eai se hebaaeadamadumaidi; se hetatagorigoridi se lau Iudea hari tupo hari tupo eai, eo Samaria, aposotolo tataodi isibom mo se mia ede. ² Eaubada matausina taumatausi Setepano se laei se tore, eo doudouna se douariariri. ³ Na Saulo, ia ekalesia i hebaaea, i awasae numa gamagamagari alodi eai, tatao eo sisine i abigogoidi numa masigiri eai i toredi.

Misionare paisoa se hetubu.

⁴ Arinai isi se tatagorigori wa, se hailauidi se lau dimo gamagamagari riba se lauguguiai.

Pilipo ana hewau

A. adi H. 6.5; 21.8

⁵ Pilipo hinage abo ie dobi Samaria eai, Keriso ribana aridi eai i guguiaidi. ⁶ Tatao nuadi esega mo, riba wa Pilipo i ribaei se ataieididini, ena riba se ataiei eo ena laulau gigibori i hemasarahadi se itadi. ⁷ Paana ede earua biibiidi tatao headi se luidi se eabalailai, isi abo se lulage murimuri eai, gamagaridi hinage se palisi, eo tatao laulauaedi hinage i hemauidi. ⁸ Kode lailai ie tubu nei eanua ne arinai.

⁹ Na tau esau esana Simona nabada wa nei eanua eai ne i tabutabusima, Samaria tataodi i aiaigoridi, ia hinage i ene iabom i sae ariri. ¹⁰ Isi gamagamagaridi ena riba se ataiei, tatao gaibu eo tatao headi saeseariridi si ene, "Tau ta Eaubada ena gigibori lailai ie abi." ¹¹ Isi ia se lauwatai paana ede nabada i aiaigoridi ena tabutabusima eai. ¹² Isi abo se ataiei, Pilipo ia wasa lolo Eaubada ena basileia ribadi i guguiaidi, eo Iesu Keriso esana eai, isi abo se hebapatisoidi tatao eo sisine. ¹³ Simona hinage abo i ataiei: ia hinage se hebapatisoi, i miahai Pilipo arinai, ena laulau-gigiboridi eo heiheinoidi i itadi i noaririedi.

¹⁴ Na aposotolo tataodi Ierusalem eai wasana abo se ataiei, Eaubada ena riba Samaria tataodi se abiyao, Petero eo Ioane se hetamaridi aridi eai. ¹⁵ Isi abo se dobi se lage eanua eai, enadi se lau-uura, isi bena abo Earua Tabuna se abi. ¹⁶ (Nei huiana ne nige sora i dobi esau potana eai, Guiau Iesu esana eai mo se hebapatiso nonohaidi). ¹⁷ Isi abo nimadi se toresaei isi potadi eai, Earua Tabuna isi abo se abi.

¹⁸ Na, Simona i itayao aposotolo tataodi nimadi se toresaei arinai Earua Tabuna se moselaie, ia moni bena i mosedi. ¹⁹ I ene, “Teina gigibori ta au leama enagu, eau hinage ea aabi, nimagu ea toresaei tataoa potadi eai, isi Earua Tabuna abo se abi.” ²⁰ Na, Petero i ribalau ia arinai, i ene, “Meta moni me abo maedam au mate esega, paana u nuatui Eaubada ena ainauia bena u unemoniei. ²¹ Teina ginauri ta, taba nige tupona begana u abi, paana Eaubada matana eai nuam nige i dudurai; ²² teina em baeea ta arinai nuam u bui, u uura Eaubada arinai, bena em nuatu wa abo se nuatugabaei. ²³ Paana ea itam oa baeea apeapesuiana, eo laulau baeea augogona hinage.” ²⁴ Simona arinana i heuio, i ene, “Enagu u lau uura Guiau arinai, wau ginauri u ribaedi wa, abo nige se hearogu.”

²⁵ Na, taudi labui Guiau ena riba se hemasarahayao, eo se lauguguiayao, abo se uio Ierusalem eai, evanelia se guguiiai Samaria eanua gamagamagari gougoudi eai.

Pilipo maena Aitiope tauna.

²⁶ Guiau ena aneru i ribalau Pilipo arinai, i ene, “U torohai, u lau tupo eawana eai, u lau e Ierusalem u laugabaei Gasa dobilana me barabara mo.” ²⁷ Ia abo i torohai, ie lau: tau esau, Aitiope tauna, ia eunauka, tau wa ie sae ariri, ia Kanaki Aitiope edi wasawasa-sine ana sagu, ena une gamagamagari ia taitawataidi, ia i laoma Ierusalem eai tabaohu hesabana. ²⁸ Ia i uio, kariota alona eai i geru Isaia peroveta ena uriuri i hasihasiri. ²⁹ Earua Pilipo i heriba, i ene, “U lau arinai, nei kariota ne arinai u awasae.” ³⁰ Pilipo i aita tau ia arinai, abo i ataiei peroveta Isaia ena uriuri i hasihasiri, to i hesioi, “Em hasihasiri me nuam eai i masarahao, wa?” ³¹ Tau wa abo i ene, “Abo edoha egu ataataiena, nige taulauhasahasaigu ta?” I awanori Pilipo arinai ia bena i awasaema se bawalabulai. ³² Uriuri ena aba-hasihasirina wa ia ede ina: Ia se woeai doha mamoe se laei se unui, e doha mamoe natuna i monou mo uiana tautomna nimana eai, ia hinage, nige awana i dabari. ³³ Se ribadobidobiei huiana eai edi hegiruna eai abidudurai se nuahi. Ia isina eai abo i ribaribaei? Paana ena mauri tanoubu eai ta se abihaiyao.”

(Isa 53.7.8)

³⁴ Eunauka abo i ribalau Pilipo arinai i ene, “Ea oimurim wau peroveta ena riba ta eai i ribaribaei, iabom e tau esau ribana?” ³⁵ Pilipo awana i dabari, wau uriuri wa arinai i hetubu, Iesu wasa lolona abo i heriba. ³⁶ Isi edi dobila eai se laulau, goila ipuna esau eai se lage, eunauka abo i ene “U ita,

goila ina! Saha ede i guduguduigu ea bapatiso?" ³⁷ Pilipo i ene, "Ena u ataiei ma nuam i ohi, taiede." Ia arinana i heuio i ene, "Ea ataieididiniyao, Iesu Keriso ia Eaubada Natuna ede." ³⁸ I heribadi kariota se hetarutoro; isi taudi labui se dobi goila eai, Pilipo maena eunauka, ia abo se hebapatisoi. ³⁹ Isi goila eai se gaeosaema Guiau ena Earua Pilipo i abihaiyao, eunauka ia nige i itauioi; ia abo ena dobila eai ie lau nuana i lolo, eo ie kode. ⁴⁰ Na, Pilipo Asota eai se hailobai: eanua gamagamagari i baeawaidi, wasa lolona i gugui, i lau e, i lage Kaisaria eai.

9

Saulo nuana i bui.

A. adi H. 22.1-16; 26.9-18

¹ Saulo, Guiau tauataiena i ribahemahematausidi, eo bena i unuidi, ia abo i lau kohena lailai arinai, ² uriuri i awanoridi, ia bena i laedi Damaseko sunagodi enadi, ena headi i italobaidi wau dobila taulaulauina tataodi, tatao eo sisine, ia abo i paidi i woeaidi, i laedi Ierusalem eai. ³ Sora ma launa Damaseko i hanahanau galewa marana ia abo i hemara hetaiiri. ⁴ Ie guridobi tano eai, arina esau i ataiei i ribalaoma ia arinai i ene, "Saulo e, Saulo e, ue saha u hegahegadotoagu ta?" ⁵ Ia abo i ene, "Guiau e, oa hede eai?" Guiau i ene, "Eau hede Iesu, oa u hegahegadotoagu wa." ⁶ Ia abo i tabutabubu, eo ie noo, i ene, "Guiau e, Oaem nuatu abo edoha, egu laulau saha abo ea abi?" Guiau i ribalau ia arinai i ene, "U torohai, u lau eanua eai, em laulau aisana abo se heribam." ⁷ Tatao ia maedi se lau, se totoro na nige ariarinadi, arina wa se ataiei, na tau nige se ita. ⁸ Saulo tano eai wa i torohai ia matana se lala'o nige tau i ita na isi se abinimai, se woeai se laei Damaseko eai. ⁹ Asubena haiona ia matana se gibu, aiai nige i ai, eo goila nige i nom.

¹⁰ Damaseko eai tauataiena esau esana ede Anania; ia i enosuai, Guiau i ribalau ia arinai, i ene, "Anania e," Ia i ene, "Guiau e, eau ede ina." ¹¹ Guiau i ribalau ia arinai, i ene, "U toro, u lau dobila esau arinai esana ede Dudurai, Iuda ena numa eai tau esau esana Saulo, Tareso tauna, hage u hesio arinai, ia i laulau-uura. ¹² Ia hinage i enosuaiyao, tau esau esana Anania ie ita, i awasae ia nimana i toresaei ia potana eai, matana bena abo se lala." ¹³ Anania arinana abo i heuio i ene, "Guiau e, nei tau ne wasana ea ataieyao, tatao gamagaridi se ribaei, ia baeae lailai ie abi, hetabu tataodi i hebaeadi Ierusalem eai. ¹⁴ Inai hinage kohena lailai-didigadi edi riba eai tatao esam se atai ia abo i paidi." ¹⁵ Na Guiau i ribalau ia arinai, i ene, "U lau mo em dobila eai wa: egu bia ea hineriyao ede ina, bena abo eau esagu i

laei Etene eo wasawasadi aridi eai, eo Isaraela nanatudiyao aridi eai hinage. ¹⁶ Ia abo ea heita, eau esagu eai amamna gamagamagari abo sora i hearodi.” ¹⁷ Anania ie lau i awasae numa wa alona eai ia nimana i toresaedi ia potana eai, i ene, “Egu-tau Saulo e, Guiau Iesu wa, ia ede u laoma dobila eai i hemasaraaurim wa, ia i hetamariguma matam bena abo se lala, eo Earua Tabuna wa bena abo u monau.”

Paulo se hebapatisoi.

¹⁸ Ma-esega abo ginauri ia matana eai se beu doha eama onahidi: ia matana abo se lala, ie toro, ia se hebapatisoi. ¹⁹ Ia aiai ie ai, abo tauna se maidosiuiu. Saulo asubena headi i miamia Damaseko eai tauataiena aridi eai.

Paulo i lauguguia.

²⁰ Ia abo i lauguguia sunago alodi eai, ia Keriso i wasadu-
aiei, i ene, ia Eaubada Natuna tahunuana ede. ²¹ Isi gama-
garidi ena riba se ataiei se noo, si ene, “Ina tau wa e nige’e, ia
tauataiena Ierusalem eai i hebaaeadi wa? Ena laoma paana
hinage doha bena i paidi, eo i laedi kohena lailaidi aridi eai?”
²² Na, Saulo ena adidiri abo i tubulailai; Iudea tataodi taumia
Damaseko eai i henuapononodi, arinai abo Keriso i riba
hemasara mamohoiei.

²³ Asubena gamagaridi se ohi, Iudea tataodi abo se oioiriba
ia bena se unui. ²⁴ Saulo tau-weseina i nuatulobaidio. Eanua
gana tonana gududi se itawataidi maiona to asubena ia bena
abo se unui. ²⁵ Maiona eai tauataiena ia se usai bosa alona
eai, abo se hedawedobei tona murina eai.

Paulo i lau Ierusalem.

²⁶ Saulo abo ie lage Ierusalem eai, ia ena nuatu i ene tau-
ataataiena bena maedi se oigogo esega: na isi gamagaridi ia
se matausiei, nige se nuatui ia tauataiena esau. ²⁷ Na Banaba
ia abo i woeai, i laei aposotolo aridi eai, enadi ie riba lahinae
Guiiau dobila eai ie ita wa, eo Iesu esana eai i lauguguia
adidiriei Damaseko eai, wasana i heribadi. ²⁸ Ia maedi se mia
esega Ierusalem eai, se sae na, se dobi. ²⁹ Guiau Iesu esana
eai i riba headidiri, Iudea Heleni maedi se haiawayagara: to
isi hinage edi dobila se eoi ia bena abo se unui.

Paulo i uio Tareso eai.

³⁰ Teina se ataiei ena tataoyao ia se laei Kaisaria eai, abo se
hetamari i lau Tareso eai.

³¹ Ekalesia Iudea hari tupo, hari tupo eai, eo Galilaia eai,
eo Samaria eai abo se miataubiga eo nuadi se tubu; isi
Guiiau matausina boeana eai se laulau, eo Earua Tabuna ena
henuabiga arinai abo se hetadada.

Ainea se helolo.

³² Petero hinage ie lau hari eanua, hari eanua, ia abo ie leta ie dobi Lida eai hetabu tataodi aridi eai. ³³ Nei eai tau esau i lobai esana ede Ainea, borimai igigi-haiona ena aba eno eai ie ota ena asiebo ede i tabutabubu. ³⁴ Petero i ribalau ia arinai, i ene, “Ainea e, Iesu Keriso i hemaaurim: u toro, em aba laulaueno me u launo’u.” Arinai abo i toro heuheula. ³⁵ Isi gamagaridi Lida eo Saron taumiaidi tau wa se ita, isi abo se sinibui Guiau arinai.

Tabita mate eai se hetorouio.

³⁶ Na tauataiena sinena esau Iopa eai ie mia ia esana ede Tabita, heaheasonina se ribaei ede Doreka: teina sine ta ena hewau se lolo, eo ia sine aiainauiana. ³⁷ Nei huiana ne i asiebo, ia abo ie mate: isi ia se hedui nonohai, abo se heota biri ewa eai. ³⁸ Iopa eo Lida edadi nige se loloha, tauataiena wasa se ataiei Petero nei eai, tatao labui se hetamaridi se lau ia arinai se heriba, si ene, “U laoma, ta heula.” ³⁹ Petero abo i torohai, maedi se lau. Ia ie lage, maedi se lau biri ewa eai: sisine wabuwabu wa se totoro ia gegesina eai se doudoui, pereue, eo hari lulu, hari lulu ma miamiana eai wa Doreka i ginauridi ia se heita. ⁴⁰ Petero isi gamagaridi i aiduedi: ia abo i turibonodobi, i uura: ia i itaitalau sinarena arinai i ene, “Tabita e, u toro.” Ia matana i helaladi: ia Petero ie ita, abo i torouioma ie bawa. ⁴¹ Ia nimana i helelelaei sine wa arinai, i abihetoro, hetabu tataodi, eo sisine wabuwabudi i eogaidi, sine wa abo i mosei isi aridi eai ma maumaurina. ⁴² Iopa tataodi gamagaridi wasana se ataiei, arinai gamagaridi Guiau abo se ataiwatai, ⁴³ Petero i miahai Iopa eai asubena gamagamagari Simona, sarai opidi tauginagauridi, arinai.

10

*Petero ki wa i abiuio: Evanelia se moselaei Etene aridi eai.
Mt. 16.19; A. adi H. 2.14-41*

¹ Na, tau esau Kaisaria eai i mia esana ede Konelio, boda esau esana Italia ia edi senturion. ² Ia Eaubada matausina tau matausi, eo ena asa tataodi gamagaridi hinage i aiainauiaidi, eo huia gamagamagari i lau uura Eaubada arinai. ³ Ia i enosuai mahana haligigi-hasi eai, Eaubada ena aneru esau ie ita, i laoma ia arinai, i ribalau, i ene, “Konelio e.” ⁴ Ia i italaei abo i matausi, i ene, “Guiau e, saha wa hede?” Ia i ribalau ia arinai, i ene, “Em uura, eo em ainuia se saema Eaubada matana eai, oa se henuaisinim’o. ⁵ Tatao headi u hetamaridi se lau Iopa, tau esau se eogaiyama esana Simona, ia esana esau ede Petero. ⁶ Ia Simona esau, sarai opidi tauginagauridi, maena se miamia esega ena numa geregere eai: laulau esana bena u abi wa abo i heribam.”

Konelio ena enosuai. Headi i hetamaridi Petero se eogai.

⁷ Aneru wa Konelio i heriheriba wa abo i laugabaei, ia ena heaheari tataodi labui i eogaidi, eo iala tauna esau, Eaubada tauaihelahuina, ia hinage Konelio ana sagu huia gamagama-gari. ⁸ Riba gamagaridi i heriheribadi wa, isi abo i hetamaridi se lau Iopa.

Petero ena enosuai, paruai lailaina.

⁹ Mara-ie-tom se laulau e se hanahanui Petero i awasae'o numa ewana eai, mahana haligigi-esegana eai, i lau uura. ¹⁰ Ia abo i guriam, bena i aiai: ana sora ma laurigadi, na ia matana abo i odeode; ¹¹ galewa ie ita doha i taigari, ginauri esau abo i daroroma doha hinage abobo, isuna hasi aridi eai se au se hedawedobeyama tanoubu eai ta. ¹² Alona eai hari sarai, hari suisui, aedi hasi hasi mo, e sarai aiailetadi, eo ginauri tanoubu potana eai se daladalausi, eo malagaibu manudi hinage. ¹³ Arina esau i lage ia arinai, i ene, "Petero e, u toro, u unui, u ai." ¹⁴ Petero i ene, "Guiau e taba nige'e: ginauri baabaeadi, eo biibiidi eau taba nige ea aidi." ¹⁵ Arina wa ma labui ie riba, i ene, "Ginauri Eaubada i headi tabu u ene se baaea." ¹⁶ Ia i riba ma haiona ina doha; abo ginauri wa se abi'siniui oi galewa eai.

Petero maena Konelio ena tauwasa tataodi.

¹⁷ Na, Petero sora nuana i hetahetauponopono wau ginauri wa abo aniona saha, tatao Konelio i hetamaridi wa, Simona ena numa se hesioi se toro dobilana eai. ¹⁸ Se eogayoga se oimuri Simona esana Petero ena aba miamia ede meta? ¹⁹ Petero ginauri ie ita itaitaina wa i nuanuatui, Earua abo i ribalau ia arinai, i ene, "Tatao haiona se eooim. ²⁰ U torohai u pesadobi maemyao au lau tabu nuam i ponopono, paana ede eau ea hetamaridiwa meta." ²¹ Petero abo i pesadobi Konelio tatao i hetamaridima wa aridi eai, i ene, "Tau wa au eoi doha eau; aue laoma saha hesabana?" ²² Isi si ene, "Konelio, senturion, ia Eaubada tauaihelahuina, Eaubada matausina tau matausi, Iudea eanuadi tataodi gamagamagari si ene ia wasa-lolona tauna, aneru tabuna Eaubada arinai i laoma ia i ribahesanapulaei, i ene ai laowa hesabam, bena u laoma ema numa eai em riba abo ai ataiedi." ²³ Ia abo i eogaidi se awasaema, ia abo i haitalaidi.

Petero i lau Kaisaria.

Mara-i-tom Petero maedi se lau, ehanayao headi hinage se hesaguedi. ²⁴ Asubena helabuina isi se lage Kaisaria. Konelio isi i bagibagiedi, ia ana bogao, eo ia ehanayao i heoigogononohaidima. ²⁵ Petero abo i awasae numa eai Konelio i laoma i guridobi ia aena eai, ia i aihelahui. ²⁶ Petero ia abo i abihetoro, i ene, "U toro, eau hinage tau mo." ²⁷ Ia abo maena se ribariba, abo se lulau numa alona eai tatao gamagaridi se oigogo wa i lobaidi. ²⁸ Ia ie ribalau isi aridi eai, i ene, "Au

nuatuiyao, ema laugagaeo si ene, Iudea eo hari eanua tataodi tabu se hebori-esegaidi; Eaubada mo i heitaguo eau taba nige ea ene tau esau i baaea, eo ie bii. ²⁹ Arinai ede u eogaigu ea laoma ta: abo ea oimurim em tauwasaigu paana ede saha?”

³⁰ Konelio i ene, “Lahinaiwadi ea enowohi mahana haligigihasi eai egu numa eai, ea lau uura na tau esau ana lulu i namanamari nuanuagu eai i totoro, ³¹ i ene, ‘Konelio e oaem uura se ataieyao, oaem ainauia hinage Eaubada matana eai se nuatuidio. ³² Esau u hetamari se lau Iopa Simona Petero u eogaeyama, ia Simona sarai opidi tauginaginauridi ena numa eai ie mia geregere eai: ia i laoma, abo enam i riba.’ ³³ Arinai tau esau abo ea hetamari i lau heuheulawa: em abi se lolo ariri eamoisa mo u laoma. Ai gamagarimai inai ai oigogo Eaubada matana eai, ginauri gamagaridi Eaubada i lauhesomda wa u heribamai, bena ai ataiedi.”

Petero Etene i guguiaidi Konelio ena numa eai. Riba Paana: Abahemauri sunuma debana eai.

A. adi H. 2.14-4.1

³⁴ Petero abo awana i dabari i ene, “Mamohoi ea itayao Eaubada tatao nige i heasisinapaidi mo: ³⁵ na eanua gamagamagaridi eai tatao ena Eaubada matausina se matausi eo edi laulau se dudurai, nuana abo i loloedi. ³⁶ Riba hinage Eaubada i hetamari Isaraela nanatunayao aridi eai, loni wasana lolona se lauguguiai, Iesu Keriso debana eai: (ia tatao gamagaridi edi Guiau) ³⁷ riba wa omi au nuatuiyao, ia ede se wasaduaiei Iudea hari tupo, hari tupo eai, eo Galilaia eai se hetubu, bapatiso Ioane i lauguguiai murina eai; ³⁸ Iesu Keriso ribana, Eaubada Iesu Nasareta i heyausi Earua Tabuna arinai eo gigiborina eai hinage: ia ie sae eo ie dobi eo ena abi se lolo, isi headi hinage diabololo i hebaaeadi ia i hemaauridi; paana ede Eaubada maena. ³⁹ Ai hinage, ginauri gamagaridi i ginauridi Iudea eanuadi eai eo Ierusalema eai hinage ai itayao; ia abo se unui, eo se hebasisae oegi eai. ⁴⁰ Asubena hehaionana eai Eaubada i abihetorouioi, eo ia hinage i hemasaraaauri. ⁴¹ Tatao gamagaridi nige se ita, na isibom Eaubada i hineridi mo wa se ita, ai mo ai ita, ia maemai ai aiai eo goila aie nom, mate eai i torouio murina eai. ⁴² Eo ie lauhesomma i tatao abo ai guguiaidi, eo ai ribahemasaraha ai ene, Eaubada ia i hetoro mauri eo mate tataodi ia abo Tau-heduduraidi eai i lau. ⁴³ Peroveta gamagamagari se ribanonohaiyao, si ene, Ia esana debana eai ena tau esa, tau esa ia i ataieiwatai ena baaea abo se nuatugabaedi.”

Earua Tabuna se mosei Murimuri-tataodi tauataiedi aridi eai.

⁴⁴ Teina riba ta Petero ma ribaribana na Earua Tabuna i tarudobi isi riba tauataiena gamagamagari potadi eai. ⁴⁵ Tau periperitome, isi tauataiena hinage, maedi Petero se laoma wa se noo, paana ede Murimuri-tataodi se itadi Earua Tabuna ena ainauia se hegoidobei isi potadi eai hinage. ⁴⁶ Edi riba se ataiei hari arina, hari arina, arinai Eaubada se ribapasi-pasiei. Petero arinadi i heuio i ene, ⁴⁷ “Aitea tau abo goila i nuahi, tatao ede teina abo nige se hebapatisoidi, isi Earua Tabuna se abiyao, doha hinage ita?” ⁴⁸ Ia abo i lauhesomdi, isi abo se hebapatisoidi Iesu Keriso esana eai. Isi ia arinai se aiboda adidiri si ene sora huia headi taba maedi se miamia.

11

Petero ena paisoa Etene aridi eai i riba hasahasaidi.

¹ Aposotolo eo edi tataoyao Iudea eai se mia wasa se ataiei Murimuri-tataodi hinage Eaubada ena riba se abiyao. ² Petero i saemao Ierusalem eai, isi tauperitome pelena ia se monunuei, ³ si ene, “Oa paana saha ue lau tatao nige se heperitomeidi aridi eai, maemyao hinage aue aiaigogo?” ⁴ Petero abo riba wa ena aba tubu eai i heribakomakomanidi i ene: ⁵ “Eau Iopa eanuana eai, ea laulau-uura; abo doha ea enosuai ginauri esau ea ita, ginauri wa se hedawedobeyama, doha abobo, isuna hasi se audidinidi, galewa eai se hedawedobeyama arigu eai. ⁶ Arinai ea italau ginauri wa arinai ea nuatudadaasa, tanoubu saraidi ma-aedi hasi, adi ao udoi udoi ea itadi, eo aiailetadi hinage, eo taudaladalausi, eo malagaibu manudi. ⁷ Arina esau hinage ea ataiei, i heribagu, i ene, ‘Petero e, u toro to u unui, u ai.’ ⁸ Na ea ene, ‘Guiau e, besi nige’e: aiai se baaea eo se bii nige sora ea toresaedi awagu eai, nige ea aiaini.’ ⁹ Arina wa galewa eai abo i ribadobiuioma, i ene, ‘Ginauri Eaubada i heaadi tabu u ene se baaea.’ ¹⁰ Ma haiona i ribadobiuioma: abo ginauri gamagaridi se abi seuioidi galewa eai. ¹¹ Huiana ne masesega mo tatao haiona se lagema egu numa eai, Kaisaria eai se laoma arigu eai. ¹² Earua nuagu i dudui, i heribagu isi maidaguyao bena ai lau, tabu nuagu i labulabui. Eda tataoyao haligigi-esega maidaguyao hinage aie awasae tau wa ena numa eai. ¹³ Ia i heribamaianeru esau ie ita ena numa eai i totoro, i ribalau ia arinai i ene, ‘Tatao u hetamaridi se lau Iopa, tau esau esana Simona se hetala, ia esana esau ede Petero; ¹⁴ ia abo riba i heribam, arinai oa eo em numa tataodi gamagarimiu abo au mauri.’ ¹⁵ Ea riba hetubu abo Earua Tabuna ie taru isi potadi eai, doha hinage huia bagubaguna eai ita potada eai ie taru wa. ¹⁶ Arinai abo Guiau ena riba wa ea henuaisini, i ene, ‘Mamohoi, Ioane goila eai i hebapatiso, omi mo Earua Tabuna arinai abo se hebapatisoimiu hinage.’

17 Ena Eaubada i ainuiaidi doha hinage i ainuiaida huia ne ita Guiau Iesu Keriso ta awaabiei, eau eai bena Eaubada abo ea gudugudui?” 18 Teina riba ta se ataiedi isi nige ariarinati. Abo Eaubada se hedebasaei si ene, “Hedeomi Eaubada Murimuri-tataodi hinage i nuatuidi, isi nuadi se bui abo se mauri.”

19 Na isi Setepano edi huia heamamnana wa arinai se dagogorigori wa, headi se lau Poinike, eo Kuperu, eo Anetioka, nige se laugugua tatao gaibu aridi eai, Iudea mo isibom aridi eai. 20 Isi headi Kuperu eo Kurene tataodi se lage Anetioka eai, Guiau Iesu wasana Heleni tataodi aridi eai se lauguguaidi. 21 Guiau nimana isi potadi eai: arinai tatao gamagamagari se ataiei, eo se sinibuilau Guiau arinai. 22 Teina ginauri ta wasadi ekalesia Ierusalem eai se ataiei: isi abo Banaba se hetamari i lau Anetioka. 23 Ia abo ie lage, Eaubada ena ainuia ie ita, ie kode, gamagaridi i henuapaipaidi bena nuadi se tore-esegai eo Guiau se sogohididini. 24 Ia tau lolona ede, eo Earua Tabuna i monau eo sunuma hinage. Na tatao moutuana se patugogoma Guiau arinai. 25 Banaba abo i laugabaedi i lau Tareso, Saulo i eooi. 26 Ia abo i lobai i woeai i laei Anetioka eai. Borimai esega ekalesia maedi se oigogo tatao gamagaridi se heatadi. Tauataiena Anetioka eai esadi Keristiani se tore bagunai ede.

Ekalesia Anetioka eai edi ainuia se hetamari Ierusalem eai.

27 Nei asubenana eai ne peroveta headi Ierusalem eai se laoma Anetioka eai. 28 Esau esana Agabu i toro Earua arinai i heriba nonohaidi, i ene tanoubu i oihai guriam lailai abo se hearo; iaede Kalaodia ena huia eai ie tubu. 29 Tauataiena se heona esega esega, si ene, “Eda ainuia ta hetamaridi se laedi eda tataoyao Iudea eai wa enadi,” 30 Edi nuatu nei doha, abo Banaba eo Saulo se hetamaridi, isi nimadi eai ainuia wa se laei babada aridi eai se mosedi.

12

Heamamna hehaligigina: Petero se toai.

1 Nei huiana ne Heroda wasawasa ia nimana i helelelaedi ekalesia tataodi headi bena i hebaaeadi. 2 Iamesi, Ioane ana taubaguna, ia elepa eai i unui; 3 Iudea tataodi i itadi, nuadi se lolo, arinai abo Petero hinage bena i unui (nei asubenadi ne areto-nige-se-sese huiana ede). 4 Ia Petero i toai nonohai, abo ie tore numa tutugudu alona eai, ia se moselaei iala bodadi hasi aridi eai se itawatai edi nuatu bena Pasova murina eai abo se woeai tatao matadi eai. 5 Arinai Petero numa tutugudu eai se abididini: ekalesia se uura adiadidiri huia gamagamagari bena Eaubada ia abo i sagui.

⁶ Huiana ne Heroda bena Petero i woeahemasaraha, maionana ne ie eno iala tataodi labui ia se heduheduari, maina poasi labui ia arinai se auau: tautaitawata numa tutugudu dobilana awamatana eai se itawatai; ⁷ Guiau ena aneru esau i taumasaraha ia arinai, eo marana numa tutugudu i hemahe-maraisini: ia Petero lisilisina eai i oitagulaei, eo i abihetoro, i ene, “U toro heuheula.” Maina poasi ia nimana eai abo se beuhaima. ⁸ Aneru abo i ribalau ia arinai, i ene, “Em nogi u lio, eo am ae’um u audi.” I ginauri nonohaidi: ia abo i heriba, i ene, “Am lulu u aboboei, u lauwataiguma.” ⁹ Aneru wa abo i lauwatai i lulage murimuri eai; aneru i woeai wa nige i nuatulobai, i ene bena i enoliuliua. ¹⁰ Biri esau se laugabaei eo biri helabuina hinage, abo se lage dobila ana gudu poasi wa baubauna eai; dobila guduna wa iabom abo i tasoe: se lau murimuri eai dobila esau se lauwatai, arinai aneru wa Petero i laugabaei. ¹¹ Petero abo nuana i sae, i ene, “Abo ea ita mamohoi hedeomi Guiau ena aneru i hetamariama, Heroda nimana eai i hemaorigu ta, Iudea tataodi edi gadosisi taba nige ena aba tubu.”

¹² Ena dobila i nuatui, abo i ene ea lau Maria, Ioane Mareko sinana, ena numa eai, nei eai tatao gamagaridi se oigogo se laulau-uura. ¹³ Petero dobila guduna murimurina eai i ipeipesi: siu esau esana Roda i laoma i ataatai. ¹⁴ Ia Petero arinana i atailobai, dobila wa nige i soe ma kodena mo i aita tau ie lau i heribadi, i ene, “Petero kalau nei dobila murimurina eai i totoro.” ¹⁵ Se ribalau ia arinai, si ene, “Oa u eayaure.” Na ia mo i riba adidiri, i ene, Mamohoi. Isi abo si ene, “Ata bena ena aneru meta!” ¹⁶ Petero i ipeipesi mo: isi dobila se soe ia abo se ita se noo. ¹⁷ Ia nimana eai i oitawaidi, i ene abo se monou, abo i heribadi, i ene Guiau numa tutugudu eai i woeahelulageguma. Abo i ene, “Au lau Iamesi eo tataoyao hinage teina ginauridi ta au heribadi.” Arinai abo i laugabaedi, ie lau dimo esau eai. ¹⁸ Mara-ietom iala bodadi se hetalagegagegausi, si ene Petero edohana, haedi i laulau? ¹⁹ Heroda hinage Petero i eooi, eo nige i lobai, ia i hesio tautawataina aridi eai, abo i lauhesomdi i ene tautawataina bena se unuidi. Ia abo Iudea i laugabaei i dobi Kaisaria eai, arinai i miahai.

Heroda ia matena.

²⁰ Heroda Turia eo Sidona tataodi i ouyalayalaedi; na isi nuadi esega se laoma ia arinai, ena numa tautawataina Belaseto arinai se awaheriam baguna, wasawasa arinai bena se awa-loni, paana adi ai ai ia ena oea eai i laoma, to se duihasari ia arinai. ²¹ Asubena esau se ribanonohai, Heroda ana pasa ie lui, ena terona potana eai ie bawa i lauguguiaidi. ²² Abo tatao wa se wowo gogo, si ene, “Arinana ta eaubada arinana,

nige tau arinana!” ²³ Ma-esega abo Guiiau ena aneru Heroda ie talailaei, paana ede Eaubada nige i heasisiei: motamota ia se ai, to ie mate. ²⁴ Eaubada ena riba abo ie tubu, abo i tadada lailai. ²⁵ Banaba eo Saulo adi paisoa i ohi Ierusalem se laugabaei se uio, Ioane, esana esau ede Mareko, se laei maedi.

13

Earua Tabuna Paulo eo Banaba i eogahaidi.

¹ Ekalesia Anetioka eai peroveta headi eo tauheaheata hinage; doha Banaba, eo Simeona esana esau Nigeru, eo Lukaio Kurene tauna, eo Manaena, Heroda tetarake ena numa eai se miaesega, eo Saulo hinage. ² Isi Guiiau se awaabini, eo se aiadabu arinai Earua Tabuna i ene, “Banaba eo Saulo au goraidi paisoa arinai ea eogaidi wa abo se paisoi.”

Paulo ena misionari lauwasina bagubagunana.

³ Isi se aiaiudi eo se uura, nimadi se saosaei isi potadi eai, abo se hetamaridi se lau.

⁴ Isi taudi labui Earua Tabuna i hetamaridio, se dobi Selukia, nei eai abo se geru se lau Kuperu eai. ⁵ Isi Salami eai se lage, Eaubada ena riba se lauguguaie i Iudea edi sunago alodi eai: Ioane hinage taudi labui i heaeaiedi.

Satani bena i guduguidi.

⁶ Isi bonabonarua wa se eona se lau se lulage Papo eai arinai tabusima esau se lobai, ia peroveta borabora, Iudea tauna esana ede Ba-Iesu. ⁷ Ia wasawasa gavana esana Serio Paulo, tausonoga, arinai i miamia, ia Banaba eo Saulo i eogaidi i henua bena Eaubada ena riba abo i ataiei. ⁸ Elima, tautabutabusima wa (ia esana heaheasonina ede) i ribasuidi arinai bena gavana ena sunuma wa i riba hetomatoma.

⁹ Arinai abo Saulo (esana hinage se torebui Paulo) Earua Tabuna i monau, i itadidini, ¹⁰ i ene, “Oa tauboraborasom, baaea gamagamagari u monau boriboriri, oa diabolona natuna, laulau-dudurai gamagaridi u hewaiunuedi, Guiiau ena laulau-dudurai oa u hegegewardi, nige u lautom wa? ¹¹ Arinai u ita, Guiiau nimana potam eai ie tore, oa matam sora abo se gibu, mahana taba nige u ita i lau e, huiana sora.” Ma esega gau eo masigiri i hearo; i heoheodamumulie i bena headi se abinimaei abo se woeai se laei. ¹² Gavana wa wau laulau ie ita, arinai abo i awamamohoi Guiiau ena riba i nooei.

¹³ Paulo edi pele Papo se laugabaei, abo se lage Perega Pamepulia tehana eai: Ioane i laugabaedi ie uio Ierusalem eai. ¹⁴ Isi abo Perega se laugabaei, se lage Anetioka Pisidia tehana eai, sabati esau se lau sunago alona eai se bawabigabiga. ¹⁵ Laugaga eo peroveta edi buka se hasiri lautom,

sunago tanuagadi headi se hetamaridi se lau aridi eai si ene, “Tatao e, eo ema tataoyao e, ena riba headidiri esau au nuatui tatao enadi, au ribaei aridi eai.”¹⁶ Arinai abo Paulo i toro, i nimaoidi, i ene,

“Isaraela tataomiu e, omi Eaubada matausina taumatausi, au atajei komakomani.¹⁷ Teina Isaraela tataodi edi Eaubada tamadayao i abi-hinehineridi; nei huiana ne Aigupito eai se mia doha laolaoma tataodi, ia i hedebasaedi eo i woeaidi i laedi murimuri eai ia nimana gigiborina eai.¹⁸ Borimai tatao-labui-se-mate ia barabara eai i bobodiedi.¹⁹ Kanana eai eanua haligigi-labui i hebaaeaeheohidi, edi eanua kelero eai abo i soi enadi.²⁰ Abotai abo borimai handere-hasi eo tatao-labui-se-mate-saudoudoi tau-hedudurai i mosedi i lau e Samuela peroveta huiana eai.²¹ Isi se henua bena edi wasawasa se hetoro: arinai Eaubada Saulo Kiso natuna abo i mosei aridi eai, tau wa Beniamina bogana, i lau e ena borimai tatao-labui-se-mate.²² Eaubada ia i abihaiuioi na Davida abo i hetoro isi edi wasawasa eai ie lau; ia arinai hinage ie riba, i ene, Davida, Iese natuna, ea italobai ia nuagu i lauei ede; eau egu nuatu gamagaridi ta ia abo i abiwataidi.²³ Doha i ribahesunumadio, tau ta tumanayao aridi eai, Eaubada esau abo i hetoro Isaraela aridi eai Tauabihemauridi, ia ede Iesu.²⁴ Ia sora nige i laoma, Ioane Isaraela gamagaridi henuabui bapatisona i guguiabagunaidio.²⁵ Ioane ana paisoa i abi-heohi, abo i ene, ‘Omi au ene eau eai? Eau nige ia. Na esau murigu eai i laoma ia aena umna bena ea eairi, nige ea lolo.’

²⁶ “Tatao e, eo egu tataoyao e, boga Aberahama nanatunayao, Eaubada matausina tau-matausi teina mauri ribana ta se hetamariawa omi enamiu.²⁷ Isi Ierusalemataumi-aidi, eo adi tanuagao hinage, ia nige se nuatui, eo peroveta gamagaridi ribadi sabati gamagaridi se hasiridi nige se nuatuidi, arinai ede Iesu se hegiru, ribadi we se hemamohoi ede.²⁸ Isi ia ana matapaana nige se lobai, edi nuatu mo Pilato arinai ia bena se unui.²⁹ Riba gamagamagari se uri nonohaidi wa isi se hemamohoi, arinai abo oeagi ewana eai se taruhi dobeyama, bousa alona eai se tore.³⁰ Ia mate eai Eaubada i heterouioiama.³¹ Isi maenayao Galilaia eai se saema Ierusalemata, asubena gamagamagari ia se itaitai eo isi tatao enadi tau-ribahemasaraha.³² Kode wasana ai ribahemasaraha omi arimiu eai, doha tamadayao aridi eai se riba hesunumaedio wa,³³ Eaubada nei ribana i hemamohoiyama ita nanatuidiyao arida eai, doha Iesu i heterouioi; doha hinage se uriyao Buka Vana peina helabuihana eai, si ene, ‘Oa Natugu ede, teina asubena eai ta ea awatamaem’ (Psa. 2.7).³⁴ Ia i mateo, na i heterouioi, taba nige i posauio, ina doha ena ribariba, i ene, ‘Davida ena aba-helolodaoina abo ea leawa enamiu.’ (Is. 53.3)³⁵ Arinai hinage Vana esau eai,

i ene, ‘Oaem Hetabu Tauna u nuanuaiei ia taba nige i posa’ (Psa. 16.10). ³⁶ Paana ede Davida, ana isi i saguidi Eaubada ena nuatu debana eai, ia abo i tubahai, se tore-esagaidi ma tamanayao, ia abo hinage ie posa: ³⁷ na ia, Eaubada i heterouioi wa, nige i posa. ³⁸ Tatao e, eo egu tataoyao e, omi abo au ita, wau tau wa debana eai baaea ribagigirina se guguiaimiu: ³⁹ ia debana eai hinage tauataiena gamagamagari se dudurai ginauri gamagamagari aridi eai doha nige au dudurai Mose ena laugagaeo debadi eai. ⁴⁰ Arinai au itakomakomani ata meta peroveta se ribaeyao wa au hearo; i ene, ⁴¹ ‘Iei, omi tauhalanuinui, abo au noo, eo au tatagorigori: emi asubenadi eai paisoana ea paisoa, ena tau esau paisoa wa i riba hasahasaimiu taba nige au nuatui.’ ” ⁴² Iudea tataodi sunago eai se pesao, abo Murimuri-tataodi headi se awanorini si ene, “Sabati esau matada eai bena ina riba ta u ribauioidi.” ⁴³ Isi tauoigogo se pesagorigori Iudea tataodi eo Eaubada taunanabuena headi se hemala Iudea, isi Paulo eo Banaba se lauwataidi: se heribadi, eo se headidiridi, isi Eaubada ena ainauia eai abo se lauesegai. ⁴⁴ Asubena sabati matadi eai wa eanua tataodi gamagaridi se oigogo Eaubada ena riba bena se ataatai. ⁴⁵ Iudea tataodi moutuadi we se itadi isi se aiaromagigiriedi, Paulo ena riba se hetataguduguidi, se haiawayagara eo se arina baaea hinage. ⁴⁶ Paulo eo Banaba abo se riba-adiadidiri, si ene, “I lolo Eaubada ena riba ai heribabagunaemiuo: na omi au otaotaeyao, omibom hinage au ene mauri nige nosina taba nige au abi, arinai ina ai sinibui Murimuri-tataodi aridi eai ⁴⁷ Mamohoi Guiau i hetaladuimai, doha i ene, ‘Ea torem ta, Etene tau-hemaradi eai abo u lau, oa edi mauri paana eai abo u lau, i lau e, tanoubu sigasigana eai’ (Isa. 49.6). ⁴⁸ Teina riba ta Murimuri-tataodi se ataiei abo se kode, Guiau ena riba se hatoei: isi headi mauri nige nosina eai se nuatunonohaidi, isi ede se awamamohoi. ⁴⁹ Guiau ena riba se wasaduaiei dimo gamagamagari eai ne. ⁵⁰ Na Iudea tataodi, sinesinebadadi eo Eaubada taunanabuena sisinedi, eo eanua tanuagadi hinage se heasiwolewiledi isi Paulo eo Banaba se ouyalayalaedi, isi edi tupo eai se aiduiedi. ⁵¹ Isi aedi geregeredi se oiluiledi edi heiheinoi, abo se lage Ikonio eai. ⁵² Tau ataiena mo nuadi se kode ariri, eo Earua Tabuna hinage se monau.

14

Paulo wa Ikonio eai.

¹ Ikonio eai, isi taudi labui se awasae esega Iudea edi sunago alona eai, riba se ribaei, arinai Iudea eo Heleni tataodi

moutuadi lailai riba wa se ataiei. ² Iudea headi tauawa-awayagara Murimuri-tataodi se heasiwolewoledi, arinai tau-ataiena tataodi se ouyalayalaedi. ³ Arinai se mia e eawalana ie lau, nei eai Guiau enana se riba hetahitahinei, ena ainauia ribana ia abo i hemamohoiei, taudi labui se hegigiboridi, noo eo heiheinoidi isi nimadi eai se ginauridi. ⁴ Eanua tataodi moutuana se oilabuini: tupona Iudea tataodi se labaidi: tupona aposotolo se labaidi. ⁵ Murimuri-tataodi, eo Iudea tataodi, eo adi tanuagao maediyao, bena se heamamnadi eo se lauwe'uidi, ⁶ isi se ataiei, se dago, se lau Lukaonia eanuadi eai esadi Luseta eo Derebe, eo dimodi ne se tau-hetairidi. ⁷ Nei eai isi wasa lolona se gugua-hemasaraha.

Tau beruberu Luseta eai se headidiridi.

⁸ Tau esau Luseta eai ie bawa aena se megomego, ia sinana bogana eai aena se baaea, nige i dadadahai. ⁹ Ia Paulo ena riba i ataiei: Paulo ia i itadidini, eo ia nuana i ita ena sunuma eai abo i mauri, ¹⁰ i arina lailai, i ene, "U toro dudurai aem eai." Ia abo i lamposi, i laulau. ¹¹ Tatao Paulo ena gigibori se ita, se eoga lailai arina Lukaonia eai, si ene, "Eaubada se dobima arida eai, adi ao doha tatao!" ¹² Isi Banaba esana se torebui * Dia, eo Paulo esana se torebui ^{14.12} Hereme, paana ede ia i laulauguguiasom. ¹³ Dia ena kohena tauna, eanua baubauna eai, bulumakau eo oeagi liasidi inodi i ledima do-bila eai, bena tatao maenayao abo se aitalasam. ¹⁴ Aposotolo ne Banaba eo Paulo, se ataiei, edi lulu se purisidi, se aitautau tatao boeadi eai, se eaba lailai, ¹⁵ si ene, "Tautaubadao e, saha aue abi? Ai hinage tatao, nuamai, doha omi, wasa lolona ai leama omi enamiu, teina nuatu eauyauredi ta bena au nuagabaedi na au sinibui Eaubada maumaurina arinai, ia ede galewa, eo tanoubu, eo gabogabo, eo ginauri gamagam-agari boeadi eai tau hetubudi ede. ¹⁶ Isidi bagubagunadi eai, basileia gamagaridi isibom edi laulau se lauwataidi, ¹⁷ ia mo nei huiana ne hinage, heiheinoina se masaraha, ena abi se lolo, eda nabu i hetaruyama, eo masuri i hetare, arinai nuada se lolo, bogada se sese, ta kode." ¹⁸ Ina riba ta arinai tatao se nuahidi, aitalasam nuatuna wa arinai abo i lautom.

Paulo se lauwe'ui Luseta eai.

¹⁹ Iudea tataodi headi Anetioka eo Ikonio eai se laoma, tatao se lauhesomdi, isi Paulo se lauwe'ui abo se niurilagei eanua murimurina eai, edi nuatu si ene bena i mate aririo.

Misionari lauwasu bagubagunana wasana.

²⁰ Tauataataiena ia se toro-hetaiiri, abo i toro, ie uio eanua eai: maraitom maena Banaba eanua se laugabaei se lau Derebe eai. ²¹ Nei eanua eai ne wasa lolona se guguiadi

* 14:12: Edi eaubada esadi.

eo gamagaridi se heatadi, abo se uio Luseta, eo Ikonio, eo Anetioka eai. ²² Tauataataiena nuadi se headidiridi, eo se henuapaipaidi edi sunuma bena se sogohididini, eo si ene amamna gamagamagari aridi eai abo ta lulau Eaubada ena basileia eai.

Diakona se hetorodi ekalesia gamagamagari boeadi eai: se uio Anetioka eai.

²³ Ekalesia gamagamagari aridi eai babadadi se hetorodi, maediyao se lau-uura, eo se aiaiudi hinage, abo enadi se lau-uura Guiau arinai, ia wa se nuatudidini. ²⁴ Isi Pisidia se diogabaei se lage Pamepulua eai. ²⁵ Isi Peregaa eai riba se lauguguiai, abo se dobi Atalia eai: ²⁶ arinai abo se geru se lau Anetioka eai, edi aba torohai ede, arinai se hetorodi, Eaubada ena ainauia i mosedi adi paisoa wa se heohi wa enana. ²⁷ Isi se lage, ekalesia se heoigogodi, Eaubada ena abiabi isi aridi eai wasana se duai, eo se heribadi Eaubada sunuma dobilana ie soe Murimuri-tataodi enadi. ²⁸ Nei eai se miamia huia begana ie loha, tauataataiena maediyao.

15

¹ Tatao headi Iudea eai se dobima tauataiena se heatadi, si ene, “Omi ena taba nige au peritome, doha Mose ena laulau, taba nige au mauri.”

Paulo eo Banaba eo headi se sae Ierusalem eai.

² Paulo eo Banaba isi maedi se lulu, eo se haiawayagara, arinai ede Paulo eo Banaba se hetamaridi eo headi hinage maediyao, se sae Ierusalem eai aposotolo eo babada aridi eai teina riba ta bena se hesioei. ³ Ekalesia dobila eai se woeaidi, isi Ponikea eo Samaria se dio, Murimuri-tataodi se henuabuidi wa ribana tatao se heribadi: arinai tauataiena gamagamagari se kode ariri. ⁴ Isi se lage Ierusalem eai, ekalesia, eo aposotolo eo babada se abidi, Eaubada ena abiabi gamagamagari isi aridi eai se ribaedi. ⁵ Tauataiena headi, isi Parisea peledi, se toro si ene, “Taba se heperitome i lolo, isi taba se lauhesomdi hinage Mose ena laugagaeo bena se sogohidi.” ⁶ Aposotolo eo babada se oigogo ina riba ta se oiribaei.

Petero ena riba: isi Eaubada Earua i moseyao wa saha laugagaeo ta hepatulau aridi eai?

⁷ Isi se haihaiawayagara daoi, Petero abo i toro i ribalau aridi eai, i ene, “Tatao e, eo egu tataoyao e, omi au itayao, nabada wa Eaubada i hineridao bena eau awagu eai Murimuri-tataodi wasa lolona ribana se ataiei, abo se abiwatawai. ⁸ Eaubada nuadi i itadio ia ena heiheinoi ede Earua Tabuna, hinage i mosei aridi eai, doha hinage i leama arida eai. ⁹ Ita ede ina, isi ede nei, nige i abiudoiedi, edi

sunuma eai nuadi i deuri-heaadi. ¹⁰ Omi aue saha Eaubada au nohoi, bena ina oibahe ta au toresaei tauataataiena gedugedudi eai, tamadayao edi adidiri eo ita eda adidiri nige gonogonoana. ¹¹ Na ta nuatui, Guiau Iesu Keriso ena ainauia eai mo abo ta mauri, doha hinage isi.”

¹² Gamagaridi oigogo eai wa isi nige ariarinadi, Banaba eo Paulo edi riba se ataieikomakomanidi, gigiboridi eo noodi Eaubada i hemasarahadi nimadi eai wa, Murimuri-tataodi boeadi eai, taudi labui se ribaribaedi. ¹³ Se riba lautom abotai abo Iamesi ie riba, i ene, “Tatao e, eo egu tataoyao e, egu riba ta au ataiei. ¹⁴ Simeona wasa wa i ribaeyao Eaubada Murimuri-tataodi i ita-mugaiedio, headi ia bena i abidi se hemala ena tataoyao eai se lau. ¹⁵ Peroveta ribadi hinage nei doha gonogonoadi mo, doha si uriyao si ene,

¹⁶ ‘Abotai abo ea uioma,

Davidana abamia iaede i gurio wa, abo ea heterouioi;
i tatagorigorio abo ea peigogouioi

¹⁷ bena tatao gamagaridi Guiau se eooi,

Murimuri-tataodi gamagaridi hinage, isi wa esagu eai se eogaidi,

¹⁸ Guiau ie riba, ia mumuga eai ginauri gamagaridi ta i hemasarahadi.’ (Amos. 9.11; Iere. 12.15; Is. 45, 21.)

¹⁹ Na egu riba hedudurai ede teina ea ene, Isi Murimuri tataodi headi se sinibui Eaubada arinai tabu ta hemodedi.

²⁰ Uriuri enadi mo ta uridi, ta ene edi oitau laulaudi tabu se abiwataiuioidi, tabu se itaitadio, eo ginauri gadodi se lamosidi abo se otaotaedi, eo osina hinage tabu se abilau.

²¹ Mumuga eai i laoma wau-ta eanua gamagamagari eai Mose se guguaiei: sabati gamagamagari sunago alodi eai ena uriuri wa se hasihasiridi.”

²² Aposotolo, eo babada, eo ekalesia gamagamagari hinage si ene i lolo tatao headi se riba hinehineridi se hetamaridi Paulo maena Banaba maediyao abo se lau Anetioka; isi esadi ede, Iuda esana esau ede Basaba, eo Sila hinage, isi ekalesia edi tatao adidiri. ²³ Edi uriuri abo se laei, si uri ina doha, “Omi ema tataoyao e, Murimuri-tataomiu, Anetioka eo Suria eo Kilikia taumiamia, ai aposotolo eo babada eo emi tataoyao ina, ai aitoiemiu. ²⁴ Ai ataieyao tatao headi se laugabaemai se laowa me, edi riba aridi eai se hemodemiu, nuamiu se heponoponodi, si ene omi taba au peritome eo laugagaao au sogohi: riba wa ai nige ai heyaridi wa. ²⁵ Aie oigogo esega eo nuamai esega, ai ene i lolo tatao headi ai hineridi abo ai hetamaridiwa Banaba eo Paulo maedi se laowa, taudi labui ta ai gadosisiedi, ²⁶ isi edi mauri se nuagabaeyao eda Guiau Iesu Keriso debana eai. ²⁷ Arinai Iuda eo Sila ai hetamaridiwa, teina riba ta awadi eai hinage abo se heribamiu. ²⁸ Paana

ede Earua Tabuna maemai ai ene tabu ami oibahe ai heperohenapaidi mo; ²⁹ teina mo au nuatukomakomani, sarai se heaitalasamdi edi oitau aridi eai au dabu, osina hinage eo ginauri gadodi se lamosidi tabu au aidi, eo tabu au itaitadio. Meta ginauridi au otaotaedi i lolo ede. Aioni.”

³⁰ Se hetamaridi se lau abo se lage Anetioka eai moutuana se heoigogoidi abo uriuri wa se mosei aridi eai. ³¹ Isi se hasirinonohai, nuadi abo se taru, se kode ariri. ³² Iuda eo Sila, isi hinage peroveta, riba gamagamagari aridi eai ehadiyao se guguiaidi, eo se headidiridi hinage. ³³ Se miamia, abotai abo edi tataoyao se hetmaridi se uio aposotolo aridi eai ma nuawoiwoinadi. ³⁴ Taiede Sila ena nuatu i ene i lolo nei eai i miamia begana. ³⁵ Paulo eo Banaba se miamia Anetioka eai, Guiau ena riba se laulauheataei, eo se laulauguguiaei, eo tatao gamagaridi maediyao hinage.

Paulo ena misionari lauwasina helabuna: Sila se hineri.

³⁶ Asubena headi se lauo Paulo abo i ribalau Banaba arinai, i ene, “Hage ta uio eda tataoyao ta itadi eanua gamagamagari eai Guiau ena riba ta guguiaidi wa, ta itadi edohadi.” ³⁷ Banaba Ioane, esana esau ede Mareko, ia nuagadona mo bena maedi se lau. ³⁸ Paulo ena nuatu i ene nige i lolo maedi se lau, paana ede nabada wa Pamepulua eai i laugabaedi, adi paisoa nige i sagui. ³⁹ Taudi labui se haiawayagara ariri arinai abo se tausudara; Banaba Mareko i woeai ana sagu, se geru se lau Kuperu; ⁴⁰ na Paulo Sila nuana i amnaei, abo se torohai, edi tataoyao enadi se aiboda baguna, bena Guiau ena ainauia se abi. ⁴¹ Ia ie lau Suria eo Kilikia i utudio, ekalesia gamagamagari i riba-headidiridi.

16

Paulo Timoteo i lobai.

¹ Ia ie lage Derebe eai, eo Luseta hinage: tauataiena esau nei eai esana ede Timoteo, sine esau natuna, ia Iudea sinena eo ia tauataiena, na ia tamana Heleni tauna. ² Tauataiena gamagaridi Luseta eo Ikonio eai se mia, si ene, ia tau lolo. ³ Paulo ia i henua ia maena bena se lau; ia abo i heperitome paana Iudea tataodi nei eai se miamia i nuatuidi, isi gamagaridi se nuatuiyao ia tamana Heleni tauna. ⁴ Se tau-tausi se lau eanua gamagamagari eai, aposotolo eo babada Ierusalem eai se mia wau edi riba wa se moselaedi bena se sogohidi. ⁵ Ina doha ekalesia edi sunuma eai se headidiridi, eo asubena gamagamagari se hetadada helailai.

Earua Tabuna i woeaidi.

⁶ Isi se dio'o Perugia eo Galatia tehadi eai, Earua Tabuna i ribanuahidi tabu riba wa Asia eai se guguiaei. ⁷ Abotai

abo se lage Musia eai bena se lau Bitunia, na Iesu Earuana nige ie eari. ⁸ Arinai Musia se utuhadidi, abo se dobi Toroa eai. ⁹ Maiona eai Paulo i enosuai: tau Makedonia esau i totoro i aiaibodai i ene, “U dioma Makedonia eai, u saguimai.” ¹⁰ Enosuai eai ie ita maesega bena ai lau Makedonia eai ema dabila ai eooi, ai ene, Guiau i eogaimai, evanelia isi enadi abo ai guguaiei. ¹¹ Arinai Toroa eai aie ue, ai boboeo ai dobi Samotake eai, mara-ie-tom Neapoli eai aie duna.

Paulo eo Sila Pilipi eai.

¹² Nei eai ai geru-gabaei ai lau Pilipi eai, Makedonia eanua ede, nei tupo ne eanua wasawasana, Roma edi asa esau; eanua eai ne hinage asubena headi arinai ai miamia. ¹³ Sabati eai eanua ai laugabaei ai lau saga laopana eai, tatao edi aba lau-uura eai ne; ai bawabigabiga, sisine nei eai se bawagogo ai ribalau aridi eai.

Taunuabui bagubaguna Europa eai.

¹⁴ Sine esau esana Lidia, ia lulu buiabuia tau-uneunena, ena eanua esana Tuatira, sinena wa ia Eaubada tauaihelahuina ema riba i ataiedi; Guiau ia nuana i hemalapai, Paulo ena riba abo i ataieikomakomanidi. ¹⁵ Ia se hebapatisoiyao, eo ena numa taumiaidi hinage, i awanorimai, i ene, “Ena nuamiu au ene Guiau ea nuatu-mamohoiniyao, au laoma egu numa eai au miamia.” Ia i nuaomai.

Demoni se aiduiei: Paulo eo Sila se pidiridi.

¹⁶ Huia esau ai lau aba lau-uura eai siu esau i alaawai maemai ai hailobai ena alaawai maisadi lailaidi ana tanu-tanuaga se abiabidi. ¹⁷ Paulo maemai i hemuriwataimai, i eabayaba, i ene, “Teina tatao ta, Eaubada Saesaearirina ena heaheari tataodi, isi mauri dobilana tauheitada.” ¹⁸ Asubena gamagamagari ena laulau esega mo nei doha. Paulo i tau-siololo, ie torobui i ribalau earua arinai, i ene, “Iesu Keriso esana eai ea heribam ta u lulage murimuri eai.” Nei mahana eai ne abo i lulage.

¹⁹ Ana tanuagao se ita edi ginauri edi abaabidi i lautom, Paulo eo Sila se taoidi, se niuridi abauneune eai. ²⁰ Se woeaidi se laedi abahedudurai tataodi aridi eai, si ene, “Teina tatao ta, Iudea tataodi ina, eda eanua ta se heasiwolewole. ²¹ Laulau headi hinage se laulauheataedi, ita Roma tataoda taba nige ta abidi, taba nige ta laulauedi.” ²² Moutuadi se torogogo esega bena se guduguidi: tau riba-heduhedudurai tataodi adi lulu se purisihaidi, si lauhesomdi si ene, “Taudi labui me au pidiridi.” ²³ Se pidiridi e, se pidiriasayaidi, abo numa masigiri eai se toredi, tautawataidi se heriba, bena i itawataikomakomanidi. ²⁴ Se heriba wa i ataiei isi birigom eai i toredi, aedi aba audi oeagi eai wa i eahisididini.

Numa masigiri tanuagana Pilipi eai i nuabui.

²⁵ Bulinuana eai Paulo eo Sila se lau-uura, eo se wana Eaubada se aihelahui: tatao-tututugududi se ataataiei, ²⁶ moniinii tano i hetabubu gorigori, numa masigiri paana i he'eo'eo: dobila gamagaridi se tasoegorigori, tatao gamagaridi adi auau se tamotumotugorigori. ²⁷ Numa masigiri taitawataina nihinihina i uiouioma, numa masigiri dobiladi i itadi se soegorigoridio, ena elepa i niusihai bena iabom i unuuioi, ena nuatu i ene, tatao wa se dagogorigorio. ²⁸ Paulo i eabalailailau i ene, "Tabu u hebaaeauioim, ai gamagarimai ede ina." ²⁹ Ie eoga bena numa se tuihemara, i tauoilusae, i tabutabubu i gurisalaoba-dobi Paulo maena Sila nuanuadi eai, ³⁰ i woelageedi murimuri eai, i ene, "O tautaubadao e, saha ea abi abo ea mauri?" ³¹ Isi si ene, "Guiau Iesu Keriso u ataiwataei, oa abo u mauri, eo em numa taumiadi hinage." ³² Guiau ena riba, ia se heriba, isi gamagaridi hinage ena numa taumiaina enadi hinage se riba. ³³ Nei maionana eai ne ia i laedi adi gai i deuridi; eo se hebapatisoidi, ia eo ena numa tataodi gamagaridi. ³⁴ Ia abo i woearidi i laedi ena numa eai, aiai i peiauri matadi eai; nuana i lolo ariri, eo ena numa taumiaina tataodi hinage, paana Eaubada se nuatuwatawai.

Paulo i awayagara, i ene taba nige i pesa eamuyamui.

³⁵ Mara- ie- tom riba tauheduduraina tataodi heaheari tataodi se hetamaridi, si ene, "Lahi tatao wa au iairigabaedi." ³⁶ Numa masigiri taitawataina teina riba ta Paulo i heriba, i ene, "Riba tau-heduduraina tataodi headi se hetamaridima si ene ai abo ai iairigabaemiu; taiede au lau me, manulalonimiu." ³⁷ Na Paulo i ribalau aridi eai i ene, "Ai sewaRoma tataomai, masaraha eai mo se pidirimai eo se tutuguduimai, sora nige se hedudurai-nonohaimai, ina bena abo se iairiyamuyamuimai? Taba nige'e! Na isibom mo taba se laoma se iairigabaemai." ³⁸ Tauiala tataodi riba ta se laei tauheduhedudurai aridi eai, isi abo se matausi paana se ataiei isi taudi labui ede tauhemala-Roma; ³⁹ arinai se laoma se lautoiedi, se woelaedi murimuri eai abo se aibodaidi bena eanua se laugabaei. ⁴⁰ Isi numa masigiri eai se lulage, abo se awasae Lidia ena numa eai; edi tataoyao se itadi, se hepaipainonohaidi, abo se torohai.

17

Ekalesia se hetubu Tesalonia eai

¹ Isi taudi labui Amepipoli, eo Apolonia se dio, abo se lulage Tesalonia eai, Iudea edi sunago esau nei eai. ² Paulo ia kamakamanina i awasae isi aridi eai asubena sabati haiona uriuri tabuna ribana maedi se ribaribaei, ³ i ribahemasaraha,

eo i ribariba headidiri, i ene Keriso taba i amamna, mate eai hinage taba i torouioma, i ene “Teina Iesu ta, ia ribana ea guguiamiu ta, ia Keriso ede.” ⁴ Isi headi se ataiwatai abo se patulaoma Paulo eo Sila aridi eai; Heleni tataodi Eaubada taunanabuena moutuana lailai hinage, eo sinesinebadao begana se gamagari. ⁵ Iudea tataodi isi nige se ataiwatai wa se aiaromagigiri, tatao gaibu sanapu baaea tataodi headi se heoigogoidi eanua wa se heasiwolewole: Iasona ena numa se haillopai, taudi labui se eoidi bena se laedi murimuri eai tatao aridi eai. ⁶ Isi nige se lobaidi, arinai Iasona eo tauataataiena headi se ahaladi se laedi eanua tanuagadi aridi eai, si ene, “Teina tatao ta, tanoubu se heasibui, isi ede se lagema inai hinage, ⁷ Iasona i abitaumanaidi: isi gamagaridi Kaisara ena laugagaeo ribadi se utusidi, si ene, Wasawasa esau ede Iesu.” ⁸ Teina riba ta se ataiei, eanua tataodi, eo tanuagadi hinage aruadi se loi. ⁹ Se riba paodi, Iasona maena sasaguyao se toreyao, isi abo se iairigabaedi.

Paulo eo Sila Berea eai.

¹⁰ I maiona abo tauataataiena Paulo eo Sila se hetamar-heulaidi se lau Berea; isi se lage nei eai se awasae Iudea edi sunago alona eai. ¹¹ Tatao Iudea inai se lolo, nige doha tataodi wa Tesalonia eai, paana ede riba wa se ataiei ma nu-agigiboridi, asubena gamagamagari uriuri tabuna se eoidi, bena riba wa se hemamohoiedi. ¹² Arinai gamagaridi se ataiwatai, Heleni sisine saesaedi headi, eo tatao headi gamagaridi hinage. ¹³ Iudea tataodi taumia Tesalonia wa, wasana se ataiei Paulo Eaubada ena riba Berea eai i lauguguai, se hemuriwataidima nei eai, tatao se heasiwolewole di eo se hesohesomdi. ¹⁴ Arinai tauataataiena Paulo se hetamari heulai bena i dobi geregere eai; na Sila maena Timoteo se mia. ¹⁵ Isi Paulo tauwoeaina wa ia se laei Atenai eai; i lauhesomdi, i ene Sila maena Timoteo bena se heuheulama ia arinai; arinai isi wa abo se torohai se lau.

Paulo Atenai eai.

¹⁶ Paulo Atenai eai i bagibagiedi, eanuana ie ita, oitau i monau, arinai nuana i auauedi, ¹⁷ arinai ede maenayao Iudea eo Eaubada taunanabuena headi, sunago alona eai riba se haihaiawayagaraei, eo abauneune eai asubena gamagari aidobudi nei eai i lobaidi maena se oiouriba. ¹⁸ Tatao sonogadi headi esadi se ribaedi Epikuro peledi eo Sitoiko peledi, maedi Paulo se oiuriba, na headi si ene, “Hage taugigigimasina ta abo i ene edoha?” Headi hinage si ene, “Ia eanua udoi eaubadadi tauguguguaidi,” paana ede Iesu eo ena torouio i ribahemasarahadi. ¹⁹ Isi ia abo se abilau, se woeai se laei * Areopago eai, si ene, “Wau riba harihariuna u ribaei wa, taba

* 17:19: Edi aba oigogo esana.

ai ataiei? ²⁰ Paana riba udoi ina u leama beamai eai; ai henua aniona ai ita.” ²¹ Kamanidi Atenai tataodi eo taulaolaoma nei eai se miamia, edi laulau esaga mo, riba harihariudi bena se ataataiedi eo se ribaribaedi.

Gugua Areopago eai. Riba paana: Iesu Keriso sabina, Eaubada tanoubu abo i hekiraino.

²² Paulo abo i toro Areopago duaduarina eai i ene: “Atenai tataomiu e, ea itamiuo emi aigora se gamagari ariri. ²³ Ea baeawaemiu emi abatabaohu gamagaridi ea itadi, aitalasam hatahatana esau hinage ea iita, uriurina ina doha se pusai si ene, “NUATUPA EAUBADANA ENANA”; ia au tabaohui, na au hekau wa, ia ede ea ribahemasaraha arimiu eai ta. ²⁴ Eaubada tanoubu tauginaurina, eo ginauri gamagaridi boeana eai, ia galewa eo tanoubu Guiauna, tatao dubu se ginauridi nimadi eai taba nige ena abamiahai meta, ²⁵ hinage tatao nimadi eai taba nige se aihelahui, ia nige ginauri esau i hedehea, mauri eo eawasi eo ginauri gamagaridi ia tauleamana ede. ²⁶ Tatao basileiadi gamagaridi tanoubu potana eai se miamia osinadi esegana eai i ginauridi, isi edi huia i ribaedio, edi abamia sigasigadi i ribaedio hinage, ²⁷ bena Eaubada se eooi, bena se heoidadai abo se lobai. Ia gamagarida gegesida eai, ia nige eda lohaloha eai. ²⁸ Doha omi emi tauwana headi se ribaei, ‘Ia arinai ta mauri, ta moimoiu, ta miamia ta;’ eo hinage, ‘Mamohoi, ita hinage ia nanatunayao ede.’ ²⁹ Ena ita Eaubada nanatunayao, tabu ta ene Eaubada ia doha *gold* e *silver* e we’u tatao se heoitau edi nuanuatu eai. ³⁰ Emi huia supusupu eai wa, Eaubada nige i nuatui, na huia ta mo i lauhesomda i ene tatao gamagaridi, eanua gamagaridi eai, bena nuadi se buidi; ³¹ paana ede ia asubena esau i ribaei, arinai tanoubu ta abo i hedudurai laulau dudurai boeana eai, tau esau i hetoro wa debana eai, hinage tatao gamagaridi edi abahemamohoiena i mosedi, iaede ia mate eai i heterouioi.” ³² Isi mate torouiona ribana se ataiei, headi se alaliuliuaei; na headi si ene, “Em riba wa huia esau bena ai ataieiuioi.” ³³ Arinai Paulo abo i laugabaedi. ³⁴ Na tatao headi se awaabiei, eo se nuatuwatai, boeadi eai tau esau ede Daionesio, Areopago tauna, sine esau esana Damari, eo headi hinage maediyao.

18

Paulo Korinito eai.

¹ Teina ginauri ta muridi eai Paulo Atenai i laugabaei, i laoma Korinito eai. ² Ia Iudea tauna esau maena se hailobai esana ede Akula, Ponoto eai se labasi, ia ma monena esana ede Peresila, Italia eai se laolaoma (paana ede Kalaudia Iudea tataodi gamagamagari i lauhesomdi, isi Roma se laugabaei),

Paulo ie lau i itadi; ³ ia eo isi edi nima-paisoa esega, arinai i miamia aridi eai eo se paisoa, adi paisoa wa numa-lulu tauginaginauri, ⁴ Sabati gamagamagari sunago alona eai i lauheataidi, Iudea tataodi eo Heleni tataodi i nuaoihetairidi.

Ekalesia se hetubu Korinito eai.

⁵ Abotai Sila eo Timoteo Makedonia eai se lagema, Paulo laugugua arinai ie mode Iudea tataodi aridi eai i ribariba-hemasaraha, ede Keriso iaede Iesu. ⁶ Isi se riba gudugudui eo se arina baaeai, arinai ana lulu i oiluiluidi i ribalau aridi eai i ene, “Omibom mo osinamiu potamiu eai! Eau taba nige agu giru. Ina abo ea lau Murimuri-tataodi aridi eai.” ⁷ To nei eai i laugabaedi, i awasae tau esau ena numa eai, tau wa esana Tito Iusetu, Eaubada tauaihelahuina esau, ia ena numa eo sunago se haitore-siribebe. ⁸ Kirisipo, sunago tanuagana, abo Guiau i nuatuwatai, maenayao ena numa tataodi gamagaridi; Korinito tataodi moutuana Paulo ena riba se ataiei Guiau se nuatuwatai hinage, eo se bapatiso. ⁹ Maiona esau Guiau Paulo i he-enosuai, i ribalau ia arinai, i ene, “Tabu u matausi, u riba, tabu u monomonou, ¹⁰ eau maidam, taba nige tau esau i abilaowa, i hebaaeam: paana ina eanua eai ta egu tatao se gamagari.” ¹¹ Ia nei eai ie mia borimai esega, eo nawalai haligigi-esega Eaubada ena riba i laulauheatai isi boeadi eai.

Galio ena nuatomatoma.

¹² Na huiana ne Galio se hetoro Akaia tehana eai i hemala gavana, Iudea tataodi nuadi esega bena Paulo se toai, ia abo se laei tauhedudurai matadi eai, ¹³ si ene, “Tau ta tatao i nuaoihetairidi, bena Eaubada se aihelahui nige doha ema laugagaao eai ribana.” ¹⁴ Paulo bena awana i dabari, Galio i ribalau Iudea tataodi aridi eai, i ene, “Iudea tataomiu e, taba laulau ponori, e laugagaao utusina lailaina esau, matapaana gonoana abo emi riba ea ataiei; ¹⁵ na ina emi laugagaao ribadi eo esadi au haihesabaedi, besi, omibom au eooi; eau taba nige ina ginauri ta ea hedudurai.” ¹⁶ Abahedudurai abababawana eai ne i aiduedi. ¹⁷ Isi gamagaridi Sosene, sunago tanuagana wa, se toai, aba-hedudurai numana awamatana eai se pidiri. Na Galio laulau ta nuana nige se lauedi.

Roma 6.14. tauurina, eo 2 Kor. 3.7-14; eo Gala. 3.23-28 Iudea edi laugagaao esau i abiwatai.

¹⁸ Murina eai Paulo i miatahitahi aridi eai, abotai tauataiena i lauaioniedi, ie geru ie lau Suria, Peresila eo Akula ia maenayao: Kenekerea eai i uru’om, paana ede ia i aigora. ¹⁹ Epeso eai se lage metai i laugabaedi: iabom i awasae sunago alona eai Iudea tataodi maenayao se ribariba. ²⁰ Isi ia se awanori bena i miatahitahi aridi eai, nige nuana mia;

²¹ i lauaioniedi, i ene, “Eau ea lau Iesusalema eai, mataasi i hanahanauma ta taba eā ai: ena Eaubada nuana abotai hari huia abo hinage ea uioma arimiu eai. Ia Epeso abo i gerugabaei.

²² Kaisaria eai ie pesa, i awasae ekalesia i lautoiedi, abo i dobi Anetioka eai. ²³ Huia headi nei eai ie mia, e eawalana ia abo Galatia, eo Perukia i taudadaidi, tauataataiena gamagaridi i headidiridi.

Apolo Epeso eai.

²⁴ Iudea tauna esau esana Apolo, ia Alesania eai se labasi, i laoma Epeso eai. Ia manana i amna, ena riba se lolo eo uriuri tabudi abidi ie ata ariri. ²⁵ Na tau ta Guiauna ena laulau se heatayao; earuana hinage i gigibori ia Guiauna ena ginauri i heata headidiridi, Ioane mo ena bapatiso ribana i ataiei. ²⁶ Ia sunago alona eai i riba-adiadidiri: Peresila eo Akula ia se ataiei, se woeai maedi, Eaubada ena dobila se heitakomakomanini. ²⁷ Ia bena i geru i lau Akaia eai, ena tataoyao se uriuri tauataataiena aridi eai, bena ia se labai. Nei eai ie lage isi wa ainuia debana eai tauataiwataina abo i saguaririedi, ²⁸ paana matadi eai Iudea tataodi i nuaoihetairidi, ena riba se gigibori, uriuri tabudi eai tatao i heatadi, Keriso ia Iesu ede.

19

Paulo Epeso eai.

¹ Huiana ne Apolo Korinito eai ie mia, Paulo tuposaesae eai i utuhadidi i laoma Epeso: tauataataiena headi nei eai i lobaidi. ² Ie ribalau isi aridi eai, i ene, “Emi huia ataiena wa i laoma e teina huia ta, omi Earua Tabuna au abiyao, e nige’e wa?” Isi se ribalau ia arinai si ene, “Nige’e, doha Earua Tabuna ribana sora nige ai ataataiei.” ³ Ie ribalau isi aridi eai, i ene, “Saha esana arinai se hebapatisoimiu wa?” Isi si ene, “Ioane ena bapatiso arinai.” ⁴ Paulo abo i ene, “Ioane ena bapatiso henuabui bapatisona, eanua tataodi i heribadi, i ene, esau ia murina eai i laoma isi abo se ataiei, ia ede Iesu Keriso.” ⁵ Teina riba ta se ataiei, Guiaua Iesu esana eai abo se hebapatisoidi. ⁶ Paulo nimana i saosaeyao isi potadi eai, Earua Tabuna abo i taru isi potadi eai: isi hari arina, hari arina arinai se ribariba, eo hinage se riba-peroveta. ⁷ Isi gamagari tataodi saudoudoi-labui.

Paulo sunago alona eai Epeso eai: eo Turano ena sikulu eai.

⁸ Ia i awasae sunago alona eai nawalai haiona i riba adididiri, maedi se haiawayagara, eo tatao i henuabuidi se sinibuima Eaubada ena basileia ginauridi aridi eai. ⁹ Headi nuadi se oiura, nige se nuatuwatai, na dobila ta se riba

baaeai tatao gamagaridi matadi eai, ia abo i laugabaedi, tauataataiena i laehesuaaraedi, asubena gamagamagari Turano ena aba sikusikulu eai riba se haiawaeagaraei. ¹⁰ Borimai labui ana abi nei doha; arinai isi gamagaridi Asia eai se miamia Guiau ena riba se ataiei, Iudea tataodi, eo Heleni tataodi hinage.

Paulo laulau gigiboridi i ginauridi.

¹¹ Heiheinoi gigibori-ariridi Eaubada i ginauridi Paulo nimana eai: ¹² arinai gadogado eo nogi Paulo tauna eai se hesausauedi, abo se laedi tauasiasiebo aridi eai, adi asiebo arinai se lautom, eo earua baaea hinage se lululage. ¹³ Iudea headi taudadadausi gaibu, tauobaoba tataodi, isibom Guiau Iesu esana se atai, demoni tauluina aridi eai, si riba ina doha, “Iesu, Paulo i guguiwai wa, debana eai ai duiem ta.” ¹⁴ Sekeva, Iudea tauna, ia kohena lailai, ia nanatunayao tataodi haligigilabui edi laulau doha nei. ¹⁵ Na earua baaea i ribalau aridi eai, i ene, “Iesu abina ea atao, eo Paulo hinage abina ea atao, na omi aidobudi?” ¹⁶ Tau wa demoni i lui wa, i amposi sae potadi eai, i adidiri ariri, i hebaaeadi, numana se dagogabaei ma tauahaahadi eo ma adi gai. ¹⁷ Wau wa Epeso taumiaina gamagaridi se ataiei, Iudea tataodi, eo Heleni tataodi hinage, isi gamagaridi matausi lailai se hearo, arinai abo Guiau Iesu esana se hetadada helailai. ¹⁸ Tauataataiena gamagamagari se laoma, se riba hemasara, edi laulau se wasawasaedi. ¹⁹ Isi gamagaridi hinage se obaoba borabora, edi buka se ledima se peigogoidi, tatao gamagaridi matadi eai se gabudi, buka wa maisadi se hasiriesegaidi, moni *silver* tausani tatao-labui-se-mate-saudoudoi. ²⁰ Arinai Guiau ena riba ie tubu lailai, i adidiri ariri hinage.

²¹ Wau ginauri wa muridi eai, Paulo ena nuatu, Earua debana eai, bena Makedonia eo Akaia i taudaru abo i lau Ierusalem eai, i ene, “Ea lau nei eai, abotai abo ea lau Roma ea ita.” ²² Ana sasaguyao labui Timoteo eo Eraseto i hetamaridi se bagunai Makedonia eai, ia iabom huia kuukuu mo ie mia Asia eai.

Ario tataopaisoa Epeso eai se hetalagegaga.

²³ Nei huiana ne, Dobila ta debana eai tatao nuadi se heasiwolewoledi. ²⁴ Paana ede tau esau esana Demetiu, *silver* taupaisoaina, Diana ena abatabaohu *silver* eai i ginaginauridi, eo taunimabiga adi bodao une lailai arinai se abiabini. ²⁵ Ia ana bodao wa maedi tatao gamagaridi wau paisoa se abi wa, i heoigogoidi, i ene, “Tautaubadao e, omi au nuatuiyao ina paisoa eai ta eda une ta hetubu. ²⁶ Hinage au itayao, eo au ataieyao, Epeso eai mo nige’e, eanua gamagamagaridi hinage

Asia eai, teina Paulo tatao gamagaridi i nuanuaoidi eo i henu-abuidi, i ene isi nige eaubada tatao nimadi eai mo se ginauridi ede. ²⁷ Arinai ada paisoa ata doha se helautom, eo eaubada-sine lailaina Diana, ena dubu ata doha se laupalihibaei, ia Asia eo tanoubu se oihai se tabaohui, ana bela eo ana tepo saesae ata se hetagorigori.”

²⁸ Isi teina riba ta se ataiedi, abo adi ou se ealayala, se eaba lilai si ene, “Diana Epeso edi eaubada, iabom i sae ariri!” ²⁹ Eanua tataodi gamagamagari se heasiwolewoledi: isi Gaio eo Aritako se toaidi, taudi labui Makedonia tataodi, isi hinage Paulo helena taulau wa, isi maedi se aिताугого abaaiaiewa numana eai. ³⁰ Paulo ena nuatu, i ene bena i awasae tatao aridi eai, na tauataataiena ia se nuahi; ³¹ headi hinage Asia tautawatai tataodi, Paulo ena heriheriam headi se hetamaridi ia arinai, se awanorini abaaiaiewa numana tabu i awasae arinai. ³² Headi se gagari, si ene doha nei, eo headi se gagari si ene doha nei: arinai edi oigogo wa se heasiwolewole; moutuana se heoigogoidi wa edi laolaoma-gogo matapaana wa nige se nuatui. ³³ Maedi moutuana boeana eai Alesana se dudui, ia Iudea se heterohemasarahalaei. Alesana nimana eai i oitawaidi bena ena eanua tataodi i ribahebigadi. ³⁴ Na se italobai ia Iudea tauna, maesega gamagaridi se wowogogo arinadi esega mo, mahana labui sorasorana eai se wowo gudugudui, si ene, “Diana Epeso edi eaubada, iabom i sae ariri!”, ³⁵ Kaunisela edi tauuriuri tatao i ribahelautomdi, i ene, “Epeso tataomiu e, aitea tau nige i ita Epeso eanua eai Diana ena dubu se itawatai, eo oitauna se itawatai hinage, eada eai i beuma, wa? ³⁶ Omi au nuatuiyao teina riba ta taba nige tauribanuahina, au monou mo, taumiu se biga. ³⁷ Teina tatao ta au woeaidima, isi nige dubu taugirihaidi, emi eaubada-sine hinage isi nige tauribahebaeana. ³⁸ Arinai, ena Demetiu ma helena taupaipaisoa tau esau bena se hegiru, hedudurai numana se soeauri, gavana hinage arinai miamiana; taudi labui abo se lau se lauhetala. ³⁹ Ena hari laulau ribadi au eoidi, oigogo huiana mamohoina eai, arinai au hedudurai. ⁴⁰ Wau hetalagegageda wa arinai ata se hetalada, eda oigogo ta hinage nige matapaana, abo saha ta ribaei” ⁴¹ Ena ribariba ina doha, tatao abo i hetatagorigoridi.

20

Paulo i lau Ierusalem eai: (1) i lau Makedonia eai eo tupo Heleni eai.

¹ Se hetalagegageda lautom Paulo tauawaabiena i eogaidima, i alagoiedi, i lauaioniedi, abo i laugabaedi i lau Makedonia eai. ² Ie lau nei tupo gamagamagari ne aridi eai, i ribahenuapaipaidaoiedi, abo i lage Heleni eai. ³ Nawalai

haiona nei eai maedi se mia. Ia bena i geru i lau Suria, Iudea tataodi headi se oiriba se wesei, arinai abo i uio Makedonia dobilana i lauwaitai. ⁴ Headi ia se hesaguei maenayao se lau Asia eai, Sopata, Piru natuna, Berea tauna; eo Tesalonia tataodi headi hinage, Aritako eo Sekuna: eo Gaio, Derebe tauna, eo Timoteo; Tukiko eo Teropimo, Asia tataodi hinage. ⁵ Isi se bagunaimai, Toroa eai se bagibagiemai.

⁶ Areto-Nige-i-Sese mataasi huiadi se lautom, abo Pilipi ai gerugabaei; asubena haligigi abo ai duna Toroa eai isi aridi eai, hinage asubena haligigilabui nei eai aie mia. ⁷ Sabati asubenana bagubagunana eai, tauataataiena se oigogo, areto se ihi, Paulo i guguanonohaidi, mara-ie-tom bena abo i laugabaedi; ena riba i heloha, i lau e bulinuana eai. ⁸ Lamepa gamagaridi si healasidi ema aba-oigogo eai, biri pota eai. ⁹ Hewari esau, esana ede Eutuko tomlapai eai i babawa, i eno mate. Paulo ma gugualohalohana, arinai abo hewari wa matana se enoeno ariri, numa isi haiona i beuhemuridi, tano eai ia se abi'sini, i mateo. ¹⁰ Paulo abo i pesadobi, i salaoba dobi, i labaisiniama, i ene, "Tabu nuamiu se baaea, ena mauri ma otana tuiatuiana eai." ¹¹ Ia abo i awaseuio, eo areto ie ihi, se ai ai eo riba, i riba heloha i lau e mara-ie-tom, arinai abo i laugabaedi. ¹² Hewari wa se woeaiama i mauri uio, eo nuadi abo se taru komakomani.

(3) Toroa i laugabaei i lau Mileto eai.

¹³ Ai aie geru baguna waga eai, ai lau Aso eai, arinai abo Paulo ai bagibagiei doha i hetaladuimai, ia i henua i lauyona. ¹⁴ Ia maidamai ai hailobai Aso eai ia abo ai usai, abo aie duna Mitelene eai. ¹⁵ Arinai hinage ai ue uio, mara-ie-tom ai lage Kaiosi ubuna eai; asubena esau Samo eai aie duna, imaisina Mileto eai aie duna. ¹⁶ Paulo ena nuatu adidiri i ene, taba nige i pesa Epeso eai, nige bena i bawa Asia eai, bena i lau heuheula Ierusalem eai i lage Penetekoso asubenana eai.

(4) Paulo maena Epeso babadadi.

¹⁷ Mileto eai tatao headi i hetamaridi se lau Epeso ekalesia taitawataidi se eogaidima. ¹⁸ Abo se laoma ia arinai, i ribalau isi aridi eai i ene: "Egu laulau alodaina ede huia gamagamagari omi au itayao, lahinae Asia eai ea lage bagubaguna wa arimiu eai, i laoma e huia ta. ¹⁹ Eau Guiau ea heaeaiei ma nuabigabigagu eo ma matasulugu hinage, eo noho gamagamagari hinage ea hearodi Iudea tataodi se wesewesegu: ²⁰ aba helolomiu nige ginaurina esau ea mahihiei, na nuamiu ea hemasarahadi, eo ea heatamasamasarahaimiu, eo hari numa, hari numa eai, ²¹ Iudea tataodi eo Heleni tataodi hinage ea guguiadi, bena nuadi abo se buidi Eaubada arinai, eo Guiau Iesu Keriso abo se sunusunumaei. ²² Wau ta abo ea

lau Ierusalem eai, earua nuagu i auau, saha eo saha nei eai abo ea hearodi nige ea nuatuidi; ²³ teina mo, eanua gamagamagari eai Earua Tabuna i heribagu, edi aba auaugu, eo agu amamna se abinonohaiyao. ²⁴ Teina ginauridi ta taba nige esau i hemoimoiugu, maurigu hinage taba nige ea nuatui, agu paisoa mo ta taba ea abiheohi ma nualologu, hewau ta Guiau Iesu i leama, Eaubada ena ainauia, wasa lolona, bena ea wasaduaiei. ²⁵ Na ea nuatuiyao, omi gamagarimiu arimiu eai Eaubada ena basileia ribana ea guguiamiu, matagu taba nige au itauioi. ²⁶ Paana ede meta wau asubena ta arinai ea heribamiu me, tatao gamagamagari osinadi giruna eau arigu eai nige'e, ²⁷ paana ede Eaubada ena riba gamagamagari se ohi ea heribamiuo, nige ea ma'e'e. ²⁸ Omi, omibom nanabumiu au nanabu, eo mamoe gamagamagari eawoidi hinage, Earua Tabuna i hetoromiu, isi tauwoeaidi ede omi, Eaubada ena ekalesia iabom osinana eai i unedio, au heaheaidi. ²⁹ Eau ea itayao, ea laugabaemiu, na kedewa-luko abo se luimiu, eawoidi abo se hetatagorigoridi. ³⁰ Headi hinage omi arimiu eai abo se toro, se ribahilihilimiu, bena tauataataiena se niuridi aridi-ena. ³¹ Arinai au soasoari, na au nuanuatui, borimahaiona arinai ea ribahesanapumiu, maiona to asubena nige ea ribalautom, ma matasulugu hinage. ³² Omi wau ta abo ea heabimosemiu Eaubada arinai, eo ena ainauia ribana arinai hinage, ia ena adidiri eai abo i abihetoromiu, ena ainauia i leawa enamiu, tauhetabu gamagamagari maediyao. ³³ Tau esau ena *silver* eo, ena *gold* eo, ena lulu hinage, nuagu nige se lauedi. ³⁴ Omi au itayao, nimagu eai ta ea paipaisoa, agu aiai eo egu ginauri gamagamagari ea lobaidi, agu sasaguyao adi hinage. ³⁵ Ginauri gamagamagari ea heitamiuo, ea ene au paisoa tatao beruberu abo au labaidi, eo Guiau Iesu ena riba hinage abo au nuatuidi, ia i ene ina doha, 'Ta ainaui i lolo ariri, se ainauiaida lolona nige doha.'

³⁶ Ia abo i ribalautom i turibono, maedi se lauuura. ³⁷ Isi gamagaridi se dou ariariri, se durudurulau Paulo gedugeduna eai, ia se alagoiei. ³⁸ Edi nuadubuenta paana ede wau riba wa i ribaei i ene ia matana taba nige se itauioi. Isi dohila eai ia se hesaguei, i lau e waga eai.

21

(5) Mileto se laugabaei se lau Turo.

¹ Ai lauaioni-nonohaidi, waga ai niuridobei, ai boboeo giuri Kosi eai, mara-ie-tom Rodesi eai aie dobi Patara eai aie duna. ² Nei eai waga esau ai lobai i laulau Poinike, arinai ai geruawasi, aie ue. ³ Kuperu ai itaitalaei ai laugabaei ia teha bauri

eai, ai lau Suria, Turo eai aie pesa: nei eai waga gogona se hepehepesa.

(6) Paulo bena i lau Ierusalem: Earua Tabuna ia i nuahi.

⁴ Tauawaabiena headi nei eai ai eoidi, aridi eai aie mia, asubena haligigi-labui: isi Earua debana eai Paulo se heriba si ene tabu i sae Ierusalem. ⁵ Asubenadi e se ohi, abo ai laugabaedi, ema adau wa ai adauei; isi gamagaridi se healatumai dobila eai, ma monediyao, ma nanatudiyao se hesaguemai, i lau e eanua ai laugabaei: aie dobi salagomgom eai arinai ai turibonogogo, ai lau-uura eo ai lauaioniedi. ⁶ Abotai aie geru, na isi se uiouio edi eanua.

⁷ Turo ai gerugabaei, abo aie duna Tolemai eai, tauawaabi-ena ai aitoiedi, asubena esega maedamaiyao aie mia. ⁸ Mara-ie-tom ai abo ai geru ai lage Kaisarea: ai awasae Pilipo ena numa eai, ia ede wasa lolo tauguguiaina lahinae tatao haligigi-labui wa esau ede ia; maedamai aie mia. ⁹ Teina tau ta ia nanatunayao hasara hasi, nige se tawasora, isi hinage tau-peroveta.

(7) Earua Tabuna Paulo i ribaguduguduiuiioi.

¹⁰ Nei eai ai miamia e eawalana, peroveta esau esana ede Agabu, Iudea eai i dobima. ¹¹ Ia i lagema arimai eai, Paulo ena turituri i iairihai, iabom nimana eo aena i auuioidi, abo i ene, “Earua Tabuna ie riba, “Turituri ta tanuagana abo Iudea tataodi Ierusalem eai se au, doha ede teina, abo hinage se moselaei Murimuri-tataodi nimadi eai.” ¹² Teina riba ta ai ataiedi, ai eo isi nei asa ne tataodi, ai riba nuahi, ai aibodai ai ene tabu i sae Ierusalem. ¹³ Paulo mo ema riba i heuioiama i ene, “Au sahasaha au doudou ta, eo aruagu au lauheloi? Ea nonohao taba se augu taiede, taba Ierusalem eai se unuigu Guiau Iesu debana eai, hinage taiede.” ¹⁴ Ema ribanuahi nige i ataiei, arinai ai riba lautom, ai ene, “Besi, Guiau iabom nuana i lauei.”

(8) Paulo Ierusalem eai.

¹⁵ Nei asubenadi ne se lautom ema gogo ai peigogo abo aie sae Ierusalem. ¹⁶ Tauawaabiena headi Kaisarea tataodi maedamaiyao hinage aie lau, Nasona maedi hinage se woeai, ia Kuperu tauna, tauawaabi bagubagunana, ia bena maedamai ai mia.

¹⁷ Aie lage Ierusalem eai, tauawaabiena se eogaisinimai, ma kodedi.

Paulo Iudea edi aigora esau ie abi

Heb. 10.2, 9-12

¹⁸ Mara-ie-tom maedamai Paulo ai awasae Iamesi arinai; babada gamagaridi metai se bawagogo. ¹⁹ Ia i lautoiedi, abo ginauri gamagamagari Eaubada i ginauridi Murimuri-

tataodi aridi eai, ena gugua debana eai, i heriba komakomanidi. ²⁰ Isi riba wa se ataieyao, Guiau se hedebasaei, se ribalau ia arinai si ene, “Ema tau e, u itayao, Iudea tataodi moutuadi gamagamagari se ataiwatai; hinage nuadi se gigibori laugagaeo se abiwatai, ²¹ eo gamagaridi wasam se ataiei, Iudea tataodi gamagaridi Murimuri eai se miamia, bena u heaheatadi Mose abo se nuagabaei, u ene nanatudiyao tabu se heperitomedi, laulau gamagaridi hinage tabu se abiabiwataidi. ²² Ita abo saha ta ginauri? Wau u laoma ta wasana abo se ataiei, moutuadi abo se oigogoma. ²³ Ai heribam ta hage u lauwatai ede. Tatao hasi arimai eai ede se aigorayao. ²⁴ isi u woeaidi maemyao u heaauioim, urudi tau’om’om oabom abo u hemaisadi, tatao gamagaridi arinai abo se ita, wasam wa se ataiei nige mamohoina, na oa hinage laugagaeo sogohina eai u laulau. ²⁵ Na Murimuri tauawaabiena tataodi wa enadi ai uriurio, ai ene teina laulau mo taba se abiwataidi, ginauri se heaitalasamdio oitau aridi eai tabu se abilau, osina hinage, eo gado se lamosidi hinage, eo tabu se itaitadio.” ²⁶ Mara-ie-tom Paulo tatao wa i woeaidi, maenayao i heaauioi abo se awasae esega dubu tabuna alona eai, se hemasaraha edi huia heasisi auiana i lautom, eo esau esau edi ainauia abo se tore.

²⁷ Wau edi asubena haligigi-labui wa i hanahanau abo se lautom, Iudea tataodi Asia eai se laoma, ia dubu alona eai se ita, tatao gamagaridi se heasiwolewoledi, abo se abilau ia arinai se toai. ²⁸ Isi se eabayabaei, si ene, “Isaraela tataomiu e! Au saguimai! Teina tau ta, tatao gamagamagari eanua gamagamagari eai ia taulauheataedi, eda eanua tataodi, eo laugagaeo, eo dimo ta, hinage i lauguduguidi: Heleni tataodi i woeaidi dubu alona eai, teina dimo tabuna ta i hebii.” ²⁹ Paana isi eanua dobilana esau eai Paulo se itayao, maena Toropimo, Epeso tauna, ia i hesaguei, to isi si ene bena Paulo tau wa i woeaiyao dubu alona eai. ³⁰ Eanua maudoina se moiugogo, gamagaridi se aitaugaogoma: Paulo se toai, se niurilaei dubu murimurina eai, dobila abo se lauguidi. ³¹ Isi se aipate ia bena se unui, iala tanuagana wasana i ataiei Ierusalemata tataodi gamagaridi se hetalagegaga. ³² Iala tanuagana wa, iala tataodi maedi senturion headi i woeaheuheulaidi se aitaugaogogo, se lau tatao aridi eai: isi iala tanuagana eo iala tataodi, se itadi Paulo se pidiri lautom.

Paulo maina poasi eai se auai.

³³ Iala tanuagana i laoma, Paulo abo i toai, i hetaladuidi, maina poasi labui arinai ia abo se au; ia abo i oimuri, ia ede eai eo ia saha ie abi? ³⁴ Moutuana boeadi eai, headi si eoga ina doha, headi nei doha, se eaba mo: edi hetalagegaga mata

paana nige i lobai, arinai i hetaladuidi ia se bahei iala tataodi edi numa lailai eai. ³⁵ Se lage bena se awasae paipeo eai iala tataodi ia se baheisini, paana tatao se hemahemanabara ariri; ³⁶ paana moutuana gamagamagari se hemuriwataidi, se eabayabalau si ene, “Au aiduiei!”

³⁷ Paulo se woeai numa lailai wa alona eai, i ribalau iala tanuagana arinai i ene, “Bena riba esau enam ea riba, e nige’e?” Ia i ene, “Oa arina Heleni ue ata, wa? ³⁸ Oa Aigupito tauna, e nige’e, nabada tatao tausani hasi u woeaidi barabara eai, isi Tauaiainunu wa?” ³⁹ Na Paulo abo i ene, “Eau Iudea tauna, egu eanua ede Tareso, Kilikia tehana eai, eau egu eanua nige i gagiri: ea awanorim ta tatao enadi bena ea riba. ⁴⁰ Ia abo ie eari, Paulo i totoro paipeo eai, nimana eai tatao i oitawaidi. Isi se monou gogo, abo arina Heberu eai enadi ie riba, i ene;

22

¹ Tatao e, eo ehaguyao e, eo tamaguyao e, egu riba ta ina, au ataiei,”

Paulo ena riba moutuana matadi eai: ia nuabuina wasana i heribadi.

A. adi H. 9.1-18; 26.9-18

² Isi se ataiei ia arina Heberu eai i ririba, abo se monou ariri, abo i ene:

³ “Eau Iudea tauna mamohoina, Tareso eai se labasigu, Kilikia tehana eai, na ina eanua eai ta arinai se abihelaigu Gamaliela aena paana eai, ita tamadayao edi laugaga eo laulaudi se heatakomanigu, eau hinage Eaubada mo ea nuatuadiadiriei, doha hinage omi gamagarimiu teina wau ta. ⁴ Wau Dabila wa arinai ea hemahemanabaraidi e se mate, ea paidi, ea gabalaedi numa masigiri eai ea toredi, tatao eo sisine. ⁵ Kohena lailai hinage, eo babada gamagamagari egu riba se awamamohoiei: uriuri ea abidi ehadayao enadi, abo ea lau Damaseko eai tatao paipaiauridi nei eai bena ea laedi Ierusalem eai, abo se hemata’iladi.

⁶ “Dabila eai ea laulau, Damaseko ea hanahanau asua-subenalai eai, marana lailai i sinaigu, galewa eai i sinado-bima. ⁷ Ea guridobi tano eai, arina esau ea ataiei, i ribalaoma arigu eai i ene, ‘Saulo e, Saulo e, ue saha u hegadotoagu ta?’ ⁸ Ena riba ea heuiu ea ene, ‘Guiau e, oa hede eai?’ Ia abo i ribalaoma arigu eai i ene, ‘Eau Iesu Nasareta tauna, oa ede u hegadotoagu ta.’ ⁹ Agu sasaguyao maeguyao aie lau wa, marana wa se ita se matausi; na ia wa i ribama arigu eai arinana nige se ataiei. ¹⁰ Abo ea ene, ‘Guiau e, saha abo ea abi?’ Guiau enagu ie riba, i ene, ‘U torohai, u lau Damaseko eai, nei eai ginauri gamagamagari bena u

abidi, abo se heribam.’ ¹¹ Marana wa i balebalelem arinai nige ea italoloei, agu sasaguyao se abinimaegu, abo aie lage Damaseko eai.

¹² “Tau esau esana ede Anania, Eaubada taunanabuena, eo laugaga eo taunuatudidinina hinage, Iudea tataodi gamagaridi nei eai se mia si ene ia abi-lolo tauna, ¹³ i laoma gegesigu eai i toro, i ene, ‘Egu tau Saulo e, matam se lala.’ Arinai abo matagu ea helabaisini, ia ea iita. ¹⁴ Ia abo i ene, ‘Tamadayao edi Eaubada i itasipoi, i hetorom ena nuatu abo u itadi, Laulau Dudurai Tauna hinage abo u ita, ia awana ribadi hinage abo u ataiedi. ¹⁵ Ia tauribahemasarahana ede oa, saha eo saha u itadi, eo saha eo saha u ataiedi, abo u ribaedi tatao gamagamagari aridi eai. ¹⁶ Na, ede saha u bagibagini? U toro, abo se hebapatisoim, em baaea se deurigabaedi, Guiau esana u ataatai.’

¹⁷ “Eau abo ea uioma Ierusalem eai, dubu eai ma uuragu ea enosuai; ¹⁸ ia ea iita, i heribagu, i ene, ‘Ierusalem u laugabaeheuheulai, eau ribagu u ribaei taba nige se ataiei.’ ¹⁹ Ea ene, ‘Guiiau e, se nuatuiyao, tauataataiena tataodi sunago gamagamagari alodi eai ea lobaidi, ea tutuguidi, eo ea pidiridi hinage. ²⁰ Oa tauawaabiem Setepano, osinana se heboriri wa, eau maedi ai totoro, eau hinage ena mate ea talamsagu ia tauunuina hinage adi lulu ea abiabi gogo.’ ²¹ Ia i ribalaoma arigu eai, i ene, ‘U lau, abo ea hetamarim eda lohaloha eai Murimuri-tataodi aridi eai.’ ”

²² Ena riba tatao se ataiei i lau e wau riba wa i ribaei, abo se ribagogo, si ene, “Temeta tau me au woeahesuarayawa, tabu i mia tanoubu potana eai! I mauri i mia nige i lolo.” ²³ Isi se eogayoga, adi lulu se lauhaidi, geregere hinage se gagarohai, se tusaei. ²⁴ Iala tanuagana i hetaladuidi, Paulo se woeai, numa lailai alona eai, pidipidiri eai bena se eooi adi matapaana abo se italobai.

Paulo Roma tauna.

²⁵ Isi ia sarai opina mainana eai se auau, Paulo i ribalau senturion wa arinai, gegesina eai ede i totoro, i ene, “Roma tauna au pidiri gaibui, edi riba hinage sora nige se hemamo-hoiei, laugaga eo abiabina ede meta wa?” ²⁶ Teina riba ta senturion wa i ataiei, ie lau iala tanuagana arinai, ia heriba, i ene, “U komani, tau me ia Roma tauna.” ²⁷ Iala tanuagana abo i laoma, ia i heribalaei, i ene, “U heribaguma, oa Roma wa?” I ene, “Hedeona.” ²⁸ Iala tanuaga i ene, “Eau maisa lailai ea tore arinai se iairigu ea hemala Roma.” Paulo i ene, “Eau ma-iairihai eai se labasigu.” ²⁹ Arinai isi ia bena se pidiri eo se oimuriei wa se lauheuheula, iala tanuagana hinage i matausi paana ede i itayao ia Roma, hinage ia tau wa ie au.

³⁰ Mara-ie-tom Iudea tataodi adi mata bena i ataieikomakomani, Paulo i iairigabaei, kohena lailaidi eo sunederi gamagaridi i hetaladuidi, isi hinage abo se oigogoma, Paulo abo i woelaei isi nuanuadi eai.

23

Paulo sunederi matadi eai.

¹ Paulo i ita-dudurai sunederi aridi eai, i ene, “Tatao, eo egu tatayao e, Eaubada matana eai ea miamia ma nuawoiwainagu mo i laoma e teina wau asubena ta.” ² Kohena saesaena Anania, isi Paulo gegesina eai se totoro i hetaladuidi ia awana abo se aitutui. ³ Paulo abo enana ie riba i ene, “Eaubada abo i aitutuim hinage, biribiri se hepoahu heposiposi ia ede oa! Edoha u babawa me laugagaeona arinai bena u heduduraigu, na oa laugagaeona u utusi u hetaladuidi se aitutuigu ta?” ⁴ Isi se totoro gegesina eai si ene, “Eaubada ena kohena saesaena u arina-baaeaei?” ⁵ Paulo abo i ene, “Egu tataoyao e, agutoi, eau nige ea ita ia kohena saesaena; doha si uriyao si ene, ‘Tatao adi tanuaga tabu u arina-baaeai.’”

Paulo i ribalau Parisea tataodi aridi eai.

⁶ Paulo abo i nuatulobai isi headi Sadukea tataodi, headi hinage Parisea tataodi, ie eoga lailai sunederi boeadi eai, i ene, “Eau hinage Parisea tauna, Parisea tauna esau natuna eau: mate eai torouioma ribana nuatuna arinai ede au lauhetalaigu ta.” ⁷ Ia ena ribariba ina doha, Parisea tataodi eo Sadukea tataodi abo se haiawayagara: arinai abo moutuadi wa se oilabuidi. ⁸ Paana ede Sadukea si ene taba nige eda abatorouio, nige aneru hinage, eo earua nige’e: Parisea mo se nuatu labulabuiedi. ⁹ Arinai abo se hetalagegagaga ariri: Parisea enadi tauuriuri headi se toro si ene, “Tau ta ena baaea nige aie ita: na ena earua esau, e aneru esau ie ribalau ia arinai, tabu Eaubada ta hetatagudugudui.” ¹⁰ Isi se haiawayagara ariri, iala tanuagana i matausi i ene ata Paulo se tabeutusi ne, to iala tataodi i hetaladuidi se dobi se adidiri ia se girihaiyama numa lailai alona eai.

Guiiau Paulo i sagui.

¹¹ Maionana eai Guiiau abo i toro ia gegesina eai, i ene, “Paulo e, u nuaadidiri; Ierusalema eai wa u ribahemasarah-ago, Roma eai hinage doha, abo u wasawasaegu.”

Se oioiriba Paulo bena se unui.

¹² Mara-ie-tom, Iudea tataodi headi se oioiriba, aigora se oiribaei, si ene, aiai taba nige se ai, eo goila taba nige se nom, i lau e Paulo se unuiyao. ¹³ Wau tauoioiriba wa, tataodi tatao-labui-se-mate eo tabena. ¹⁴ Isi abo se laoma kohena saesaedi eo babadadi aridi eai, si ene, “Ai aigora gogo, ai ene taba nige aiai ai aiita i lau e Paulo ai unuhemate. ¹⁵ Omi,

sunederi maemiu, iala tanuagana au heriba maraitom abo Paulo i hetamariuioiawa, doha bena riba esau au hesio komakomani: ia i hanahanauma abo ai nonoha ai unuhemate.”

¹⁶ Paulo se wesewesei ribana ena goroa i ataieyao, i lau numa lailai alona eai Paulo i heriba. ¹⁷ Paulo senturion esau i eogai, i ene, “Teina hewari ta u woelaei iala tanuagana arinai: riba esau abo enana i riba.” ¹⁸ Arinai abo ia i laei iala tanuagana arinai, i ene, “Paulo, tau-auauna wa, i eogaigu, i awanorigu bena teina hewari ta ea leama arim eai, riba esau bena i heriheribam.” ¹⁹ Iala tanuagana ia i abinimaei, i woautoioei, i hesiomodigau, i ene, “Saha bena u heribagu?” ²⁰ Ia i ene, “Iudea tataodi se riba gogo se henua oa maraitom Paulo u woadopei sunederi aridi eai, edi borabora bena riba esau abo se hesio komakomani ia arinai. ²¹ Isi awadi tabu u abi: doha tatao tauwesena tatao-labui-se-mate eo tabena ia se wesewesei, isi hinage se oiribao, eo se aigoraos si ene aiaia taba nige se ai, eo goila taba nige se nom i lau e Paulo se unui; isi se wesenonoha, em lauheari mo se bagibagiei.” ²² Iala tanuagana hewari wa i duiei i ene, “Wau riba wa, tabu tau esau i nuatui u heribagu wa.”

Paulo se hetamari Peliki arinai, Kaisarea eai.

²³ Senturion labui i eogaidi, i ene, “Tauiala tataodi handere labui au abinonohaidi, eo hosi taugeruidi tatao-haiona-se-mate-saudoudoi, eo tau-abialahia handere labui, maiona mahana haiona abo se dalahai se lau Kaisarea. ²⁴ Hosi hinage au abidi Paulo ena abageru, ia au laei komakomani gavana Peliki arinai. ²⁵ Ena leta ie uri i ene ina doha:

²⁶ “Eau Kalaodia Lusua ea uriyawa oa gavana Peliki, taulailai, eauedo. ²⁷ Teina tau ta Iudea tataodi se toai, ia bena se unui; eau ea dobi ma agu bodao ai eligirihai, paana ea ataieyao ia Roma. ²⁸ Ana mata-paana hinage ea eooi arinai ede ea woadopei sunederi matadi eai. ²⁹ Ana mata-paana ede abo ea italobai edi laugagaes mo ribadi, isi se ribahepai bena se unugaibui mo, ana mata-paana nige’e arinai taba se unuhemate e se tutugudui. ³⁰ Wasana abo se heribagu si ene headi ia se wesewesei, arinai tau ta ea hetamariheulaiyawa, ia tauhegiruna hinage abo ea hetaladuidi edi lauhegiro oa matam eai se ribaei. Aioni.”

³¹ Iala tataodi i hetaladuidi wa ia awana se abi, Paulo abo se laei maiona eai se lage Anatipateri eai. ³² Mara-ie-tom se uio numa lailai eai, hosi taugeruidi mo isi bom ia maedi se lau. ³³ Isi se lage Kaisarea eai, leta wa se mosei gavana arinai, eo Paulo hinage se laei ia nuanuana eai. ³⁴ Gavana leta wa i hasiri abo i hesio, i ene, “Oa aitea teha tauna?” Ia abo i nuatui ia Kilikia tauna; ³⁵ i ene, “Tau hegiro wa sora

se lagema em riba abo ea ataiei.” Ia i hetaladuidi Heroda ena aba hedudurai numana eai ia se itawatai.

24

Paulo Peliki matana eai.

¹ Asubena haligigi se ohi Anania kohena lailai eo babada maenayao se dobima, tau esau esana Teretulo, ia tau mana amna, maedi se laoma, ia Paulo i ribagewaei gavana matana eai.

Paulo se hegiru.

² Teretulo se eogahai ia Paulo i hegiru, i ene, “Peliki e, oa em abi se loloariariri, eo loni lailai ai abi arim eai, oaem sonoga arinai ema eanua laulaudi u heduduraidi. ³ Peliki oa tausaesena e, em abi lolodi huia gamagamagari ai abidi dimo gamagamagari eai aie mia, ai lautoiem. ⁴ Ata doha egu riba arinai ea heyawasi-motum, riba begana mo taba u ataiei ede. ⁵ Teina tau ta ai ita ia tau baaea eo, ia heasiwolewole tauhetubuna ede Iudea tataodi gamagamagari tanoubu se ohi boead i eai; ia hinage Nasareta peledi tauwoeaidi esau. ⁶ I aipate hinage bena dubu tabuna i hebaaea, ia mo ai toai; ai ai ene bena ema laugagaeo eai ai hedudurai, ⁷ na Lusua, iala tanuagana, ena adidiri i hemahemasaraha i laoma tau me nimamai eai i eligirihai, ia tauhegiruna i hetaladuidi se laoma arim eai. ⁸ Oa ena u oimuridi abo ginauri gamagamagari aridi eai se hegiru u italobaidi.”

⁹ Iudea tataodi hinage nuadi esega si ene wau riba wa riba mamohoi.

Paulo riba wa i heuio.

¹⁰ Gavana, Paulo i nimaoini bena i riba, abo Paulo i ene, “Ea itayao oa borimai gamagamagari teina eanua tataodi oa enadi tauheduhedudurai, arinai nuagu i lolo oa matam eai egu riba ea ribaei. ¹¹ I lolo oa abo u ita lahinae abo ina mo ea saesae Ierusalem eai, Eaubada tabaohuina hesabana ea saesae wa i laoma e wau ta asubena saudoudoi-labui mo; ¹² isi nige se itagu numa tabuna alona eai esau maedagu ai haiawayagara, e sunago eai, e eanua aloalona eai, tatao nige ea heasiwolewoledi. ¹³ Wau riba wa aridi eai se hegirugu meta taba nige se hemamohoi. ¹⁴ Na teina mo ea riba hemasaraha arim eai, wau Dabila wa si ene i ponori, arinai eau tamamaiyao edi Eaubada ea aiailahui, eo riba gamagaridi se uridi laugagaeo ribadi eo peroveta ribadi ea ataiwataidi, ¹⁵ Eaubada ea sunusunumaei, doha hinage isi se abiwatai, ea ene taumatemate gamagamagari mate eai abo se hetorouioidi, laulau-dudurai tataodi eo laulau-baaea tataodi hinage. ¹⁶ Arinai egu aipate adidiri ede ina, bena huia gamagamagari Eaubada arinai eo tatao aridi eai hinage, egu

nuatu abaheduduraina nauboeagu eai taba nige i hegirugu.
¹⁷ Na borimai gamagari se lauo, arinai ea uioma egu basileia arinai, tatao edi ainauia ea leama, egu eanua tataodi enadi.
¹⁸ Teina ea ginaginauri arinai isi se lobaigu numa tabuna alona eai, se heaaguo maeguyao Iudea headi Asia eai se laoma, ai nige ai gamagari, eo nige ai hetalagegageda. ¹⁹ Tatao me bena se hegirugu se saha nige se laoma inai oa matam eai?
²⁰ Ina tatao ta sunederi matadi eai mo se itagu ea totoro, hage se ribaei egu baaea saha se ita, ²¹ egu riba esega mo, boeadi eai ea totoro ea ene, ‘Mate torouiona au lauhetala ina, ede matamiu eai ea totoro.’ ”

²² Peliki teina riba ta i ataiei, ia Dobila ta i tohonoa, na i aiharedi i ene, “Lusia iala tanuagana sora i dobima emi riba me abo ai ataiei-komakomanidi.” ²³ Senturion esau i hetaladui Paulo bena i itawatai, i ene, “U iairigabaei i otawa, i tautausi, eo ena heriheriamyao se laoma ia bena se giginoi tabu u ribanuahidi.”

²⁴ Asubena headi se lautom, Peliki ma monena Derusila, Iudea sinena, se laoma Paulo se eogai, Keriso ena riba ataieina hesabana, bena se ataiei. ²⁵ Ia ena riba abi-dudurai ribana, eo sinaetahinei ribana, eo hedudurai abo i laoma ribana. Peliki riba wa i ataiedi i tabutabubu, ia arinana i heuio, i ene, “Besi, na u lau: sora huia lolo esau abo ea eogaim.” ²⁶ Ena nuatu hinage i ene nuana Paulo moni abo i mosei ena iairigabaena wa maisana: arinai ede huia gamagamagari i eogayogahai, eo maena se ribariba.

Borimai labui Paulo Kaisarea eai i miasuara.

²⁷ Borimai labui e se lautom Pokio Peseto i laoma Peliki i helaudamai. Peliki Iudea tataodi bena i taubigaidi arinai Paulo ma auauna i laugabaei.

25

Paulo Peseto matana eai.

¹ Peseto ena aba gavana tehana eai ie lage, asubena haiona ie mia abotai abo Kaisarea i laugabaei ie sae Ierusalem. ² Kohena lailai eo Iudea babadadi Paulo ribana ia arinai se ribataubigaei, ia hinage se awanorini, ³ isi edi gadosisi bena i lauhetamari Paulo se woeiama Ierusalem eai, isi edi nuatu ia bena abo se wesei dobila eai ia bena se unui. ⁴ Na Peseto arinadi i heuio, i ene, Paulo Kaisarea eai se auai, eo i ene nige eawalana abo ea lau nei eai. ⁵ Tanutanuaga aridi eai i ene, “Headi omi maidamiuyao au laoma ta laulau, teina tau ta ena laulau baaea saha eo saha arinai abo au hegiro.”

⁶ Ie mia aridi eai asubena haligigi-haiona e saudoudoi abo i dobi Kaisarea eai: mara-ie-tom hedudurai abababawana arinai i bawasae abo i hetaladuidi Paulo abo se woeiama.

⁷ Ia ie lage, Iudea tataodi wa Ierusalem eai se dobima se toro-hetaiiri, ribariba taubiga gamagamagari se toreheohisaedi Paulo potana eai, riba tauhetuhetubudi wa nige abina se ata se hemamohoiedi. ⁸ Paulo edi riba i hemaisa i ene, “Iudea edi laugagaeo eau nige ea utusidi, numa tabuna hinage eau nige ea hebaaea, eo Kaisara hinage nige ariariri.” ⁹ Na Peseto, Iudea tataodi bena i henualolodi, Paulo arinana i heuio i ene, “Oa bena u sae Ierusalem wa, nei eai eau matagu eai teina riba ta aniona abo ta hedudurai?”

Paulo Kaisara esana i atai.

¹⁰ Paulo abo i ene, “Eau Kaisara ena hedudurai aba babawana eai ea totoro: emi aba heduduraigu mamohoina ede meta: Iudea tataodi nige ea hebaeadi doha abina u ata ariri. ¹¹ Taba egu laulau se baaea, eo mate laulaudi ea abiwataidi, mate nige ea awayagaraei: na teina riba ta arinai se hegirunapaigu mo taba nige tau esau i woelaegu isi aridi eai. Kaisara esana ea atai.” ¹² Peseto, tauoigogo wa maedi se ribariba lautom, abo ia arinana i heuio, i ene, “Oa Kaisara esana u atai wa? Taiede Kaisara arinai abo u lau.”

¹³ Asubena headi se lauo Ageripa eanua wasawasana eo Bereniki, Kaisarea eai se lage bena Peseto se aitoiei. ¹⁴ Asubena gamagamagari se miamia nei eai, Peseto Paulo ribana wasawasa wa i heriba, i ene, “Tau auaua esau ia ede nei Peliki i toregabaei: ¹⁵ eau Ierusalem eai, kohena lailaidi eo Iudea babadadi se heribagu, eo se awanorigu ia bena ea hemata’ila. ¹⁶ Eau ea heribadi ea ene, Roma edi laulau ede teina, tabu tau esau se ununapai mo, tauhegiruna isi ia se ribataubiga se totoro ia matana eai, ena baaea se ribaei, e se riba lautom, abo hinage arinadi i heuio. ¹⁷ Arinai abo se oigogoma inai, mara-ie-tom hedudurai ababawana eai ea bawa ea hetaladuidi wau tau wa abo se woeaiama. ¹⁸ Tauribataubiga abo se toro mata wa se hasari se ribataubiga gaibu mo, edi riba wa nige aniona. ¹⁹ Isi edi tabatabaohu mo ribadi se ribaedi, eo tau esau esana Iesu ribana, ia i mateo, na Paulo i ene i mauri. ²⁰ Edi riba ta nuagu i ponoponoei arinai ea hesio ia arinai, ea ene, ‘Oa bena u lau Ierusalem, nei eai wau riba wa abo se hedudurai? ²¹ Paulo bena i bagibagi mo, na Aoguso ena hedudurai mo i awanorini, arinai ea hetaladuidi ia se itawatai i lau e sora abo ea hetamari i lau Kaisara arinai.” ²² Ageripa Peseto i heriba, i ene, “Tau wa ea henua bena ea atai ei hinage.” I ene, “Sora maraitom ia abo u atai ei.”

²³ Mara-ie-tom Ageripa maena Bereniki se laoma ma adi tepo se awasae aba ataatai eai, maediyao iala tanuagadi, eo eanua babadadi, Peliki abo i hetaladuidi se lau Paulo se woeaiama. ²⁴ Peliki i ene, “Guiau Ageripa e, omi hinage ede ina gamagarimiu maemaiyao, teina tau ta au ita, ia hesabana

ede Iudea tataodi moutuadi Ierusalem eai se laoma arigu eai se riba, eo se laoma inai hinage se riba gogo si ene ia maurina taba i lautom abo i lolo. ²⁵ Na eau mo ea iita ia mate laulauna nige i laulauei, ia hinage Aoguso esana i atai, eau ea hepaipai ia abo ea hetamari ie lau. ²⁶ Nuagu i ponopono, ea ene saha abo ea uri tanuagagu arinai? Arinai ia ea woeaiama omi matamiu eai ea tore, oa matam eai hinage Guiau Ageripa e, ta hetala lautom abo egu riba esau ea lobai ea uriuri. ²⁷ Teina ta ea ene nige i dudurai ena tau auauna ea hetamari napai ena baaea se ribataubigaedi nige ea uridi.”

26

Paulo ena riba i ribaei Ageripa matana eai.

A. adi H. 9.1-18; 22.1-16

¹ Ageripa abo i ribalau Paulo arinai i ene, “Oabom nuam ena u ene u riba, abo u riba.” Arinai Paulo nimana i helele i oitawaidi, edi riba wa ia abo i heuioidi.

² I ene, “Guiiau Ageripa e, eau nuagu i lolo wau ta egu riba ea ribaei oa matam eai, wau riba gamagamagari Iudea tataodi aridi eai se hegirunapaigu wa. ³ Teina hinage i lolo Iudea laulaudi eo ribadi gamagamagari u ataariri, arinai ea awanorim egu riba ta bena u ataiei, eo nuam ie taru.

⁴ “Egu laulau ma hewarigu eai wa, huia bagubaguna wa egu eanua tataodi boeadi eai, Ierusalem eai, Iudea tataodi gamagamagari se nuatuiyao. ⁵ Isi se itaguo huia bagubaguna eai wa, taba se henua se riba abo se ribaei, ema tabaohu abiabidi gamagamagari ea sogohididini, na eau Parisea tauna mamohoi. ⁶ Na eau ede ina, aba-hedudurai eai ta ea totoro, Eaubada ena ribahesunuma tamadayao aridi eai wa debana eai, ⁷ iaede eda asa saudoudoi-labui ribahesunuma ta se nuanuatui, maiona to asubena edi tabatabaohu eai. Guiiau Ageripa e, teina sunuma ta debana eai Iudea tataodi se hegiro-napaigu ta! ⁸ Taumatemate Eaubada abo i hetorouioidi, omi paana saha nige gonoamiu au awa mamohoiei?

⁹ “Eau hinage nabada wa egu nuatu ea ene i lolo laulau gamagamagari ea abidi Iesu Nasareta esana hinage bena ea hebaaea. ¹⁰ Egu laulau hinage meta doha ea abidi Ierusalem eai; hetabu tataodi gamagamagari numa masigiri eai ea tutuguidi, kohena lailaidi se hetorogu; isi se unuhematedi, eau hinage ea ribasaguidi. ¹¹ Sunago gamagamagari eai ea aiaipidiridi Eaubada bena se arina baaei, eo egu ouyalayala lailai eai ea hebaaea-arriedi, arinai ede se dago se lau hari eanua hari eanua.

¹² “Arinai ede ea lalau Damaseko, kohena lailaidi se hetorogu eo se hetamarigu edi uriuri ea laedi. ¹³ Guiiau e, asuasubenalai eai marana ea ita galewa eai i sinadobima,

i mara ariri, nige doha mahana marana, eau eo isi hinage agu sasaguyao maeguyao i sinahetaiiri- esegaimai. ¹⁴ Ai gamagarimai ai guridobi tano eai, arina esau ea ataiei, arina Heberu eai i heribaguma i ene, ‘Saulo e, Saulo e, ue saha u hegadotoagu ta? I amamna ena aem nuri eai u aitutuidaoui mo.’ ¹⁵ Eau ea ene, ‘Guiiau e, oa hede eai?’ ia i ene, ‘Eau Iesu ina u hegadotoagu ta.’ ¹⁶ Na u toro u torohai; arinai ede ea hemasarahaurim ta, ea hetorom oa heaheari tauna, ginauri gamagaridi arigu eai ue ita, eo sora aridi eai abo ea hemasarahauioigu, oa abo tauwasaduaiedi, ¹⁷ em eanua tataodi eo Murimuri-tataodi ea hetamarim u lau aridi eai, ena se hebaaeam eau abo ea hemaaurim. ¹⁸ Isi matadi abo se helaladi, masigiri eai abo se itaitabui marana eai, Satani ena gigibori abo se otaotaei se lau Eaubada arinai, edi baaea abo se nuatugabaedi, isi enadi abo se abi tauhetabu maediyao, isi tausunusunumaegu wa.’

¹⁹ “Arinai Guiiau Ageripa e, wau galewa ribana wa nige ea awaeyagaraei. ²⁰ Isi taumia Damaseko, eo abotai abo isi taumia Ierusalem, eo Iudea oeana eai taumiaina hinage, eo Murimuri-tataodi ea heribadi, bena isi nuadi abo se buidi abo se itaitalau Eaubada arinai, hinage henuabui laulaudi abo se abiwataidi. ²¹ Paana ede meta Iudea tataodi numa tabuna eai se toaigu, eo agu mata se eooi bena se unuigu. ²² Eaubada mo i saguigu i laoma e teina asubena ta, arinai ea totoro ta, tatao eo babada aridi eai riba ta ea hemasarahadi, nige saha ea ribaei na ginauri gamagamagari peroveta eo Mose si ene abo se tubu, meta mo ea ribaedi ede; ²³ ribana ede: Keriso ia abo i amamna, eo ia tau bagubagunana mate eai abo i torouio, eda tataoyao eo Murimuri-tataodi ia marana abo i heitadi.”

²⁴ Nei doha ma-ribaribana, Peseto i riba lailai i ene, “Paulo e, oa doha u koakoarere; em ata gamagamagari se heyauyau-rem.” ²⁵ Na Paulo i ene, “Peseto, abi-lolo tauna e, eau nige ea koakoarere, riba mamohoina eo nua malapai ribadi ea ribaedi ede meta. ²⁶ Wasawasa ia riba ta abidi ie ata, gonoagu ia arinai ea riba adiadidiri, paana ea nuatuiyao wau riba wa nige esau i hekau; wau ginauri wa nige se ginauri eamuyamuidi. ²⁷ Guiiau Ageripa e, peroveta edi riba oa u nuatuwataidi, e nige’e? Ea nuatuiyao oa taunuatuwataidi.” ²⁸ Ageripa abo i ribalau Paulo arinai i ene, “Begana mo abo oa bena nuagu u buihetaiiri ea hemala Keristian!” ²⁹ Paulo i ene, “Eaubada ea awanorini, nige oabom mo, isi gamagaridi wau ta egu riba se ataiei, taba gamagarimiu doha hinage eau — teina agu auau mo ta i otawa.”

³⁰ Wasawasa wa abo i toro, eo gavana, eo Bereniki, eo isi hinage maediyao taubabawa; ³¹ se lausua abo isibom se oiioriba si ene, “Teina tau ta nige mate laulauna esau e auau

lauauna esau ie abi.” ³² Ageripa abo i ribalau Peseto arinai i ene, “Ena tau ta nige Kaisara esana i atai wa, nuana taba ta iairigabaei.

27

Paulo se hetamari Roma eai.

¹ Isi se ribaribamaoda, abo si ene ai abo ai geru ai lau Italia, Paulo eo tatao-auaudi headi hinage se moselaedi tau esau esana Iuliu arinai, ia senturion Aoguso peledi esau. ² Adaramatiu wagana esau i totorohai, arinai aie geru ai lau, Asia bena se adau hasari maemai tau esau esana Aritako, Makedonia tauna, Tesalonia tehana. ³ Mara-ie-tom aie duna Sidona eai. Iuliu i riba maheasisina Paulo arinai, i ene, “Oabom ena ehamyao bena u itadi u pesa u itadi eo se taubigaim.” ⁴ Arinai abo Sidona ai gerugabaei, Kuperu ubuna eai ai heurisi paana ede ama mana i baaea. ⁵ Ai Kilikia eo Pamepulia gabogabona eai ai adauawasi abo aie duna Mura eai, Lukia oeana eai. ⁶ Nei eai Alesana wagana esau senturion i lobai abo i lau Italia, arinai i hegeru-awasimai. ⁷ Asubena gamagamagari ai adaadau taubiga mo na sora ma adaumai Kenido ubuna eai, mana i iuhipipinimai nige gonoamai ai lau, arinai Kereta ubuna eai mo aie lau, Salamoni hasarina eai. ⁸ Ai hadidi benai-benai e ai giuri, abo ai lage arotau esau arinai, esana ede Gadoalolodi, hanahanauna eai ne eanua esana Lasea.

⁹ Huia lohaloha ai gabaeyao, adau huiana i baaea paana aiudi huiana i lautomo. Paulo abo i ribahesanapuedi ¹⁰ i ene, “Tautaubada e, ea itayao eda adau ta nuana abo i baaea, gogo hinage abo ta gabaei, ibai, abo ta mate, e nige’e?” ¹¹ Na Senturion wa waga kapenana eo waga tanuagana mo edi riba i ataiei, Paulo ena riba i otaotaei. ¹² Paana arotau wa aba-lona i baaea, arinai tatao gamagaridi nuadi bena ai torohaiuio, ai aipate ai lage Peniki eai ai lo, arinai ai mia e waeauna i lautom. Peniki ede Kereta arotauna esau, tupo esau i italau ealasi, tupo esau i italau eawana.

¹³ Eawana abo ie toa, i waeawaeagama, isi edi nuatu si ene, adi mana lolo arinai lo se tabei se ue, se geru Kereta hasarina eai.

Mana baaea; wowori lailai.

¹⁴ Se geruo nige baeona mana lailai ie toa, mana wa esana Mana-ealasi, oea eai i toa-adidirima; ¹⁵ mana wa waga i iuhipipini, nige gonoamai to ai boboeo mo ai lau. ¹⁶ Bonabonarua esau esana Kauda ai boboeo ai lau ubuna eai, woeona eai ai hesahesabadaoi ema waga gagirina bena ai ueisini: ¹⁷ si ueisini nonohai, maina se abi se saisaini,

se matausi ata i pipinisaemai malapota eai, arinai worewore se aunoudi, se heoheopari. ¹⁸ Wowori lailai se hetahetaipileaririemai, arinai mara- ie- tom waga gogona se gabagabadobi. ¹⁹ Asubena hehaionana eai waga ginauridi gamagaridi aibom nimamai eai ai gabagabadobi. ²⁰ Huia lohaloha mahana eo ipora nige ai itadi, mana lailai hinage otana, ema mauri ai sunumagabayao.

Paulo ena gigibori.

²¹ Huia lohaloha nige se aiai, Paulo abo i toro isi duaduaridi eai, i ene, "Tatao e, lahinae egu riba wa taba au ataiei Kereta nige ta uegabaei, wau baaea wa, eo gogo au gabaehelihidi taba nige ta hearodi. ²² Eau ea riba headidirimiu, nuamiu bena se taru, arida eai taba nige esau i mate, waga mo abo ta gabaei. ²³ Paana Eaubada, tanuagagu ede, eau hinage ena heaheari, ia ena aneru ina maiona ta i totoro gegesigu eai, ²⁴ i ene, 'Paulo e, tabu u matausi, Kaisara matana eai oa abo se woelaem: Eaubada hinage am sasaguyao maedamyao aue geru me abo i lediwa.' ²⁵ Ehe i tatao e, au nuaadidiri, Eaubada ena riba eau ea sunumaei, doha i ribaei wa abo hinage ie tubu. ²⁶ Abo ta dunasae bonabonarua esau eai."

²⁷ Maiona hesaudoudoina i lageo, ai Aderia gabogabona eai ai alealele mo, waga tauhaiwawarina edi nuatu si ene oea ai hanahanau. ²⁸ Gabogabo se liei, liena tau-i-mate; se taulau begana abo se lieuioi, liena saudoudoi-haligigi. ²⁹ Se matausi ata banabanari eai aie duna, arinai lo hasi ai tu-dobedi waga tupo lalakina eai, ema gadosisi mo taba mara-i-tom sasari. ³⁰ Waga tau haiwawarina bena waga se dago-gabaei, waga gagirina se hedawedobei gabogabo eai, se boraauridi, si ene, lo esau waga tupo kikiu eai bena se tudobei. ³¹ Paulo senturion, eo iala tataodi i heribadi, i ene, "Ena nige se bawa waga eai, taba nige au mauri." ³² Arinai abo iala tataodi waga wa ana maina se tomgabaei, abo i beudobi.

³³ Mara i iuiari Paulo gamagaridi i riba-henuapaipaidi, i ene, "Wau ta asubena hesaudoudoi-hasina omi au aidabu, nige aiai begana au ai. ³⁴ Arinai ea awanorimiu ta, aiai begana abo au ai; abo au adidiri: urumiu maiawadi taba nige esau ie motu." ³⁵ Ina doha ena ribariba, ia falawa i abi, isi gamagaridi matadi eai Eaubada i aihelahui: ie ihi abo ie ai. ³⁶ Arinai abo isi gamagaridi nuadi se taru, isi hinage aiai begana se ai. ³⁷ (Ai gamagarimai waga tau-geruina tataomai* handere labui eo tatao-haiona-si-mate-saudoudoi-haligigiesega.)

³⁸ Isi si aiai lautom, waga se hemamala, † sitona se gabagabadobi gabogabo eai.

* 27:37: 276 † 27:38: Wheat.

³⁹ Mara-ie-tom oea wa se hekau: saga esau geregerena se ita edi nuatu si ene, nuana gonoana waga abo se hedunalau nei eai. ⁴⁰ Lo se tom-gabaedi se otawa, gabogabo eai eaisi ana maina se iairidi, tupo lalaki woreworena se uei, geregere wa se boboeowatai. ⁴¹ Butubutu nei eai i laoma, inai i lau, abo se haioioi, waga wa abo se hetatadunaduna; tupo kikiu ie duna ie ota mo arinai, na bagodu lailaidi tupo lalaki se eatugorugoru. ⁴² Iala tataodi se oioiriba, si ene, tatao-auaudi ta ta unuidi ata headi se tubasuara se dago. ⁴³ Senturion Paulo i nuatoatoaei to i laubiriedi; i hetaladuidi, i ene, isi tuba abina se ata taba se dui gabogabo eai, abo se tubasae geregere eai. ⁴⁴ Headi tuba abina nige se ata, morumoru eo waga oeagina se abi arinai se patu, se tuba se sae. Arinai isi gamagaridi se lage tano eai, ma maumauridi.

28

Melita eai se pesa: mota baaea Paulo nimana i letai

Mk. 16.18

¹ Taiede se maurio, abo se ita komakomani bonabonarua wa esana Melita. ² Nei eanua tataodi arinadi ai hekau, taiede edi abi mo se lolo ariri se taubigaimai: eo ema oeagi se iuhi abo ai aimoiga, nabu i tarutaru, to i waoo ariri. ³ Paulo oeagi augogona esau i abiyama oeagi alaalasi potana eai ie torelaei, mota esau oeagi gigiborina i ataiei i laoma i apusae Paulo nimana eai. ⁴ Eanua ne tataodi mota wa se ita nimana i apudidini, isibom se ribariba, si ene, "Teina tau ta, nuana tauaiainu, gabogabo eai i mauri, inai mo ta abo i mate." ⁵ Ia mota wa i lau-luilui hebeu oeagi alaalasina eai, ia nige i baaea. ⁶ Se itaitawatai, si ene, nimana abo ie pou, e nige'e, abo i guri-dobi i mate heuheula, e nige'e; se itaita e, se itaitaasa ia nige i baaea, arinai nuadi se buidi, si ene, nuana ia eaubada esau.

Laulau gigibori: Pubilio tamana ana asiebo se hemaui.

⁷ Nei dimo ne, bonabonarua ne guauna ena tano, tau wa esana ede Pubilio, ia hinage i taubigaimai, asubena haiona ena numa eai ia i abitaumanaimai. ⁸ Pubilio tamana ie ota, ana asiebo i gigibori eo osina ie abi. Paulo abo i awasae ena biri eai i lau-uura, ia nimana ie toresaedi ia potana eai, ia i hemaui. ⁹ Arinai abo headi hinage bonabonarua eai se asiebo, se laoma ia abo i helolouioidi. ¹⁰ Isi hinage se taubigaimai, eo se taubigaaririemai; ai abo ai laugabaedi ema alae gamagaridi se usaidi ema waga eai.

¹¹ Nawalai haiona se lautom, Alesana wagana esau eai ai gerugabaedi, waga wa, bonabonarua eai wa ie lo ealasi huiana, ia esana ede Kasita eo Polaki. ¹² Surakusa eai abo aie pesa nei eai aie mia e asubena haiona. ¹³ Nei eai ai adaadau

hasari, abo ai lage Regimu eai, huia esega eawana ie toamaraitom aie lage Puteoli eai. ¹⁴ Nei eai ai hailobai ma eda tataoyao, se nuahimai arinai asubena haligigi-labui aridi eai aie mia; arinai aie geru abo ai lau Roma. ¹⁵ Eda tataoyao nei eai wasamai se ataiei se laoma Apio Poro, eo Taberona Haiona eai, se laubagibagiemai; Paulo i itadi Eaubada i lautoiei, abo nuana i adidiri. ¹⁶ Roma eai aie lage, tataoauaudi senturion i moselaedi iala kapenana esau arinai: Paulo iabom i mia suara tau-iala esau ia i itawatai.

Paulo Roma eai: Iudea tataodi i lauheataedi.

¹⁷ Asubena haiona se lautom, Paulo Iudea babadadi i heoigogoidi, isi se oigogo, ie ribalau isi aridi eai, i ene, “Tatao e, eo ehaguyao e, nige laulau esau arinai eda eanua tataodi ea hebaaeadi, eo tamadayao edi laulau hinage nige ea hebaaeadi, na se toaigu mo, Ierusalem eai se laeguma inai, eo se moselaegu Roma tataodi nimadi eai. ¹⁸ Isi se oimurieguma, abo bena se iairigabaegu, paana ede isi se ita eau mate laulauna nige esau ea abi, ¹⁹ na Iudea tataodi se riba gewa nuagu mo se hepaipai arinai Kaisara esana ea atai; ia mo egu basileia eau nige bena ea hegiru. ²⁰ Arinai ede ea eogaimiu ta bena ea itamiu, eo ta ribariba: Isaraela edi aba sunuma debana eai maina poasi eai se auauigu ta.” ²¹ Isi ia se heriba si ene, “Uriuri Iudea eai se laoma nige wasam baaeana esau ai ataiei, ehamaiyao headi hinage se laoma arimai eai nige wasa aisana se ribaei bena arinai se hegirum. ²² Em nuatu bena ai ataiei: ina peledi ta, wasadi ai ita dimo gamagamagari tatao si ene isi se baaea.”

²³ Asubena esau se ribanonohaiyao, gamagaridi abo se laulau ena numa eai se bawa, Eaubada ena basileia ribana i riba hasahasaidi, Iesu ribana hinage i henuapaipaidi, Mose laugagaao bukana alona eai, eo peroveta bukana hinage, maratmtom eai i ribahetubu, i lau e, i maimailahi. ²⁴ Isi headi riba wa ie ribaei se ataiei, na headi hinage nige se atailobai.

Paulo i sinibui Murimuri-tataodi aridi eai.

²⁵ Isi nige nuadi esega na se laugorigori, Paulo riba esega i heriba-bagunaedi, i ene, “Earua Tabuna ie riba mamohoi Isaia peroveta awana eai, tamadayao aridi eai, i ene:

²⁶ ‘U lau tatao ta; aridi eai, u ene,
Abo au ataiei, mamohoi,
na taba nige au atailobai,
abo au ita, na taba nige au italobai.

²⁷ Teina tatao ta nuadi se digabu,
ataatai eai beadi se doodoo,
isi matadi hinage se hegibudi;
ata matadi eai se italobai,

eo beadi eai se atailobai,
eo se sinibuima arigu eai bena ea hemaauridi.’

(Isa. 6.9-10.)

²⁸ Omi arinai abo au ita, Eaubada ena mauri ta se heta-
mariyao Murimuri-tataodi aridi eai; isi abo se ataiei.”

²⁹ Wau riba wa i ribaedio, Iudea tataodi se pesagabaei,
mahaihaiawayagaradi se laulau.

³⁰ Na borimai labui maudoudoidi Paulo nei eai, ena numa
iabom i hemaisa arinai ie mia; isi gamagaridi se laolaoma
ia arinai, i abiabitaumanaidi, ³¹ Eaubada ena basileia ribana
i guguguiaidi, eo Guiau Iesu Keriso ribana i laulauheatadi,
masaraha eai i ribaheaheadidiridi, nige tau esau i gudugudui.

PAULO ENA URIURI ROMA ENADI

¹ Eau Paulo, Iesu Keriso ena heaheari, se eogahaigu ea hemala aposotolo, Eaubada ena evanelia arinai se torelaegu, ² ia ede ena peroveta awadi eai uriuri tabudi eai nabada i ribahesunumadao, ³ eda Guiau ia Natuna Iesu Keriso ribana, ia ede buluma dobilana eai Davida tumana eai ie tubu. ⁴ Ia Eaubada Natuna se ribaei ma-gigiborina, lolo dumaduma earuana arinai, mate eai i torouioma debana eai; ⁵ ia arinai ainauia eo aposotolo paisoana ai abidi, eanua gamagari boeadi eai sunuma nuatuna ai awaabiei, ia esana debana eai; ⁶ isi boeadi eai omi hinage se eogahaimiu Iesu Keriso enana.

⁷ Omi gamagarimiu Roma eai taumia e, Eaubada i gadosisiemiu, hetabu tataomiu se eogahaimiu: ainauia enamiu, eo loni Eaubada tamada arinai se laowa, eo Guiau Iesu Keriso arinai se laowa hinage.

⁸ Bagubaguna, omi gamagarimiu debamiu eai egu Eaubada ea lautoeiei Keriso debana eai, paana emi sunuma wasana tanoubu gamagamagari eai se wasaduaiei. ⁹ Paana Eaubada i itaguo, ia ede nuagu eai ia Natuna ena evanelia boeana eai ea heaheayaiei, na nige egu aba-aiyawasi egu uura eai esamiu ea ataidi huia gamagamagari; ¹⁰ ea aiboda, bena huia ta dobila aisana Eaubada ena nuatu debana eai, abo ea laowa arimiu eai. ¹¹ Egu gadosisi lailai bena ea itamiu, galewa ainuiana bena ea leawa, arinai abo nuamiu se paipai; ¹² ia ede, bena omi eo eau sunumada esega debana eai arinai abo maemiu ta nuaadidiri. ¹³ Egu tataoyao e, tabu nuamiu se ponopono, huia gamagari eau nuagu bena ea laowa (nabada se hemodegu), arimiu eai hinage bena agu paisoa aniona ea abi, doha hinage ea aabi Murimuri-tataodi headi aridi eai. ¹⁴ Eau Heleni tataodi ea nuahaiedi, eo hemahemanabara tataodi ea nuahaiedi: tatao sonoga, eo tatao hinage nige se sonoga. ¹⁵ Na nuagu i gigibori omi Roma taumia hinage bena ea laugugaiimiu.

¹⁶ Keriso ena evanelia nige ea taumaeamaeaei; paana ia ede Eaubada ena gigibori i lau e abihemaurina eai, tatao gamagamagari tau-sunusunuma aridi eai, esau eo esau; bagubaguna Iudea tataodi aridi eai, eo Heleni tataodi aridi eai hinage. ¹⁷ Arinai ede Eaubada ena laulau dudurai se hemasarahama, sunuma eai i lau sunuma eai, doha se uriyao, "Tatao laulau dudurai edi sunuma eai abo se mauri."

¹⁸ Na Eaubada ena ouyalayala galewa eai i dobima se hemahemasaraha tatao aridi eai isi Eaubada matausina nige se matausi, eo laulau baeea gamagamagari se abiwataidi;

arinai riba mamohoina se oitawai. ¹⁹ Eaubada i ouyalayala paana Eaubada ribana aridi eai i masamasaraha; Eaubada i heitadio, ²⁰ tanoubu ena huia tubu eai i laoma, ia ena abi eamuyamui, ena gigibori i miahai nige nosina, eo ia Eaubadana hinage, se masarahao nimana ginauridi aridi eai; tatao gamagari abo se ita. Arinai nige edi abaahare; ²¹ isi Eaubada se nuatuiyao, na nige se hedebasae eo nige se awaeaubadaei, eo hinage nige se laulautoiei; isi mo edi nuatu se haihaiawayagara gaibu mo, eo nuadi se hedigabu eo se hemasigiri; ²² isibom si ene se sonoga, arinai se hemala eauyaure, ²³ to Eaubada miatahitahina nige se aiaihelahui, oitau mo se ginauridi adi ao doha tatao, eo doha manu, eo sarai, eo ginauri se daladalausi, se aiaihelahuidi.

²⁴ Arinai Eaubada edi nuatu biibiidi aridi eai i buigabaedio, taudi nige se heasisiedi na se hebaaeauioidi laulau biibiidi aridi eai. ²⁵ Paana Eaubada ena riba mamohoina se he'ori, se awa-boraboraai, eo ginauri se hetubudi meta mo se aihelahuidi eo se awa-eaubadaedi, Tauhetubudi nige se nuatuwatai, ia ede i sae ariri i lau e nige nosina! Amen.

²⁶ Paana ede meta Eaubada i mosegabaedi gadosisi baaedi aridi eai; edi sisine ma-heledi sisineyao taudi se hebaaeadi, ²⁷ eo tatao hinage, sisine nige se nuatuidi, ma-heledi tatao mo edi lelehi se bii, eo se laulau baaea, edi laulau taumaea-maeanana, maisana isibom taudi eai se hearoyao.

²⁸ Isi Eaubada nuatuna nige se henua arinai Eaubada nuatu eauyaure abo i hegadosisidi, laulau gewagewadi abo se abidi. ²⁹ Abi-baaea gamagamagari se monau, laulau baaea, ginauri se gadosisi gaibuidi, nuabaaea. Aiaromagigiri se monau, eo aiunu, eo lululu, eo laulau borabora, eo se haihaigum, se riba moninihi, ³⁰ isi dagila eai tauaileta, Eaubada tauhewaiununa, tautuisugara eo se riba-tausaeuioidi, tauribapasipasiuioidi, baaea tauhetubuna, tamadiyao sinadiyao tau-awayagaraedi, ³¹ eauyauredi, isibom edi riba tau-utusidi, gadosisi mamohoi nige abina se ata, nuadi se oiura, nuatoatoa nige abina se ata. ³² Isi Eaubada ena abihedudurai ribana se nuatuiyao, ede teina ginauri tauabidi abo se mate, taiede na se ginauridi mo, eo hinage isi wau laulau tauabidi wa nuadi se loloedi.

2

¹ Tau e, oa bena u heduhedudurai nige em aba ribaduduraina; paana ena tau esau u hegiru meta doha hinage u hegiruuiioim, paana ede oa, tauheduhedudurai, hinage em laulau meta doha mo. ² Na ai nuatuiyao Eaubada ena hedudurai i taru isi teina baaea tauabidi ta potadi eai, i dudurai mo. ³ Tau e, oa teina baaea tauabidi u heduduraidi, eo em laulau hinage doha, em nuatu saha u ene Eaubada ena

hedudurai abo u dagogabaei? ⁴ E, ena lolo saesae-ariridi, eo ena nuapaipai, eo ena nuatoatoa i laulau, u halanuiniuedi; nige u nuatui Eaubada ena abilolo ede i woearim eo i henu-abuim? ⁵ Na nuam i oiura eo nige begana i bui arinai ouyalayala u peiauri nonohai, abo u hearo ouyalayala asubenana eai, Eaubada ena laulau dudurai heduduraina asubenana eai ne abo se hemasaraha. ⁶ Hari tau, hari tau, ia maisadi abo i mosei edi laulau gonogonoadi mo: ⁷ headi laulau lolo se nuatupaipaiedi, hedebsae eo heasisi eo mauri nige i posa se eooidi, aridi eai mauri nige nosina abo i mosei: ⁸ na isi taululusenauri, eo riba mamohoina nige se awaabiei, laulau gewagewa mo se awaabiei, aridi eai, ribasuu eo ouyalayala abo i mosedi. ⁹ Amamna lailai eo nuadubu lailai tatao gamagaridi, esau eo esau nige esau i deha, baeaa tauabidi abo se hearodi, Iudea tataodi se abi bagubaguna, abotai Heleni tataodi hinage; ¹⁰ na namanamari, eo hedebsae, eo loni, tatao gamagaridi, esau eo esau, lolo tauabidi abo se hearodi, Iudea tataodi se abi bagunai, abotai Heleni tataodi hinage. ¹¹ Paana ede Eaubada tatao nige i heasisi-napai.

¹² Isi se laulau gaibu laugagaao nige se nuatui, eo edi laulau se baeaa, abo hinage se posa mo, nige laugagaao eai; isi laugagaona se nuatui, eo edi laugagaao se baeaa, laugagaona eai hinage abo se heduduraidi. ¹³ Paana tatao laugagaona beadi eai mo se ataataiei, isi nige se dudurai Eaubada matana eai, laugagaao tauabidi mo isi abo se heduduraidi. ¹⁴ Ena Etene tataodi, isi laugagaona nige se abi, na laugagaona dobilana se launapai mo, isi laugagaona nige se abi, taiede, isibom doha i hemala edi laugagaao. ¹⁵ Isi nuaboead i eai laugagaao laulauna se urihemasarahao, nuadi hinage se taetaea, eo nuadi se hegiruuioidi e se heduduraiuioidi, ¹⁶ nei asubenana ne Eaubada tatao edi nuatu eamuyamuidi abo i lauhetaladi, Iesu Keriso arinai, doha egu evanelia ribana wa.

¹⁷ Hage ena esam se tore si ene oa Iudea tauna, laugagaona eai u mia taubiga, eo Eaubada u ribatausae, ¹⁸ ia ena nuatu u ita-komakomaniyao, eo ginauri lolololodi u awalolodi, laugagaona ribana eai se ribahasahasai mo; ¹⁹ eo em nuatu adidiri u ene taumatagibugibudi tauwoeaidi ede oa, eo tatao masigiri boeana eai se mia tauhemaradi ede oa, ²⁰ tatao supusupudi eo kaimou, oa tauheatadi, laugagaona eai doha riba mamohoina eo sonoga adi ao ue abi; ²¹ oa, tau esau u heata, oabom nige u heatauioidi? Oa u gugua tau esau arinai, u ene tabu i aiyahari, oa u aiyahari, e nige'e? ²² Oa u ene tatao tabu se ganaganawari, oa u ganaganawari, e nige'e? Oa oitau u halanuiniuedi wa, numa tabuna ginaurina u abiabi-gaibuidi, e nige'e? ²³ Oa laugagaona arinai u ribapasipa-

siuioim, oa laugagaeona u utusi, arinai Eaubada u hebaaea, e nige'e? ²⁴ Doha se uriyao, "Paana ede omi, Murimuri-tataodi boeadi eai Eaubada esana se riba-baaeaei." ²⁵ Mamohoi ena laugagaeona u sogohididini abo peritome i lolo; na ena laugagaeona u utusi em peritome taba nige peritome, ginauri gaibu mo.

²⁶ Arinai ena tatao nige se peritome wa, laugagaeona laulau duduraina se sogohididini, tatao wa nige se heperitome wa abo se hemala peritome, e nige'e? ²⁷ Tau nige se peritome laugageona i abiwatai, oa abo i hegirum, oa ena laugagaeona u utuutusi, e nige'e? ²⁸ Ia se ribaei Iudea-tauna ia nige Iudea tauna mamohoi; eo peritome bulumana eai mo nige peritome mamohoi. ²⁹ Iudea tauna mamohoi ena nuatu doha hinage Iudea, eo peritome mamohoina hinage ia ede nuana eai, earuana eai, nige uriuri eai; hedebaseaena tatao aridi eai nige'e, Eaubada mo arinai i laoma.

3

¹ Iudea tataodi edi lolo saha abo se abi? Hinage peritome, aisana lolona arinai abo se hetubu? ² Edi lolo i lai ariri; bagubaguna isi aridi eai Eaubada ena riba mamohoina se mosei. ³ Ie saha isi headi riba wa nige se nuatuwatai? Edi awayagara Eaubada ena abiesega ta abo i heberuberu wa? ⁴ Taba nige'e! Ita ta 'ne Eaubada ia mamohoi na tatao gamagamagari se borabora, doha hinage se uriyao si ene, "Em riba aridi eai abo se heduduraim: ena se hekirainom abo u adidiri." ⁵ Ena eda laulau gewagewa Eaubada ena laulau dudurai i hemasaraha abo ita ta 'ne edoha? Bena Eaubada ena laulau se gewagewa tatao ena i hemaisadi, wa? (Egu riba ta ea riba doha tatao edi riba.) ⁶ Nige ariariri! Ena meta doha Eaubada tanoubu edoha i heduheduduraidi? ⁷ Ena egu riba borabora Eaubada ena riba mamohoina i hemasaraha, arinai ia se hedebaseae; ie saha se lauhetalagu doha eau tau baabaaeana? ⁸ Hinage ie saha nige ta 'ne (doha hinage tatao borabora headi si ene ai ene), "Besi, ta laulau baaea, arinai lolo ta hetubu"? Tatao doha nei maisana lilai abo se abi, i dudurai.

⁹ Abo edohana? Ita Iudea ta saetawatawaidi? Nige'e, nige ariariri: nabada wa Iudea eo Heleni eau ea heoiesegaidi baaea eai se laulau. ¹⁰ Doha se uriyao si ene, "Nige esau ena laulau se dudurai, nige esega;

¹¹ nige esau i nuatulobai, nige esau Eaubada i eooi.

¹² Gamagaridi dobila eai se laulausuara, se baaegogo;

nige esau ena laulau se lolo, nige esega." (Psa. 14.1-2; 53.1-2.)

¹³ "Gadodi doha bousa se soeauri, memenadi eai se ribaborabora;

"Sopa aloalodi eai mota edi haha abamate."

14 “Awadi ribahemate eo kalapi se monau.”

15 “Aedi se heula, osina bena se heboriri,

16 sabom eo nuadubu edi dobila eai se toro.

17 Loni dobilana nige abina se ata.”

18 “Eaubada matausina matadi eai nige’e.” (Psa. 5.9; 140.3; 10.7; Is. 59.7-8; Psa. 36.1.)

19 Na, ta nuatui riba gamagamagari laugagaao eai se uridi isi laugagaao tauabidi edi riba: awadi gamagamagari bena se guduohidi, abo tanoubu gamagamagari se ohihai, Eaubada matana eai se hegirudi. 20 Arinai ede laugagaao abiabidi eai nige tau esau ia matana eai abo se hedudurai; paana laugagaona eai baaea se nuatulobai ede. 21 Na abotai abo Eaubada ena laulau dudurai se hemasarahayama, laugagaona eai nige’e, ia ede laugagaona eo peroveta se hemasaraha mo, 22 Eaubada ena laulau dudurai, ia ede Iesu Keriso sunumana tauataataiena gamagamagaridi enadi. Nige hinehinerina, 23 paana tatao gamagamagari edi laulau se baaea Eaubada ena namanamari sora nige se lobai; 24 ena ainauia eai se hedudurainapaidi, abihemaui debana eai Keriso Iesu boeana eai. 25 ia Eaubada i hetoro hemasarahayao, baaea bena i saugabaei, ia osinana eai, sunuma eai ta abi enada. Teina arinai Eaubada ena laulau dudurai i masaraha, nabada wa baaeadi i nuatugabaedi ena healapaipai debana eai; 26 ena laulau dudurai aba-italobaina, ea ’ne teina huia ena laulau dudurai abo i masaraha, iaede Iesu tausunumaena ia abo i hemaui ede.

27 Eda ribapasipasi wa haedi? Se guduha. Aitea laugagaona eai? Laulau laugagaona? Nige’e, na sunuma laugagaona mo. 28 Paana ta nuatui ta ’ne tau esau abo i dudurai sunumana eai mo, laugagaao abiwatana eai nige’e. 29 E ia Iudea tataodi isibom mo edi Eaubada wa? Murimuri-tataodi edi Eaubada hinage, e nige’e? E, mamohoi, Murimuri-tataodi edi Eaubada hinage. 30 Ia ede Eaubada mamohoina esega, peritome tataodi sunuma debana eai abo i heduduraidi, eo tatao nige se heperitomeidi sunuma eai abo i heduduraidi hinage. 31 Sunuma ta arinai laugagaona ta helautom wa? Nige ariariri! Laugagaona abo ta hetoro adiadidiri ede.

4

1 Aberahama, urutubuda tanoubu eai ta, edohana abo ta ribaei? 2 Ena Aberahama ena laulau debadi eai ia se hedudurai, ena aba ribatausaeui oi ede meta; na Eaubada matana eai nige’e. 3 Uriuri tabudi si ene edoha? Aberahama Eaubada i nuatuwatai arinai ede se nuatulaei si ene, laulau duduraina meta. 4 Na paisoa tau-abina ia nige se ainauiai, na se hemaisa mo. 5 Ia wa nige i paisoa, na tatao baaea tauheduduraidi i nuatuwatai mo, ena sunuma abo se ribaei

laulau-dudurai. ⁶ Doha hinage Davida ena uriuri eai tau ena nuawoiwoina i ribaei, ia wa Eaubada i awa-laulaududuraiei, nige ena paipaisoa debadi eai; i ene:

⁷ “Isi edi laulau baaea se ribagigiridio, edi laulau baaea se poitawaidio, nuadi se woiwoina;

⁸ tau Eaubada nige i riba-taubaaeaei, nuana i woiwoina.”
(Psa. 32.1-2.)

⁹ Wau nuawoiwoina wa, isi tau-peritome isibom abo se abi, e tatao nige se heperitome di abo se abi hinage? Paana ita ta 'ne, Aberahama ena sunuma debana eai ia se awataulaulaududuraiei. ¹⁰ Edoha edi awaawataulaulaududuraiena? Ia se heperitomeyao, e sora nige se heperitome? Ia sora nige se heperitome. ¹¹ Ia se heperitome doha heiheinoi mo, ena sunuma laulaududuraina heiheinoina huia ne sora nige se heperitome wa; ia abo tauataiena gamagamagari tamadi eai ie lau, isi wa nige se heperitome di, edi sunuma debana eai mo se awaawataulaulaududuraiedi. ¹² Eo ia abo tauperiperitome tamadi eai ie lau, na isi mo nige'e, isi hinage gamagamagaridi tamadi Aberahama ena sunuma laulauna se laulauwatai, sunuma wa i abiyao ia sora nige se heperitome.

¹³ Paana ribahesunuma wa, Aberahama eo ia pesipesinayao aridi eai se ribaei si ene ia tanoubu abo i tanuagaei, nige laugagaeona debana eai i laoma, na sunuma laulau-duduraina mo. ¹⁴ Na, ena tau-laulaududurai laugagaeona eai, isi tanoubu abo se tanuagaei, sunuma abo nige aniona, eo ribahesunuma wa hinage nige ana ao. ¹⁵ Paana ede laugagaeona wa ouyalayala aba-hetubuna ede: na haedi eai laugagaeona nige'e, laugagaeo utusina nige'e.

¹⁶ Arinai sunuma eai mo ribahesunuma wa i tubuma, ainuia debana eai, bena ia pesipesinayao gamagamagari aridi eai ribahesunuma wa tatao se hemamohoiei; isibom laugagaeo ribana eai enadi mo nige'e, isi hinage enadi Aberahama ena sunuma tau-abina, ia gamagarida tamada ede, ¹⁷ doha se uriyao si ene, “Ea hetorom oa eanua gamagaridi urutubudi eai u lau;” (Gen. 17.5.) Eaubada i sunumawatai wa matana eai, ia taumatemate tauhemauridi, eo ginauri sora nige se hetubudi ena riba eai abo se tubu. ¹⁸ Ia ena sunuma doha nige aniona, taiede i sunumawatai mo, eanua gamagamagari bena abo i hemala tamadi; doha se ribaei wa si ene, “Doha hinage meta pesipesimayao abo se gamagari.” (Gen. 15.5.) ¹⁹ Tauna i nuatui se beruberuo, ena gigibori se lautom'o, na ena borimai handere i hanahanau, eo Sara i nuatui i agari hinage, taiede ena sunuma nige i beruberu. ²⁰ Eaubada ena ribahesunuma nige i awayagaraei, eo nige i tagugu, ena sunuma mo i adidiri, eo Eaubada i ribatausaei; ²¹ ena nuatu

adidirina eai i ene, saha eo saha i ribahesunumaei abo hinage abina i ata i hemamohoei. ²² Arinai ede ena sunuma ia arinai se awa-laulaududuraiei. (Gen. 15.6.) ²³ Se uri wa si ene, "Ia arinai se awa-laulaududuraiei;" iabom mo nige se nuatui, ²⁴ se nuatuida hinage. Ita arida eai nige baeiona sunumada abo se awa-laulaududuraiei, ita Iesu eda Guiiau mate eai i hetorouioi, tausunusunumaena. ²⁵ Eda laulau baeaa debadi eai ia se moselaei, eo ia se hetorouioi eda aba-heduduraida ede.

5

¹ Na sunuma eai se heduduraida wa, arinai Eaubada maeda ta loni eda Guiiau Iesu Keriso debana eai. ² Ia arinai hinage ta lage Eaubada nualolona eai, arinai ta totoro, eo ta kode, paana Eaubada ena namanamari boeana eai ita eda tupo ta abi. ³ Meta mo nige'e, eda amamna eai hinage arinai ta kode paana ta nuatui amamna nuapaipai i hetubu, ⁴ eo nuapaipai tau ena nuaadidiri i hetubu; eo nuaadidiri arinai sunuma i tubuma hinage; ⁵ eo ena ta sunusunumaei taba nige ta taumaeamaea, paana Eaubada ena gadosisi nuaboeda eai se ini-hemonauboriboriri, Earua Tabuna debana eai ia ede se leamao.

⁶ Paana ita ma-beruberuda, huiana i lagema, Keriso, tatao Eaubada matausina nige se matausi, debadi eai ie mate. ⁷ Taulaulaududurai mo debana eai taba nige tau esau ie mate; taiede tau lolo ariri debana eai ibai headi abo se mate, e nige'e? ⁸ Na Eaubada ena gadosisi arida eai i hemasarahayama ede ina, ita ma laulau baabaeada eai Keriso debada eai ie mate. ⁹ Arinai ede ia osinana debana eai se heduduraida wa, ia debana eai hinage Eaubada ena ouyalayala eai abo se hemauida. ¹⁰ Ena ita ma-waiunuda Eaubada arinai ta labini ia Natuna matena eai, na ta labinieiyao wa, abo ta mauri hinage, ena mauri eai. ¹¹ Na meta mo nige'e, Eaubada ta kodei hinage eda Guiiau Iesu Keriso debana eai, ia arinai maeda ta labini-esegaidao.

¹² Na doha tau esega arinai baeaa ie tubu tanoubu eai ta, eo mate hinage baeaa debana eai; arinai hinage tatao gamagamagari mate se hearo, paana tatao gamagamagari edi laulau se baeaa. ¹³ Paana sora laugagaeona nige se hetubu baeaa i tubuo tanoubu eai ta; na ena nige laugagaeo taba nige se awa-laulaubaeaei. ¹⁴ Taiede Adamu ena huia eai i lau e Mose ena huia eai mate i gigibori, isi hinage se hearo isi nige se laulau baeaa doha Adamu, ia ede abo i laoma wa tautauna ede.

¹⁵ Ainauia ta abinapai wa, baeaa i saetawatawai. Ena tau esega ena baeaa debana eai tatao gamagamagari se mateo, Eaubada ena ainauia, arinai tau esega, Iesu Keriso, i aiainuia-napai wa, abo i tadada hinage, tatao gamagamagari

enadi. ¹⁶ Hinage ainauia wa nige doha baaea wa tau esega i hetubu; paana tau esega debana eai se lauhetala eo se hemaisa, na ainauia dumaduma wa baaea gamagamagari abaheduduraide ede. ¹⁷ Ena tau esega baaeana eai mate i tanuaga, tau esega debana eai, isi ainauia lailai eo laulau dudurai ainauiana nige maisana tauabidi edi mauri eai abo se tanuaga, tau esega mo, Iesu Keriso, debana eai.

¹⁸ Arinai doha tau esega ena baaea debana eai tatao gamagamagari se hegirudi, se hemaisadi; hinage tau esega ena laulau dudurai debana eai ainauia dumaduma tatao gamagamagari se abi, i lau e abaheduduraide ede, eo edi mauri. ¹⁹ Doha hinage tau esega ena awayagara debana eai tatao gamagamagari se hemala tatao baabaeadi, tau esega ena awaabi debana eai hinage tatao gamagamagari abo se hemala tatao laulau-duduraide. ²⁰ Laugaga eo i lagema, baaea wa bena i hetadada. Na haedi baaea ena aba-tadada wa, temetai ainauia abo i hetadada-lailai. ²¹ Doha baaea i tanuagaida i laulau e mate eai, hinage ainauia laulau-dudurai debana eai bena i tanuagaida i laulau e mauri nige nosina ta lobai, eda Guiau Iesu Keriso debana eai.

6

¹ Abo ta ene edoha? Baaea ta abididini ainauia bena i hetadada? ² Nige ariariri! Ita baaea eai ta mamate abo edoha eda abiabididini? ³ Au nuatui e nige'e ita gamagarida Iesu esana eai se hebapatisoida, ia matena eai se hebapatisoida? ⁴ Arinai bapatiso eai, ia maeda mate eai se toretoretu-esegaida; na doha Keriso mate eai se heterouioi Tamana ena gigibori eai, ita hinage abo ta laulau mauri harihariuna eai.

⁵ Taba ena mate eai ia maeda ta heoiesegaida, ena torouio eai hinage ia maeda abo ta heoiesegaida. ⁶ Teina ta nuatui tauda beabeana ia maeda se hesatauroesegaida; baaea tauda bena se hetatagorigori, maraitom asubena baaea taba nige ta heayaiei. ⁷ Paana ia mate i hearo baaea maisana i toreyao. ⁸ Na ena Keriso maeda ta mate esega, hinage eda nuatu ta 'ne maeda abo ta mauri esega. ⁹ Paana ta nuatuiyao Keriso mate eai se heterouioi taba nige i mateuio: ia arinai mate ena gigibori i lautomesegai. ¹⁰ Ma esega mo baaea arinai mate i matei; na Eaubada arinai mauri i mauriei. ¹¹ Omi hinage au nuatui, baaea arinai au mateo, na Eaubada arinai au mauri eda Guiau Iesu Keriso debana eai.

¹² Taumi posaposadi eai tabu baaea i tanuagaidi, gadosisi baaeadi ata au awaabiedi. ¹³ Eaumi hinage tabu au moselaedi, doha laulau-baaea abiabina, baaea eai; na au moseuioimiu Eaubada arinai, doha aue mate wa eo au

torouio, eo eaumiū hinage au moselaedio, doha laulau-dudurai abiabina, Eaubada arinai. ¹⁴ Baaea taba nige i tanuagaimiū, paana laugagaeona nige i tanuagaimiū, ainuia mo omi i tanuagaimiū.

¹⁵ Abo edoha? Abo ta baaea paana laugagaeona nige i tanuagaida? Nige ariariri? ¹⁶⁻¹⁷ Omi abina au ata, e nige'e, ia arinai au moseuioimiu, au heayaiei, awana au abi, ia ena heaheari omi, paana ia awana au abi; e taba baaea ena heaheari, i lau mate eai, e awaabi ena heaheari, i lau laulau-dudurai eai? Eaubada ta lautoiei omi nabada wa baaea ena heaheari eai aue lau, na lauheata se leawa ma nuaadidirimiu au awaabieiyao. ¹⁸ Baaea eai se iairihaimiu wa, abo omi au hemala laulau-dudurai ena heaheari. ¹⁹ Emi beruberu debadi eai ea ribariba ta doha tatao edi riba: na doha eaumiū au moselaedi laulau biibiidi, eo hari laulau hari laulau baaedi edi heaheari eai se lau; hinage doha meta huia ta eaumiū abo au moselaedi laulau-dudurai ena heaheari eai se lau emi aba hetabuemiū ede.

²⁰ Na omi baaea ena heaheari huiana eai wa laulau-dudurai nige i tanuagaimiū. ²¹ Ginauri wa huia ta au taumaeamaeadi, aniodi saha saha aridi eai au abidi? Meta ginauri me adi sigasiga eai ede mate. ²²⁻²³ Na baaea eai se iairihaimiu, eo au hemala Eaubada ena heaheari, aniomiu au abidi laulau tabuna eai, eo adi sigasiga hinage mauri nige nosina. Paana baaea maisana ede mate, na Eaubada ena ainuia ede mauri nige nosina eda Guiau Iesu Keriso debana eai.

7

¹ Egu tataoyao e, au nuatui, e nige'e (ea ribariba laugagaeona taunuatuina aridi eai ina), laugagaeo tatao edi mauri huiana eai mo i tanuagaidi? ² Sine esau i tawasora laugagaeona eai, ia ma maumaurina eai monena arinai i patudidini, na ia ena ie mate, abo monena laugagaeona arinai sine wa se iairihai. ³ Arinai taba ia monena ma miana eai na tau esau i tawasorai, ia esana abo se ribaei sine ganaganawarina. Na taba monena i mateo laugagaeo arinai se iairihai; tau esau ie hai temeta nige ganawari.

⁴ Egu tataoyao e, Keriso tauna debana eai omi hinage laugagaeona eai aue mate; esau bena au tawasorai, ia ede ia mate eai wa se heterouioi, ita bena anioda ta hetubu Eaubada enana. ⁵ Na ita buluma ena huia eai sora ma miamiada wa, tauda lelehidi baaedi laugagaeo i hesohesomdi, eauda eai se paipaisoa bena anioda ta hetubu mate enana. ⁶ Na huia ta laugagaeona eai se abigabaeda, ena abiabididinida wa i mateo; ita taba nige ta heayaiei gaibui doha beabeana wa, na miamia harihariuna eai mo, Earua enana.

⁷ Ita abo ta ene edoha? Laugagaeona i baaea ede? Nige ariariri! Nige'e, baaea taba nige ea nuatui, na laugagaeo mo ia tauhemasarahana; gadolelehi taba nige ea nuatui, na laugagaeo mo i ene, "Tabu hari tau ena ginauri nuam se lauedi." ⁸ Baaea ena dobila i lobai laugagaeona eai hari baaea, hari baaea, i hemasarahadi. Na, taba laugagaeo nige'e, baaea abo ie mate. ⁹ Nabada wa sora nige laugagaeona, na ea mauri: na laugagaeona i laoma, baaea abo i mauri, eau mo ea mamate. ¹⁰ Laugagaeona wa mauri bena i leama, mate mo i hetubuyama. ¹¹ Paana ede baaea ena dobila i lobai laugagaeona eai, i boraigu, arinai i unuhemategu. ¹² Arinai ta 'ne laugagaeona ede laugagaeo tabuna, eo duduraina, eo lolona.

¹³ Ginauri lolona ede meta, arigu eai abo i hemala mate wa? Nige ariariri! Na baaea mo ginauri lolona debana eai mate i hetubu, bena abo baaea se italobai komakomani, eo bena baaea, laugagaeo debana eai, baaea laina ana ao abo i masamasaraha. ¹⁴ Ita ta nuatuiyao laugagaeo ia earuana eai heaheasonina ede; eau mo bulumagu eai ta, baaea arinai se unegabaegu. ¹⁵ Na egu abiabi nige ea ene eau egu abiabi: saha eo saha ea henua ea abidi, nige ea abidi, na meta mo nige ea henuadi, ia ede ea abidi. ¹⁶⁻¹⁷ Ena saha nige ea henua, meta mo ea abidi ede, arinai abo ea ene laugagaeo i lolo. Eau eaubom nige ea abidi, baaea mo nuaboeagu eai ie mia, ia tauabidi ede. ¹⁸ Ea nuatuiyao eau nuaboeagu eai (ia ede bulumagu boeana eai) nige ginauri lolona esau ie mia; eau egu nuatu ea ene bena ea lolo, na ia mo nige egu gigibori. ¹⁹ Laulau lolo ea henua ea abi, nige ea abi: baaea nige ea henuhenua, meta mo ea abiabini. ²⁰ Na ena meta mo ea abidi nige ea henuadi ia mo ea abidi, taba nige ea 'ne eau ea abidi, na baaea boeagu eai ie mia, ia tauabidi ede.

²¹ Laugagaeo esau ea lobai ede ina: eau ea henua ea laulau lolo, baaea mo i wesewesegu. ²² Paana nuaboeagu eai Eaubada ena laugagaeo ea henua aririei, ²³ eaugu eai mo laugagaeo udoi ea ita, nuagu laugagaeona maena se haihaiabi, eo baaea laugagaeona eaugu eai i toaigu, i tanuagaigu. ²⁴ Ea ene kapore eau tau baabaeagu ta! Teina mate ta taugu eai, eai abo i hemaaurigu? ²⁵ Eaubada ea lautoiei, eda Guiiau Iesu Keriso debana eai! Arinai ea ene, nuagu eai eau eaubom Eaubada ena laugagaeo ea heaheayaiei, na bulumagu eai mo baaea laugagaeona ea heaheayaiei.

8

¹ Arinai ede isi Iesu Keriso boeana eai nige edi abahebaaeadi, isi buluma dobilana nige se laulauwatai, na Earua mo se laulauwatai. ² Paana mauri Earuana laugagaeona

Keriso Iesu boeana eai, baaea eo mate laugagaeona eai i iairihaiguo. ³ Na saha wa laugagaeo nige abina i ata i abi paana, buluma eai, i beruberu, Eaubada ia Natuna baaea hesabana i hetamariyama, ana ao hinage doha buluma baaeana, na ia buluma eai baaea i awabaaeaei. ⁴ Laugagaeo laulau-duduraina abo se hemamohoiei ita boeada eai wa ita nige buluma ta lauwatai, na Earua mo ta lauwatai. ⁵ Isi buluma se lauwatai, buluma ginauridi mo se nuatuidi; na isi Earua se lauwatai, Earua ginauridi se nuatuidi. ⁶ Paana nuada eai buluma ginauridi ta nuanuatuidi ta mate; na Earua enana ta nuanuatuidi abo ta mauri eo ta loni. ⁷ Paana buluma nuatuna ta nuatu-daoiei Eaubada abo ta hewaiunuei ede, Eaubada ena laugagaeo nige ta awaabiei, nige abina ta ata. ⁸ Isi buluma nuanuatuina eai se laulau, Eaubada henualolona abina nige se ata.

⁹ Na omi nige buluma boeana eai, na Earua boeana eai, ena Eaubada Earuana i miamia boeamiu eai. Ena tau esau Keriso Earuana nige i abi ia nige Keriso enana. ¹⁰ Eo ena Keriso i miamia nuaboeamiu eai taumi u ena se mate baaea debana eai, taiede earuamiu se mauri laulau-dudurai debana eai. ¹¹ Na taba Iesu mate eai tauhetorouioina Earuana i miamia nuaboeamiu eai, ia Keriso mate eai i hetorouioi wa taumi u posaposadi abo i hemaauridi, Earuana i miamia boeamiu eai wa debana eai.

¹² Egu tataoyao e, ita buluma nige ta mose-hagai, buluma gadosisina ata ta lauwatai. ¹³ Ena buluma gadosisina au lauwatai, abo au mate; na ena Earua debana eai taumi u laulaudi au unuidi, abo au mauri. ¹⁴ Paana isi gamagamagaridi Eaubada Earuana i woewoeaidi, isi Eaubada nanatunayao ede. ¹⁵ Paana omi earuamiu taba nige au abiuioidi doha se paiuioimiu, eo doha matausi arinai au guriuio; na omi gigiori earuana au abi, au hemala-natu. Arinai ena ta eaba lailai ta ene "Aba! Tamada e!" ¹⁶ ia Earuana ma earuada ede se oiribaribaei, ita Eaubada nanatunayao; ¹⁷ na taba ita ia nanatunayao ita hinage ena gogo tauabina, eo Keriso maeda tau-abiesegaina, ena taba ena amamna ta hearoesegai eo maeda ena hedebasae ta hearo hinage.

¹⁸ Amamna wa huia ta ta abidi se gagiri ariri, hedebaesae abotai abo se hemasarahayama boeada eai, meta mo ea nuatui ede i lai ariariri. ¹⁹ Ginauri eo abi gamagamagari se hetubudi wa, Eaubada nanatunayao edi hedebasae se bagibagiwatai, ma-nualelehidi. ²⁰ Paana ede abi gamagamagari se hetubudi se guridobi, se laulau gaibu mo, isi nige edi nuatu eai na tauheguridi mo ena nuatu eai se laulau; edi sunusunuma paana ²¹ ede abi gamagamagari posaposadi adi auau eai abo se hemaauridi, eo abo se lulagema Eaubada nanatunayao edi iairihai lolo-dumadumana eai. ²² Ita ta

nuatui abi gamagamagari se oihai se lepalepagogo, eo se amamna ariri i laoma e huia ta. ²³ Nige isibom mo, na ita hinage Earua ena uaua ealahouna tauabina, ita hinage ta lepalepa nuaboeada eai, gigiorina ta bagibagiei, ia ede tauda wa abo se hemauidi. ²⁴ Paana ita sunuma debana eai ta mauri; na sunuma ne se itaitai, meta nige sunuma mamohoina; tau ginauri matana eai ie ita saha abo i sunumaei? ²⁵ Na ena ginauri nige ta ita, ta sunumaei, iaede abo ta bagiwatai, manuapaipaida.

²⁶ Doha hinage eda beruberu eai Earua i sagusaguida, saha eo saha bena ta lau-uuraedi, duduraina nige abina ta ata, na Earua iabom enada i aiboda gadogadora, taba nige ta ribaei, nige arinana. ²⁷ Nuataueooidi Earua ena nuatu aniona i itayao, paana ede ia hetabu tataodi enadi i aiaiboda, Eaubada ena nuatu mo i lauwatai.

²⁸ Ta nuatuiyao ginauri gamagamagari se lauloloesegaidi isi Eaubada taugadosisiena aridi eai, isi ia ena nuatu eai se eogahaidi. ²⁹ Na isi i ita-nonohaidio hinage i henuatu-auridio ia Natuna ana ao abo hinage se abiwatai, ena tataoyao gamagamagari aridi eai ia bena abo i hemala natu-ealahouna. ³⁰ Isi i henuatuauridio wa, hinage i eogahaidi; isi i eogahaidi wa, hinage i heduduraidi; eo isi i heduduraidi wa, hinage i hedebaseadi.

³¹ Teina ribadi ta aridi eai abo ta ene edoha? Taba Eaubada i torotaunida, eai abo i guduguidi? ³² Ia, Natuna nige i nuahi na ita gamagarida debada eai i moselaei, ia maena hinage abo ginauri gamagamagari i ledima-esegaidima, e nige'e? ³³ Eaubada ena tauhinehineri tataodi, eai abo riba esau arinai i hegirudi? Eaubada ia tauheduduraina ede. ³⁴ Eai abo i riba-hebaaea? Keriso Iesu ie mate ede, taiede i torouio, ia Eaubada nimatutuna eai ie mia, eo enada i aiaiboda. ³⁵ Keriso ena gadosisi eai ta, eai abo i abihesarada? Amamna lailai e, nuadubu e, se hebaaeada e, guriam e, tauhaaha e, mate hanahanau e, elepa wa? ³⁶ Doha se uriyao si ene,

“Oa debam eai se unuimai, asubena gamagamagari;

se abimai doha mamoe, bena abo se unuidi.” (Psa. 44.22.)

³⁷ Nige'e, teina ginauri gamagaridi ta boeadi eai ita abo ta adidiri ariariri, ia i gadosisieda wa debana eai. ³⁸ Paana ea nuatuiyao, nige mate, eo nige mauri, eo nige aneru, eo nige guiau wasawasadi, eo nige gigibori, eo nige ginauri huia ta, eo nige ginauri sora nige se tubu, ³⁹ eo nige ginauri saesaedi, eo nige ginauri dobidobidi, eo nige ginauri esau se hetubu, abidi se ata Eaubada ena gadosisi eai se abihesarada, gadosisi wa iaede eda Guiau Keriso Iesu arinai.

9

¹ Keriso boeana eai ea riba mamohoi, nige ea riba borabora, nuaboeagu eai egu nuatu abaheduduraina Earua Tabuna i hemara hinage, ia maegu ai riba esega, ² ea 'ne nuagu i mou ariri, eo egu nuadubu otana. ³ Eau egu gadosisi taba se ribahemategu mo, taba Keriso arinai se tomgabaegu egu tataoyao eo agu bogao mamohoi debadi eai. ⁴ Isi ede Isaraela tataodi, awa-natu isi enadi, eo hedebaseaena hinage, eo ribahesunuma; laugagaeo isi ede se mosedi, eo Eaubada ana paisoa aba-heyaiena, eo aihelahuina; ⁵ eo urutubu, tamadiyao wa, isi enadi, adi bogao eai hinage Keriso i laoma. Eaubada, ia ginauri gamagamagari i saetawatawaedi, ia se aihelahui i lau e nige nosina. Amen.

⁶ Tabu ta ene Eaubada ena riba nige aniona. Paana isi Isaraela tataodi wa, gamagaridi nige Isaraela mamohoi; ⁷ isi Aberahama pesipesinayao, gamagaridi ia nige nanatunayao, na si ene, "Isaako arinai pesipesim abo se hetoro." (Gen. 21.12.) ⁸ Isi buluma nanatunayao nige Eaubada nanatunayao; na ribahesunuma nanatunayao isi ede se awa-pesipesiedi. ⁹ Ribahesunuma ribana ede ina, i ene, "Teina huia ta borimai matada eai abo ea laoma, Sara natuna abo i labasi." (Gen. 18.10.) ¹⁰ Eo teina mo nige'e; ita tamada Isaako arinai Rebeka ie boga; ¹¹ (isi merumeru sora nige se tubuma, nige esau sora ena laulau se lolo, e se baaea, Eaubada ena nuatu bena i laulau wa, arinai tatao i hineridi nige laulau debadi eai, iabom mo tau-eogahaidi ena nuatu.) ¹² se ribalau Rebeka arinai, si ene, "Taubaguna ena taumurita abo i heyaiei." (Gen. 25.23.) ¹³ Doha se uriyao si ene, "Takobo ea gadosisie, na Isoa ea hewaiunuei." (Mal. 1.2, 3.)

¹⁴ Ita abo ta ene edoha? Laulau gewagewa meta, Eaubada ena tupo eai, wa? Nige ariariri! ¹⁵ Doha i ribalau Mose arinai, i ene, "Isi bena ea laubiriedi abo ea laubiriedi, isi bena ea nuatoatoaidi, abo hinage ea nuatoatoaidi." (Ex. 33.19.) ¹⁶ Arinai ta ene taunuatuina nige ena nuatu eai, eo tauaitau-tauina nige ena aipate eai, na Eaubada ena nuatoatoa eai mo, laubirina i hetubu. ¹⁷ Uriuri Tabuna eai Parao arinai si ene, "Teina hesabana ede ea hetorom ta, egu gigibori bena abo ea hemasaraha oa boeam eai, eau wasagu abo se ribaei tanoubu gamagamagari aridi eai." (Ex. 9.16.) ¹⁸ Arinai isi i henua i laubiriedi abo i laubiriedi, eo isi i henua nuadi i heoiuradi abo i heoiuradi hinage.

¹⁹ Abo u ribalaoma arigu eai u ene, "Ie saha i hegiruda? Ia nuana, eai abo i torogudui?" ²⁰ Na, tau e, oa eai Eaubada u riba gudugudui wa? Ginauri se helasa abo i ribalau tauhelasana arinai i ene, "Ue saha u helasagu doha ede

ina?” (Is. 29.16.) ²¹ Mono tauhelamona iabom ena nuatu mono pei esegana eai ginauri i lauginauri esau ana ao lolona, e ginauri esau paisoa dobidobina mo enana. ²² Ata bena Eaubada i henua ena ouyalayala i heitada, eo ena gigibori i hemasaraha, arinai baaea gulewadi, mate hesabana se ginauridi, i nuapaipaiedi, ²³ arinai hinage ena hedebasae lolona bena i hemasaraha gulewa saesaedi, nuanuabigadi, ia i ginauri nonohaidi aba-hedebasaena ede, ²⁴ ia ede ita, ia i eogahaida wa, Iudea tataodi aridi eai mo nige'e, na Murimuri-tataodi aridi eai hinage, wa? ²⁵ Doha Hosea ena uriuri eai i ene,

“Eau egu tataoyao abo ea ribaedi,
isi nabada wa nige egu tataoyao;

eo sine wa nige ea gadosisiei,
abo ea gadosisiei.” (Hos. 2.23; 1 Pet. 2.10.)

²⁶ “Dimo eai wa se ribalau aridi eai si ene, ‘Omi nige egu tataoyao,’ metai abo se ribaedi, ‘Eaubada maumaurina nanatunayao.’” (Hos. 1.10.)

²⁷ Isaia hinage, Isaraela ribana i eogayogaei i ene: “Isaraela nanatunayao ta hasiridi doha gabogabo geregerena, ia mo tupona, haghagana mo, abo se hemaauridi. ²⁸ Paana Guiau ena hemaisa abo i hepaisoaei tanoubu eai ta, abo i heohi heulai.” (Is. 10.22; 28.22.) ²⁹ Hinage doha Isaia i uri bagunaiyao, i ene,

“Ena Moutuadi Guiauna ada isimurita nige i leama,
ita nabada eai wa doha Sodoma ta hearoyao, eo doha Gomora.” (Is. 1.9.)

³⁰ Abo ta ene edoha? Murimuri-tataodi nabada wa laulau-dudurai nige se lauwatai, isi laulau-dudurai se lobaiyao, laulau-duduraina ta iaede sunuma eai i tubuma; ³¹ na Isaraela, isi laulau-dudurai laugagaeona se lauwatai, hinage laulau-dudurai laugagaeona nige se hemamohoiei. ³² Paana saha? Paana ede isi sunuma eai nige se eoi na laugagaeo laulaudi eai mo se eoi. Aba-alabesibesi we'una ede meta, arinai se alabesibesi; ³³ doha se uriyao, si ene,

“Hage, Siona eai aba-alabesibesi we'una
ea totore,

eo ae-abahetupanei we'u-dubana hinage,
arinai tatao abo se beu;

na eai to eai ia se nuatuwatai, taba nige se taumaeamaea.” (Is. 8.14; 28.16.)

10

¹ Egu tataoyao e, egu gadosisi lailai, eo egu uura Eaubada arinai Isaraela debadi eai, iaede teina: bena abo se hemaauridi. ² Ea itadio isi se adidiri Eaubada arinai, na se adidiri

gaibu mo. ³ Paana isi Eaubada ena laulau-dudurai se supusupuei, eo isibom edi laulau-dudurai se eooi bena se hetubu: Eaubada ena laulau-duduraina nige se nuatuwatai. ⁴ Paana Keriso ia laugagaeo sigana ede, tausunusunuma gamagamagari bena se heduduraidi.

⁵ Laulau-dudurai, laugagaeo eai i tubuma, Mose i ribahasahasaida, i ene tau esau teina ginauri ta i ginauridi abo i mauri debadi eai. ⁶ Na laulau-dudurai sunuma eai i tubuma, i ene ina doha, “Tabu nuam eai u ene, ‘Eai abo i awasae galewa eai?’ (ia ede Keriso abo se woeadobeiyama), ⁷ e ‘Eai abo i letadobi doubu eai?’ ” (ia ede Keriso mate eai abo se woeaisiniyama). ⁸ Na i ene edoha? I ene, “Riba wa hanahanaum eai, awam eai eo nuam eai”: ia ede sunuma, ai lauguguaiei; (Deu. 30.12-14.) ⁹ paana taba awam eai Iesu u wasawasaei u ene ia Guiau, eo nuam eai u nuatuwatai u ene Eaubada ia mate eai i heterouioi, oa abo u mauri. ¹⁰ Paana tau ma nuana i nuatuwatai i lau e laulau-dudurai abo i tubu; eo awana eai hinage ia i wasawasaei arinai abo i mauri. ¹¹ Uriuri tabuna eai si ene, “Ena tau esa, tau esa, ia i nuatuwatai taba nige i taumaeamaea. (Is. 28.16.) ¹² Iudea tauna eo Heleni tauna isi nige udodoi; paana Eaubada esegana mo gamagarida i tanuagaida, isi gamagaridi se eogalau ia arinai ia i ainauiaadoiedi. ¹³ Tau esa, eo tau esa, se eogalau Guiau esana se atai, isi abo se mauri. (Ioela 2.32.)

¹⁴ Na edohana abo tatao edi eogayogalau arinai, ena ia sora nige se ataataiwatai? Edohana abo edi ataataiena ena sora ia wasana nige se ataiei? Eo edohana edi ataiena ena nige enadi taulaugugua? ¹⁵ Abo edohana tatao edi laulaugugua, ena nige se hetamaridi? Doha se uriyao si ene, “Aedi adi ao tai se lolo, isi loni wasa-lolona taulaulauguguiaina, eo ginauri lolodi wasadi lolodi tauleamana!” (Is. 52.7.) ¹⁶ Na isi headi evanelia nige se awaabiei. Doha Isaia i ene, “Guiau e, eai ema wasa i nuatuwataiyao?” (Is. 53.1.) ¹⁷ Arinai ta ene ataiena debana eai sunuma ie tubu, eo Eaubada ena riba arinai ataiena ie tubu.

¹⁸ Na ea hesio, isi nige se ataieyao, wa? E, mamohoi se ataieyao. “Dagugudi i lau e tanoubu i laugirihai, eo edi riba se lau tanoubu gamagamagari sigasigadi eai.” (Psa. 19.4.) ¹⁹ Na ea hesiouio, Isaraela nige se nuatui, wa? Bagubaguna eai Mose i ene, “Isi tatao gaibu aridi eai ea heaiaromagigiriemi, eo eanua eayuaure aridi eai ea heouyalayalaemi.” (Deu. 32.21.) ²⁰ Isaia i riba adidiri ariri, i ene, “Isi nige se eooigu se lobaiguo, isi nige se hetalagu matadi eai ea toro masaraha.” (Is. 65.1.) ²¹ Na Isaraela aridi eai i ene, “Asubena gamagamagari nimagu ea helelelaedi tau awaawayagara eo tauhegihegirugaibu aridi eai.” (Is. 65.2.)

11

¹ Ea oimurini, ea ene, Eaubada ena tataoyao ta i gabaedi, wa? Nige ariariri! Eau hinage Isaraela tauna, eau Aberahama pesipesina esau, boga Beniamina. ² Eaubada ena tataoyao wa, i nuatui-nonohaidi, nige i gabaedi. Uriuri Tabuna ribana Elia ribana se ribaei au nuatui, e nige'e? Ia i aiboda Eaubada arinai Isaraela bena i gudugudui, i ene, ³ "Guiau e, isi em peroveta se unuidi, em abaitalasam se heduigabaedi; eau eaubom ea mimia, eau hinage bena se unuigu." (1. Kings 19.10.) ⁴ Ia arinana Eaubada i heuio, i ene edoha? I ene, "Tatao tausani haligigi-labui ea abidi isi sora nige Baala nuanuana eai se turibono." (1. Kings 19.18.) ⁵ Hinage doha teina huia ta ainauia hinerina debana eai tupona gagirina mo se mia. ⁶ Ena ainauia debana eai se hineridi, abo nige laulau debana eai, ata ainauia nige ainauia mamohoina.

⁷ Abo edoha? Isaraela ginauri wa i eooi nige i lobai; tauhinehineridi se lobaiyao, na wau isi headi wa matadi se hegibudi. ⁸ Doha se uriyao si ene, "Eaubada mataeneno earuana i mosei aridi eai, matadi taba nige se ita, eo beadi taba nige se ataiei i laoma e huia ta." (Is. 29.10; Deu. 29.4.) ⁹ Na Davida hinage i ene, "Adi aiiai abo i hemala sa'i eo i hemala puru beubeu, eo edi aba-alabesibesi, eo edi abahemahemaisadi; ¹⁰ matadi abo se hegaugaudi isi taba nige se ita, eo huia gamagamagari dageladi abo u heporoudi." (Psa. 69.22-23.)

¹¹ Ea oimuri, ea ene, isi se alabesibesi, abo se guri esegai? nige ariariri! Na isi edi guri eai Murimuri-tataodi abo abihemauri se hearo; Isaraela abo se heaiaromagigiriedi. ¹² Teina edi guri ta tanoubu edi abalolo, eo edi heberuberu wa Murimuri-tataodi edi aba-lolo hinage: sora isi se heterouioidi abo se heloloaririedi.

¹³ Omi Murimuri-tataomiu ea ribalaowa arimiu eai, paana eau Etene edi aposotolo, egu paisoa ta ea hesae: ¹⁴ bena egu eanua tataodi egu abiabi eo iilagu eai abo ea headidiridi, isi headi abo se mauri. ¹⁵ Taba isi wa se tauotaotaedi, debadi eai tanoubu abo se laubiriei, ena se abiuioidi abo i hemala mate eai abahemauridi, e nige'e? ¹⁶ Ena elahouna se hetabuei, maudoina hinage se hetabuesegai; ena oegi lamna se hetabuei, abo laganayao hinage.

¹⁷ Ena laganayao headi se tagasi, eo oa, doha *olive* nuura, lagam se torehepatulaei boeadi eai, eo *olive* mamohoi wa lamna eo adidirina u abiesegai, ¹⁸ tabu hari laga aridi eai u ribapasipasiuioim. Na u ribapasipasiuioim wa, lamna oa nige u hetoro, lamna oa ede i hetorom. ¹⁹ Oa abo u ene, "Laganayao se hetagasidi bena se torehepatulaegu." ²⁰ Doha

ede, isi nige se nuatuwatai arinai ede se tagasi; oa, sunuma debana eai, u helaudamaidi. Tabu u ribatausaem, na u matausi mo. ²¹ Ena Eaubada laganayao mamohoi nige i nuahidi, u komakomanim, ata hinage oa nige i nuahim. ²² Hage Eaubada ena abilolo eo ena abi-ouyalayala u itadi; isi tauguri wa ena abi-ouyalayala i beudobima potadi eai; na oa, ena abilolo i laowa arim eai ena u miahai ena abilolo boeana eai: ena nige'e, oa abo se tomgabaem. ²³ Isi hinage ena edi awayagara eai nige se miatahitahi abo se tore-hepatudima, paana Guiau torehepatuuioidi abina ie ata. ²⁴ Ena oa, *olive* nuura eai i ini gaibu, se talahaim, eo nige em aba'ini mamohoi na se torehepatum *olive* lolona arinai, isi laganayao mamohoi wa, isibom edi *olive* boeana eai abo se torehepatuuioidi, e nige'e?

²⁵ Egu tataoyao e, riba esau nabada wa nige se heribamonihinihimiu tabu nuamiu se ponoponoai, ata omibom ami sanapu nige se lolo; ia ede ea ene Isaraela matadi se hegau-gaudi i lau e Murimuri-tataodi gamagamagari se lageohima. ²⁶ Arinai Isaraela se oihai abo se hemauidi. Doha uriuri tabuna eai si ene,

“Siona boeona eai Tauabihemauidi abo i tubuma,

Eaubada matausina nige se matausi, meta abo i duiei Iakobo arinai;”

²⁷ “na egu ribahesunuma aridi eai ede ina:

isi edi baaea abo ea laehesuaradi.”

(Is. 59.2-12; 27.9.)

²⁸ Evanelia arinai Iudea tataodi se hemala Eaubada ena waiunuyao omi debamiu eai; na Eaubada ena riba hinehineri eai, isi i gadosisiaririedi tamadiyao debadi eai.

²⁹ Paana Eaubada ena ainuia eo ena eogayogahai, taba nige nuana i bui. ³⁰ Doha hinage omi nabada wa Eaubada au awawayagaraei, na huia ta isi edi awayagara debana eai nuatoatoa au lobai; ³¹ isi hinage huia ta se awayagara, nuatoatoa enamiu wa debana eai, bena isi hinage nuatoatoa abo se lobai. ³² Paana isi gamagaridi i awa-tauawaawayagaraedi bena gamagaridi hinage abo i nuatoatoaheohidi.

³³ Eaubada ena sonoga eo ena nuatu sibasiba haedi edi abaohi! Ena nuatu dudurai taba nige esau i eooiheohi, ena laulau taba nige esau i italobai!

³⁴ “Guiau nuana, eai ie ita? Eo eai hinage ia i ribasagui?” (Is. 40.13-14.) ³⁵ “Eai ginauri esau i mosei Eaubada arinai bena maisana abo i abiuioi?” (Job 35.7; 41.11.) ³⁶ Paana ginauri gamagamagari se hetubudi ia enana, eo ia debana eai, eo ia arinai. Hedebasaena ia arinai, huia nige nosina. Amen.

12

¹ Egu tataoyao e, ea awanorilaowa arimiu eai Eaubada ena nuatoatoa arinai, taumiu ma aniodi au mosedi se hemala aitalasam maumaurina, aitalasam tabuna, Eaubada i henua-aririei, iaede emi heaheari abananabuena. ² Teina tanoubu ta edi laulau tabu au laulauwataidi, omi nuamiu au hehar-ihariudi abo au hemala udoi, Eaubada ena nuatu lolodi, eo saesaedi, eo lolodumadumadi omi abo au italobaidi.

³ Ainauia wa se leama arigu eai debana eai hari tau eo hari tau arimiu eai, ea ribalau aridi eai, ea ene tabu se ribatausaeuioidi, edi nuatu se nuatui komakomani, doha Eaubada sunuma nonoina i moseyao hari tau hari tau aridi eai. ⁴ Doha ita tauda esega mo, eo tauda eaudi se gamagari, eo eaudi adi paisoa udoi, udoi; ⁵ ita hinage ta gamagari, eo Keriso boeana eai tauda esega mo, eo hinage esau eo esau ta he-eauesegaida. ⁶ Hari ainauia, hari ainauia, se ledimao arida eai ina: ena peroveta, abo ta riba peroveta, eda sunuma gonogonoana; ⁷ e ena ta tanuaga, abo ta tanuaga komakomani; ia i lauheata, abo i lauheata komkomani; ⁸ e ia i riba hepaipai, abo i ribahepaipai komakomani; eo ia i aiainauia abo nuana eai i mose-esegai; ia i hesahesagu abo i abi ma-nuagigiborina.

⁹ Emi gadosisi, bena gadosisi mamohoi; ginauri i baaea au hewaiunuei; ginauri i lolo au patudidini arinai. ¹⁰ Au haigadosisiemiu doha omi boga esega tataomiuyao, helemiu tatao au heasisiedi, au hebagunadi. ¹¹ Ami paisoa arinai tabu au welawelai, nuamiu se gigibori, Guiau au heyaiei. ¹² Sunumamiu arinai au kode; se heamamnamiu, au nua-paipai; uura au uu'uura heneheneteawa. ¹³ Hetabu tataodi enadi au heonadi; au abiabitaumana i hemala emi laulau.

¹⁴ Isi se heamamnamiu au abiloloedi; au abiabiloloedi, tabu au ariarina-baaeaidi. ¹⁵ Isi taukodekode maemiu au kode esega, isi taudoudou maemiu au dou esega. ¹⁶ Ma nuaesegamiu au miataubiga, tabu au hetausaeuioimui, na tatao dobidobidi au italau aridi eai. Tabu omibom emi sanapu aridi eai au nuasaesae. (Prov. 3.7.) ¹⁷ Tau esau i hebaaeam, ena baaea tabu au hemaisa. Tatao gamagamagari matadi eai, ginauri duduraidi mo au nuatuidi, eo au abidi. (Prov. 3.4.) ¹⁸ Au aipate komakomani tatao gamagamagari gonoamiu au miaheboheboriedi ma-lonimiu. ¹⁹ Ehaguyao e, egu gadosisi arimiu eai, tabu ami gum au abi, emi ouyalayala se otawa, paana ede se uriyao si ene, "Guiiau i ene, eaubom mo gumgu abo ea abi, eau abo ea hemaisa." (Deu. 32.35.) ²⁰ Arinai ena ami waiunu i guriam, aiiai ana au mosei, ena i gadomagu goila au henom, arinai oegi mutuaridi alaalsidi au peigogoauri ia uru potana eai. (Prov. 25.21, 22.) ²¹ Baaea

tabu i saetawatawaemiu, na omi laulau lolo eai baaea au saetawatawai mo.

13

¹ Tatao gamagamagari, tau esau, tau esau, adi tanuaga bena se awaawaabiedi. Paana wasawasa gamagamagari edi awa-tanuaga Eaubada arinai i laoma: eda wasawasa huia ta, Eaubada i hetorodi. ² Tau esau eo tau esau edi tanuaga se gudugudui, Eaubada ena nuatu hinage se gudugudui: isi tauguduguidi wa isibom abo se hebaaeauioidi. ³ Paana tatao laulau-dudurai, isi tanuagadi nige se matausiedi, na tatao laulau-baaea mo tanuagadi se matausiedi. Am tanuaga abo nige u matausiei, wa? Besi em abiabi se lolo, ia abo nuana u helolo. ⁴ Ia Eaubada ena heaheari, bena i helolom. Na em laulau se baaea, abo u matausi; paana elepa nige i bahegaibui, ia Eaubada ena heaheari, ia taulaulau-baaea abo i hemaisadi. ⁵ Arinai ia abo ta awaabiei, maisana abo nige ta hearo, ta awaabiei hinage nua-abaheduduraina nuaboeda eai, debana eai. ⁶ Paana ede teina, omi hinage takisi au mosemosei, ina paisoa ta tauabina, isi hinage Eaubada ena heaheariyao. ⁷ Tatao gamagamagari enadi u hemaisadi: takisi au mosei takisi tauabidi aridi eai, eo * telo au mosei telo tauabidi aridi eai, eo heasisi tataodi au heasisiedi, eo hedebasae tataodi au hedebasaeidi.

⁸ Tabu tau esau arinai au abiabi haghaha, na au haigadosiemiu mo; ia helena-taumia i gadosisiei laugagaao i abiheohidio. ⁹ Laugagaao ede ina, tabu u ganaganawari, tau tabu u ai-unu, tabu u aiyahari, tabu u monumonunu gaibu, tabu ginauri au gado-lelehiedi, eo laugagaao gamagamagari laugagaao esega eai ta se abiesegaidi si ene: "Helem-taumia tauna u gadosisiei doha oabom u gadosisiuioim." ¹⁰ Gadosisi kamanina ede, helena-taumia nige i hebaaea, arinai ede ta ene gadosisi laugagaao i hemamohoiei.

¹¹ Ina riba ta abiwataidi paana au nuatui huiana i lage-mao bena au eno lautom, na au eno-toro. Paana abihe-maurida i hanahanauma, nige doha nabada wa, huia ne ta nuatuwatabagunai wa. ¹² Maiona nige eawalana abo i ohi, asubena i hanahanauma, ita masigiri abiabidi ta gabaedi, eo marana ena iala nimaabiana ta luidi. ¹³ Ta laulau-komani, doha asubena eai ta laulau, tabu ta aiaisom eo ta nomno-myauyaure, tabu ta matamatae'o eo ta aiiahewahewari, tabu ta lululu eo ta aiaiaromagigiri. ¹⁴ Na omi Guiau Iesu Keriso au lui, tabu buluma ena sorasora au mosei, ena gadosisi baaea tabu au lauwataidi.

* 13:7: customs maisana.

14

¹ Ia sunuma arinai i beruberu, au oiamiyama au awaehaei, na tabu bena au haiawayagara. ² Paana tau esau ena sunuma eai i ene ginauri gamagamagari abo i aidi, tau esau i beruberu, arinai sarai i dabudabu. ³ Tau ai ai wa taudabudabu tabu i isugaraei, eo taudabudabu wa tauai ai tabu i hegiru. Paana Eaubada ia tau wa i oiamiyama. ⁴ Oa eai tau esau ena tauheaheari u hetala? Ia ana tanuaga mamohoi matana eai i toro e i beu. Mamohoi abo se heterodidini, Eaubada ia heterona abina ie ata.

⁵ Tau esau i ene asubena esau i sae ariri, tau esau enaba asubena gamagamagari gonogonoadi mo. Tatao gamagamagaridi tau esau, eo tau esau, isibom edi nuatu se nuatudidini. ⁶ Ia asubena wa i hetabuei, Guiau arinai i hetabuei; ia asubena nige i hetabuei hinage Guiau arinai nige i hetabuei. Tauai ai Guiau arinai i ai ai paana Eaubada i lautoiei; tau dabudabu Guiau arinai i dabudabu, eo Eaubada hinage i lautoiei. ⁷ Paana nige tau esau arida eai iabom ena mauri i mauriei, eo nige tau esau iabom ena mate i matei. ⁸ Ena ta maumauri, Guiau arinai ta mauri; eo ena ta mamate, Guiau arinai ta mate. Arinai ta mauri, ta mate, ita Guiau enanayao. ⁹ Paana hesabana ede Keriso ie mate, eo i toro, eo i maurio tatao matematedi eo tatao maumauridi ia bena edi Guiau eai i lau.

¹⁰ Ue saha em tau u hegiru? Ue saha em tau u isuewaei? Paana ita gamagarida abo ta toro Keriso ena aba-lauhetala abababawana matana eai. ¹¹ Doha se uriyao si ene, “Guiiau ie riba, doha eau ma-maurigu ede, turidi gamagamagari abo se turibono nuanuagu eai, eo memenadi gamagamagari Eaubada abo se wasawasaei.” (Is. 45.32.) ¹² Ita gamagarida, tau esau eo tau esau, Eaubada arinai eda laulau abo ta wasawasaedi.

¹³ Arinai tabu ita ta haiheduduraiuioida, na teina eda abahedudurai mo ta nuatui, ita tabu aba-alabesibesi eo abaheduguri esau ta tore eda tau esau ena eda eai. ¹⁴ Ea nuatui, eo Guiau Iesu i henuatuigu, nige ginauri esau i bii gaibu; ia mo ena nuatu eai i ene ginauri ie bii, iaede arinai ie bii ede. ¹⁵ Na ena em tau am ai ai arinai u henuabaaea, meta nige gadosisi laulauna. Ia debana eai Keriso ie mate wa, am ai ai eai tabu u hebaaeae. ¹⁶ Em lolo tabu se awa-baaeaei, ¹⁷ paana ede Eaubada ena basileia ai ai nige’e, eo nomnom nige’e, na laulau-dudurai mo eo loni, eo kode Earua Tabuna boeana eai. ¹⁸ Ia teina ginauri ta aridi eai Keriso i heyaie i Eaubada ia i nualoloei, eo tatao hinage ia se awaloloei. ¹⁹ Loni abahetubuna abiabina ita hesabana ta laulau, eo ginauridi hinage aridi eai tatao ta hesibasibadi. ²⁰ Ai ai sabina Eaubada

ana paisoa tabu u hetatagorigori. Mamohoi ginauri gamagamagari se aa, ia mo tauaina ena i ene se baaea, ia arinai abo se hemala baaea. ²¹ I lolo sarai u otaotaei, eo waina hinage u otaotaei, eo laulau saha eo saha u otaotaedi, ata debadi eai em tau u healabesibesi, eo u heberuberu. ²² Sunusunumam oabom nuaboeam eai u abididini, Eaubada matana eai; tau wa i lolo ede ena ia nuana nige i hegiruuioi, ena abiabi e saha eo saha i aiaini, debadi eai. ²³ Na ia nuana i labulabui, ena i aiaini abo ana giru, paana sunuma mo debana eai nige i aiaini; laulau aisana eo aisana nige sunuma eai se tubuma, isi baaeadi ede.

15

¹ Ita ta adidiri, tatao beruberu edi megomego eai taba ta lebohaidi, eo itabom tabu ta nuatuuioida. ² Ita arida eai, esau eo esau, helena taumia taba i henualolo, ia wa i helolo abo i tubu hinage, sibasibana eai. ³ Paana Keriso iabom nige i henualolouioi, na doha se uriyao si ene, "Tatao se sagasagariem edi riba-sagasagari se beuma potagu eai." (Psa. 69.9.) ⁴ Paana uriuri gamagamagari nabada wa se uridio, se uridi eda abalaulauheata ede, ita uriuri tabudi edi henuabiga eo edi henuapaipai aridi eai eda sunuma abo ta lobai. ⁵ Nuapaipai eo nuabigabiga Eaubadana, ia abo i henuaesegaimiu au miataubiga doha hinage Keriso Iesu nuana; ⁶ omi ma nuamiu esega, eo ma awamiu esega, Eaubada bena au hedebasaei, ia ede eda Guiau Iesu Keriso ia Tamana.

⁷ Arinai omibom au hai-oiamiuioimiu, doha Keriso hinage ita i oiamida Eaubada ena hedebasae eai. ⁸ Na ea 'ne Iesu Keriso i hemala Isaraela tataodi edi heaheari, Eaubada ena riba mamohoina bena i hemasaraha eo ribahesunuma wa Tamadayao aridi eai, bena i riba-hemamohoi. ⁹ Eo Murimuritataodi hinage Eaubada bena se hedebasae ena nuatoatoa debana eai; doha se uriyao si ene, "Paana ede teina Murimuri-tataodi boeadi eai eau abo ea wasawasaem eo esam eai hinage abo ea wana." (Psa. 18.49.)

¹⁰ Hinage i ene, "Omi Murimuri-tataomiu e, ia ena tataoyao maemiu abo au kodeesega." (Deu. 32.43.)

¹¹ Hinage i ene, "Omi Murimuri-tataomiu e, Guiau au aihelahui; eo omi tatao gamagamagari, ia au hedebasaei." (Psa. 117.1.)

¹² Eo hinage Isaia i ene, "Iese arinai lamna esau abo i tubuma, ia abo se hetoro Murimuri-tataodi i tanugaedi, basileiadi ia abo se sunusunumaei." (Is. 11.1, 10.) ¹³ Eaubada, ia sunuma tauleamana wa, kode maudoina eo loni aridi eai abo i usahemonaumiu, emi sunusunuma aniona, arinai Earua Tabuna ena gígibori debana eai emi sunuma abo i tadada ariri.

¹⁴ Egu tataoyao e, arimiu eai nuagu i taru paana ea nuatui hinage omi lolo au monau boriboriri, hinage hea-
didiriuiomiu abina au atao. ¹⁵ Egu tataoyao e, taiede ea
uriuri adiadidiri ta arimiu eai, nuamiu bena abo ea hesaedi,
paana ainauia Eaubada i leama arigu eai wa, ¹⁶ arinai eau
ea hemala Iesu Keriso ena heaheari Murimuri-tataodi aridi
eai. Eaubada ena evanelia eai eau kohena abiabina abo ea
abiabini, Murimuri-tataodi edi aitalasam eai Eaubada abo
se henualolo, ia ede Earua Tabuna i hetabuei. ¹⁷ Keriso
Iesu boeana eai, agu paisoa Eaubada enana taba ea riba-
pasipasiei. ¹⁸ Na taba nige saha ea ribaei, meta mo Keriso eau
boeagu eai i ginauri, bena Murimuri-tataodi i heawaabidi,
riba eai eo laulau eai, ¹⁹ eo heiheinoidi gigigiboridi, eo
noonoodi, Earua Tabuna gigiborina eai, arinai Ierusalem
eai, i lau e Iliriko i hetaiiri sigasigana ede, Keriso ena evanelia
ea lauguguaiehoi. ²⁰ Taiede ea aipate bena evanelia ea
lauguguai nei dimodi eai ne Keriso esana sora nige se ataiei,
ata esau ena paa potana eai ea tarini. ²¹ Na doha se uriyao si
ene, "Tatao wa aridi eai ia wasana nige se duai, isi abo se ita;
eo sora nige se ataiei, abo se nuatui." (Is. 52.15.)

²² Hinage paana ede ma hisa se hemodegu, sora nige ea
laowa arimiu eai. ²³ Na teina tupo eai ta dimo gamagamagari
ea heohidio, hinage borimai gamagari egu gadosisi lailai
bena ea laowa arimiu eai. ²⁴ Sora ea lau Sipania abo hinage ea
laowa arimiu eai; ea henua ea itamiu, metai ma adaugu abo
egu dobila eai au hegerugu, na sora ta mia begana, egu amna
lolo arimiu eai ea abi. ²⁵ Abo ina ta ea dobi Ierusalem
eai hetabu tataodi ea heyaiedi. ²⁶ Maketonia eo Akaia tataodi,
ma nuaamnadi hetabu tataodi gogogesagesadi Ierusalem
eai se ainuiaidi. ²⁷ Mamohoi nuadi se amna, iaede adi
haga se hemaisa. Ena Murimuri-tataodi Iudea tataodi edi
earua ginaurina ainuiana tupona se abi, i lolo hinage isi
buluma ginauridi aridi eai se heyaiedi. ²⁸ Teina paisoa ta
ea abihehoi, eo edi ainuia wa wau tatao wa ea mosei aridi
eai, abotai egu lau Sipania, abo ea laowa. ²⁹ Ea nuatui ena
ea laowa arimiu eai, ea laowa Keriso ena ainuia lolona eai,
hemonauboriboririna eai.

³⁰ Na egu tataoyao e, ea awanorilaowa arimiu eai, ea ene
Guiau Iesu Keriso debana eai, eo Earua ena gadosisi hinage
debana eai, omi maeguyao au adidiri emi uura Eaubada
arinai, eau enagu. ³¹ Isi tauawaawayagara Iudea eai nimadi
eai bena se hemaugui, eo agu paisoa wa Ierusalem eai,
hetabu tataodi abo se abi ma nualolodi; ³² eau Eaubada ena
nuatu debana eai bena ea laowa makodegu, eau maemiu abo
ta aiyawasi, nuada se gougouai. ³³ Eaubada loni tauleamana,
omi gamagarimiu maemiu i mia. Amen.

16

¹ Ita louda Pibe enana ai ribahesibasibamiu, ia ekalesia Kenekerea eai tauheayaiedi; ² ia au oiamihai Guiau boeana eai, doha hetabu tataodi edi laulau, eo ana paisoa aisana aisana ia abo au sagusagui, paana ia tatao gamagamagari tau sagusaguidi ede, eo eau hinage i saguigu.

³ Perisika eo Akula, helegu taupaipaisoa Keriso boeana eai, ea aitoiedi; ⁴ egu mauri debana eai isi edi mauri se torehebiga, isi ea lautoiedi, hinage nige eaubom mo, Murimuri-tataodi edi ekalesia gamagamagari hinage se lautoiedi. ⁵ Hinage ekalesia isi edi numa eai wa, ea lautoiedi. Epaineto, ia ea gadosisiaririei ea aitoiei, ia Asia ealahouna Keriso arinai. ⁶ Maria hinage ea aitoiei, boeamiu eai i paisoa adidiri ariri. ⁷ Eo Anironiko, eo Iunia, egu eanua tataodi, ea lautoiedi, nabada wa se tutuguduesegaimai, isi aposotolo boeadi eai se sae ariri eo isi Keriso tauataiena bagubagunadi, huia ne eau soragu. ⁸ Amepelia, Guiau boeana eai ea gadosisiaririei, ea aitoiei. ⁹ Urobano, ada sagu Keriso boeana eai, ea aitoiei, eo Setaku hinage, ea gadosisie. ¹⁰ Apele ea aitoiei, Keriso ia i nualoloei. Aritobulo ena dodogayao ea lautoiedi. ¹¹ Eo egu eanua tauna Herodiona ea aitoiei. Isi Narikiso ena dodogayao Guiau boeana eai ea aitoiedi. ¹² Terupaina eo Teruposa isi Guiau arinai se paisoa adidiri, ea aitoiedi. Paresida, ea gadosisiaririei, ia Guiau ana paisoa taupaipaisoa adidiriena, ea lautoiei. ¹³ Rupo, Guiau ena tauhinehinerina esau, ma sinana, ia eau sinagu hinage, ea lautoiedi. ¹⁴ Asukirito eo Pelegona, eo Heremese, eo Pateroba, eo Heremasa, eo eda tataoyao isi maedi se miamiaesega wa, ea lautoiedi. ¹⁵ Pilogogo eo Iulia, eo Nerea, eo ia louna hinage, eo Olumepa, eo hetabu tataodi gamagamagari isi maedi se miamiaesega wa, ea lautoiedi. ¹⁶ Alagoi tabuna arinai au haiaitoiemiu. Keriso ena ekalesia gamagamagari omi se lautoiemiu.

¹⁷ Na egu tataoyao e, ea awanorilaowa arimiu eai, ea ene isi boeamiu eai se peilabuimiu eo se woeaponorimiu au itakomakomanidi; riba au ataieyao isi se laugudugudui: au otaotaedi. ¹⁸ Paana isi meta doha eda Guiau Iesu Keriso nige se heyaiei, isi bogadi mo se nuatuidi, edi riba amna eo edi ribapasipasi borabora arinai tatao supusupu se boraboraidi. ¹⁹ Omi emi awaabi tatao gamagamagari se nuatuiyao, arinai omi debamiu eai ea kode; egu nuatu ea ene bena lolo arinai au sonoga, na baaea arinai bena au supusupu. ²⁰ Eaubada loni tauleawana, nige eawalana Satani abo i ututawatawai aemiu ubudi eai. Eda Guiau Iesu Keriso ena ainauia arimiu eai i ota. Amen.

²¹ Timoteo, helegu- taupaisoa, eo Lukiso, eo Iasona, eo Sosipatela, egu eanua tataodi, se aitoiemiu.

²² Eau hinage, Teritio, teina leta tauurina ede, Guiau boeana eai ea lautoiemiu.

²³ Gaio, egu aba- aitaumana eo ekalesia gamagamagari edi aba- aitaumana, i lautoiemiu, eo Eraseto, eanua ta edi tobo tautawataina, eo Kwareto hinage, eda tau esau, se lautoiemiu. ²⁴ Eda Guiau Iesu Keriso ena ainauia omi gamagarimiu arimiu eai i ota. Amen.

²⁵ Ia arinai, henuapaipaimiu abina i ata, doha egu evanelia eai ea ribaei, eo Iesu Keriso ena laugugua ribana eai hinage, doha hinage laulau-eamuyamui se hemasarahamao, ia ede se toreyamui tanoubu ena abatubu eai wa, i laoma e huia ta. ²⁶ Huia mo ta se hemasarahayama eo peroveta edi uriuri eai, Eaubada mauri nige nosina ena laugagaeo eai, eanua gamagamagari abo se heatadi, sunuma awaabina eai abo ie tubu. ²⁷ Eaubada arinai, iabom i sonoga, Iesu Keriso debana eai ia se hedebasaei, i lau e ana huia, ana tasi. Amen. *

* **16:27:** Korinito eai Roma enadi se uri, Pibe nimana eai se hetamari, ia ekalesia Kenekerea edi heaheari sinena esau.

PAULO ENA URIURI BAGUBAGUNANA KORINITO TATAODI ENADI

*Tauawamamohoiena ena abatoro ainauia boeana eai.
Rom. 5.1-2; Ep. 1.3-14*

¹ Paulo, se eogahai Iesu Keriso ena aposotolo esau, Eaubada ena nuatu eai, eo eda tau Sosene.

² Eaubada ena Ekalesia Korinto eai, enadi, isi Keriso Iesu arinai se hetabuedi, hetabu tataodi se eogahaidi wa, isi hinage gamagaridi dimo gamagaridi eai Iesu Keriso eda Guiau esana tauatai, isi edi Guiau eo ita eda Guiau:

³ Ainauia omi arimiu eai, eo loni, Eaubada Tamada eo Guiau Iesu Keriso arinai i laoma.

⁴ Huia gamagari egu Eaubada ea lautoiei paana Eaubada ena ainauia se leawa, Keriso Iesu arinai, ⁵ ginauri gamagagari aridi eai ai arinai se helolomiu, riba gamagaridi eai, eo sonoga gamagaridi eai hinage— ⁶ doha Keriso ena riba se hemamohoei omi arimiu eai— ⁷ nige earua ainaiuana esau arinai se hedehamiu, eda Guiau Iesu Keriso ena hemasarahama au bagibagiei. ⁸ Ia abo i abididini miu i lau e sigasigana eai, eda Guiau Iesu Keriso ena asubena eai omi taba nige girumiu. ⁹ Eaubada ena abi se lolo, iaede se eogahaimiu au patulau ia Natuna eda Guiau Iesu Keriso heoiesegana arinai.

¹⁰ Ema tataoyao e, ea awanorimiu ta eda Guiau Iesu Keriso esana debana eai, riba esega au ribaribaei, omi tabu peimiu udoi udoi, na nuamiu eai au heoiesegaimiu, eo emi nuanuatu esega. ¹¹ Ehaguyao e, Keloe helena taumia tataodi wasamiu se heribagu, si ene au haihaiawayagarauioimiu.

¹² Omi arimiu eai esau i ene, “Eau Paulo pelena,” e “Eau Apolo enana,” e “Eau Kipasi ena pele,” e “Eau Keriso enana.”

¹³ Keriso se peiudoiei, wa? Paulo debamiu eai se hesatauro, wa? E Paulo esana debana eai se hebapatisoimiu? ¹⁴ Agu eamoisa omi nige ea hebapatisoimiu, na Kiripa eo Gaio isibom. ¹⁵ Ata headi edi nuatu si ene eaubom esagu eai ea hebapatisoimiu. ¹⁶ (Setepano ena numa tataodi hinage ea hebapatisoidi, taiede nuana nige arimiu eai tau esau ea hebapatisoi.) ¹⁷ Paana Keriso nige i hetamarigu bena ea hebahebapatiso, na evanelia mo bena ea guguai; hinage nige ribariba sonoga eai, ata Keriso ena satauro gigiborina aniona i tauyamui.

¹⁸ Paana satauro ribana isi taumatemate nuadi eai ginauri eauyaure, na ita taumaurio ta ene Eaubada ena gigibori ede.

¹⁹ Si uriyao si ene,

“Tatao sonoga edi sonoga abo ea hetatagorigoridi, eo tatao sibasiba edi sibasiba abo ea taugudui.” (Is. 29.14.)

²⁰ Tau sonoga ia haedi? Tauuriuri haedi? Teina tanoubu ribadi tau-ribaribaedi haedi isi ede? Tanoubu sonogana Eaubada matana eai i hemala eauyaure, e nige’e? ²¹ Tanoubu ena sonoga eai Eaubada nige se italobai, Eaubada ena sonoga meta; Eaubada i ene i lolo guguia eauyaurena debana eai isi tauataiena se mauri. ²² Paana Iudea tataodi heiheinoi se henua, eo Heleni tataodi sonoga se eooi, ²³ na ai Keriso se hesatauro ai guguai ede, Iudea tataodi edi aba-alabesibesi, eo Heleni tataodi si ene riba eauyaure. ²⁴ Na isi wa se eogahaidi, Iudea eo Heleni, iaede Keriso Eaubada ena gigibori, eo Eaubada ena sonoga. ²⁵ Paana Eaubada ena riba eauyaure tatao edi sonoga i saetawatawai, eo Eaubada ena beruberu tatao edi adidiri i saetawatawai.

Tauataatai Korinito, isi nige sonoga tataodi.

²⁶ Egu tataoyao e, se eogahaimiu wa hage au ita, tatao sonoga buluma sonogana eai gamagaridi nige se eogaidi, eo nige tatao adidiri-daoidi, nige wasawasa gamagaridi se eogaidi; ²⁷ na Eaubada teina tanoubu ginauri eauyauredi i hineridi, aridi eai sonoga i hetatagorigoridi, eo Eaubada teina tanoubu ginauri beruberudi i hineridi, aridi eai ginauri adidiri-daoidi i hetaumaeamaeadi. ²⁸ Teina tanoubu ginauri baaedi, eo ginauri se isugaraedi isi ede Eaubada i hineridi, eo ginauri sora nige se tubu ginauri miamiadi abo se helautomdi, ²⁹ arinai taba nige tau esau Eaubada matana eai i ribapasipasi. ³⁰ Emi mauri paana ede ia, Keriso Iesu boeana eai, ia Eaubada i abi i hemala eda sonoga, eda laulau-dudurai, aba-hetabuuioida eo abihemauri; ³¹ arinai doha se uriyao si ene, “Ia tauribapasipasi, taba Guiau mo i ribapasipasiei.” (Jer. 9.24; 2 Kor. 10.17.)

2

Riba Tabuna se hemasarahama nige tatao edi sonoga eai i laoma.

¹ Egu tataoyao e, nabada ea laowa wa, nige ea laowa ma mana-amnagu, eo egu riba nige se sonoga, Eaubada ena riba ea heriheribamiu. ² Paana nuagu i adidiri taba nige ginauri esau ea nuatui omi boeamiu eai, ginauri esega mo Iesu Keriso, eo ia se hesatauro. ³ Ea miamia arimiu eai wa ma-beruberugu, ma-matausigu, eo ma-tabutabubuaririgu. ⁴ Arinagu, eo egu guguia nige ma-ribaamnadi, doha tatao edi sonoga, na Earua aba hemasarahana mo, eo gigiborina eai, ⁵ bena emi sunuma taba nige i ota tatao edi sonoga eai, na Eaubada ena gigibori mo arinai.

⁶ Taiede taunuasibasiba aridi eai ema riba sonoga taba ai ribaei, tanoubu ta sonogana nige'e, eo tanoubu ta wasawasadi edi sonoga nige'e, isi abo se tauyamui. ⁷ Na ai Eaubada ena sonoga ai ribaei, ribayamuyamui eai, sonoga wa se toreyamui, iaede Eaubada i nuatuiyao, huia ne tanoubu sorana, ita eda abahedebasae. ⁸ Tanoubu wasawasadi nige esau ina abina se ata. Ena abina se ata namanamarina Guiauna taba nige se hesatauro.

Earua ribadi taba nige tau ena sonoga eai ta italobaidi, na Eaubada i hemasarahadio tatao headi aridi eai, isi nuadi se nonohao.

⁹ na doha se uriyao,

“Mata nige se ita, bea nige se ataiei,

tau nuana eai nige se nuanuatui,

ginauri wa Eaubada i abinonohaidio ia taugadosisiena enadi.” (Is. 64.4; 65.17.)

¹⁰ Na Eaubada ginauri wa ia Earuana arinai i hemasarahadima arida eai. Paana Earua ginauri i itasipoidi, mamohoi Eaubada ena ginauri gabogabotumdi hinage. ¹¹ Eai tau ena nuatu abidi i ata, na tau iabom mo earuana nuaboehana eai wa? Hinage doha nei Eaubada ena nuatu nige tau esau abidi i ata, na Eaubada Earuana iabom mo. ¹² Tanoubu earuana ita nige ta aabi, na Earuana Eaubada arinai i laoma mo ta aabi; ginauri gamagamagari arinai Eaubada i aiainauianapaida, ita bena abidi ta ata. ¹³ Ginauri wa riba arinai ai ribaedi, nige tatao edi sonoga eai aie abi, na Earua ede i heatamai, ena nuatu mamohoi i hemasarahadima isi Earua tauabina aridi eai.

¹⁴ Na tau buluma dobilana eai sorana Eaubada ena earua ginauridi taba nige i abidi, ia i ene ginauri eauiyau: ta ene nige abidi i ata paana earuada eai mo se masamasaraha.

¹⁵ Na ia earua ribana nuana eai, ginauri gamagaridi i nuatuheduduraidi, ia mo taba nige tau esau i hedudurai.

¹⁶ “Guiiau nuana, eai i nuatulobai, ia bena i lauheata?” (Is. 40.13; Rom. 11.34.) Na ita Keriso nuana ta abi.

3

Buluma miamiana earuada edi tubu i gudugudui.

¹ Na, egu tataoyao e, eau taba nige ea ribalaowa arimiu eai doha omi earuamui eai tauataiena, na ea ribalaowa doha omi buluma dobilana eai au laulau, doha omi kaimou mo Keriso arinai. ² Susu mo ea henommiu, aiai mamohoi nige ea leawa, paana nabada wa nige gonoamui au ai, huia ta hinage soramui. ³ Paana omi buluma dobilana eai ma laulaumui. Arimiu eai aiaromagigiri eo lulu, eo peimui udoi udoi, iaede omi buluma dobilana eai au laulau, eo emi laulau doha tatao kamanidi, e nige'e? ⁴ Esau i ene, “Eau Paulo ena pele,” eo esau

i ene, “Eau Apolo ena pele,” omi sora buluma eai au laulau, e nige’e?

⁵ Paulo ne eai? Eo Apolo eai? Isi tauheaheri mo, debadi eai au ataiwatai wa, doha Guiau i mosei hari tau enana, hari tau enana. ⁶ Eau ea uuma, Apolo goila eai i he’ini, na Eaubada aniona i mosei. ⁷ Tau umaina nige ta nuatui, eo goila eai tauhe’inina nige ta nuatui, na Eaubada mo aniona taumosemoseina. ⁸ Tauumaina eo goila tauhe’inina gonogonoadi, esau, esau ana paisoa maisana abo i abi, ana paisoa nonoina debana eai. ⁹ Eaubada ena taupaisoa ita, maeda ta paipaisoa; omi Eaubada ena oea se umai, omi Eaubada ena numa i heteromiu.

¹⁰ Eaubada ena ainauia se leama arigu eai, debana eai eau doha numa tauabina tausonoga, numa paana eau ea totore, potana eai tau esau abo i abinuma. Tau esau, tau esau, bena i ita komakomani, edohana paa ta potana eai ena abiabinuma. ¹¹ Taba nige tau esau paana udoi i tore, paana wa se toreyao iaede Iesu Keriso.

Paipaisoa adi ao labui, eo uauadi.

¹² Teina paana eai taba tau esau ginauri i tarini, *gold* e *silver*; e we’u maisa lailaidi, e oegi, e lei, e wenu— ¹³ tatao gamagamagari esau, esau, ana paisoa abo se hemasaraha, Asubenana wa abo i hemasaraha paana oegi alaalasina eai abo i masaraha, alaalasina wa tatao gamagamagari adi paisoa abo i lauita i peikomakomani, i lolo e i baaea. ¹⁴ Ena tau esau ana paisoa i miatahitahi, wau paana eai i tarini wa, ia ainauia abo i abi. ¹⁵ Ena tau esau ana paisoa se gabu, enana wa abo i tauyamui, iabom mo abo i mauri, na doha oegi alaalasina eai se hemaui.

¹⁶ Omi abina nige au ata, omi Eaubada ena numa tabuna, eo Earua Tabuna i miamia nuaboeamui eai? ¹⁷ Ena tau esau Eaubada ena numa tabuna i hebaaea, Eaubada abo ia i hebaaea hinage, paana Eaubada ena numa tabuna se hetabuei, numana wa iaede omi.

¹⁸ Tabu tau esau iabom i borauioi. Ena tau esau arimui eai i ene tanoubu sonogana ie abi, ia taba i hemala eayuaure, ena bena abo i sonoga mamohoi. ¹⁹ Paana ede teina tanoubu ta sonogana eaubada matana eai eayuaure. Doha se uriyao si ene, “Tatao sonoga i toaidi edi sanapu eai,” ²⁰ eo hinage, “Guiau tatao sonoga edi nuatu abidi i atao, nige aniodi.” (Psa. 94.11.) ²¹ Arinai tabu esau ena aba ribapasipasi tatao mo. Ginauri gamagaridi omi enamui, ²² ena Paulo, e Apolo, e Kipasi, e tanoubu, e mauri, e mate, e teina isi ta ginauridi, e ginauri maraitom-asubena abo se tubu: ginauri gamagaridi omi enamui ede; ²³ eo omi Keriso enana, eo Keriso Eaubada enana.

4

¹ Tatao taba se nuatuimai doha ina: ai Keriso ena hea-heari tataomai, Eaubada ena ribayamuyamui tauitawataidi. ² Hinage tautaitawata ena se hetorodi, ginauri bagubaguna ede isi bena abidudurai tataodi. ³ Na eau mo ena au itasipoigu, e ena tatao se lauhetalaigu meta i gagiri. Eamoisa eaubom nige ea lauhetalauioigu. ⁴ Nuagu eai egu beruberu aisana nige ea nuatui, taiede nige ea ene ea dudurai. Tautasipoigu ede Guiau. ⁵ Arinai tabu au hekirainomaodai, sora Guiau ena huia uioma eai ginauri masimasigiri se miyamuyamui, abo i hemasarahadi, eo tatao edi nuatu hinage abo i hemasarahadi. Abotai hari tau, hari tau, Eaubada abo i hedebasaei, ena laulau debadi eai.

⁶ Egu tataoyao e, teina ta ea uriuriwa, ea hepatu bagunai eaubogu arigu eai, eo Apolo arinai, omi debamui eai; bena miamia doha uriuri tabudi eai se heatada, au italobaidi arimai eai, eo au lauwateraidi, bena tabu tatao au ribatausaedi, eo pele esau, e pele esau, au ribatausaedi. ⁷ Eai i hetorom i ene oa mo udoi? Saha ue abi na nige se leawa? Na ena se leawa edohana u ribapasiasiei, doha nige se ainaiuim?

⁸ Omi gamagarimui au monauo! Monamonaune tataomui omi! Ai nige'e na au hemala wasawasa! Au awa-tanuaga i lolo meta, bena ai hinage ai patulaowa emi awa-tanuaga arinai! ⁹ Eau ea ene nuana Eaubada ai aposotolo i hetoromuritaaririemai, doha tatao se ribahematedio; ai hemala tanoubu tataodi edi abaaiewa, aneru enadi hinage. ¹⁰ Keriso debana eai ai ai eaure, omi Keriso boeana eai au sonoga. Ai beruberu, na omi au adidiri. Omi se heasisiemui, ai mo se isugaraemai. ¹¹ I laoma e ina mahana eai ta ai guriam eo gadomai se magu, nige ema lulu, eo se oihehearimai, eo nige ema abamia, ¹² eo ai paisoa, nimamai eai ai paipaisoa. Se riba hebaaeamai, ai riba helolo; se heamamnamai ai nuapaipai mo; ¹³ wasamai se hebaaea, ai aipate ai ribahedudurai; ai hemala tanoubu ena wenu biibiina, ginauri gamagaridi edi pupuro baaeana, i laoma e teina asubena eai ta.

¹⁴ Teina ta nige ea uriuri arimui eai bena ea hetaumaeamaemui, na paana omi doha nanatuguyao, ea gadosisiemui, arinai ea ribahesanapuemui. ¹⁵ Hage ena tauheatamui Keriso arinai tausani saudoudoi, taba nige tamamiuyao se gamagari. Eau tauhetubumui Keriso Iesu boeana eai, evanelia ta arinai. ¹⁶ Arinai ea awanorilaowa arimui eai, bena au lauwateriguma. ¹⁷ Paana ede ina Timoteo ea hetamariyawa, ia natu-eogoyogoigu ede, Guiau arinai ena abi se lolo, egu laulau Keriso miamiana eai abo i henuaisinimui, doha dimo gamagamagari eai ea laulauheata, dubu gamagamagari eai. ¹⁸ Headi se nuasaesae, doha si ene taba nige ea

laowa. ¹⁹ Na abo ea laowa, nige baeana, ena Guiau ena nuatu doha nei, abo tatao ea yaure wa edi riba taba nige ea ataiei, na edi gigibori mo abo ea lauita. ²⁰ Eaubada ena basileia nige ribariba eai, na gigibori ede. ²¹ Omi edohamiu? Abo ea laowa ma-nimapidipidirigu, e gadosisi eai, eo ma nuabigabigagu?

5

Laulau bii ribasuuina: baeana nige se hedudurai, arinai biribiri se tubu ekalesia boeadi eai.

¹ Riba lailai ai ataiei, si ene omi arimiu eai tatao headi se laulau bii, hinage laulau wa doha Etene aridi eai taba nige se abi, si ene tau esau tamana monena ie abi. ² Na omi au ribaribasipasi wa! Ie saha nige au doudou? Tau wa boeamiu eai laulau ta ie abi, au torehesuara.

³ Mamohoi, eau taugu i miasuaraemiu, earuagu mo omi boeamiu eai tau wa laulau wa ie abi, ea hekirainoyao, doha eau maemiu, ⁴ eda Guiau Iesu Keriso esana eai. Ena au oigogo, earuagu maemiu eda Guiau Iesu gigiborina eai, ⁵ tau wa au mosegabaei Satani arinai, bulumana hebaeana eai, bena earuana abo i mauri Guiau Iesu ena asubena eai.

⁶ Emi ribapasipasi nige i lolo. Nige au nuatui * obue begana mo falawa wa abo i sese-heohi? ⁷ Obue beabeana au heagabaei, omi bena falawa harihariuna, doha nige obuena. Paana Keriso, eda pasova mamona, ia se heaitalasyao enada. ⁸ Arinai mataasi wa ta abididini, obue beabeana eai nige'e, eo obue ouoyalayalana eai, eo laulau baeana eai nige'e, na falawa aana eai, nige se heobuei, aomamohoi eo riba mamohoi falawana.

⁹ Nabada ea uriyawa enamiu wa, ea ene tatao laulau biibii aridi eai tabu au heoiesegaimiu; ¹⁰ nige tanoubu ta taulaulaubii ea ribaedi, eo tatao aiaigirihai, eo tauaiyahari eo eaubada borabora tauaihelahuidi, ata doha nei abo tanoubu bena au laugabaei. ¹¹ Na ea uriuri wa ea ene ena emi pele tauna esau au awa-emi-tau, ia tau laulau bii, e tau aiaigirihai, e eaubada borabora tauaihelahuina, e taudiladilagaibu, e tau nomnom-ea yaure, e tauaiyahari: esau doha meta arinai tabu au bawa-esega, e au ai esega. ¹² Isi ganamuri tataodi saha ea hekirainodi? Omi ganaalo eai mo au hekirainouioimiu, e nige'e? ¹³ Isi ganamurimuri eai Eaubada i hekirainodi. Arinai tau baeana wa boeamiu eai au torehesuara murimuri eai.

* 5:6: Yeast.

6

Ekalesia tataodi taba nige koti eai heledi ekalesia se lauhetala.

¹ Ena esau boeamiu eai maena tauataiena esau se hai-awayagara, abo au lau tau gaibu matana eai bena i heduduraimiu? Abo au lau hetabu tataodi mo matadi eai, e nige'e?

² Au nuatui, e, nige'e, hetabu tataodi tanoubu abo se hedudurai? Ena omi abo tanoubu tauheduduraina, edoha ginauri gagiridi heduduraidi abina nige au ata? ³ Au nuatui, ita aneru hinage abo ta heduduraidi, e nige'e? Taba doha nei, teina mauri ta ginauridi isi mo taba abidi ta ata ariri ta heduduraidi. ⁴ Teina mauri ta ginauridi ena abidi ta ata ta heduduraidi, paana saha abo isi dubu eai nige begana se sunumaedi, isi ede au hetorodi tauheduduraimiu? ⁵ Riba ta debana eai bena au taumaeamaea. Mamohoi nige tau sonoga esau arimiu eai? Nige esega ena tataoyao hekirainodi abina i ata, ⁶ arinai eda pele tauna esau ena tau i laei laugaga eo abaheduduraina numana eai, eo tatao isi nige tauawaabi matadi eai?

⁷⁻⁸ Au laulauhetala laugaga eo numana eai, emi baaea meta, arinai ea hegirumiu. Ena se hebaeamiu paana saha nige au nuapaipai mo? Eo ena se boraimiu taiede, i otawa. Na omi au hebahebaea, eo au abiabi gaibu, eo emi tataoyao mamohoi ede au hebahebaeadi.

Tauda ginauri tabuna: (1) Paana se heaao, se heduduraiyao.

⁹ Au nuatui e nige'e, tatao edi laulau nige se dudurai taba nige se lusora Eaubada ena basileia eai? Tabu se boraimiu; tatao laulau-bii, eo tatao eaubada borabora se aihelahuidi, eo tatao ganaganawari, eo tatao laulau gewagewadi, eo tatao ma heledi tatao se hebaeaeuioidi, ¹⁰ eo tatao aiayahari, eo hari tatao edi ginauri taugadosisiedi, eo tatao nomnomdao, eo tatao siosiololodi, eo tatao aiaigirihaidi, taba nige edi tupo se abi Eaubada ena basileia eai. ¹¹ Nabada omi heamiu doha meta. Na se heduimiuo, se hetabuemiuo, omi Guiiau Iesu Keriso esana eai se heduduraimiu, eo eda Eaubada ena Earua arinai.

¹² Ginauri gamagamagari arigu eai se lolo, nige laugaga eodi, ia mo ginauri gamagamagari nige se helologu. Ginauri gamagamagari se lolo laugaga eo eai, ia mo nige ea henua ginauri esa i tanuagaegu.

Tauda tabuna: (2) Paana Guiiau enana.

¹³ Aiai ede boga ana, eo boga aiai enana, na Eaubada abo i hetatagorigorilabulabuiedi. Tauda nige se hetubu laulau bii enana: se hetubu Eaubada enana, Guiiau hinage ita tauda enana. ¹⁴ Eaubada Guiiau i hetorouioi ia ena gigibori eai,

abo hinage i hetorouioida. ¹⁵ Au nuatui, e nige'e, taumiu isi ede Keriso eaunayao? Keriso eaunayao abo ea abidi ea hepatulaedi sine baaea arinai wa? Eaubada enaba nige'e! ¹⁶ Hede saha? Au nuatui, e nige'e, ia i hepatuui oi sine baaea arinai, maena se hemala taudi esega? Doha se uriyao, "Taudi labui se hemala buluma esega." ¹⁷ Na ia i patulau Guiau arinai, maena se hemala Earua esega. ¹⁸ Laulau bii au dagoei. Baaea udoi udoi tau i ginauridi, ede tauna murimurina eai; na laulau bii tauabina iabom tauna i hebaaeuioi.

Tauda Tabuna: (3) Paana numa tabuna ede.

¹⁹ Edohana? Au nuatui, e nige'e taumiu ede Earua Tabuna ena numa tabuna, ia boeamiu eai ie mia, Eaubada arinai aue abi. Omi omibom enamiu nige'e; ²⁰ maisana eai se uneuneimiuo. Arinai Eaubada taumiu eai au hedebasaei, eo earuamiu eai, isi ede Eaubada enana.

7

Tauda tabuna: (4) Paana Eaubada tawasora i hetubu.

¹ Riba wa emi leta eai au uriyama wa; ea ene i lolo ena tau nige i abilau sine arinai. ² Na taiede ata tau noho i hearo laulau bii i laulauei, arinai taba tau esa monena i abi, eo sine esa monena i abi. ³ Tau monena bena i heasisiei, eo i ainaui ai: sine hinage doha, monena arinai. ⁴ Sine iabom tauna nige i tanuagaei, tau wa monena tanuagana ede; eo hinage tau iabom tauna nige i tanuagaei, na sine wa monena tanuagana ede. ⁵ Tabu au hainuanuahiuioimiu; taba nuamiu esega au miasuara bena au aiudi eo au uura, i lolo abotai au miaesegauio, ata Satani i nohoimiu. ⁶ Na ina eau egu eari eai mo ea riba, nige se lauhesomgu. ⁷ Egu gadosisi ea ene taba tatao gamagaridi doha eau. Na, tau esau, tau esau, iabom ena ainauia i abi, Eaubada arinai i laoma, esau doha ina, esau doha nei.

⁸ Isi nige se tawasora, eo wabuwabu, aridi eai ea ene se lolo ena se mia-esegaidi, doha hinage eau. ⁹ Na ena nige gonoadi, taba se tawasora. Se tawasora i lolo, lelelelehidi eai se alasi mo i baaea.

¹⁰ Tautawasora ea lauhesomdi, hinage eau mo nige'e, Guiau i lauhesomdi: sine tabu monena i laugabaei. ¹¹ (na ena i laugabaei tabu i tawasoraui o, i lolo mo taba ma monena se laubiri) eo tau tabu monena i inawasei.

¹² Na isi headi aridi eai eaubom enadi ea riba, Guiau nige'e: ena eda tau esau monena nige i nuabui, ia mo ie eari bena se mia esega, tabu i torehesuara. ¹³ Eo sine hinage, ena monena ia nige tausunuma, ia mo ie eari bena se mia esega, tabu i laugabaei. ¹⁴ Paana sine wa monena nige tausunuma, monena abo i hetabuei; eo tau wa monena nige tausunuma, monena

abo i hetabuei, ena nige'e abo nanatumiuyao mabiidi, na ia mo isi tau-tabuna. ¹⁵ Na wau tau e sine nige se ataiwatai wa, ena i henua i lausuara, taiede i lau; se abi doha ina eda tau, e louda, isi nige maauaudi. Na Eaubada loni arinai i eogaida. ¹⁶ Sine e, u nuatui, monem ata u hemaui e nige'e? Tau e, u nuatui, monem ata u hemaui hinage, wa?

¹⁷ Doha Eaubada tatao gamagaridi esau to esau i mosedi eo doha Eaubada esau to esau i eogahaidi, iaede meta ena miamia, bena i lauwaterai. Ekalesia gamagamagari ea lauh-esomdi doha meta. ¹⁸ Tau esau edi huia eogahaina eai wa, ia tauperitome, tabu bena i peritome lautom. Esau edi huia eogahaina eai nige i peritome, tabu ia se heperitome. ¹⁹ Peritome, e nige se heperitome, nige aniodi, na Eaubada ena laugagaao sogohina mo. ²⁰ Tau esa tau esa, se eogai wa, ana paisoa saha, paipaisoa wa arinai i miatahitahi. ²¹ Oa tauauaum se eogaim wa? Tabu nuam se baaea. Taiede ena em dobila i masaraha bena se iairihaim, i lolo. ²² Paana tauauau Guiau arinai se eogai, ia Guiau ena tauiairihai. Hinage doha tau esau se iairio na se eogai, ia Keriso ena tauauau esau. ²³ Omi maisana eai se uneuneimiuo; tabu au hemala tatao edi heaheari-tauauau. ²⁴ Arinai, egu tataoyao e, tau esau, tau esau, ena aba toro huia eogaina eai wa, arinai taba i toro esega, Eaubada maena.

²⁵ Isi nige se tawasora wa, Guiau ena laugagaao nige i leama isi enadi, eau egu nuatu mo ea heribamui, doha eau Guiau ena nuatoatoa eai ea toroesegaigu ta, arinai ede ea ririba. ²⁶ Huia ta baaea ta hearo, arinai nuana i lolo tau esau, esau, ena dobila esegana i lauwaterai. ²⁷ Monem arinai se auauim? Tabu bena se iairim. Monem arinai se iairimo? Tabu tawasora u eouioi. ²⁸ Ena au tawasora, nige au baaea. Ena siu i tawasora, hinage nige i baaea. Taiede isi tautawasora tanoubu eai ta abo amamna se hearodi, arinai bena ea woeoimiu. ²⁹ Egu tataoyao e, egu riba ede teina, huia wa i kuu ariri, isi monediyao tauabidi nige baaeona abo doha monediyao nige'e. ³⁰ Isi taudoudou hinage doha isi nige se doudou; isi taukodekode doha isi nige se kode; isi tau uneune doha isi nige edi gogo. ³¹ Isi tanoubu eai ta se laulau, tabu arinai se mode, paana tanoubu kamanidi abo se tauyamui.

³² Na ea henua bena omi tabu emi mode. Ia nige i tawasora Guiau ena ginauri i nuatuidi, ena nuatu bena Guiau nuana i helolo. ³³ Na ia tautawasora tanoubu ta ginauridi i nanabuedi, bena monena nuana abo i helolo, ³⁴ arinai abo nuana i labulabui. Na sine nige i tawasora, eo siu-nuanu-asupuna, Guiau ena ginauri mo i nanabuedi bena tauna eo earuana eai i hetabuioi; na ena i tawasora, abotai ena mode bagubaguna monena arinai, bena nuana i helolo. ³⁵ Riba ta ea

ribaei bena ea saguimiu, nige bena ea healabesibesimiu, na bena nuamiu se lau Guiau arinai, au heesegaimiu, taba nige hari tupo eai au mode.

³⁶ Na ena tau esau ena nuatu i ene siu enana se ribahe-sunumaei, nige i lolo i miahai, eo taba ena borimai ie lau eo i ene i lolo bena i tawasora, besi ena nuatu i lauwtai mo, nige i abi baaea ena taba i tawasora. ³⁷ Na ia nuana i adidiri i toroesegai, nige i lelehi eo ena nuatu abina i ata i tanuagaei, eo nuana eai i nuatuiyao ena mia-gologolowa i laelaei, ia mo i lolo ede. ³⁸ Arinai ta ene ia i tawasora i abi lolo, na ia nige i tawasora i abi lolo ariri.

³⁹ Sine i tawasora, monena mamiana ia se auau, monena i lautom abo se iairihai. Ena i henua taba i tawasoraui, Guiau boeana eai mo. ⁴⁰ Na eau egu nuatu ea 'ne ena i miahai abo i kode ariri ede. Nuana Eaubada Earuana eau hinage arigu eai.

8

Aiai eo aiaidabu: ekalesia ena iairihai ma-heasisina.

¹ Ginauri se heaitalasangdi oitau aridi eai ribana ta nuatui, gamagarida ta sibasibao. (Sibasiba i henuasaesaeda, gadosisi mo i heatada ede.) ² Ena esau i ene i sibasibao, i lolo taba abina i ata ia sonoga mamohoina sora nige i abi. ³ Na ena tau Eaubada i gadosisie, Eaubada ia wa abina i ata.

⁴ Wau aiai se heaitalasangdi oitau aridi eai wa ribana: ta nuatuiyao oitau nige ginauri maumaurina, tanoubu eai ta, eo eaubada headi nige'e, esegana mo. ⁵ Se ribaedi mo eaubada, galewa eai e tanoubu eai (doha eaubada se gamagari, eo guiau se gamagari), ⁶ na ita arida eai Eaubada esegana mo, iaede Tamana, ia arinai ginauri gamagaridi se laoma, eo ita ia debana eai ta maumauri, eo eda Guiau Iesu Keriso esegana, debana eai ginauri gamagaridi se tubuma, eo ita hinage ia boeana eai.

⁷ Au nuatui tatao maudoidi sonoga ta nige se abi. Headi oitau miamiana se manasaei, aiai wa se ai doha aiai se moseyao oitau, se aiaini ede; edi nuatu abaheduduraina nuaboeadi eai i beruberu, arinai se hebii. ⁸ Na buluma aiaina taba nige i heteroda Eaubada arinai. Ena ta ai taba nige ta lolo, ena nige ta ai taba nige ta baaea. ⁹ Omi mo au ita komakomanimiu, ata ina emi iairihai ta i hemala abalabesibesi tauberuberu aridi eai. ¹⁰ Paana taba tau esau i itam, oa tau sibasibana, oitau ena dubu eai u bawa u aiai, abo wau tau beruberuna wa ena nuatu-abaheduduraina nuaboeana eai abo u hesom e nige'e, bena ginauri se heleleyao oitau arinai ia abo i aidi? ¹¹ Doha ina oa em nua-sibasiba debana eai em tau beruberuna abo i baaea, ia wa debana eai Keriso ie mate. ¹² Arinai em tataoyao abo u hebaeadi, eo

nuatu-abaheduduraina nuaboeadi eai ma-beruberuna, ena u hebaaea, iaede Keriso hinage u hebaaea. ¹³ Arinai ede ena buluma aiaina eai egu tau ea hebeu, besi taba nige buluma ea ai, tanoubu ta mamiana eai, ata egu tau ea hebeu.

9

Paulo ena awa-aposotolo i riba-hemamohoei.

Gal. 1.11-2.14

¹ Eau aposotolo e nige'e? E eau nige iairihai tauna? Iesu eda Guiau eau ea itayao, e nige'e? Omi agu paisoa ede, Guiau boeana eai, e nige'e? ² Hari tatao aridi eai ata bena eau nige aposotolo, omi arimiu eai mo eau ede, paana omi egu aposotolo leleana ede Guiau boeana eai.

³ Egu heuio isi tau lauitagu aridi eai ede ina: ⁴ abo ai mo taba nige i dudurai ena ai ai ai eo ai nomnom? ⁵ Ai mo taba nige monemaiyao, loudayao headi, ai woeauseidi, doha aposotolo headi, doha Guiau ena tataoyao mamohoi, doha Kipasi? ⁶ E maegu Banaba aibom mo taba nige ama ai ai dobilana paisoana ai torehesuara? ⁷ Aisega tau ie lau i iala, ena lau wa iabom i hemaisa? Aisega tau vine oeana i umai, uauana taba nige i ai? E aisega tau ena goti eawoina i suidi, susu taba nige i nom?

⁸ Ina ginauri ta ea ribaedi doha tau mo ena riba wa? Laugagaeo eai se ribaei doha, e nige'e? ⁹ Paana Mose ena laugagaeo eai se uriyao, "Bulumakau sitona i utuutui awana tabu au suma." Eaubada bulumakau i nanabuedi? ¹⁰ E ie riba ita gamagarida debada eai? Ata debada eai se uri ina, bena tano taugiari ma sunusunumana i giagiari, eo sitona tau-utuutuina ena sunusunuma ede ana tupona abo i abi. ¹¹ Ena earua ena gogo enamiu ai hesuruyao, au ene ginauri lailai ariri taba ena emi tanoubu gogona tupona ai abi? ¹² Ena headi si ene gonoadi arimiu eai se abi doha ina, nuana ai mo gonoamai ariri ede.

Taiede ema tupo ta nige aie abi, na ai abihokuu mo, paana ai ene ata Keriso ena evanelia dobilana ai hepiripiri. ¹³ Au nuatui e nige'e, isi dubu eai taupaisoa adi ai ai abo dubu eai wa se abi? Eo aba-aitalasang edi heaheari tataodi adi ai ai aba-aitalasang eai abo se abi? ¹⁴ Arinai ede Guiau i ribao, aidimodi evanelia se gugui ai, isi adi ai ai dobilana evanelia arinai abo se lobai.

¹⁵ Ia mo dobila ta eau nige ea abiwatai, eo riba ta nige ea uri bena arigu eai au abi doha ina. Taba besi ea mate mo, ena esau egu aba ribapasipasi ta i abihai. ¹⁶ Egu ribapasipasi nige paana evanelia ta ea gugui ai. Porohe lailai meta, eau nuagu eai i duduigu, agutoi ahani eau, ena taba evanelia ta nige ea gugui ai! ¹⁷ Ena nuagu i eari paisoa ta ea ginauri, maisagu

meta; ena nige ea eari, eau doha heaheari tauna paisoa se tore mo nimana eai. ¹⁸ Egu maisa wa saha? Iaede ina: ena ea gugua, Keriso ena evanelia abo ea hemasarahauri, nige maisana, arinai ede wau egu dohila saha wa, taba nige ea nuatui, evanelia debana eai.

¹⁹ Nige tau esau i tanuagaegu, ia mo ea moseuioigu tatao gamagaridi edi heaheari eai ea lau, bena headi ea toaidi. ²⁰ Iudea aridi eai ea hemala doha Iudea, bena Iudea ea abidi; isi laugagaeo boeana eai se laulau, aridi eai ea hemala doha isi, bena laugagaeo tataodi ea abidi. ²¹ Isi laugagaeo tau-miamurimuriena aridi eai ea hemala ganamuri, bena laugagaeo tau-miamurimuriena ea abidi (ia mo eau Keriso ena laugagaeo boeana eai ea laulau, nige Eaubada ena laugagaeo murimurina eai). ²² Tatao beruberu aridi eai ea hemala tauberuberu, bena tauberuberu ea abidi. Ea hemala agu ao udoi udoi, tatao udoi udoi aridi eai, bena dohila udoi udoi aridi eai headi ea hemauidi. ²³ Ina doha ea abi evanelia debana eai, bena eau maidamiu egu tupo hinage abo ea lobai, evanelia boeana eai.

²⁴ Au nuatui, e nige'e, hailako eai gamagaridi se aitauteu, na tau esega mo ainaiuana abo i abi. ²⁵ Tau esau ena i aiapate bena i baguna, laulau gamagaridi i nanabuedi, tauna i heasisiei. Isi se abi doha ina bena korona posaposana se abi, ita mo korona taba nige i posa. ²⁶ Arinai ede ea tau esegai, nige ea aitauteu gaibu; ea iala, nige doha nimagu eai ea oiogaibu; ²⁷ taugu ea hepaipai eo ea tanuagaei, ata hari tatao aridi eai ea gugua, na eau mo abo se torehesuaragu.

10

Isaraela barabara eai: tautauna i ribahesanapueda.

¹ Egu tataoyao e, nige ea henua ginauri ta au supusupuei, ita tamadayao gamagaridi eada wa ubuna eai se laulau, eo gabogabo boeana eai se awasi, ² eo Mose arinai gamagaridi se hebapatisoidi, eada boeana eai eo gabogabo boeana eai, ³ eo gamagaridi earua esegana aiaina se ai ⁴ eo earua esegana nomnomna se nom. Paana earua We'una arinai se nom, eo i hemuriwataidi. We'una wa iaede Keriso. ⁵ Taiede gamagaridi aridi eai Eaubada nuana nige i lolo; arinai barabara eai se baaea eo se mate.

⁶ Teina ginauri ta ita eda aba italau ede, bena ita tabu nuada eai ginauri baabaeadi ta lelehiedi, doha isi se lelehiedi. ⁷ Bena tabu au tabaohu oitau matadi eai doha isi headi; doha se uriyao si ene, "Tatao wa se bawabigabiga se ai ai se nomnom, se toro se saga." (Ex. 32.6.) ⁸ Hinage ita tabu laulau biibiidi eai ta lau, doha isi headi edi laulau, asubena esega tataodi tausani-tau-esega-i-mate eo haiona se guri. ⁹ Eo

tabu Guiiau ta nohoi doha isi headi ia se nohoi, eo mota wa se ailetai di se mate. (Nu. 21.5.) ¹¹ Teina ginauri gamagaridi se hearodi, bena ita eda tautau, eda aba sibasiba arinai se uridi, ita tanoubu ena huia sigasigana tataoda. ¹² Arinai ia ena nuatu i ene i totoro, bena i komakomani ata i guri. ¹³ Taba nige noho esau i hearom na doha gonogonoana tatao gamagari se hearoyao. Na Eaubada i lolo, taba nige noho esau u hearo nige abina u ata u otaotaei, na noho wa arinai abo em aba-dago dobilana i heitam, abo gonoam u adidiri.

Ta abihesarauioida, Guiiau ena heoiesega debana eai.

¹⁴ Arinai egu tataoyao ea gadosisiemiu e, oitau tabaohuna au dagogabaei. ¹⁵ Doha omi tatao sibasiba arimiu eai ea ribalaowa ta: egu riba hage au nonoidi. ¹⁶ Aihelahui bianomnomna arinai ita ta aiaihelahui wa, iaede Keriso osinana henuaoisegaina, e nige'e? Areto ta purisi, iaede nuada edi heoiesega Keriso tanau arinai, e nige'e? ¹⁷ Na ita ta gamagari, taiede areto esega ita, eo tauda esega, paana ita gamagarida areto esegana eai wa ada tupona ta abiyao. ¹⁸ Isaraela edi laulau hage au ita: isi aitalasam tauaina, edi tupo se abi heitalasam hatahatana eai, e nige'e? ¹⁹ Besi ea ene edoha? Oitau ede aisana, e ginauri oitau arinai se heitalasam ede aisana? ²⁰ Nige'e, na eau ea 'ne ginauri wa etene se heitalasamdi, demoni aridi eai se heitalasamdi ede, Eaubada arinai nige'e, na nige ea henua au heoiesegauioimiu demoni aridi eai. ²¹ Taba nige Guiiau ena bia-nomnom eo demoni enadi au nomesegaidi. Taba nige au patulau Guiiau ena hatahata eo demoni edi hatahata hinage. ²² Abo Guiiau ta hesom, ta heaiaromagigiri? Doha ita ta adidiri ariri, ia ta saetawatawai?

Gadosisi laugagaena, aiai eo nomnom i tanuagaei

Rom. 14.1-23

²³ Ginauri gamagaridi laugagaeno boeana eai taba ea abidi, ia mo ginauri gamagaridi nige i lolo ea abidi. Ginauri gamagaridi laugagaeno boeana eai taba ea abidi, ia mo nige se headidirigu. ²⁴ Tau esa eo esa, tabu iabom enana i eooi, na hari tatao edi lolo i eoo-bagunai. ²⁵ Aiai buluma udoi udoi abauneune eai se uneuneidi au aidi, tabu nuaboeamiu eai au hetahetala. ²⁶ Paana "tanoubu ta Guiiau enana, masurina maudoudoina ia enana hinage." (Psa. 24.1; 50.12.) ²⁷ Ena tatao headi, isi nige tauawaabi, edi mataasi eai se eogaimiu na au ene i lolo au lau, aiai saha se tore matamiu eai au ai, tabu nuamiu eai au oioimuri au ene aiai ta aisana, nuatu-abaheduduraina nuaboeamiu eai debana eai. ²⁸⁻²⁹ Na taba esau i heribamiu i ene, "Teina aiai ta se heitalasamyao oitau arinai," au otaotaei, tabu au ai, wau tauheribamiu wa debana eai, eo nuatu-abaheduduraina wa nige ea 'ne enam na wau

esau wa enana ede bena au heasisiei. ³⁰ Ena eau ainauia debana eai gonoagu ea abilau (ai ai wa arinai) paana saha ginauri wa ea lautoiyao, debana eai abo se riba baeeai? ³¹ Besi, ena au ai e au nom, e saha au ginauri, maudoina au abi Eaubada aba hedebasaena eai. ³² Tabu esau au henu-
 aberuberu, Iudea e Heleni, e Eaubada ena ekalesia. ³³ Doha eau egu laulau gamagaridi aridi eai ea aipate tatao gamagari nuadi ea helolodi, nige eaubom egu lolo ea eooi, na tatao gamagari edi lolo, isi bena se mauri.

11

Guiau ena Mataasi Tabuna, heasisina eo abiabina, lauheatana.

¹ Omi egu laulau taulaulauedi, doha eau Keriso ea heawatoe. ² Ea hedebasaemiu paana ginauri gamagaridi aridi eai au nuauatuigu eo egu ribahasahasa au sogohidi. ³ Ea henua au nuatulobai, Keriso ia tatao gamagaridi uruurudi ede, na sine uruuruna ede tau, eo Keriso uruuruna ede Eaubada. ⁴ Tau i uura e i ribaperoveta, taba uruna i bubuli, ana ao doha uruna i hetaumaeamaea. ⁵ Na sine esa, esa, i uura e i ribaperoveta, ena uruna nige i bubuli, iaede uruna i hetaumaeamaea, gonogonoana doha uruna se om. ⁶ Ena uruna nige i suma, besi i om; ena ta 'ne nige i lolo uruna se om, besi uruna i bubuli. ⁷ Tau taba nige uruna se bubuli, ia Eaubada oitauna eo ana bela; na sine ia tau ana bela. ⁸ (Paana tau nige sine arinai i laoma, na sine ia tau arinai i laoma. ⁹ Hinage tau nige se hetubu sine enana, na sine mo tau enana.) ¹⁰ Arinai sine ena gigibori heiheinoina uruna eai ie ota i lolo, aneru debadi eai. ¹¹ (Taiede Guiau boana eai nige tau sine i toromurimuriei, eo nige sine tau i toromurimuriei; ¹² doha sine tau arinai i laoma, gonogonoana tau hinage sine arinai i laoma, na ginauri gamagaridi Eaubada mo tauhetubudi ede.) ¹³ Omibom hage au eoouioimiu ana tau nhiage sine arinai i laoma, na ginauri gamagaridi Eaubada arinai? ¹⁴ Ita kamanida eai ta italobai, tau uruna ie loha, taumaeamaeana meta, ¹⁵ na sine uruna ie loha, ana bela meta, uruna lohalohana se mosei ena bubuli. ¹⁶ Taba esau riba ta bena i buiama, ai nige laulau esau ai nuatui, Eaubada ena ekalesia boeadi eai hinage nige'e.

¹⁷ Na riba esau abotai ea ribaei arimiu eai ta, arinai taba nige ea hedebasaemiu, arinai emi oioigogo nige se helolomiu, na se hebaeamiu mo. ¹⁸ Bagubagunana ea ataiei, si ene au oigogo na boeamiu eai biribiri se ota, hinage tupona ea awamamoheiei. ¹⁹⁻²⁰ Mamohoi pele udoi udoi abo se tubu bena aidobudi tautoresegaidi abo se masaraha boeamiu eai. Huia ne abaoigogo esega eai au tupagogoma, nige bena Guiau

ena mataasi au ai. ²¹ Esau esau iabom ana aiai i ai bagunai, esau i wesari, esau i nomdaoi. ²² Edohana! Nige emi numa, bena aridi eai au aiai eo au nomnom? E Eaubada ena oigogo au isugaraei eo taudeha au hetaumaeamaeaidi? Abo ea ene edoha arimiu eai? Abo ea hedebasaemiu? Nige'e, ina ginauri ta arinai taba nige ea hedebasaemiu.

²³ Paana riba ta eau Guiau arinai ea aabi, iaede ea leawa arimiu eai: ede Guiau Iesu nei maionana eai ne se morui wa, areto ie abi, ²⁴ i lautoi baguna abo ie ihi, i ene, "Teina eau taugu ede, omi debamiu eai se hetamogoru. Au abi ina doha, emi aba henuaisinigu." ²⁵ Hinage doha, se ai lautom abo bia-nomnom ie abi, i ene, "Bia-nomnom ta ribahesunumana harihariuna ede, eau osinagu eai. Au abi ina doha, huia gamagamagari ena au nom abo au nuanuatuigu." ²⁶ Arinai huia gamagamagari areto ta au ai, eo bia ta au nom, Guiau ena mate au hemahemasaraha, i lau e i lageuioma.

²⁷ Arinai ena esau areto ta i ai gaibui, e bianomnom ta i nom gaibui, Guiau tauna eo osinana giruna abo i abi. ²⁸ Taba tau i nonoiuioi baguna, abotai abo areto wa i ai, eo bia wa i nom. ²⁹ Tau ai gaibu eo tau nom gaibu iabom aba-hegiruna i ai eo i nom ede, Guiau tauna nige i italobai. ³⁰ Matapaana ede headi boeamiu eai se beruberu eo se asiasiebo, eo headi se mateo. ³¹ Taba mamohoi itabom ta nonoiuioida taba nige ina lauhegiru ta ta hearo. ³² Na se hekirainoda bena Guiau i heduduraida, bena tabu ita maeda tanoubu ta, se hebaaea-esegaida.

³³ Arinai, egu tataoyao e, ena aiai hesabana au oigogo, esau i bagilau esau arinai— ³⁴ ena esau i guriam, taba ena numa eai i aiai — ata giru au hearo emi oigogo debana eai. Na ginauri headi sora ea laowa abo ea heduduraidi.

12

Earua ena ainauia. (14) Taunuabui ede Keriso Tauna eauna esau, iabom ena ainauia, eo iabom ana paisoa se tauribaei.

¹ Earua ena ainauia, egu tataoyao e, nige ea henua au supusupuedi. ² Au nuatui huia ne omi etene, se woehaimiu oitau monomonoudi dobiladi eai, doha edi woewoewaimiu wa. ³ Arinai ea lauihasahasaimiu ta, taba nige esau Eaubada Earuana gigiborina eai i ribariba, na Iesu i ribahebaaea, eo taba nige esau i riba i ene Iesu ia Guiau ede, na Earua Tabuna gigiborina eai mo.

⁴ Ainauiana udoi udoi, na Earuana esega mo; ⁵⁻⁶ heaeai paisoana udoi udoi, na Eaubada esega, ia nuadi eai ginauri gamagaridi tau-hepaisoaei ede. ⁷ Na esau esau arinai Earua i hemasarahauioi, gamagarida bena i heloloda.

⁸ Esau arinai sonoga ribana se mosei, Earua debana eai, esau nuatu i ribahemasaraha, Earua esegana debana eai, ⁹ esau arinai sunuma, Earua esegana debana eai, eo esau asiebo i helolouioidi, Earua esegana debana eai, ¹⁰ eo esau arinai laulau gigibori hepahepasoaina, esau arinai riba-peroveta, esau arinai earua udodoi itahinehinerina, esau arinai arina udodoi, eo esau arina udodoi ribaribabuina. ¹¹ Ina ginauri gamagaridi ta Earua esegana ia tauhetubudi, esega dumadumana, esau esau enana i soiei, iabom ena nuatu eai.

¹² Doha tauna esega eai eauna udoi udoi se gamagari, se gamagari ia mo taudi esegana ede, gonogonoana doha ede Keriso ¹³ Earua esegana eai ita gamagarida se hebapatisoida, eda tupo ta lobai ia tauna wa esegana boeana eai — ita Iudea e, Heleni e, tau-auau tataoda e, se iairihaida e — eo gamagarida eda abanomnom esega, Earua esegana eai wa.

¹⁴ Tauna nige eauna esega mo, na se gamagari. ¹⁵ Ena taba aena i ene, “Paana eau nige nima, besi egu tupo nige’e tauna boeana eai,” mamohoi wa, ia tauna tupona nige’e? ¹⁶ Ena taba beana i ene, “Paana eau nige mata, besi egu tupo nige’e tauna boeana eai,” mamohoi wa, ia tauna tupona nige’e? ¹⁷ Taba tauna maudoina ede mata mo, haedi ena abataataiei? Taba tauna maudoina ataataiei mo, haedi ena abapanepane? ¹⁸ Na Eaubada wau eaudi udoi udoi, esau esau ie tore tauna boeana eai, ia ena nuatu eai. ¹⁹ Taba maudoudoina ede eauna esega mo, tauna abo edohana? ²⁰ Na mamohoi eauna se gamagari, na tauna mo esegana. ²¹ Mata taba nige i ribalau nima arinai i ene, “Arigu eai nige am paisoa,” e uru i ribalau ae arinai i ene, “Arigu eai nige am paisoa.” ²² Na eaudi headi ta ene se beruberu ariri, isi aridi eai ta duihasari ariri ede, ²³ eo tauda eaudi headi nige ta heasisidaoidi, isi ede ta abikomakomanidi, eo tauda tupo headi adi ao nige se lolo, isi ede ta heasisaririedi, ²⁴ doha eda tupo lolodi nige ta mode ariri aridi eai. Eaubada tauda i tore-esegaidi, tupo headi se dobidobi i hedebasaedi ede, ²⁵ bena tauda eai tabu hinehinerina, eaudi udoi udoi abo se haisagusaguuioidi, se heona gonogonoauioidi. ²⁶ Eauna esega i baaea, eanua gamagaridi abo se amamna hinage; eauna esega se helolo, abo eauna gamagaridi maena se kode-esega.

²⁷ Keriso tauna ede omi, eo eauna udoi udoi omi esau eo esau. ²⁸ Eo isi Eaubada i hetorodi ena ekalesia boeana eai, bagubagunadi ede aposotolo, helabuina peroveta, hehai-nana taulauheata, abotai laulau gigibori eo asiebo helolona ainuiana, tauhaisagusagu, tauwoeawoea, arina udoi udoi tauribaribaedi. ²⁹ Gamagaridi nige se aposotolo, gamagaridi nige peroveta, gamagaridi nige taulauheata, gamagaridi nige gigibori laulaudi se abidi. ³⁰ Gamagaridi nige ainuiana wa

se abi bena asiebo se helolodi, gamagaridi nige arina udoi udoi eai se ribariba, gamagaridi nige arina udoi tauribabuidi.

³¹ Na ainauia saesaeariridi, meta mo bena au henuaaririedi.

Na sora dobila esau lolo-dumadumana ede, hage ina ea heitamiu:

13

Ainauia saesaena ede Gadosisi.

¹ Tatao eo aneru memenadi eai eau taba ea riba, na ena gadosisi nige ea abi, eau boiatu dagudaguguna mo, e pate se oioi gaibu. ² Eo taba ea riba peroveta, eo sonoga eamuyamui eo riba piripiridi arigu eai se masaraha, eo egu sunuma i lai taba oea tupidi ea hemoimoiudi, na egu gadosisi nige'e, eau ea deha ariri. ³ Egu gogo gamagamagari taba ea soiei bena taugogogesagesa ea heaidi, taugu taba ea moselaei bena se gabu, ia mo nige aniona, ena nige ea gadosisi.

⁴ Gadosisi i taubiga ariri, i abilolo. Gadosisi nige i aiaromagigiri, nige i ribapasipasiuioi; ⁵ nige i nuasaesae eo nige ena abi se baaea. Gadosisi nige iabom ena nuatu mo i lauwateri; taba nige se hesom i nuabaaea, nige i lauhegiru. ⁶ Baaea arinai taba nige i kode, riba mamohoina mo arinai ie kode. ⁷ Gadosisi ginauri gamagaridi i baheidi, ginauri gamagaridi i awamamohoi, ginauri gamagaridi i sunumaedi, ginauri gamagaridi aridi eai i torotahitahi.

⁸ Gadosisi taba nige i tauyamui. Peroveta ribadi abo se tausua, arina udoi udoi abo se lautom, sonoga abo se hemuri. ⁹ Paana ita tupona mo ta italobai, arinai tupona mo ta riba-perovetai; ¹⁰ na lolo-dumadumana i laoma abo lolotupona wa i helaudamai. ¹¹ Eau magagirigu eai wa ea ribariba doha merumeru, egu nuanuatu doha merumeru, egu heuheuio doha merumeru, i lau e ea taulailai, abo merumeru laulaudi ea torehesuaradi. ¹² Ita huia ta doha ta itaitalau ilu eai, i gaugau, na nei huiana ne abo matada eai ta haiitaita. Aboina tupona mo ea italobai, nei huiana ne abo maudoina abina ea ata, doha eau hinage abigu i atao. ¹³ Arinai ede awamamohoi, sunuma, eo gadosisi se ota, teina haiona ta; na saesaearirina ede gadosisi.

14

Ainauia esau: riba-peroveta.

¹ Bena emi aipate gadosisi, abotai earua ena ainauia headi hesabadi au lau, bagubagunana ede ribariba-peroveta.

² Paana esau arina udoi eai i riba, ia Eaubada arinai i ribariba, tatao nige'e; nige esau ena riba i ataiei, Earua eai ginauri eamuyamuidi i ribaribaedi. ³ Na esau i ribariba-peroveta ia tatao enadi i lauhasahasa, i henuabigadi. ⁴ Arina udoi

tauribaribaena iabom mo i heatauioi, na tauriba-peroveta ia ekalesia i heatadi. ⁵ Ea henua taba gamagarimiu arina udoi eai au ribariba, na ribariba peroveta mo i lolo ariri. Tau ribariba-peroveta ia arina udoi tauribaena i saetawatawai, ena nige esau arinana i ribabui bena ekalesia se ataiei.

⁶ Hage wau ta ea laowa arimiu eai arina udoi udoi eai ea ribariba, egu tataoyao e, edohana abo i saguimiu ena nige ribahemasaraha esau, e sonoga, e ribaperoveta, e lauheata, ea tore matamiu eai? ⁷ Aba aihea doha baubau e huelele, isi ginauri matematedi mo, na ena dagugudi nige se masaraha edohana abo ta ataiei aitea wanana ede se iuhiyuhini, e se oioini? ⁸ Ena bogigi daguguna nige i masaraha, eai abo i henonohauioi iala arinai? ⁹ Gonoana omi, ena arina udoi ribaribadi nige se masaraha, edohana abo tatao emi riba aniodi se atailobaidi? Abo emi riba au gabagaibuidi. ¹⁰ Tanoubu eai ta arina se gamagari, eo gamagaridi ma aniodi. ¹¹ Iaede, ena tau esau i ribalaoma na ena riba nige ea ataiei, eau doha ealeyaleba tauna ia arinai, ia doha ealeyaleba tauna eau arigu eai. ¹² Omi Earua heiheinoina au eooidi wa, bena au nuahai ekalesia heaheatana mo arinai.

¹³ Arinai arina udoi tauribaribaena wa taba i uura bena ribaribabui ainaiuana i abi. ¹⁴ Paana ena arina udoi eai ea lau-uura, earuagu mo i uura na nuagu nige i paipaisoa. ¹⁵ Abo edohana? Besi, earuagu eai abo ea lau-uura, eo ma nuagu hinage abo ea lau-uura; earuagu eai abo ea aihe-lahui wana eai, eo ma nuagu hinage abo ea aihelahui wana eai. ¹⁶ Ena nige'e, oa earuam eai Eaubada u hedebasaei, na tausupusupu gegesim eai i totoro edohana abo em lautoi eai enaba, "Amen," ena nige em riba aniona i ataiei? ¹⁷ Em lautoi ata bena i dudurai, ia mo tauataiena wa nige i sagui. ¹⁸ Eaubada ea lautoiei, arina udodoi ribaribaena eai eau taba gamagarimiu ea dioimiu. ¹⁹ Ia mo dubu eai eau riba haligigi mo taba ea ribaedi tatao bena ea heatadi, meta i lolo ariri, riba tausani saudoudoi arina udoi eai nige'e.

²⁰ Egu tataoyao e, tabu emi sibasiba eai omi doha merumeru, baaea eai mo bena omi merumeru, na sibasibamiu eai bena au taulailai. ²¹ Se uriyao laugagaeo eai si ene. "Hari arina, eo hari tatao sopadi eai, abo ea ribalau teina boda ta aridi eai, na arinagu taba nige se ataiei, Guiau nei doha i ribaei." (Is. 28.11-12.) ²² Arinai arina udodoi ribaribaena wa, ia ede heiheinoi mo, nige tauataiena enadi na tauawayagara enadi. ²³ Arinai taba ekalesia edi oigogo arina udodoi eai se ribariba, na tausupusupu, e esau nige i awamamohoi, i laoma, abo nige i ene au eauyaure? ²⁴ Na ena gamagaridi se riba-peroveta, to tau nige i awamamohoi, e tausupusupu esau i laoma, gamagaridi edi ribariba eai

ia abo nuana i bui, eo awadi eai abo ana giru i ita. ²⁵ Ia nuaboena eai nuatu eamuyamuidi se masarahao, abo i gurisalaoba Eaubada i aihelahui i ene mamohoi Eaubada boeamiu eai ede.

Oigogo abiabi-duduraina.

²⁶ Egu tataoyao e, abo edohana? Ena au oigogo, esa eo esa ena nuatu i leama; esau hedebasae wanana, esau ena lauheata, esau riba hemasarahao, e riba arina udoi eai, e wau riba wa i torebui. Ginauri gamagari abo au abidi aba-heatamiu bena. ²⁷ Taba esau arina udoi eai bena i riba, taba labui e haiona mo se riba oigogo boena eai, eo esau esau ena huia eai; hinage taba esau enadi i ribabui. ²⁸ Ena nige tauribabui esau metai, besi wau tauribariba wa taba se monou, esau, esau, nuana eai mo iabom enana i riba. ²⁹ Tau-ribaperoveta labui e haiona hinage taba se riba, na gamagarimiu edi riba au nonoidi. ³⁰ Taba Eaubada nuatu esau i hemasarahao taubabawa esau arinai, wau tau wa i ribabagunao besi i monou. ³¹ Gamagarimiu taba au ribaperoveta, esau to esau, abo gamagarimiu au atailobai, eo nuamiu se adidiri; ³² peroveta earuadi se awaabi peroveta wa aridi eai. ³³ Paana Eaubada nige abiponopono Eaubadana, na abi komakomani Eaubadana.

Doha ekalesia edi dubu gamagaridi eai, ³⁴ sisine taba se monou dubu eai, taba nige se riba, bena se awaabi mo, doha laugagaao i ribaei wa. ³⁵ Ena saha bena se atailobai, se lageuioi numa eai abo monediyao se hesioidi. Sine dubu eai i ribariba nige i lolo. ³⁶ Edohana? Eaubada ena riba omi arimiu eai i laoma, e i lagewa omibom mo arimiu eai?

³⁷ Ena esau i ene ia peroveta, e ia earuana eai se ainuiai, bena i ita komakomani, ina ea uriyawa ta Guiau ena lauhesom ede. ³⁸ Ena tau esau i supusupuei, besi ia tausupusupu. ³⁹ Egu tataoyao e, ribana ede ina: riba-peroveta ainuiana au eooi, na arina udoi eai ribaribana tabu au gudugudui. ⁴⁰ Ginauri gamagaridi au ginauridi, bena adi ao se dudurai, eo se laulolo-esegaidi.

15

Keriso se hetorouioi; tausunumaena hinage abo se hetorouioidi.

¹ Egu tataoyao e, Evanelia ta ea hemasarahayao arimiu eai, ea guguiamiu wa, omi au ataiei, arinai au toro, ² arinai hinage au mauri, ena egu guguia wa au sogohi eo ena nige au sunuma gaibu.

³ Riba ea leawa bagunai, ia ede se leama arigu eai, ede Keriso ita eda baee debadi eai ie mate, doha uriuri tabudi eai se ribanonohiyao, ⁴ eo ia se toreyao na i torouio asubena

hehaionana eai, doha uriuri tabudi eai se ribaei, ⁵ eo i taumasaraha Kipasi arinai, abotai saudoudoi-labui wa aridi eai. ⁶ Abotai i taumasaraha eda boda tataodi aridi eai, isi taudi handere haligigi i dioi, edi huia itana esega, isi maudoudoidi mamiadi wau ta, headi mo se eno'o. ⁷ Abotai i hemasarahauioi Jamesi arinai, abotai aposotolo maudoina aridi eai. ⁸ I lau e i taumasaraha murimurita-ariri eau arigu eai, eau doha nige egu huia mamohoi eai na se labasigu ta. ⁹ Paana aposotolo aridi eai eau mo ea gagiri ariri, nige i lolo se ribaegu aposotolo, paana Eaubada ena ekalesia eau tauheamamnadi. ¹⁰ Na Eaubada ena ainauia eai eau ede ina, ena ainauia i leama wa nige i taru gaibu arigu eai. Nige'e, egu paipaisoa adidiri eai isi gamagaridi ea dioidi, ia mo eau nige'e, Eaubada ena ainauia ede, eau arigu eai. ¹¹ Arinai ena eau e isi, iaede ai laugugua wa, omi au ataiwatai.

¹² Na ena ema gugua wa ai ene Keriso mate eai i toro, edohana omi heamiu au ene mate nige torouiona? ¹³ Na taba mate torouiona nige'e, besi Keriso nige i torouio; ¹⁴ eo Keriso ena nige i torouio ema gugua nige aniona, omi emi sunusunuma hinage nige aniona. ¹⁵ E, abo ai hinage se lobaimai Eaubada enana tauriba boraboramai, paana ai ribaei ai ene Eaubada Keriso i hetorouioi na nige i hetorouioi, ena ta ene taumatemate taba nige se hetorouioi. ¹⁶ Paana ena taumatemate taba nige se torouio, Keriso hinage nige se hetorouioi. ¹⁷ Taba ena Keriso nige i torouio, omi au sunuma gaibu, eo mamiamiu emi baeae boeadi eai. ¹⁸ Eo isi Keriso boeana eai se mateo, hede se lautomaririo. ¹⁹ Ahani, ena teina eda huia mauri eai mo Keriso abo ta sunusunumaei, tatao gamagaridi boeadi eai itabom mo ta nuatoatoa ariri.

²⁰ Ia mo mamohoina ede, Keriso mate eai i torouio'o isi mate eai taueno'o uaua bagubagunana ede ia. ²¹ Doha tau esau debana eai mate i laoma, tau esau debana eai hinage mate torouiona i laoma. ²² Doha Adamu debana eai gamagaridi se mate, Keriso debana eai gamagaridi se mauri. ²³ Esa, esa, ena huia mamohoi eai: Keriso ia uaua bagubagunana, abotai isi Keriso enanayao wa, ena laolaoma eai. ²⁴ Abotai abo huia anasigana i lagema, huia ne basileia abo i mosei Eaubada arinai, Tamana ede, sora tanutanuagana, laugagaego, gigibori, maudoidi i helautom-bagunaidi. ²⁵ Abo iabom Wasawasa, i lau e ana waiunuyao gamagaridi aena eai i ututawatawaedio. ²⁶ Waiunu murimurita-aririna abo se unui wa, iaede mate. ²⁷ Eaubada ginauri gamagaridi aena ubuna eai i ututawatawaedio. Si ene, "Ginauri gamagaridi abo se toredobeidi ia awaabina eai," na iabom mo nige'e, paana ia ginauri gamagaridi tautanuagaidi ede. ²⁸ Ginauri gamagaridi ia awaabina eai se laulau, abotai abo Natuna

hinage i awaabi, wau ginauri gamagaridi tauheawaabidi wa, bena Eaubada i abiheohida eo iabom i sae ariri.

²⁹ Ena nige'e, isi taumatemate debadi eai se hebapatisoidi wa edohadi, ena taumatemate taba nige se torouio? Paana saha enadi se hebahebapatiso? ³⁰ Eo paana saha ai mahana to mahana baaea i hanahanauimai na ai totoro? ³¹ Ea ribanuahimiu, egu tataoyao e, omi egu aba kode Keriso Iesu eda Guiau boeana eai, eau ea mamate asubena gamagamagari! ³² Ena doha tatao edi ribariba eai, maegu liona hemahem-anabaradi ai haiabiabio Epeso eai, edohana abo i helologu, ena taumatemate nige se heterouioidi? Besi ta ai mo, ta nom mo, paana maraitom abo ta mamate. ³³ Tabu se boraimiu: awaeha baaeadi abo iila lolodi se hetatagorigoridi. ³⁴ Au siliata, au torohai laulau dudurai arinai na au baaea lautom. Paana headi sora Eaubada se hekau. Teina ea ribaei ta emi abataumaeamaea.

³⁵ Na headi abo se hesio, "Edohana taumatemate abo se heterouioidi? Abo taudi sahasahaidi eai se uioma?" ³⁶ Oa tausupusupu! Tuma tano eai se hesuru, taba nige i mauri ena nige i mate baguna. ³⁷ Na saha u hesuru tano eai wa, nige u umai ana ao doha maraitom asubena, na tumana mo, ata bena * sitona, e tuma esau. ³⁸ Na Eaubada tauna abo i mosei, iabom ena nuatu lolona eai, hari tuma taudi udoi udoi. ³⁹ Buluma udoi udoi, nige adi ao esega, adi ao esau tatao bulumadi, esau suisui bulumadi, esau eama, esau manu. ⁴⁰ Headi taudi galewa, headi taudi tanoubu ta; wau galewa enana ena namanamari udoi, tanoubu enana ena namanamari udoi. ⁴¹ Mahana namanamarina udoi, nawalai namanamarina udoi, hinage ipora namanamaridi udoi; hari ipora hari ipora, edi namanamari udoi.

⁴² Mate torouiona ana ao doha meta. Se umai ma posaposana, se heterouioi taba nige i posa. ⁴³ Se umai nige heasisina, se heterouioi ma ana tepo saesaena. Se umai ma beruberuna, se heterouioi ma gigiborina. ⁴⁴ Se umai tauna tanoubu ta enana, se heterouioi tauna earua enana. ⁴⁵ Arinai ede se uriyao, "Tau bagubagunana Adamu i hemala tau ma earuana maumaurina"; na Adamu murimuritana wa ia hemahemaui earuana ede. ⁴⁶ Earua nige i laoma baguna, na buluma, abotai abo earua. ⁴⁷ Tau bagubagunana wa tano eai i laoma, ia tano tauna; tau helabuina wa galewa eai i laoma. ⁴⁸ Isi tanoubu, adi ao doha tano tauna wa; isi galewa enana, adi ao doha galewa tauna wa. ⁴⁹ Doha ita tanoubu tauna wa tautauna ede, hinage doha galewa tauna tautauna bena i hemala ita ada ao. ⁵⁰ Egu tataoyao e, ea heribamiu ina: buluma eo osina taba nige Eaubada ena basileia i abi enana,

* 15:37: wheat.

eo taba nige ginauri posaposana, ginauri taba nige i posa, i abi enana.

⁵¹ Au ita! Ginauri eamuyamuina esau ea hemasaraha arimiu eai. Gamagarida taba nige ta eno, na gamagarida abo ta ori, ⁵² ma-esega, doha mata hekampoina eai, bogigi murimurita-aririna eai. Paana bogigi abo se iuhi, eo taumate-mate abo se hetorouioidi taba nige se posauio, eo ita ada ao si ori. ⁵³ Teina posaposana ta nige-posaposana abo i lui, eo teina buluma ta maurina, abo mauri nige nosina i lui. ⁵⁴ Nei huia ne posaposana ta i hemala taba nige i posa, eo buluma ta maurina i hemala mauri nige nosina, abotai abo riba wa se hemamohoiei, si ene: “Saesaepoina wa mate i domyao.”

⁵⁵ “Mate e, haedi em nuri ede?

Bousa e, haedi em aba unuimai?”

⁵⁶ Mate ena nuri ede baaea, baaea ena gigibori ede laugagaeo.

⁵⁷ Na Eaubada ta lautoiei, ia baaea saepoina i leamao eda Guiau Iesu Keriso debana eai.

⁵⁸ Arinai egu tataoyao e, egu nuanuai, au toroesegaimiu, taba nige se hemoimoiuumiu, huia gamagamagari Guiau ana paisoa au helahelai paana au nuatui taba nige au ene ami paisoa nige aniona, Guiau boeana eai.

16

Ribahasahasa headi, eo lautoi.

¹ Ainauia ta peigogoi hetabu tataodi enadi wa, doha ekalesia Galatia eai ea heatadi, hinage ea heatamiu, bena au ginauriwatai. ² Asubena bagubagunana Sabati sorasorana eai, esau to esau doha ana paisoa se lau lolo, abo aniona tupona i torehesuara, ea laowa abo taba nige ta hetubu ainauia ta tore. ³ Sora ea lagewa, eai to eai emi leta eai au tauribaedi, isi abo ea hetamaridiwa emi nuagigibori heiheinoina wa abo se bahei se laei Ierusalemia eai. ⁴ Ena i lolo bena eau hinage ea lau, abo isi maeguyao.

⁵ Abo ea laowa arimiu eai, sora Makedonia ea baeawai baguna, paana Makedonia egu dobila eai, ⁶ nuana arimiu eai abo ea mia, ata bena huia gogoma abo ta miagogo, bena egu adau eai abo au hetamarigu ea lau, haedi egu abatorohai eai. ⁷ Nige ea henua ea itamiu mo, egu gadosisi bena ea miahai begana arimiu eai, ena Guiau ie eari. ⁸ Na Epeso eai abo ea bagibagi i lau e Penetekoso huiana, ⁹ paana egu sorasora lolona inai, matagu eai se soeauri, taba agu paisoa ma aniona, waiunu hinage se gamagari.

¹⁰ Ena Timoteo i laowa au oiyami, bena boeamiu eai i manasa, paana ia Guiau ana paisoa i paipaisoeai, gonoana doha eau. ¹¹ Tabu esau i itadobei. Au helabiniei au hetamari ena

lauwasi eai, bena i uioma arigu eai; paana ia ea bagibagiei, maeda tataoyao.

¹² Eda tau Apolo ribana eau ea dudu ariri bena i laowa arimiu eai, eda tataoyao headi wa maedi, na nige begana Eaubada ena nuatu bena aboina i laowa. Sora ena huia i lobai abo i laowa.

¹³ Au silasilawahetete, sunuma eai ta au torotahitahinei, iilamiu doha tatao, au adidiri. ¹⁴ Ginauri gamagaridi gadosisi eai mo bena au ginauridi.

¹⁵ Egu tataoyao e, Setepanas ena numa tataodi abidi au atao, isi taunuabui bagubagunadi Akaia eai, eo se moseuioidi hetabu tataodi se bobodiedi; ¹⁶ egu aiboda gadogadora arimiu eai bena tatao doha ina au awaabiedi, eo aidobudi hinage ada paisoa ta se sagui eo maeda se paipaisoa. ¹⁷ Ea kode ariri Setepanas eo Fotunata eo Akaika edi laoma eai, saha arimiu eai ea hedeha, isi se heduduraiyao; ¹⁸ paana earuagu se heaiyawasi, doha omi earuamiu hinage. Tatao doha ina au heasisiedi.

¹⁹ Ekalesia Asia eai se lautoiemiu. Akuila eo Peresila se lautoi-aririemiu Guiiau debana eai, maediyao ekalesia pelena wa edi numaalo eai se oioigogo. ²⁰ Eda tataoyao maudoidi se lautoiemiu. Alagoi tabuna eai au aiaitoiuioimiu.

²¹ Eau Paulo egu lautoi ea uri ina, eaubogu nimagu eai ta. ²² Ena tau esau eda Guiiau nige i gadosisie, ia baaeana.

* Eda Guiiau i laoma! ²³ Guiiau Iesu ena ainauia maemiu. ²⁴ Egu gadosisi omi gamagarimiu arimiu eai i ota, Keriso Iesu boeana eai. Amen. †

* **16:22:** Heleni ribana: Maranata † **16:24:** Uriuri bagubagunana Korinito enadi, Pilipi eai se uri, Setepanas, Fotunata. Akaika eo Timoteo nimadi eai.

PAULO ENA URIURI HELABUINA, KORINITO ENADI

Paulo ena paipaisoa matapaana bena i hemasaraha.

¹ Paulo, Iesu Keriso ena aposotolo Eaubada ena nuatu eai, eo eda tau Timoteo, Eaubada ena ekalesia Korinito eai enadi ai uri, maedi hetabu tataodi gamagaridi, Akaia tupo gamagarina eai se miamia:

² Ainauia bena enamiu, eo loni Eaubada Tamada arinai i laoma, eo Guiau Iesu arinai.

³ Eaubada ta hedebasaei, iaede eda Guiau Iesu Keriso Tamana, nuatoatoa Tamana, eo henuabiga gamagari Eaubadana, ⁴ ia i henuabigada eda amamna gamagamagari boedi eai, abo ita hinage abina ta ata tatao edi amamna eai ta henuabigaidi, wau nuabiga eai wa arinai Eaubada i henuabigaidao. ⁵ Doha Keriso ena amamna ai ai hearo aririei, ena henuabiga abo ai hearo hinage, ai abihelai, Keriso debana eai. ⁶ Ena se heamamnamai, meta omi emi henuabiga eo emi mauri debana eai; e ena se henuabigaimai meta omi emi henuabiga debana eai, ena taba amamna au hearodi, doha ai ai hearodi. ⁷ Ema sunumaemiu i ota esegai, paana ai nuatuiyao amamna au hearodi, henuabigana abo au hearo hinage.

⁸ Heamamna lailai Asia eai ai hearo, nige ai henua au supusupuei; se hebaaea-aririemai ema adidiri nige gonoana, hinage nuamai se beruberu ariri ai ene ibai abo ai mauri e nige'e? ⁹ Ema mate ribana se ribaeyao, taiede bena tabu ai sunumauioimai na Eaubada mo mate eai tauhetohetouio. ¹⁰ Mate matausina i lai ariri, arinai i iairihaimaio, eo abo i iairihaimai, eo ai sunusunumaei maraitom-asubena hinage abo i iairihaiuioimai. ¹¹ Omi hinage, bena emi uura eai au sagusaguimai, bena tatao gamagaridi ai debamai eai abo se lautoi, paana ainauia ai arimai eai wa, isi abo se hearo, uura gamagaridi maisadi.

¹² Paana ema aba-kode ede ina, nuaboeamai eai ema nuatu duduraina wa i hemasarahamai, ema iila tabuna eo ama ao mamohoi Eaubada matana eai, nige buluma ena sonoga eai na Eaubada ena ainauia debana eai ema miamia tanoubu eai ta aie abi, eo omi hinage arimiu eai. ¹³ Nige riba udoi enamiu ai uri, riba esegana mo, iaede au hasiriyao eo au italobaiyao, ea sunumaemiu abo au italobai i lau e anasiga, ¹⁴ doha tupona au italobaiyao, bena ai abo emi abakode, eo omi ai ema abakode, Guiau Iesu asubenana eai.

¹⁵ Teina egu nuatu adidiri ta debana eai bena ea laowa, bena egu aba-helolomiu helabuina; ¹⁶ bena ea itamiu abo ea taudaru ea lau Makedonia, e abo Makedonia eai ea uiowa arimiu eai, bena egu adau eai au healatugu Iudea edana eai. ¹⁷ Ina egu nuatu eai ta arinai au ene egu dobila ea buibuidi, wa? Doha bulumagu i woewoeaigu, doha gonoagu ea ene E, E, e Nige'e, Nige'e? ¹⁸ Agutoi, doha Eaubada ia mamohoina, ema riba arimiu eai nige E, to Nige'e. ¹⁹ Eaubada Natuna Iesu Keriso ai ribahemasaraha arimiu eai wa, eau maegu Silevano eo Timoteo, ia ena riba nige E eo Nige'e, na huia gamagari E mo. ²⁰ Eaubada ena ribahesunuma gamagaridi isi ede Hedeona. Arinai ia debana eai ita ta ene Amen, Eaubada ta hedebasaei. ²¹ Eaubada ia tauhetorotahitahida, omi eo ai, Keriso boeana eai, eo i tauribaeda; ²² eo i goraidao Earua heiheinoina nuada eai i leamao.

²³ Eaubada ea eogai ia tauhemasarahagu ede, sora nige ea lagewa Korinito, paana emi huia ea leawa baguna. ²⁴ Nige bena emi sunuma ai tanuagaei, emi kode mo bena ai sagui, eo emi sunuma boeana eai au torotahitahimiu.

2

¹ Na eau egu aipate adidiri bena tabu ma nuaporohegu ea uiowa arimiu eai. ² Paana ena ea henuadubumiu, eai abo tauhekodegu na ia ea henuadubu wa? ³ Riba esega ta ea uri arimiu eai, ata egu huia laoma eai isi bena se hekodegu wa, abo nuadubu mo ea lobai aridi eai, paana egu nuatu adidiri bena egu kode abo i hemala gamagarimiu emi kode. ⁴ Paana amamna lailai eo nuakalapi eai enamiu ea uuri wa, ma-matasulugu, nige bena nuamiu ea heamamnadi, na bena egu gadosisi lailai-aririna arimiu eai au ita.

⁵ Ena esau i henuadubuda, nige eaubom na ita gamagarida i henuadubuda ede — ea riba ina doha, nige ea henua ea heporoheaririemi. ⁶ Tatao maudoidi ena tau ta se hemaisa, meta gonoana ede; ⁷ abotai i lolo ena baaea au nuatugabaei, ia au taubigai, ata ena nuadubu lailai abo i oitawai. ⁸ Arinai ea aibodaimiu ta emi gadosisi bena au hemasarahauioi ia arinai. ⁹ Hinage egu uriuri wa matapaana esau, bena ea lautamiu, ginauri gamagaridi eai au awaabi, e nige'e? ¹⁰ Eai ena baaea omi au ribagigiri, eau hinage ea ribagigiri. Ena saha eau ea ribagigiriyao, omi debamiu eai meta, eo Keriso matana eai, ¹¹ ata diabolo ena sorasora i lobai abo i saepoida; ena sanapu wa ita nige ta hekaudi.

¹² Huia ne ea laoma Toroasi eai wa, Keriso ena evanelia bena ea gugui, Guiau egu dobila i soeauri matagu eai; ¹³ na nuagu nige i taru, paana egu tau Tito ea eooasa-eai. Arinai ea lauaioniedi ea torohaigabaedi ea lau Makedonia.

¹⁴ Na Eaubada ta aitoiei, ia huia gamagari i woewoeaida ta adidiri-daoi Keriso boeana eai, eo ita debada eai italobaina i tadada eo i masaraha tupo gamagari eai. ¹⁵ Paana ita doha Keriso panena lolona ede, Eaubada arinai, eo mauri taulobaina boeadi eai, eo isi ma-matematedi boeadi eai hinage; ¹⁶ esau arinai doha mate panena, i lau e mate; esau arinai doha mauri panena, i lau e mauri. Ina ginauri ta, eai abo gonoana? ¹⁷ Paana ai nige doha headi, Eaubada ena riba se abi doha edi uneune; ai nuatu mamohoi tataomai, Eaubada i tauribaemai, eo Eaubada matana eai ai ribariba, Keriso boeana eai.

3

Heaeai paisoana, arinai aposotolo se tauribaedi wa.

¹ Abo ai hetubuuiio matamiu eai ai hetorouioimai? E, doha tatao headi, leta nimamai eai ai abidiwa bena abimai au ata, e doha nei bena omi arimiu eai ai abidi? ² Omi ema leta ede, se urihemasarahamaio omi nuamiu eai, tatao gamagaridi se itayao, se hasiriyao. ³ I masarahao omi Keriso ena uriuri, ai ama paisoa aniona, nige *ink* eai se uri, na Eaubada maumaurina Earuana eai, nige aba-uriuri we'u eai, na aba-uriuri wa tatao nuadi ede.

⁴ Ema sunuma ta ai tore Eaubada arinai, Keriso debana eai. ⁵ Nige ai ene ema adidiri gonoana taba aibom mo saha ai ginauri, Eaubada iabom gonoamai ede, ⁶ ia i hegigiborimai dobila harihariuna ai tauhemasarahana, ribana nige se uri, Earua eai ta abi; riba se uri meta ginauri ai aiununa, na Earua ia ede i abiabihemauri.

⁷ Ena taba laugagaeo dobilana, maisana wa ede mate iaede we'u eai se pusaei wa, ena laoma i namanamari ariri, nige gonoana Isaraela nanatunayao se italau Mose matana eai, paana ana ao se namanamari ariri, namanamarina wa nige baeiona i tausoesoe, ⁸ abo nige Earua dobilana namanamarina i lai ariri hinage? ⁹ Laugagaeo dobilana, uauana ede baeia abo se hemaisa, taiede ma-namanamarina i laoma, Earua dobilana, uauana ede laulau dudurai, ia namanamarina mo abo i lai ariri ede, e nige'e? ¹⁰ Na wau namanamari bagubagunana wa, ana ao doha nige i namanamari ariri, paana murimuritana mo i lai ariri ede. ¹¹ Wau dobila wa nige baeiona abo i tauyamui, ma-namanamarina ie laoma; dobila wa miatahitahina i lau e nige nosina, ia namanamarina abo nige i lai ariri, wa?

¹² Ai ema sunuma doha ina, arinai ema riba se adidiri ariri, ¹³ ai nige doha Mose, ia matana i woeoi, Isaraela nanatunayao bena tabu se italau namanamari i tautauyamui wa sigana se ita. ¹⁴ Na nuadi se heoiura, i laoma e wau ta ena laugagaeo

beabeana se hasiri, woeona wa otana, nige se lausini, paana Keriso mo debana eai se abihesuara. ¹⁵ Hedeona, i laoma e wau-ta, huia ne Mose se hasihasirini, woeo wa nuadi ie suma. ¹⁶ Na ena tau i sinibui Guiau arinai, nei huia ne abo woeona se abihesuara. ¹⁷ Guiau ia ede Earua. Haedi Guiau Earuana ede, temetai iairihaina. ¹⁸ Na ita gamagarida matada se masaraha, doha ilu eai Guiau namanamarina ta hemahemasaraha, abo ta bui, ada ao abo si ori doha ia ana ao, hari namanamari to hari namanamari arinai ta lage, doha Guiau Earuana ena abiabi debana eai.

4

Heaeai paisoana: mamohoina, eo ena paa.

¹ Ai paisoa ta ena heaheari tataomai, Eaubada ena nuatoa-toa tauhearona, ai taba nige nuamai se beruberu. ² Laulau headi taumaeamaea debana eai ta toreyamuidi, meta ai rib-agabaedio; nige borabora eai ai laulau eo Eaubada ena riba nige ai hepaisoa ponori, na mamohoina ai hemasaraha, ai moseuioimai tatao aridi eai, eo esa, esa ena nuatu abahe-duduraina nuaboena eai, Eaubada matana eai. ³ Ena ema evanelia se woeoi, isi taumatemate mo matadi eai se woeoi. ⁴ Paana tanoubu ta eaubadana isi nige se sunusunuma wa matadi i hegibudi, bena Keriso ena namanamari evaneliana marana tabu i sinaidi, iaede Eaubada tautaua. ⁵ Nige aibom wasamai ai laugugui, na Keriso Iesu ia ede Guiau, eo ai, emi heaheari tataomai, Iesu debana eai. ⁶ Paana Eaubada ena riba wa i ene, “Masigiri eai marana abo i sinama,” ia ede nuada eai i sinao, Eaubada italobaina marana namanamarina i lemao, Keriso ana ao eai.

⁷ Na ina eda gogo saesaena ta gulewa tano eai se ginauri, arinai ta abiabini, bena gigiborina lailai-aririna Eaubada arinai i laolaoma, nige ita arida eai.

Heaeai paisoana: ena amamna.

⁸ Tupo gamagari eai se hesahesabaimai, ia mo nige i heoitawaimai; nuamai se ponopono, ia mo nige nuamai se beruberu; ⁹ se heamamnamai, ia mo nige i nuagabaemai; se oihegurimai, ia mo nige ai baaea; ¹⁰ huia gamagari taumai eai Iesu ena mate ai bahei bena taumai eai Iesu ena mauri i masaraha. ¹¹ Ai ma-miamai huia gamagari se mosemoselae-mai mate arinai, Iesu debana eai, bena Iesu maurina hinage i masaraha bulumamai eai. ¹² Arinai ai boemai eai mate i paipaisoa, omi boeamiu eai mo mauri.

¹³ Sunuma earuana aie abi, gonogonoana doha uriuri eai se ribaei, “Ea awamamohoi, arinai ea ririba,” (Ps. 116.10) ai hinage, ai awamamohoi arinai aie riba, ¹⁴ ai nuatuiyao ia Guiau Iesu i hetorouioi wa, ai hinage abo i heteroesegaimai,

maemai Iesu, omi hinage maemai, abo i woeaesegaida ia nuanuana eai. ¹⁵ Paana ginauri gamagaridi omi debamiu eai se tubu, ainauia abo i tadada tatao gamagaridi aridi eai, abo lautoina hinage i tadada, Eaubada aba-hedebasaena.

¹⁶ Arinai taba nige nuamai se beruberu. Murimurimai tauna i tatatagorigori, ia mo boeamai tauna i heharihariu, asubena to asubena. ¹⁷ Ema amamna mamaladi huia kuukuu mo ai hearodi ina, namanamari nonoina lailaina taba nige ta ribaei, i lau e nige nosina, enamai i abiabinonohai. ¹⁸ Nige ai itaitalau ginauri masamasarahadi mo aridi eai, na matamai se lau ginauri tautauyamuidi aridi eai; paana ginauri ta itaitaidi isi ede ina huia ta enana, na ginauri nige ta itaitaidi isi ede huia i lau e nige nosina enana.

5

Mate matausina nige'e, Guiau ena heaeai tauna arinai.

¹ Ta nuatuiyao teina eda abamia, numa tano ta, ena i tatagorigori, numa esau Eaubada arinai abo ta abi, numana nige tatao nimadi eai se ginauri, i miahai i lau e nige nosina, galewa eai. ² Mamohoi teina arinai ai lepalepa, ema gadosisi taba mo ema abamia galewa eai wa arinai ai lulau, ³ ai lui abo taba nige ai ma-taukohakohamai. ⁴ Ina eda abamia eai ta miamimai, ai lepalepa paana nuamai se porohe, nige ai henua ma-tauahaahamai, na ai henua se heluimai, bena ina buluma enana ta i tauyamui mauri arinai. ⁵ Tauhetubuda ina dobila eai ta, ede Eaubada, heiheinoina ede Earua, i leama arida eai.

⁶ Arinai huia gamagari nuamai se adidiri; ai nuatui taumai eai ta ai miamiataubiga, Eaubada ede ai tausuarai, ⁷ paana sunuma eai ai laulau, nige itaita eai. ⁸ Ai nuakipikipi, ai henua mo taba taumai ai tausuaedi na Guiau arinai ai miatahitahi. ⁹ Taiede, ema aipate, ena ia arinai ai lageo, e ena sora ma-tausuaramai, ia nuana mo bena ai helolo. ¹⁰ Paana gamagarida abo ta taumasaraha Keriso ena aba-hekiraino paana eai, bena esa, esa, maisana i abi, i lolo e i baaea, ia tauna eai ma-miana wa ena laulau debadi eai.

¹¹ Eaubada matausina abina ai ata, arinai tatao ai lauhesomdi; ama ao saha i masarahao Eaubada arinai, ata bena i masaraha hinage emi nuatu abaheduduraina arinai nuaboeamiu eai. ¹² Nige bena ai hetorouioimai omi matamiu eai ina, na ai bena emi aba nualolo, abo abina au ata tatao edi riba au heuio, isi pota ana ao mo se nuatui, nuaboeana ana ao nige'e. ¹³ Ena ai eauyaure, Eaubada enana mo; ena nuamai se dudurai, omi debamiu eai ede.

Heaeai paioana: matapaana eo aipatena.

¹⁴ Na Eaubada gadosisina i hetahetaladuimai paana ai italobai tau esega tatao gamagamagari debadi eai ie mate,

arinai tatao gamagamagari ta ene se mateo. ¹⁵ Gamagaridi debadi eai ie mate wa, bena isi taumauri taba nige isibom enadi se miamia, na ia enana mo, ia wa isi debadi eai ie mate, eo se heterouioi.

¹⁶ Arinai huia ta taba nige tau esau ai nuatui, buluma nuanuatuina eai; Keriso mamohoi nabada eai ai nuatui doha ina, na huia ta nige'e. ¹⁷ Ena tau esau ia Keriso boeana eai, ia doga harihariuna; ginauri beabeadu se tausuarao, ginauri gamagaridi se hemala harihariu. ¹⁸ Ginauri gamagari Eaubada ena paipaisoa ede; laubiri i ginauri, ia eo ita, Keriso debana eai, eo i heteroda laubiri paisoana ta abi; ¹⁹ iaede ina, Eaubada ia Keriso boeana eai, ena laubiri debana eai tanoubu i abiuioi ia arinai, arinai tatao edi baaea giruna nige i tore potadi eai, na ena laubiri ribana ta i leama ita bena taubaheina. ²⁰ Arinai ai ede Keriso enana tautoro, Eaubada ai awamai eai i aiaiboda. Hinage ai aibodaimiu, Keriso debana eai, emi laubiri au ginauri Eaubada arinai. ²¹ Ita debada eai ia i hemala baaea, ia wa baaea nige abina i ata, bena ia boeana eai abo Eaubada ena laulau dudurai ta abi.

6

Heaeai paisoana: abiabina riba tohona.

¹ Ia maemai ai paipaisoa esega, ai aibodaimiu, tabu Eaubada ena ainauia au abi gaibui. ² Ena riba i ene, "Huia lolo eai arinamiu ea ataiei, mauri asubenana eai eau ea saguimiu." (Is. 49.8.)

Hage au ita, wau-ta huia lolona ede, wau-ta mauri asubenana. ³ Taba nige aba-alabesibesi ai tore esau ena dohila eai, ata ema heaeai paisoa se hegiru. ⁴ Na doha Eaubada ena heaheari mamohoi, ai hemasarahauioimai, ema taubiga lailai eai, ema amamna eai, ema deha eai, ama iwala baaea eai, ⁵ pidipidiri eai, tutugudu eai, tatao edi hetalagegaga eai, paisoa eai, silasilawa eai, ai aidabu eai; ⁶⁻⁷ nua-aamai eai, ema nuatulobai eai, ema torotahitahi eai, abilolomai eai, Earua Tabuna arinai, gadosisi ana ao mamohoina eai, riba mamohoina eai, eo Eaubada ena gigibori eai; laulau dudurai alahiana nima tutumai eai eo nima seuseurimai eai; ⁸ se hedebaseamai e se isugaraemai, wasamai i lolo e wasamai i baaea. Se abimai doha ai tatao borabora, ia mo ai mamohoimai; ⁹ doha se hekaumai, ia mo wasamai ie lai; doha ai mateo, ia mo ma-maurimai ta; doha se heamamnamai, ia mo nige se unuimai; ¹⁰ doha ma-nuadubumai, ia mo huia gamagamagari ai kode; doha ai taudeha, ia mo ai debamai eai tatao gamagari edi gogo abo se lai; doha manimaahaahamai, ia mo ginauri gamagamagari enamai ede.

¹¹ Omi Korinito e, awamai ai dabari ina, eo nuamai ai soeauri arimiu eai. ¹² Ai nige ai guduguduimiu, omibom emi gadosisi eai au nuanuahiuiomiu. ¹³ Emi heuio arimai eai — ea ribalaowa doha omi nanatuguyao — hage omi nuamiu au soehelaidima hinage.

Ekalesia hetabuuioina, eo heaana.

¹⁴ Tabu au hepatuuioimiu tatao nige se awamamohoi aridi eai. Laulau dudurai eo laulau baeaa edohana abo se hainuaesega? Mara eo masigiri edohana abo se heoiesegaidi?

¹⁵ Keriso eo Beliela edohana abo edi dohila esega? E tauataiena maena tauawayagara edohana abo edi tupo esega?

¹⁶ Eaubada ena dubu eo oitau, edohana abo ta abilabulabuiedi? Paana ita Eaubada maumaurina ena dubu; doha Eaubada i ribaei wa i ene,

“Eau boeadi eai abo ea mia, boeadi eai ea lau, eau abo edi Eaubada, isi abo egu tataoyao ede.

¹⁷ Arinai omi au pesagabaedima, aridi eai au torehesuarauioimiu, Guiau ie riba, ginauri biibiina tabu au abilau, arinai abo ea abigogoimiu,

¹⁸ eo eau abo tamamiu ede, omi abo nanatuguyao tatao eo sisine, Guiau gigibori i ribaei.

(Ex. 29.45; Is. 52.11; Hos. 1.10.)

7

¹ Egu nuanuai e, ribahesunuma ta ta abidio, besi bulumada eo earuada aba-hebiidi maudoidi aridi eai ta heaauioida, ta hetabuuioida, eda lolo ta abiheohi, Eaubada matausina eai.

Paulo nuana mamohoi ta ita.

² Nuamiu au soedima arimai eai; ai nige tau esau ai hebaaea, nige esau ai heata-ponori, nige esau arinai ai helolouioimai. ³ Egu riba eai ta nige bena ea hegirumiu paana doha ea ribaeyao, ai abimiu nuaboemai eai, ta mate esega e ta mauri esega. ⁴ Ea sunuma-aririemi, egu ribapasipasi lailai omi; henuabiga eai ea monau. Ema amamna gamagaridi boeadi eai ea kode ariariri.

⁵ Huia ne aie lage Makedonia wa, taumai nige edi abaaiyawasi, tupo gamagari eai amamna ai hearodi — murimuri eai haiabi eo boea eai matausi. ⁶ Taiede, Eaubada taunuadobidobi i henuabigadi, ia i henuabigamai hinage Tito ena laoma arinai. ⁷ Nige ena laoma mo, na nuabiga arinai omi au henuabigaei wa, wasana i heribamai emi gadosisi, emi dou, emi nuagigibori eau arigu eai, meta egu kode i helai ariri. ⁸ Mamohoi egu leta eai ea heporohemiu, ia mo

nige ribana ea bui (nuagu eai mo ea bui), ea nuatui leta wa i heamamnamiu, na huia kuukuuna eai mo. ⁹ Abotai ea kode, nige paana ea heamamnamiu, na paana emi nuaamamna i hemala nuabui; nuaamamna tabuna meta, bena tabu ginauri esau au hedeha ai debamai eai. ¹⁰ Nuadubu Eaubada nimana eai i hemala nuabui, i woeaida e ta mauri; nuabui ta arinai taba nige ta uio. Tanoubu nuadubuna mate mo i hepaisoaei. ¹¹ Au ita wau nuadubu Eaubada i leawa wa, debana eai au aipate ariri, au mode ariri bena au heduduraiuiomiu, au riba adidiri, au tagugu, au laukapore, nuamiu tai se gigibori, au hemaisauioimiu! Ginauri gamagaridi aridi eai emi nima-aa, baaea wa arinai, au hemasaraaha-auri. ¹² Enamiu ea uri wa, nige tau wa baaea i hetubu debana eai mo, eo nige baaea wa tauhearona debana eai, na bena omi emi nuagigibori arigu eai i masaraha, Eaubada matana eai. ¹³ Arinai ede nuamai se taruo.

Hinage ema kode ie lai, paana Tito ena kode aie ita, omi gamagarimiu earuana au heharihariu. ¹⁴ Egu ribapasipasi debamiu eai ia ea heribayao, na nige au hetaumaeamaeagu; doha riba gamagaridi ai lediwa isi ede mamohoi, ema ribapasipasiemi hinage Tito i lobai, mamohoina. ¹⁵ Ena gadosisi arimiu eai i lai ariri, paana emi awaabi ena riba arinai i henuhenuaisini doha ma-matausimiu, ma-tabutabubumiu, ia au oiyami. ¹⁶ Eau ea kode, paana ginauri gamagaridi aridi eai ea sunumaaririemi.

8

Ekalesia edi aiainauia, Makedonia iiladi.

¹ Hinage, egu tataoyao e, Eaubada ena ainauia Makedonia dubudi aridi eai, wasana bena ea heribamiu, ² isi porohe lailai eai se lauitadi, taiede edi abakode lailai ede tatao se sagusaguidi, se ainauia ariri, edi gogo ede. ³ Ea ribahe-masarahadi ina, edi adidiri gonogonoana se ginauri, to edi adidiri gonogonoana se dioi hinage, isibom edi nua-eari eai. ⁴ Se aiboda adidiri arimai eai bena isi hinage edi tupo se abi, ainauia ta arinai, hetabu tataodi eda aba saguidi wa. ⁵ Ai ema nuanuatu se dioi, isibom se moseuioidi baguna Guiau arinai, eo ai arimai eai hinage, Eaubada ena nuatu debana eai. ⁶ Arinai Tito ai aibodai, ia ainauia ta tauhetubuna, bena paisoa saesaena ta i heohi omi boeamiu eai. ⁷ Doha ginauri gamagaridi aridi eai au nuahai ariri — sunuma eai, ribariba eai, sonoga eai, nuagigibori eai, eo emi gadosisi eai, ai arimai eai — au itakomakomanimiu bena ainauia ta arinai hinage au nuahai.

⁸ Ina riba ta nige ea lauhesommiu, na hari tatao edi nuagigibori eai emi gadosisi ana ao mamohoi bena ea lauita.

⁹ Paana eda Guiau Iesu Keriso ena ainauia omi abina au atao, ena gogo i lai ariri, ia mo i hemala gogogesagesa, bena omi gogo lailaina au lobai, ia ena deha lailai debana eai. ¹⁰ Na egu nuatu ina: ea ene i lolo paisoa ta borimai esau eai au hetubu wa, au heohi, nuamiu heiheinoina au hemasaraaha. ¹¹ emi nua-eari au hemamohoiei, saha nimamiu eai au abiyao arinai paisoa wa au heohi. ¹² Ena tau ie ea mo, saha wa ie abi arinai abo ta italobai, nige saha ie deha wa arinai. ¹³ Egu riba ta nige bena headi porohe ta abo se buigabaei, na omi mo abo au bahei, ¹⁴ na bena emi nonoi gonogonoana, emi abihelai eai headi edi deha eai abo au heaidi, isi edi abihelai eai abo omi se saguimi, arinai abo nonoimi gonogonoana. ¹⁵ Doha se uri wa, “Ia ana lailaina i tanogogoi ana aitore nige’e, ia begana mo i tanogogoi, i abi-gonogonoaiei.”

¹⁶ Na Eaubada ta lautoiei, ia Tito nuana i hegigibori ariri omi arimiu eai, enamiu i taubiga. ¹⁷ Mamohoi awamai ie abi, na iabom ena nuagigibori eai i torohai i laowa arimiu eai. ¹⁸ Maena eda tau esau ai hetamaridiwa, ia wasana i tadada ariri ekalesia gamagari tupo gamagari boeadi eai, ana paisoa evanelia enana, debana eai. ¹⁹ Hinage ekalesia ia se tauribaei bena maemai ai adau, ainauia ta paisoana debana eai, iaede ai ginaginauri Eaubada hedebaseana, eo ema nua-eari heiheinoina. ²⁰ Ai aipate bena tabu tatao edi abahegirumai, ainauia saesaena ta hepahepasoaina eai, ²¹ bena ema abiabina i lolo mo, nige Eaubada matana eai mo na tatao matadi eai hinage. ²² Eda tau ta maediyao ai hetamariyawa, huia gamagari ena nuagigibori ai itayao, na teina mo arinai i nuagigibori ariri: ena sunuma lailai ie tore omi arimiu eai. ²³ Ena headi Tito se hetala, au ene ia agu sagu ede, helegu taupaisoa omi debamiu eai; eo eda tataoyao headi wa, isi edi dubu se tauribaedi, Keriso namanamarina isi. ²⁴ Arinai emi gadosisi bena au hemamohoiei isi aridi eai, ekalesia gamagaridi matadi eai; ema ribapasipasi abo au hemamohoiei hinage.

9

¹ Hetabu tataodi eda aba-saguidi wa, taba nige saha ea uri; omi abina au atao, ² emi eari tupo eai ta abina ea atao hinage, iaede ea ribapasipasiei Makedonia tataodi aridi eai, ea ene Akaia se nonohao, borimai esega i lauo; emi nuagigibori isi gamagaridi i heteiedi. ³ Na eda tataoyao ta ea hetamaridiwa bena tabu ema ribapasipasi omi debamiu eai nige aniona, na bena au nonoha, doha ea heribadio ea ene abo au nonoha. ⁴ Ata Makedonia headi maemai ai laowa ai lobaimiu nige au nonoha, abo ai (eo ata bena omi hinage) ai mae paana doha ai sunuma gaibu. ⁵ Arinai ea ene i lolo eda tataoyao ea

aibodaidi se bagunawa, emi ainauia au ribahesunumaei wa abo au abinonohai, ainauiana omibom nuamiu, taba nige se duduimiu.

Ita ta aiainauia, Eaubada hinage i ainauiaida.

⁶ Teina ea ribaei: ia tuma begana mo i hesuru, begana mo abo i lauoelai, na ia i hesuru-auri, ana maudoudoina abo i lauoelai. ⁷ Esau to esau nuana eai i nuatuiyao bena i ginauri, iaede abo i ginauri, tabu, ma-nuaoipirina, e paana se lauhesom, paana Eaubada ainauia tautorena ma nuakodena ia ede i gadosisie. ⁸ Eaubada abina i ata ainauia maudoina arimiu eai i hetadada, omi ginauri gamagaridi abo gonoamiu au abiheohidi, paisoa lolodi gamagamagari arimiu eai abo se tadada. ⁹ Doha se uriyao,

“Ia tauhesuru-auri, gogogesagesa tataodi i ainauiaidi; ena laulau dudurai i otahai i lau e nige nosina.”

(Is. 55.10; Hos. 10.12.)

¹⁰ Ia tuma tauhesuhesuruna i ainauiai, eo falawa ana i heai, omi hinage emi umauma abo i helaiyawa, eo emi laulau dudurai masurina abo i hegamagari. ¹¹ Emi aiainauia-daoi debana eai emi gogo abo se helai, ai debamai eai, abo Eaubada aba-aitoiena. ¹² Ainauia ta paipaisoaina nige hetabu tataodi edi deha mo i sagui, na Eaubada hedebasaena i helai hinage. ¹³ Paana ami ao arinai i masaraha, tatao Eaubada se hedebasaei, evanelia awaabina doha omi awamiu eai se ataiei, eo emi aiainauia se ita, isi aridi eai eo tatao gamagaridi aridi eai; ¹⁴ isi enamiu abo se aiboda, eo nuadi se laowa arimiu eai, Eaubada ena ainauia lailai omi boeamiu eai, abo i abiitadi. ¹⁵ Eaubada mo ta lautoiei, ena ainauia saesae-aririna taba nige ta ribaei!

10

Paulo ena awa-aposotolo bena i hemamohoiei.

Gal. 1.11-2.14

¹ Eau Paulo ina, ea aibodaimiu ta, Keriso nuatudobido-biuioina eo taubigana debadi eai — eau, boeamiu eai ea maemaee wa, ea tausaraemiu abo ea nuakipikipi ariri! — ² ea awanorimiu, bena tabu eau boeamiu eai abo riba addiri ea hetoro, doha ea abi headi aridi eai, isi wa se hegihegirumai si ene tanoubu kamanina eai ai laulau. ³ Tanoubu eai mamiamai, ia mo ema iaiala nige doha tanoubu eai ta abiabina, ⁴ paana ina iala ta alahiana nige tanoubu enana, na se gigi-bori Eaubada matana eai, iala bonadi adiadiridi se oioiheguridi. ⁵ Tatao edi nuanuatu se gabagabadobeidi, eo ginauri saesaedi hinage Eaubada italobaina se tautaugudui, eo nuatu gamagaridi se auaudi, se hetahetaladuidi Keriso awaabina

arinai. ⁶ Au nonoha awayagara gamagari au hedudurai, ena omi awaabi maudoina au abiyao.

⁷ Au italau ginauri matamiu eai. Ena esau i sunumauioi bena ia Keriso enana, hage nuana i sae, ena ia Keriso enana, ai hinage. ⁸ Ena taba ea ribapasipasi ariri paana se heterogu tanuaga, iaede Guiau i leama omi debamiu eai, bena ea abihetoromiu, nige bena ea laudobeimiu, taba nige esau i hetau-maeamaeagu. ⁹ Taba nige egu leta eai bena ea hematausimiu. ¹⁰ Doha si ene, “Ena leta se gigibori, eo se adidiri, na iabom ena taumasaraha eai i beruberu, eo ena riba taba nige ta nuatui.” ¹¹ Riba ta tauribaena taba se nuatui, ema riba saha leta eai, huia ne ai hari tupo eai, temeta ama ao ede, huia ne ai boeamiu eai. ¹² Ai taba nige ai toreuioimai, e ai lauitauioimai, tauribahetauseuioidi peledi aridi eai. Isi isibom mo aridi eai se nononoiuioidi, isibom mo aridi eai se laulauitauioidi, edi nuasibasiba nige’e.

¹³ Ema ribapasipasi eai taba nige aibom ema nonoi ai dioi, Eaubada ama sigasiga i nonoiyao, iaede i lage arimiu eai wa. ¹⁴ Nige bena ai helaiuioimai, doha nige ai lagewao arimiu eai; ai taulage baguna arimiu eai, Keriso ena evanelia ai ede ai leawa. ¹⁵ Nige ai ribapasipasi gaibu, bena hari tatao adi paisoa ai ene ai ai ginauri; na ema nuatu adidiri taba mo emi sunuma i tubu, abo ema tupo arimiu eai i helai. ¹⁶ Bena evanelia ai guguai, teha headi hari tupomiu eai, nige ama paisoa hari tatao edi tupo eai mo ai ribapasipasiei. ¹⁷ Na eai bena i ribapasipasi, taba Guiau mo i ribapasipasiei. ¹⁸ Paana tauribahetauseuioi, ia nige i lolo, na tau wa Eaubada i ribahetausei, ia mo i lolo ede.

11

Eaubada ena aiaromagigiri, tatao debadi eai.

¹ Sora egu huia au leama, egu riba gaibu begana bena ea ribaei. Mamohoi arigu eai au taubiga ariri! ² Debamiu eai ea aiaromagigiri, Eaubada ena aiaromagigiri eai; paana doha ea ribahetawasoraemiu Keriso arinai, doha hasara nuanua-supuna, ma-nuaana se woeai monena esega nuanuana eai. ³ Na ea matausi, doha mota Eva i borai wa, ena sonoga borabora eai, ata omi nuamiu se woeahesuaradi, Keriso gadosisina, aana, tahunuana, au abigabaei. ⁴ Ena esau i laowa Iesu udoi i guguai, nige ia wa ai ai guguai, e ena earua udoi au abi, nige doha arimai eai aue abi wa, e evanelia esau ai nige ai leawa, doha au nonoha ariri bena au ataiwatai. ⁵ Ia mo ea ene aposotolo saesaedi ta, eau nige ea murimuritaidi. ⁶ Ata bena ribariba eai awagu nige se biga, iamo italobaina ea abiyao, doha i masarahao arimiu eai, ema laulau gamagaridi eai.

⁷ Ea abi baaea wa, paana ea hedobidobiuiouigu matamiu eai bena ea lausiniui, to Eaubada ena evanelia enamiu ea guguai, nige maisana? ⁸ Hari dubu aridi eai ea abigaibu, paana isi egu dohila se hemaisa, bena gonoagu enamiu ea paisoa. ⁹ Boeamiu eai ea mimia wa, huia headi ea dedeha, ia mo nige esau arimi eai ea heporohe, paana eda tataoyao Makedonia eai se laoma wa, isi egu deha eai se saguigu. Arinai ea itawatauiouigu, bena tabu ea heporohemiu, hinage doha meta abo egu abiabi ede. ¹⁰ Doha Keriso ena riba mamohoi arigu eai ie ota, arinai Akaia edi teha eai egu ribapasipasi eai ta taba nige tau esau i guduguduigu. ¹¹ Paana saha? Paana nige ea gadosisiemi? Agutoi! Eaubada abina i ata ea gadosisiemi.

¹² Na egu abiabi ta abo ea laelaie, taba nige edi huia ea mosedi, isi wa edi nuasaesae eai si ene bena edi paipaisoa gonoana doha ede ai.

Taulauheata borabora ribahesanapuena.

¹³ Tatao ta isi aposotolo borabora, adi ao mamohoi se toreyamuidi, bena adi ao doha Keriso ena aposotolo. ¹⁴ Taba nige ta noo, Satani ia hinage abina i ata mara aneruna ana ao i lui. ¹⁵ Arinai kamanina, ia ena heaheari tataodi adi ao abo se bui hinage, doha laulau dudurai heahearidi adi ao. Adi siga eai abo adi paipaisoa maisana.

Paulo se sinari, arinai ena tupo i hemasaraha.

¹⁶ Ea ribauio, tabu esau i ene ea eayuaure. Ena eau tauyauyaure, besi au taubiga, na ea ribapasipasi begana. ¹⁷ (Agutoi egu riba ta nige Guiau ena lauhesom, na eaubogu egu eayuaure eai, doha bena ea helolouioigu begana. ¹⁸ Headi tanoubu ginauridi aridi eai se ribapasipasi, eau hinage besi ea ribapasipasi.) ¹⁹ Omi au sibasiba ariri, hage au eari begana tauyauyaure aridi eai! ²⁰ Paana tau ena i abimiu au hemala tauauau, e i hebaaeamiu, e iabom i helolouioi omi debamiu eai, e i saetawatawaemi, e i oipareaimiu, taiede au nuapaipai mo. ²¹ Egu riba eai ta ea mae, doha ai mo ai beruberu ariri.

Eai gonoana saha i ribapasipasiei — ea ribariba doha tauyauyaure ina — eau gonoagu hinage taba ea ribapasipasiei. ²² Bena isi Heberu tataodi? Eau hinage. Isi Isaraela? Eau hinage. Isi Aberahama ana isimurita? Eau hinage. ²³ Isi Keriso ena heaheari? Eau mo ea dioidi — ea ribariba doha tau esau aruana se loi — eau mo agu paisoa se lalai ariri, egu huia se tutuguduigu se gamagari ariri, se pidirigu i gamagari ariri, mate ea hanahanau mahisa. ²⁴ Ma-haligigi Iudea se pidirigu, edi pidipidiri eai wa, esega mo abo i lage tatao-labui-se-mate. ²⁵ Ma-haiona tue eai se pidirigu; ma esega se lauwe'uigu. Ma-

haiona waga eai ea sariri; maiona esega eo asubena esega gabogabo eai ea alealelei; ²⁶ adaadau eai huia se gamagari, aba-baaea saga eai, aba-baaea tauhemahemanabara nimadi eai, aba-baaea eaubogu egu eanua tataodi nimadi eai, aba-baaea Murimuri-tataodi nimadi eai, aba-baaea eanua lailai boeana eai, aba-baaea barabara eai, aba-baaea gabogabo eai, aba-baaea eda tataoyao borabora nimadi eai; ²⁷ paisoa porohe eai eo amamna eai, silasilawa eai, guriam eo gadomagu eai, aiaidabu eai huia se gamagari ariri, waoo eai eo nige ama lulu. ²⁸ Ginauri maudoina ta potana eai, ede ekalesia porohedi ea bahebahei, asubena gamagamagari. ²⁹ Eai i beruberu, na eau nige ea beruberu hinage? Eai se abihebeu, na eau nige nuagu i alasi?

³⁰ Ena bena ea ribapasipasi, besi ginauri headi egu beruberu se hemasaraaha, isi abo ea ribapasipasiedi. ³¹ Eaubada, eda Guiau Iesu Keriso Tamana, ia abigu i ata nige ea riba borabora. ³² Damaseko eai Wasawasa Aretasi ena gavana ie riba edi eanua dobiladi gududi se nahanahaidi, bena se toaigu, ³³ na numa esau eanua tonana eai, tomlapaina eai ea sosora, bosa eai se hedawedobeigu, to nimana eai ea dadago.

12

¹ Ea ribapasipasi abo saha ea lobai? Taiede, Guiau ena enosuai eo ena hemahemasaraaha abo ea ribaedi. ² Tau esau Keriso boeana eai ea nuatui, borimai saudoudoi-hasi se lauo, ia se abiisini galewa isihehaionana eai — ibai ia tauna eai, e tauna i tausuaraei, nige ea nuatui, Eaubada iabom abina ie ata. ³ Tau ta eau abina ea ata, wau se abiisini Paradaiso eai wa, ia tauna mamohoi eai e tauna i tausuaraei, nige ea nuatui, Eaubada iabom — ⁴ ia riba didigadi taba nige ta ribaedi, i ataiedi, doha tau nige gonoana i ribaribaedi. ⁵ Tau ta debana eai abo ea ribapasipasi, eaubogu enagu taba nige'e, egu beruberu mo ea ribapasipasiedi. ⁶ Ena ea henua ea ribapasipasiuioigu, taba nige ea eauyaure doha nei, paana egu riba abo riba mamohoi. Na besi awagu ea tawai, ata tau esau i heasisiaririegu, nige doha agu ao eai i itagu mo gonoana, e awagu eai i ataiegu. ⁷ Paana ginauri se hemasara-hadi arigu eai se lai ariri, ata ea nuasaesae-daoui, arinai nuri esau bulumagu eai se leama, Satani ena heaheari ena abahesabaigu, ata ea nuasaesae-daoui. ⁸ Ma-haiona ea awanori Guiau arinai, wau ginauri wa bena i abihesuaraei; ⁹ na ia i ribalaoma arigu eai i ene, "Egu ainauia oa gonoam ede, paana egu gigibori abo se hemamohoiei beruberu arinai." Besi abo ea kode ariri, egu beruberu mo abo ea ribapasipasiedi, bena Keriso ena adidiri arigu eai i taru. ¹⁰ Keriso debana eai nuagu i lolo ena beruberu, riba isuisugara, miamia oioiuradi,

heamamna, baaea lailaidi, ea hearodi; paana huia ne ea beruberu abo ea adidiri ede.

¹¹ Ea hemala eauyaure! Omi ede au duduigu ta. I lolo taba omi tauribasaguigu. Eau nige saha, ia mo aposotolo saeseariridi isi nige se hemurigu. ¹² Aposotolo mamohi abaitalobaina ai hemasarahadio omi boeamiu eai, ma taubigamai, heiheinoidi, eo noo, eo paisoa gigiboridi eai. ¹³ Ginauri saha arinai omi hari ekalesia bodadi au hemuridi, ginauri esega eai mo, iaede porohegu nige au bahei doha isi? Egu ponori eai ta au ribagigirigu!

¹⁴ Ina egu huia he-haionana ta ea nonoha bena ea laowa. Taba nige ea heporohemiu, nige emi gogo ea gadosisie, na omi mo; paana merumeru nige adi paisoa tamadiyao sinadayao enadi se peigogo, na tamadiyao sinadiyao isi merumeru enadi taupeigogo. ¹⁵ ma kodearirigu abo egu gogo ea gabaei, eo eaubogu hinage ea gabauioigu, earuamiu debadi eai. Ena egu gadosisi arimiu eai i lai ariri, abo omi emi gadosisi arigu eai i gagiri? ¹⁶ Ata bena nige ea heporohemiu wa paana eau tausanapu, abo au ene egu sanapu eaumuyamui eai ea toaimiu. ¹⁷ Isi ea hetamaridiwa arimiu eai wa, debadi eai ea helolouioigu wa? ¹⁸ Eau Tito ea dudui i laowa, eo eda tau esau maena ea hetamariyawa. Tito i laowa arimiu eai i helolouioi wa? Earuana esega ai tataomai labui i woewoaimai, e nige'e? Eo dobilana esega ai laulauei, e nige'e?

¹⁹ Ata bena au ene ai heduheduduraiuioimai ina omi matamiu eai, na riba ta Keriso boeana eai ai ribaei, Eaubada matana eai. Na egu nuanuai e, agutoi, ginauri gamagaridi ta aba-heatamiu ede. ²⁰ Ea matausi ata ea lobaimiu omi au hemala udoi, ata hinage au lobaigu eau udoi, nige doha ta henua ta lobaiuioida; ata haiabi, hewaiunu, ouyalayala, biribiri, hari dodoga ta ribariba-hebaaeadi, toretoreyamui, nuasaesae nuatudi, oipiri tanuaga aridi eai. ²¹ Ea matausi ata egu huia uiowa eai egu Eaubada abo i hetaumaeamaeagu omi matamiu eai, ata ea nuadubu paana headi baaea eai se beu na nige se nuabuiuio, edi lelehi bii aridi eai, edi laulau baaea eo edi matamataeo debadi eai.

13

¹ Egu huia hehaionana ina ea laolaowa arimiu eai. Taita labui e haiona awadi eai riba gamagaridi abo se masaraha. ² Doha ea ribaeyao egu huia helabuina eai, huia ne eau maemiu wa, hinage ea ribauio, ma tau-suaragu ta, isi baaea se hetubu taba nige ea nuatoatoaidi: ³ wau abaitalobaina au eooi wa, mamohi Keriso iaede boeagu eai i ribariba? Ia ena abiabi arimiu eai nige se beruberu, na ia boeamiu eai

i gigibori. ⁴ Ia ma-tauberuberuna eai se hesatauro wa, ia mo ma-maurina Eaubada ena gigibori debana eai. Ai hinage ma-beruberumai ia boeana eai, na ema abiabimiu eai ai ma-maurimai, ia maemai, Eaubada ena gigibori debana eai.

⁵ Hage au eouuioimiu, sunuma ta boeana eai au laulau e nige'e? Au lauitauioimiu. Amnana au ataiei e nige'e, Iesu Keriso ia boeamiu eai — ena lauita eai nige au ene au uioo!

⁶ Ea sunusunuma, taba nige nuamiu se labulabui ai debamai eai, au ene ai uio e nige'e. ⁷ Ai uura Eaubada arinai bena tabu baaea au hetubu, nige bena ai wasamai se lolo mo, na omi, bena emi abiabi gamagari se dudurai, ena ai baaea e nige'e.

⁸ Paana taba nige mamohoina ta ialai, mamohoina ta paisoa-sagui mo. ⁹ Nei huiadi ai ai beruberu, omi au adidiri, ai kode ariri. Eo teina hinage ai uuraei, bena emi lolo au abiheohi.

¹⁰ Riba ta ea uri enamiu, sora ma-miasuaragu, bena ea lage boeamiu eai abo egu heduhedudurai taba nige i porohe; Eaubada i tauribaegu tanuaga, bena ea laulauhetoro, nige bena ea hetahetatagorigori.

¹¹ Egu tataoyao e, egu riba anasiga, aioni. Emi laulau bena lolo au abiheohi, egu riba au ataiei, au hainuaesega, loni boeana eai au miamia, gadosisi eo loni Eaubadana ia abo maemiu. ¹² Alagoi tabuna eai omi esau to esau, au aiaitoiuioimiu. ¹³ Hetabu tataodi gamagaridi se lautoiemiu.

¹⁴ Guiau Iesu Keriso ena ainauia, Eaubada ena gadosisi, Earua Tabuna heoiesegana, omi gamagarimiu maemiu ede. Amen.*

* **13:14:** Uriuri helabuina ta Pilipi eai se uri, Makedonia eanuana esau, Tito eo Lukasi nimadi eai.

PAULO ENA URIURI GALATIA ENADI

¹ Eau Paulo, aposotolo tauna — nige tatao enadi eo nige tatao se hetorogu, na Iesu Keriso debana eai eo Eaubada, Tamana, iaede mate eai Iesu i hetorouioi wa — ² eo egu tataoyao gamagaridi isi maeguyao, omi ekalesia Galatia enamiu ina:

³ Ainauia bena enamiu, eo loni, Eaubada Tamada arinai i laowa, eo eda Guiau Iesu Keriso, ⁴ ia i moselaeuioi wa eda baaea debadi eai, teina tanoubu baaeana eai ta bena i abihemaurida, Eaubada, Tamada, ena nuatu i lauwaitai ede; ⁵ ana tepo hedebaseana i abi, i lau e huia nige nosina. Amen.

⁶ Ea nooemiu, paana huiana i kuu ariri na tauyogahaimiu Keriso ena ainauia boeana eai wa au nuagabaei, au sinibui evanelia udoi hesabana — ⁷ evanelia udoina nige'e, na headi mo nuamiu se heponopono, Keriso ena evanelia bena se hegewagewa. ⁸ Na ena ai, e aneru esau galewa eai i laoma, evanelia udoi i guguiaimiu, nige doha evanelia ai ai guguiaimiu wa, ia abo se riba-hebaaea aririei. ⁹ Doha ai heribamiu wa, hinage abo-ina ea heribauioimiu ta, ea ene, Ena taba tau esau evanelia udoi i guguiaimiu, nige doha evanelia ai guguiaimiu wa, ia abo se hebaaea aririei.

Paulo ena evanelia, nige i abi hari aposotolo aridi eai, na Eaubada ena hemahemasaraha eai.

Gal. 1.10-2.14

¹⁰ Eau egu aiaipate saha, bena tatao nuadi ea hebiga, e Eaubada? E bena tatao nuadi ea helolodi? Ena eau soragu tatao ea henuhenualolodi, taba nige eau Keriso ena heaheari tauna.

¹¹ Na egu tataoyao e, ea heribamiu ta bena au nuatui, evanelia wa ea lauguguiaimiu, nige tatao enadi. ¹² Nige tau esau arinai ea abi, nige tau esau i heatagu, na Iesu Keriso ena hemahemasaraha eai mo ea aabi. ¹³ Egu miamia nabada wa, Iudea edi tabatabaohu dobilana eai, wasana au ataieyao, Eaubada ena ekalesia eau tauheamamnadi ede, taba nige ta ribaei, eo ea hetatagorigoridi; ¹⁴ eo Iudea edi tabaohu arinai egu eanua tataodi ea saetawatawaedi, tamamaiyao edi laulau aridi eai nuagu se gigibori ariariri. ¹⁵ Na Eaubada ena nualolo ede, sinagu bogana eai i abihineriguo, huia ne ena ainauia eai i eogahaigu wa, ¹⁶ Natuna i hemasarahayama eau boeagu eai, bena Murimuri-tataodi aridi eai ia ea laugugui; nei huiana ne eau nige buluma eo osina aridi eai ea oioiriba, ¹⁷ hinage nige ea sae Ierusalem, isi aposotolo eai se muga-mugaiegu wa aridi eai, na ea lausua mo Arabia eai; abotai ea seuio Damaseko eai.

¹⁸ Borimai haiona murina eai abotai ea sasae Ierusalem, bena Petero ea ita, ia arinai ea mimia asubena saudoudoi-haligigi. ¹⁹ Aposotolo headi nige ea itadi, Iamesi iabom mo, ia Guiau ena tau wa. ²⁰ (Teina ginauridi ea uriuridiwa, agutoi, Eaubada matana eai nige ea boraimiu!) ²¹ Murina eai ea laoma Suria eo Kilikia tehadi eai. ²² Keriso ena ekalesia Iudea eai sora agu ao se hekau; ²³ wasa se ribaei mo se ataiei, si ene, "Nabada tauheamamnada wa, sunumana lahina i hebahebaaea wa, wau-ta i gugugui." ²⁴ Eau debagu eai Eaubada se hedebasaei.

2

¹ Borimai saudoudoi- hasi murina eai abo ea seuio Ierusalem, maegu Banaba. Tito hinage ea abi ea woeai. ² Earua ena woeawoea eai ea sasae; egu laulaugugua Murimuri-tataodi boeadi eai bena ea hemasara (isi headi wasadi se lai maeguyao, aibom mo ai oigogo) ata ma aita tau-gaibugu, e dohila udoi eai ea aiaita tau. ³ Tito maegu wa, ia Heleni tauna, taiede nige se dudu bena ia se heperitome. ⁴ Na paana eda tataoyao borabora headi se woea-eamuyamuidima boeamai eai, se lusorama bena ema iairihai miamiana Keriso boeana eai ai lobai wa, se itasipoi bena se auuioimai. ⁵ Aridi eai nige begana aie eari, nige maesega, bena evanelia mamohoina ai sogohi enamiu. ⁶ Na isi headi se awatanuagaedi (edi tausae nige ea nuatui; Eaubada tatao nige i heasisinapaidi) ea 'ne isi wa wasadi se tanuaga, nige saha se leama arigu eai; ⁷ nige'e, na se itagu evanelia tau-nige-peritome enadi se leamao eau arigu eai, doha evanelia tau-peritome enadi se moseyao Petero arinai ⁸ (paana ia wa Petero boeana eai i paipaisoa tau-peritome enadi, eau boeagu eai i paipaisoa hinage, Murimuri-tataodi enadi), ⁹ eo ainauia arigu eai se leama wa se ita, abotai Iamesi eo Petero eo Ioane, isi ekalesia eai du lailaidi ede, se nimaluimai, eau eo Banaba, heoiesega nimatutuna ede se heleleama, bena ai abo Murimuri-tataodi aridi eai ai lau, isi abo tau-peritome aridi eai se lau; ¹⁰ ginauri esega mo si ene bena tatao gogogesagesa ai nuanuatuidi, iaede egu laulau meta.

¹¹⁻¹² Na huia ne Petero ie laoma Anetioka eai, matana eai ea taugudui paana ia ana giru. Paana tatao headi sora nige Iamesi arinai se laoma, ia maena Murimuri-tataodi se aiaigogo; na isi wa se lagema abotai i abihesarauioi, tau-peritome peledi i matausiedi. ¹³ Ia maenayao Iudea headi hinage nige ao-masaraha eai se laulau, i lau e Banaba hinage se hearulaei edi abi-borabora eai. ¹⁴ Na eau ea ita edi laulau nige i dudurai doha evanelia ribana mamohoina laulauna, isi gamagaridi matadi eai ea riba dudurai Petero arinai, ea

ene, “Ena oa Iudea tauna, u miamia doha Murimuri-tauna, nige doha Iudea tauna, ue saha Murimuri-tataodi u lauhesomdi bena Iudea edi laulau se lauwataidi?” ¹⁵ Ai ede se labasimai Iudea tataomai, nige Murimuri-tataodi taulaulau baaea, ¹⁶ taiede ai itayao laugagaao paisoana debana eai taba nige tau esau i dudurai, na Iesu Keriso sunumaina debana eai mo, ai hinage Iesu Keriso ai awamamohoieiyao, bena ema sunuma Iesu Keriso arinai debana eai se heduduraimai, nige laugagaao paisoana debana eai, paana laugagaao paisoana debana eai taba nige tau esau i dudurai. ¹⁷⁻¹⁸ Na ena ita ta aiaipate bena Keriso boeana eai ta dudurai, na ita mabaaeada eai ta laulau, abo ta ’ne Keriso ia baaea ena heaheari, wa? Nige ariariri! Na ginauri wa ea lopahaidio, ena ea heterouioidi, abo ea hemasarahauioigu ede, eau laugagaao tau-utusi. ¹⁹ Paana eau laugagaao debana eai ea mateo laugagaao arinai, bena Eaubada arinai ea mauri. ²⁰ Eau Keriso maegu se hesatauroguo; taiede hinage ea mauri, na eau mo nige’e, Keriso ede ie mauri eau boeagu eai; na mauri wa bulumagu eai ta Eaubada natuna sunumana debana eai ea miamiai, ia i gadosisiegu eo i moselaeuioui eau debagu eai. ²¹ Eaubada ena ainai nige ea gudugudui, paana ena taba laugagaao debana eai aba heduduraida i laoma, abo Keriso ie mate gaibu.

3

Earua se ainai, sunuma debana eai, nige laugagaao paisoana eai.

¹ O Galatia euyauremiu e! Eai i iwalaemiu to riba mamohoina nige au awaabiei, omi matamiu eai Iesu Keriso se hetero hemasarahana, ia ede se hesatauro wa? ² Teina mo bena ea hesioimiu: Earua wa omi aue abi laugagaao paipaisodi eai, e ataataiena, sunuma eai? ³ Au euyaure doha nei? Earua arinai au hetubu, abotai abo buluma eai au heohi? ⁴ Amamna gamagaridi au hearogaibuidi, wa? — ena mamohoi aniodi nige’e. ⁵ Ia Earua i leawa wa i bobodiemi, eo laulau gigiboridi boemiu eai i hetubudi, laugagaao paipaisoana eai i ginauridi, e ataiena eai, ma sunumana?

⁶ Doha hinage Aberahama “Eaubada i awamamohoiei, ia arinai se awalaulau dudurai.” ⁷ Iaede arinai au ita, sunuma tataodi isi ede Aberahama nanatunayao. ⁸ Uriuri tabudi se itamaodai Eaubada Murimuri-tataodi abo i heduduraidi sunuma debana eai, evanelia se guguia-maodai hinage Aberahama arinai, si ene, “Oa debam eai basileia gamagamagari abo se helolodi.” ⁹ Arinai ede, isi wa sunuma tataodi se helolodi, maedi Aberahama, sunuma tauna wa.

10 Isi gamagaridi laugagaeo paipaisoadi aridi eai se sunusunumalau, isi soradi riba-hebaaea potadi eai ie ota; paana se uriyao si ene, “Esau, esau, ginauri gamagaridi laugagaeo bukana eai se uridi, nige i miamiaidi e i laulauwataidi, ia se riba-hebaaea.” 11 I masaraha ariri Eaubada matana eai nige tau esau se hedudurai laugagaeo debana eai, paana “Tau-laulaududurai sunumana eai abo i mauri;” 12 na laugagaeo paana nige sunuma, doha si ene, “Tau ena i laulauedi mo, abo i mauri debadi eai.” 13 Keriso laugagaeo riba-hebaeana eai i lebohaida, paana ia i hemala riba-hebaaea, ita debada eai — doha si uriyao, “Tau esa se hebasisae oegi eai, ia se riba-hebaeai” (Deu. 21.23)— 14 arinai Keriso Iesu debana eai Aberahama helolona abo i taru Murimuri-tataodi potadi eai, ita Earua se ribahesunumaei wa abo ta hearo, sunuma debana eai.

15 Egu tataoyao e, ea riba doha tatao edi riba; ena tatao se hai-ribahesunuma, taiede ena edi riba tohona, taba nige tau esau riba wa i hekuu e i hemotula. 16 Ribahesunumadi wa se ribaedi Aberahama arinai eo pesipesina esau. Nige si ene, “Eo pesipesimiyao aridi eai,” doha se gamagari; na esega mo, “Eo oa pesipesim arinai,” iaede Keriso. 17 Egu riba doha ina: ribahesunuma wa Eaubada i ribahetohonaeyao, abotai laugagaeo i laoma murita, borimai handere hasi eo tau-esega-i-mate saudoudoi se lauo, arinai ia taba nige ribahesunuma i helautom. 18 Paana ena ginauri abiabina laugagaeo eai i laoma taba nige ta 'ne ribahesunuma eai ta abiabini; ia mo Eaubada i mosei wa Aberahama arinai, ribahesunuma eai.

19 Laugagaeo ne ana paisoa saha? Se hetubu baaea debana eai, i lau e pesipesina wa abo i laoma, ia arinai ribahesunuma wa se ribaei; eo aneru se hetubu, taulaulaubiri awana eai. 20 Esa wa taulaubiri ta atai, ta nuatui tatao hisa abo se laubiri; na Eaubada esega mo.

21 Abo laugagaeo ta ene Eaubada ena ribahesunuma i laudoiei? Taba nige'e; ena laugagaeo esau se leama gonoana tau i hemaui, abo ta ene laulaududurai laugagaeo eai ta aabi. 22 Na uriuri tabuna ginauri gamagaridi i toredi baaea boeana eai, na ribahesunuma wa Iesu Keriso sunumana debana eai, iaede abo se mosei isi tauawamamohoi aridi eai.

23 Sunuma sora nige i laoma wa, ita laugagaeo boeana eai se tutuguidida, se audidinida, i lau e sunuma abo se hemasaraha. 24 Arinai laugagaeo tauheaheatada ede, i lau e Keriso i laoma, bena ita sunuma debana eai se heduduraida. 25 Na sunuma wa i laomao ina, arinai tauheaheata wa i lautom arida eai. 26 Paana Keriso Iesu boeana eai omi gamagarimiu Eaubada nanatunayao ede, emi sunuma debana eai. 27 Omi gamagarimiu aidobu se hebapatisoimiuo, Keriso

ede aue lui. ²⁸ Iudea e Heleni nige'e, tauauau e tauiairihai nige'e, tau eo sine nige'e; paana omi gamagarimiu omi esega Keriso Iesu boeana eai. ²⁹ Na ena omi Keriso enanayao, omi Aberahama pesipesinayao hinage, ena ginauri tauabina omi, ribahesunuma wa debana eai.

4

¹ Eau ea ene wasawasa natuna, ena gogo tauabina wa, ia ma merumeruna ia gonogonoana doha heaheari tauna mo. Ia gogo maudoina tanuagana, ² taiede ia taitawata eo tauheata nimadi eai, i lau e huiana tamana i ribaei. ³ Ita hinage doha, ma merumeruda tanoubu kamanidi se auauda. ⁴ Na huiana mamohoi i lagema, Eaubada ia Natuna i hetamariama, sine arinai se labasi, laugagaeo boeana eai se labasi, ⁵ isi laugagaeo boeana eai se laulau bena i lebohaidi, ita bena i hegigiorieda, i awa-natueda. ⁶ Na paana au hemala ia nanatunayao, arinai Eaubada ia Natuna Earuana i hetamariama nuada eai i eoga i ene, "Aba! Tamagu!" ⁷ Arinai abotai oa em awa-heaheari i lautom, u hemala natuna; ena oa natuna oa hinage Eaubada ena gogo tauabina, Keriso debana eai.

⁸ Bagubaguna eai omi Eaubada nige abina au ata, isi nige eaubada mamohoi se tanuagaemiu ede, au heayaiedi; ⁹ na huia ta Eaubada abina au atao, ia i nuatuimiu hinage, edohana abo au sinibui ginauri beruberu, ginauri gaibu, aridi eai bena se auauuioimiu? ¹⁰ Omi asubenadi eo nawalaidi, huiadi eo borimaidi au heaheasisiedi! ¹¹ Ea matausi ata agu paisoa arimiu eai nige aniona.

¹² Egu tataoyao e, ea aibodaimiu bena au hemala doha eau, paana eau hinage doha omi. Omi nige au hebaaeagu; ¹³ au nuatui buluma iwalana esau debana eai evanelia ea lauguguiaimiu huia bagubagunana eai. ¹⁴ Egu lauuta bulumagu eai wa nige au isuewai, eo nige au otaotaegu, na au oiyamigu doha eau Eaubada ena aneru esau, doha Keriso Iesu. ¹⁵ Emi nualolo au ribaei wa, haedi ie lau? Ea ribaemiu nei huia ne taba gonoamiu abo matamiu au lamohaidi abo au ledima arigu eai. ¹⁶ Na ea hemala ami waiunu wa, paana riba mamohoina ea heribamiu? ¹⁷ Isi se ribahetausaemiu, nige bena se helolomiu; bena se tore-murimuriemiu abo omi au ribahetausaedi. ¹⁸ Aipate lolodi huia gamagari ta ene se lolo, nige huiadi eau boeamiu eai mo. ¹⁹ Egu merumeru gagirimiu e, arimiu eai ea amamna i lau e Keriso se hetubu boeamiu eai! ²⁰ Adeli eau boeamiu eai ina, abo arinagu daguguna i ori, paana nuagu i ponoponoemiu.

²¹ Au heribagu, omi wa emi gadosisi bena laugagaeo boeana eai au laulau, laugagaeo au ataiei, e nige'e? ²² Paana

se uriyao si ene Aberahama ia nanatunayao labui, esau sine auau natuna, esau sine iaiairihai natuna. ²³ Na sine auauauna natuna buluma dobilana eai se labasi, sine iaiiirihaina natuna ribahesunuma debana eai. ²⁴ Tautau ina; sisine labui ta ede aigora labui. Esau Sinai oea tupina eai i laoma, nanatunayao ma-auaudi i labalabasidi; ia ede Hagara. ²⁵ Hagara doha Sinai oea tupina, Arabia eai; eo doha Ierusalemia ina huia ta, ma-auauna, ma-nanatunayao. ²⁶ Na Ierusalemia wa ewana eai, ia ma-iairihaina, eo ia sinada ede. ²⁷ Paana se uriyao,

“U kode, oa sine agaagari, eo nige u haihaisu;

u torohai, u eoga, oa nige u labalaba wa;

paana ia se nuagabaei wa, nanatunayao se gamagari ede,

ia wa ma-monena se miamia nige doha.” (Is. 54.1.)

²⁸ Egu tataoyao e, ita doha Isaako, ita ribahesunuma nanatunayao ede. ²⁹ Doha nei huia eai ne, ia wa buluma nuatuna eai se labasi, esau wa Earua nuatuna eai se labasi wa i hesohe-som, wau ta hinage doha. ³⁰ Na uriuri tabuna i ene edoha? “Sine auauauna, ma natuna, au aiduedi; paana sine auauauna natuna taba nige enana i abi-esegai maena sine iairihaina natuna.” (Gen. 21.10-12.) ³¹ Arinai egu tataoyao e, ita nige sine auauauna nanatunayao, ita sine iairihaina nanatunayao ede.

5

*Nige laugagaeo laulauna eai ta laulau, na Earua ena aiain-
auia.*

¹ Iairihai miamiana eai Keriso i iairihaidao, arinai au toro adiadidiri, tabu se hehiliuioida auau porohena wa arinai.

² Eau Paulo ea heribamiau ea ene ena se heperitomemiu, taba nige begana Keriso ena aba-helolomiu. ³ Ea ribauio

ea ene tatao gamagaridi se peritome, besi laugagaeo maudoudoina se miawatai hinage. ⁴ Oa Keriso arinai u tomgabaeuioim, oa ena laugagaeo eai se heduduraim; ainauia

arinai u beuhai. ⁵ Paana Earua debana eai laulau dudurai sunumana ai sunusunumaei. ⁶ Paana Keriso Iesu boeana eai se peritome, e nige se peritome, nige i saguida, na sunuma

mo, gadosisi eai i paipaisoa. ⁷ Nabada omi au aitautau lolo, eai i guduguduimiu bena riba mamohoina au awaabiei?

⁸ Teina nuamiu i oihetaiiri, nige tauyogaimiu arinai i laoma.

⁹ *Obue* begana mo, tupina maudoina i seseohi. ¹⁰ Eaubada ea sunumai debamiau eai, omi taba nige nuamiu se lau udoi, eo ia

aidobu tauhemodemiu wa, ana giru maisana abo i abi. ¹¹ Na egu tataoyao e, eau taba sora peritome ea guguguiai, paana

saha se heamamnagu ina? Abotai ta ene aba-alabesibesi,

iaede satauro wa, se laehesuarao wa? ¹² Ea henua taba tauhemodemi se tomgabaeuioidi mo!

¹³ Egu tataoyao e, iairihai arinai se eogaimiu; ia mo emi iairihai tabu au abi arinai buluma ena huia au mosei, na gadosisi eai au hai-heayaiuioimiu. ¹⁴ Paana laugagaeo maudoina riba esega arinai se abiheohi, iaede ina, "Helem taumia u gadosisiei, doha oabom u gadosisiuioim." ¹⁵ Na ena au aialetauioimiu, eo au aiuiuoimiu, au komani ata hinage au haiunuuiuoimiu.

¹⁶ Na egu riba ede ina, Earua boeana eai au laulau abo taba nige buluma gadosisidi au laulauwataidi. ¹⁷ Paana buluma gadosisidi Earua gadosisina se iaialai eo Earua gadosisina buluma i iaialai; tupo labui ta se haihaihewaiunu, bena se guduguduimiu saha bena au abi, taba nige au abi. ¹⁸ Na ena Earua i woeawoeaimiu, laugagaeo nige i tanuagaimiu. ¹⁹ Buluma ena paipaisoa se masaraha, isi ede: laulau baaea udoi udoi, laulau bii, matamatae'o, ²⁰ oitau tabaohuna, tabutabusima, hewaiunu, haisaesae, aiaromagigiri, ouyalayala, nuanuatuuiuo, biribiri, abiabipele, ²¹ lelehi, nomnom-eauyaure, hemahemanabara, eo ginauri headi doha. Ea ribahesanapuemi, doha nabada ea heribamiu wa, isi laulau ta tauabidi taba nige Eaubada ena basileia se abi enadi. ²² Na Earua uauana ede gadosisi, kode, nuabiga, nuapaipai, taubiga, abilolo, miatahitahi, ²³ manamanabiga, nige saha ta abi daoi; teina ginauri ta nige laugagaeodi. ²⁴ Isi Keriso Iesu enanayao buluma se hesatauroyao, ma-gadosisina, malelehina.

²⁵ Ena Earua debana eai ta miamia, Earua debana eai hinage bena ta laulau. ²⁶ Tabu nuasaesae arida eai ie ota, tabu ita esau, esau ta hai-hesohesom, tabu to hai-aiaromagigiri.

6

Miamia harihariuna eai ta ita ta awa-tataoyao: eda abiabi eda tau arinai.

¹ Egu tataoyao e, taba tau esau ponori esau arinai i guri, omi earua eai au laulau, tau ta au lau'siniuioi, nuatudobidobiuiuo earuana eai. U itauioim ata oa hinage noho u hearo. ² Emi bahebahe porohe omi esa, esa, au hai-bahegogo, doha nei Keriso ena laugagaeo abo au hemamohoiei. ³ Ena tau esau i nuanuatuuioi i ene ia tau saesaena, ia nige saha, i borauioi mo. ⁴ Na taba esa eo esa iabom ana paisoa i lauuta, abo ena aba nualolo ede iabom ana paisoa eai, nige helena taupaisoa enana eai. ⁵ Paana tau iabom porohena abo i bahei.

⁶ Ia riba eai se heata, taba ena ginauri lolodi i mosedi tauheatana i sagui hinage.

⁷ Tabu se boraimiu; Eaubada ia nige talawasi, saha eo saha tau i umai, masurina abo i aitom hinage. ⁸ Ia wa iabom bulumana enana mo ie uma, abo bulumana eai posaposana i aitom; na ia wa Earua enana ie uma, Earua arinai mauri nige nosina abo i aitom. ⁹ Na paipaisoa lolodi eai tabu ta tausiololo, paana huiana abo i lage eda masuri abo ta aitom, ena nige nuada se beruberu. ¹⁰ Arinai eda huia ta lobai ta aipate tatao gamagaridi ta helolodi, sunuma ta numana taumiana ta nuatubagunaedi.

¹¹ Au ita, leta se lai ariri ea uriuridiwa ta, eaubogu nimagu eai. ¹² Isi buluma ana ao mo se nuanuatui, isi ede se dudududuimiu bena au peritome, matapaana bena tabu amamna se hearo, Keriso ena satauro debana eai. ¹³ Isi peritome se abiyao, ia mo nige gonoadi laugagaeo se sogohi, na se henua bena omi au peritome, bena bulumamiu edi aba nuasaesae. ¹⁴ Na Eaubada awagu i tawai, taba nige egu aba-nuasaesae esau, eda Guiau Iesu Keriso ena satauro eai mo, debana eai tanoubu eau arigu eai se hesatauroyao, eau hinage tanoubu arinai se hesatauroguo. ¹⁵ Paana peritome nige aniona, nige-peritome hinage nige aniona, na tau se hetubu harihariuna mo. ¹⁶ Aidobudi dobila ta se laulauei, loni enadi eo nuatoatoa, Eaubada ena Isaraela enadi.

¹⁷ Abotai taba nige tau esau i hemodegu; paana gaina eau taugu eai se ota, Guiau Iesu ia heiheinoina ede.

¹⁸ Eda Guiau Iesu Keriso ena ainauia abo maemiu, earu-amiu eai, egu tataoyao e. Amen.*

* **6:18:** Galatia tataodi enadi. Roma eai si uri.

Paulo Ena Uriuri Epeso Enadi

¹ Eau Paulo, Iesu Keriso ena Aposotolo esau Eaubada ena nuatu debana eai, ea uriuri hetabu tataodi isi Epeso eai se miamia enadi, eo tauataiena Keriso debana eai enadi hinage:

² Ainauia abo au abi, eo loni, ita Tamada Eaubada arinai se laowa, eo Guiau Iesu Keriso arinai se laowa hinage.

³ Eda Guiau Iesu Keriso ena Eaubada eo Tamana, ia ta aihe-lahui, earua ena ainauia gamagamagari i ainauiaida galewa dimodi eai Keriso boeana eai, ⁴ doha hinage ia i hinerida ia boeana eai tanoubu paana sora nige se hetubu, ita abo ta hetahetabueda, eo ia matana eai abo nige edi aba hegiruda.

⁵ Gadosisi boeana eai i nuatunonohaidao, i gigiorieda iabom nanatunayao, Iesu Keriso debana eai, ia ena nuatu lolona debana eai. ⁶ Ena ainauia namanamarina aba aihelahuina ede, arinai hinage i abida Taugadosisieda boeana eai. ⁷ Ia arinai mauri ta aabi ia osinana debana eai, baaea abaribagigiridi ena ainauia lailai debana eai, ⁸ arinai sonoga gamagamagari eo nuasibasiba gamagamagari i hegoigabaedima arida eai.

⁹ Ena nuatuyamuyamui i heitadao, iabom ena nuatu lolona i nuatuwatai, ¹⁰ huia wa i nuatuauriyao wa, ena i lagema, ia ginauri gamagamagari abo i heoiesegaidi Keriso boeana eai, galewa ginauridi, eo tanoubu ginauridi hinage; iabom mo boeana eai.

¹¹ Ia arinai ita hinage eda gogo ta lobaiyao, nabada ariri eai iabom ena nuatu eai, enada i nuatuauriyao, ¹² ita ia ena namanamari aba-aihelahuina ede, ita wa Keriso tausunumabagunaina. ¹³ Riba mamohoina, emi mauri evaneliana, au ataiei, murina eai ia au sunumalau arinai, hinage Earua Tabuna, se ribahesunumaei wa, heiheinoina se tore arimiu eai. ¹⁴ Iaede ginauri lolodi enada wa, eda aba-sunumaena i lau e ta abidi, ia ena namanamari aba-aihelahuina ede.

¹⁵ Arinai ede eau hinage, emi sunuma Guiau Iesu boeana eai, eo emi gadosisi hetabu tataodi gamagamagari aridi eai, wasadi ea ataiedi, ¹⁶ enamiu ea laulautoidaoi nige ea lautom, egu uura aridi eai ea ribaribaemiu bena ¹⁷ eda Guiau Iesu Keriso ena Eaubada, namanamari Tamana, sonoga eo ribahemasaraha earuana abo i leawa, ia emi abanuanuatina. ¹⁸ Nuamiu matadi i hemaradi; arinai i eogahaimiu wa sunumana abo au ita, eo hinage ia ena ginauri wasawasa ariridi wa abo au nuatui se lolo ariariri, i abidi hetabu tataodi boeadi eai, ¹⁹ eo gigibori lailai taba nige ta nonoi ita tauataiena arida eai, ena gigibori ena paipaisoa wa, iaede, ²⁰ Keriso arinai i paisoa, ia mate eai wa i abihetoro, abo

iabom nimatutuna eai i hebawa bigabiga galewa dimodi eai. ²¹ Ia gavamani teposaesaeariri tataodi, eo gigibori tataodi, eo tanutanuaga, eo esadi gamagamagari se ribaedi teina tanoubu eai ta mo nige'e, na tanoubu esau eai wa iaede abo i tubuma, ia mo i saetawatawaidi. ²² Ginauri gamagamagari se torelaedi ia aena ubudi eai, ia abo se hetoro ginauri gamagamagari uruurudi ede ekalesia enana, ²³ ia ede ia tauna, eo ena monau, arinai ginauri gamagamagari i hemonaubori-boriridi.

2

¹ Omi hinage i hemaaurimiu, laugagaao au utusidi eo emi baaea debadi eai aue mate; ² nabada wa omi teina tanoubu laulaudi au lauwataidi, eo malagaibu gigiborina ena wasawasa debana eai, earua wa teina huia ta i paipaisoa awayagara nanatunayao nuadi eai. ³ Boeadi eai ita nabada wa ta mimia, bulumada gadosisidi eai, tauda eo nuada lelehidi ta laulauwataidi, arinai ita hinage ouyalayala nanatunayao, doha tatao gamagari. ⁴ Na Eaubada ia nuatoatoa ana gogo, ena gadosisi lailai arinai i gadosisieda, ⁵ ita baaea boeana eai ta mamate wa, maeda Keriso i hemauriesegaida (ainauia debana eai au mauri), ⁶ maeda i heteroesegaida, i hebawabigabiga-esegaida Keriso Iesu boeana eai, galewa dimodi eai. ⁷ Isidi matada eai ena ainauia, nige aba nonoina wa, bena i heitadi, ena abilolo arida eai, Keriso Iesu boeana eai. ⁸ Paana ainauia debana eai au mauri, sunuma debana eai; hinage omi emi abiabi eai nige'e, Eaubada ena ainauia ede. ⁹ Nige laulau debadi eai, ata tau esau i ribapasipasiei. ¹⁰ Paana ita ia nimana ginaurina, Keriso Iesu boeana eai i hetubuda bena paisoa lolodi ta paisoaidi, Eaubada i nuatu nonohaidio enada, aridi eai bena ta laulau.

¹¹ Arinai abo au henuaisini, omi nabada wa murimuritaomiu, bulumamiu eai, isi tau-peritome, iaede tatao nimadi eai se ginauri wa, omi esamiu se ribaei nige-peritome, ¹² hage au henuaisini, nei huiana ne omi Keriso au miamurimuriei, Isaraela edi miagogo eai omi taowawa udodoi, eo ribahesunuma ribadi aridi eai omi dagodagora, nige emi sunuma eo tanoubu eai ta nige emi Eaubada. ¹³ Na Keriso Iesu boeana eai omi nabada wa eaaawamiu se loha ariri, huia ta au hanahanauma Keriso osinana debana eai. ¹⁴ Paana ia eda loni ede, ia labui wa i heoiesegaidi, eo gana wa duaduarida eai i peilabuieda i hetatagorigorio; ¹⁵ ia bulumana eai eda hewaiunu nuatudi i helautomdi, lauhesom laugagaodi edi uriuri eai se uridi; iabom mo boeana eai wau labui wa aridi eai tau harihariuna esega i hetubu, loni ena abatubu meta ¹⁶ Taudi labui ia abo Eaubada arinai i laubiriedi se hemala

tau esega mo satauro debana eai, hewaiunu nuatudi wa arinai i helautomyao. ¹⁷ Eo i laoma loni lauguguaieyawa omi eaaawamiu se loha arimiu eai, eo isi hinage se hanahanau aridi eai. ¹⁸ Paana ede ia debana eai, tauda labui, Earua esegana debana eai, ta lulage Tamada arinai. ¹⁹ Na huia ta omi nige taowawa eo omi nige dagodagora, na hetabu tataodi au hepatuesegaimiu maidamiu, omi edi eanua tataomiu ede, eo omi Eaubada ena numa tataomiu, ²⁰ aposotolo eo peroveta paana eai se hetoromiu, Iesu Keriso iabom we'u saesaena kona eai, ²¹ ia boeana eai numa se tubei komakomani se toresegai abo ie tubu i hemala numa tabuna Guiiau boeana eai, ²² arinai hinage omi se heteroesegaimiu Eaubada ena abamia ede, Earua debana eai.

3

¹ Paana ede teina eau Paulo, Iesu Keriso ena tauauaugu omi Murimuri-tataomiu debamiu eai, ² au ataieyao wa Eaubada ena ainauia hepahepasoaina i leama arigu eai omi enamiu, ³ riba eamuyamui arigu eai i hemasarahadimao; doha hinage nabada wa egu leta begana arinai ea uridiwa. ⁴ Arinai, ena au hasiri, egu sonoga Keriso ena ribayamuyamui arinai abo au nuatui, ⁵ nabada wa hari isi eai wa, nige i masaraha tatao nanatudiyao aridi eai, doha ina huia ta Earua i hemasarahayama ena aposotolo eo peroveta tabudi aridi eai. ⁶ Murimuri-tataodi abo se hemala ginauri saesaedi helemai tauabidi, eo tauda esega mo, eo ena ribahesunuma tauabidi hinage Keriso boeana eai evanelia debana eai.

⁷ Arinai eau heaheari se hetorogu ta Eaubada ena ainauia debana eai, se leama arigu eai wa, gigiborina paipaisoana eai. ⁸ Eau hetabu tataodi gamagamagari aridi eai ea hegagiri-aririegu, teina ainauia se leama eau arigu eai, Keriso ena ginauri saesaeariridi abo ea lauguguaiei Murimuri-tataodi aridi eai, ⁹ eo tatao gamagamagari ribayamuyamuidi heoiesegaina abo ea heitadi, ia ede tanoubu se hetuhetubu wa Eaubada boeana eai se toreyamui, ia ginauri gamagamagari i hetubudi, ¹⁰ bena huia ta teposaesaeariri tataodi eo gigibori tataodi galewa sonogana udoi udoi abo se itadi ekalesia arinai. ¹¹ Ena nuatu nige ena abalautom wa ia ede eda Guiiau Iesu Keriso arinai i hemamahoiei. ¹² Ia boeana eai ta nuakipikipi, eo ia boeana eai hinage eda abalau ma nuadidirida ta abi, eda sunuma eai ia debana eai. ¹³ Arinai ea henua omi tabu nuamiu se beruberu paana baaea lailai ea hearodi debamiu eai, meta emi abahedebasae paana ede.

¹⁴ Paana ede teina ea turibono eda Guiiau, Iesu Keriso Tamana, matana eai, ¹⁵ ia arinai boga gamagamagari galewa eo tanoubu eai, esadi se ata'o, ¹⁶ ia abo i ainauiaimiu, ena

namanamari lolo ariridi debadi eai, nuaboeamiu eai abo se headidirimiu ia ena gigibori eai, ia ena Earua eai; ¹⁷ Keriso bena abo i miamia nuamiu eai, sunuma eai; omi lam'miu se toredobiedi eo paamiu se heotaesegai gadosisi boeana eai. ¹⁸ Abo au ita, maemiuhetabu tataodi gamagamagari, Keriso ena gadosisi laina, eo lohana, eo uihana ie dobi, eo saesaena; ¹⁹ eo Keriso ena gadosisi abo au nuatui, nuatuina nige abina se ata, Eaubada ena monauboriboriri gamagamagari hinage arinai abo se hemonaumiuh.

²⁰ Ginauri gamagamagari ta aiboda, eo ginauri gamagamagari ta nuatui, ia abina ie ata i ledimaarriedi, gigibori wa boeada eai i paipaisoa debana eai, ²¹ ia se hedebasae, ekalesia arinai Keriso Iesu debana eai, isi gamagamagari i lau e, huia nige nosina. Amen.

4

Tauataiena ena lau, Keriso boeana eai eo Earua ena woewa eai.

¹ Eau Guiau ena tauauaugu, ea awanori-laowa omi abo au laukomakomani emi abalaulau eai arinai se eogahaimiu wa, ² ma nuatudobidobiuiuiomiu eo ma iilalolomiu, eo emi nuatoatoa se laulau mo, au hainuatuuiuiomiu gadosisi boeana eai, ³ au aipate Earua ena nuaheoiesega abo au sogohi loni ena abaaudidinimiu eai. ⁴ Tauna esega mo, eo Earua esega mo, doha hinage se eogahaimiu wa edi eogahaimiu sunuma esega mo boeana eai; ⁵ Guiau esega mo, eo sunuma esega mo, eo bapatiso esega mo. ⁶ Eaubada hinage tatao gamagamagari Tamadi esega, ia tatao gamagaridi i saetawatawaidi, eo ia tatao gamagaridi i nuhuridi eo ia ginauri gamagaridi boeadi eai ie mia. ⁷ Na, ita gamagarida esau ana, esau ana, ainauia se leamao enada Keriso ena ainauia nonoina se heaigonogonoaieda. ⁸ Arinai i ene, "Ia i awasae ewa eai, tauauau gamagaridi i toaidi i woelaedi, ainauia abo i mosedi tatao aridi eai." ⁹ (Na, si ene i awasae wa, arinai ta nuatui ia i dobibagunama wa tanoubu ubuna eai, e nige'e wa? ¹⁰ Ia i dobima ia ede hinage i awasae, galewa gamagaridi i saetawatawaidi, ginauri gamagamagari bena abo i hemonauidi.) ¹¹ Ia tatao headi i ainauiaidi aposotolo eai se lau; tatao headi peroveta; eo tatao headi, evanelia taulauguguaena, eo tatao headi, taulaulausui eo taulaulauheata; ¹² hetabu tataodi bena abo se helolodumadumaesegaidi, eo heaeai paisoana bena abo se paisoaei, eo Keriso tauna bena abo se tarinisa: ¹³ Ita gamagarida eda sunuma esega eo Eaubada Natuna ta nuatui wa, arinai abo ta hemala taulolodumaduma, i lau e Keriso ena monauboriboriri lailaina wa ita hinage abo gonogonoadi; ¹⁴ i lau, i lau e tabu ita merumeru, hari lauheata, hari lauheata

se earusaeda se earudobeda, doha mana i eohoida, eo tatao mo edi sibasiba, eo edi lauheata borabora, arinai se weseida ita bena se boraida. ¹⁵ Na riba mamohoina mo ta ribaribaei gadosisi boeana eai, ginauri gamagamagari aridi eai ta tubu ia boeana eai, ia wa, Keriso uruuruna ede; ¹⁶ ia arinai tauna se oihai se tubei komakomani eo se heoiesegai, eau esau ana paisoa eo eau esau ana paisoa, doha eau gamagamagari se paisoa komakomani abo tauna se oihai arinai abo se helai, eo sibasiba arinai ie tubu gadosisi boeana eai.

¹⁷ Teina ea heribamiu ta, eo Guiau boeana eai ea ribahe-masarahaeawa, omi tabu au laulau doha Etene isi edi nuatu gaibu eai se laulau. ¹⁸ Edi nuasibasiba se hemasigiri, isi edi supusupu debana eai Eaubada ena mauri se miamurimuriei paana ede nuamatadi se gibugibu; ¹⁹ nuadi se tomatoma arinai nuadi se lau esegadumaduma baaea arinai, eo laulau biibii gamagamagari se lauwataidi ma adidiridi. ²⁰ Na, omi Keriso nige se heatamiu doha meta: ²¹ ena au ene ia au ataiei, eo i heatamiuo riba mamohoina eai Iesu boeana eai. ²² Tau beabea wa, emi laulau nabada wa au lauhaidi au gabahe-suaradi, ia i baaea doha nuaboemiu eai i boraboraimiu; ²³ omi nuamiu earuadi bena se heharihariudi; ²⁴ eo tau harihariuna au lui, iaede se hetubu Eaubada ana ao eai, laulau dudurai mamohoina eai wa eo tabuna eai.

²⁵ Arinai riba borabora au gabahe-suara, tau esau esau, ma helena-taunia, riba mamohoina mo taba se ribaei, paana ita tau esega eauna udoi udoi ede. ²⁶ Ena au ouyalayala tabu emi laulau se baaea, tabu emi ouyalayala i otahai i lau e mahana i dui, ²⁷ tabu diabololo ena sorasora au mosei. ²⁸ Tauaiyahari tabu i aiyahari uio, na taba nimana eai i paisoa mo, paisoa mamohoi i paisoa, abo enana i abi, gonoana taudeha enadi i mosedi. ²⁹ Tabu riba baaea esau awamiu eai i lulagama, riba lolodi mo, arinai tatao au riba hesibasibadi, eo riba wa tauataiena emi aba ainuiaidi. ³⁰ Eaubada ena Earua Tabuna tabu u henuaamamna, ia debana eai heiheinoimiu se toreyao, i lau e abihemauri asubenana i lagema. ³¹ Kalapi gamagamagari, eo siaiau, eo ouyalayala, eo heasiwolewole, eo arina baaea, au gabaudoiedi, eo nuatu baaea gamagamagari, ³² esau, esau au abiloloei, ma nuabigabigamiu, emi baaea au hainuatugabaedi, doha hinage Eaubada Keriso debana eai emi baaea i nuatugabaedio.

5

Tauataiena ena lau: ia Eaubada natuna lolona.

¹ Omi Eaubada au laulauwatai, doha merumeru lolodi, ² eo gadosisi boeana eai au laulau, doha hinage Keriso i gadosisieda, eo iabom i moseuioi ita debada eai, ena ainuia panena i amna eo ena aitalasam Eaubada arinai.

³ Na laulau baaea, eo laulau bii, eo ginauri se lelehiedi, tabu esadi se ribaedi arimiu eai, doha omi hetabu tataomiu. ⁴ Eo riba bii hinage, eo riba eauyaure, eo talawasi, teina laulau ta nige se lolo; na taba au aihelahui mo. ⁵ Paana ede teina ta au nuatui, tautaitadio, eo taubiibii, eo taulelelelehi (oitau aihelahuina meta), isi taba nige edi tupo Keriso eo Eaubada edi basileia eai. ⁶ Tabu tau esau ena ribaribagaibu aridi eai i boraimiu; paana teina ginauri ta debadi eai awayagara nanatunayao Eaubada ena ouyalayala abo se hearo. ⁷ Arinai tabu au patulau aridi eai, ⁸ paana omi beabeana wa au masigiri, na huia ta omi au marao Guiau boeana eai: au laulau doha marana nanatunayao ⁹ (paana mara aniona ta lobai lolo gamagamagari eo laulau dudurai, eo riba mamohoina eai), ¹⁰ au aipate emi laulau eai Guiau nuana au helolo. ¹¹ Masigiri ena paipaisoa nige aniodi, tabu au patulau aridi eai, na taba au hemasarahadi mo. ¹² Paana ta taumaeamaea ena edi laulau eamuyamui se ribaribaedi. ¹³ Na ginauri gamagamagari se hemasarahadi marana eai abo se masamasaraha: ginauri gamagamagari edi aba hemasaraha wa ia ede marana. ¹⁴ Arinai si ene,

“Oa taueno e, u toro, mate eai u torohai, abo Keriso mara i leawa.”

¹⁵ Au itakomakomani na au laulau, nige doha tatao eauyaure na doha tatao sonoga, ¹⁶ emi huia au miahelolo, paana asubenadi se baaea. ¹⁷ Arinai tabu au supusupu, na Guiau nuana au ita lobai. ¹⁸ Tabu waina i heyauyauremiu, doha au nomnomdaoi; na Earua taba i hemonaumi; ¹⁹ om. au hairibagogo ma nuamiu, salamo eo wana, eo galewa wanadi au wanawanaedi Guiau arinai; ²⁰ huia gamagamagari ginauri gamagamagari aridi eai Eaubada, eo Tamana, au aiaitoiei, eda Guiau Iesu Keriso esana eai. ²¹ Esau esau au haiawaabiuiomiu Eaubada matausina boeana eai. ²² Sisine maitawasora omi monemiuyao mamohoi au awaabiedi doha Guiau au awaabiei. ²³ Paana tau monena wa uruuruna ede, doha hinage Keriso, ekalesia, ia tauna wa, ia uruuruna ede, eo tauhemaaurina. ²⁴ Arinai doha ekalesia Keriso se awaabiei, hinage sisine wa monediyao mamohoi ginauri gamagamagari aridi ea se awamamohoi edi hinage. ²⁵ Tatao maitawasora monemiuyao au gadosisiedi doha hinage Keriso ekalesia i gadosisie, eo debana eai iabom i moseuioilaei, ²⁶ ia bena i hetabuei, eo i heaa, goila eai i deuri, eo riba debana eai hinage, ²⁷ iabom bena i ainuiauioi ekalesia lolodumadumana, nige biina begana, eo nige wowoeana begana, nige ariariri, na ekalesia wa ia i hetabuei, eo nige ena baaea. ²⁸ Hinage doha ede meta tatao monediyao taba se gadosisiedi doha ede taudi se gadosisiuoidi. Ia monena i gadosisie iabom hinage

i gadosisiuioi. ²⁹ Paana ede nabada wa i laoma ina huia ta nige tau esega iabom bulumana i ouyalalayauioi; na i heai, eo i hebiga, doha hinage Guiiau ekalesia ena abiabina. ³⁰ Ia tauna eaudi ede ita, eo ia bulumana hinage, eo ia siadana. ³¹ Arinai ede tau wa tamana sinana i laugabaedi, abo i patulau ia monena arinai, isi taudi labui abo bulumadi esega dumaduma mo. ³² Riba ta ribayamuyamui lailai; na Keriso eo ekalesia ribana wa ea ribaribaei. ³³ Taiede omi gamagarimiu, esau eo esau, tau wa ia monena abo i gadosisie i doha iabom i gadosisiuioi; eo sine wa hinage monena abo i nanabuei.

6

¹ Omi merumeru, tamamiuyao sinamiuyao Guiiau boeana eai au awaabiedi; meta laulau me i dudurai. ² “Tamam eo sinam u heasisiedi (ia ede laugagaeo bagubagunana ma ribahesunumana hinage), ³ oa abo u lolo, eo tanoubu eai ta em mauri abo se helohayawa.” ⁴ Omi tamadiyao hinage, nanatumiuyao tabu au heouyalalayadi na au eogoeogoidi mo, bena se tubu Guiiau ena sibasiba eo ena gugua boeana eai.

⁵ Omi heaheari tauauau, ami tanuagayao, tatao wa, au awaabiedi ma matamatausimiu eo ma tabutabubumiu, eo nuamiu esega, doha Keriso au awaabiei; ⁶ tabu au abiabi kailiu matadi eai mo, bena tatao au henualolodi, na doha Keriso ena heaheari, Eaubada nuana au abi ma-nuamiu; ⁷ au paisoa ma nuatulolomiu, doha hinage Guiiau arinai, nige doha tatao aridi eai. ⁸ Au nuatui hinage paisoa lolona esau tau esau i abi, meta abo i abiuioi Guiiau arinai, tau wa ena ia tauauauna e taugaibu mo. ⁹ Omi tanutanuaga, au abi hinage doha nei aridi eai, tabu au ribahematausi: au nuatui hinage ami tanuaga galewa eai; ia hinage tatao nige i heasisinapaidi.

Tauataiena ena iala, eo ena aba adidiri.

¹⁰ Egu tataoyao e, riba ohina ede ina, au adidiri Guiiau boeana eai, eo ena adidiri gigiborina eai. ¹¹ Eaubada ena iala luludi maudoidi au luidi, omi diabolo ana sanapu baeae abo au guduguidi. ¹² Paana ede ita nige ta haipoipoi tatao aridi eai, na tepo saesae tataodi, eo gigibori tataodi, eo teina tanoubu ta masigirina guiaudi, eo earua baeedi galewa dimodi eai, meta mo maeda ta haipoipoi. ¹³ Arinai ede Eaubada ena iala luludi au abiheohidi; ena asubena baeae ie lage abo au adidiri au guduguidi, au guduguduheohidi abo au totoro. ¹⁴ Au totoro riba mamohoina au auau duaduariedi taumiu eai, eo nuapoumiu eai laulau dudurai arinai au heopeaei. ¹⁵ Aelaulaumiu loni evaneliana arinai au sumadi i henonhamiu. ¹⁶ Teina mo ie sae ariri, sunuma opeana au abi arinai baeae tauna ena alahia alaalasidi gamagamagaridi

abo au unuhebosodi. ¹⁷ Abihemauri ououna au abi, eo Earua ena elepa, ia ede Eaubada ena riba. ¹⁸ Au uura huia gamagamagari, uura gamagamagaridi eo aiaiboda Earua boeana eai, arinai hinage au nuatu komakomani hetabu tataodi gamagamagari enadi au aiboda samasamadudu. ¹⁹ Eo eau enagu hinage, au lau-uura bena riba wa abo se leama awagu abo ea dabari ma nuakipikipigu evanelia eamuyamuina abo ea hemasara, ²⁰ debana eai eau tauwasaduaiena ma auaugu; bena ea riba ma nuakipikipigu, i lolo ea riba doha nei. ²¹ Na, eau wasagu bena au ataiei, eo edohagu, Tukiko, egu tau ea gadosisiei, ia hinage heaheari tauna lolona Guiau boeana eai, ginauri gamagamagari abo i heribakomakomanimiu. ²² Hesabana ede ina ia ea hetamariyawa wasamai bena au ataiei, eo arinai nuamiu se biga.

²³ Ema tataoyao e loni bena au abi, eo gadosisi hinage ma sunumana, Eaubada, Tamana, arinai i laoma, eo Guiau Iesu Keriso arinai hinage. ²⁴ Isi gamagamagari, eda Guiau Iesu Keriso se gadosisi mamohoiei, ainauia bena abo se abi.*

* **6:24:** Roma eai se uri, Epeso tataodi enadi, Tukiko nimana eai.

PAULO ENA URIURI PILIPU ENADI

¹ Paulo maena Timoteo, Iesu Keriso ena heaheari, hetabu tataodi Keriso Iesu boeana eai isi Pilipi taumiaina, tanutanuaga eo diakona hinage, enamiu.

² Ainauia enamiu, eo Ioni Eaubada Tamada arinai i laowa, eo Guiau Iesu Keriso arinai i laowa hinage.

³ Huia gamagamagari ea nuanuatuimiu egu Eaubada ea lautoiei, ⁴ huia gamagamagari egu uura gamagamagaridi eai enamiu ea awanori ma kodegu, ⁵ paana au heoiesegaemiu evanelia boeana eai asubena bagubagunana eai i laoma huia ta. ⁶ Meta mo ea nuanuatui, ia paisoa lolona i hetubu boeamiu eai wa, abo i heohi i lau e Iesu Keriso ena asubena eai. ⁷ I lolo doha ina omi gamagarimiu ea nuanuatuimiu, paana ede omi nuagu eai ea abididiniemiu, omi maeguyao ainauia tau-abiesegaina, eo se augu eo evanelia sogohididiniina eo hemamohoina eai, omi tausaguigu. ⁸ Na Eaubada i itaguo, omi gamagarimiu ea nuatuaririemiu Iesu Keriso ena nuatotoa eai. ⁹ Egu uura ede ina, emi gadosisi abo i hetadada helailai arinai abo au sibasiba, eo sonoga gamagaridi abo au abidi, ¹⁰ ginauri saesaedi abo au awaloloedi; omi abo manuaamiu eo nige emi ababaaea i lau e Keriso ena asubena eai; ¹¹ laulau dudurai uauadi abo se hemonaumiu, isi ede Iesu Keriso debana eai se laoma, Eaubada aba-hedebasaena eo abaihelahuina ede.

¹² Ehaguyao e, ea henua bena au nuatui, ginauri ea hearodi wa evanelia se hesagulaei abo i tadada; ¹³ arinai i masarahahi, * peretoria maudoina eai, eo tatao gamagaridi aridi eai, hede Keriso debana eai se augu ta. ¹⁴ Ehadayao gamagaridi hinage Guiau boeana eai, agu auau eai ta arinai nuadi se adidiri ribana se ribaei ma adidiriaririna nige se matausi.

¹⁵ Mamohoi headi Keriso se lauguguiyai ma-aiaromagigiridi eo ma haitoremuridi; headi hinage ma nualolodi. ¹⁶ Headi wa Keriso se lauguguiyai ma luludi, nige se nuatumamohoiei, bena se nuadubuleama agu auau eai ta. ¹⁷ Na headi hinage edi gadosisi eai se lauguguiya, eo se nuatui se hetorogu eau evanelia tauheribalaena ede. ¹⁸ Abo edohana nei? Hari dobila hari dobila, headi se bora, headi se riba hemamohoiei, taiede Keriso se guguiyai mo; arinai ea kokode. ¹⁹ Hedeona, abo ea kode hinage, paana ede ea nuatuiyai emi uura debana eai teina abo egu abamauri ede, eo Iesu Keriso ena Earua hinage, ena hesahesagu eai. ²⁰ Nuagu ea alagabaeesegai egu gadosisi lailai eo egu sunuma, nige ginauri esau arinai abo

* **1:13:** Tauiala edi aba miagogo esana, Paulo se auau wa, isi taitawataina.

ea taumaeamaea, na ma nuakipikipigu doha huia gamagamagari wa, huia ta hinage, taugu eai Keriso abo se helai, ena ea mauri e ea mate. ²¹ Paana ede taba ea mauri ia ede Keriso, taba ea mate meta abo i helologu hinage. ²² Ena bulumagu eai ea mauri meta me agu paisoa aniona ede: na aitea ea abihineri nige abina ea ata. ²³ Paana ede eau nuagu i labulabui. Ea henua bena ea laugabaemiu, maegu Keriso abo ai mia esega, meta i lolo ariri. ²⁴ Taiede, bulumagu eai ea miahai arimiu eai hinage abo i lolo. ²⁵ Teina egu nuatu adidiri ta, arinai ea nuatuiyao eau abo ea miamia omi gamagarimiu maidamiu, emi tubu eo emi kode debadi eai, sunuma eai ta. ²⁶ Omi emi nuawoiwoina Iesu Keriso boeana eai abo i hetadada lailai arigu eai, paana eau abo ea uiouiowa arimiu eai.

²⁷ Teina mo emi riba eo emi laulau au haasikomakomani doha i patu Keriso ena evanelia arinai; ena ea laowa ea itamiu, e ea bawa udoi, emi laulau wasadi abo ea ataiedi omi au toroadididiri earuamiu esega, ma nuaesegamiu hinage au aipate-adidirigogo evanelia sunumana eai, ²⁸ emi waiunu tabu begana se hematausimiu. Meta mo isi aridi eai mate heiheinoina, na omi mo emi mauri heiheinoina, Eaubada arinai i laoma. ²⁹ Omi arimiu eai se leawao Keriso debana eai, ia nige au nuatuwatawatai mo, ia debana eai hinage abo au amamna; ³⁰ baaea abo au hearo doha eau lahinau au itagu wa, eo hinage huia ta wasagu au atai ei.

2

Keriso: tauataiena ena tautau, awa-heaheari iilana bena i miawatai.

¹ Na, ena henuaadidiri Keriso arinai ie ota, eo ena gadosisi nuaamnana ie ota, eo ena Earuana heoiesegaina ie ota, eo ena nuatoatoa eo nuabigabiga se ota, ² egu kode ta au hemamohoei, tabu nuamiu udoi, udoi, emi gadosisi esega mo, emi nuatu esega, nuamiu esega. ³ Tabu ginauri esau lulu eo haisaesae aridi eai au haihesaba; na nuatudobidobi eai tau esau ena nuatu i ene ana sagu mo i lolo ariri. ⁴ Tabu tau esau eo tau esau iabom ena dobila mo i nuanuatui, na tau esau eo tau esau hari tatao edi dobila hinage se nuanuatuidi. ⁵ Keriso Iesu nuana omi au abi hinage, nuamiu, ⁶ ia itaitana Eaubada mo itaitana, ia nige i nuatui i aiaigirihai doha i ene ia eo Eaubada gonogonoadi, ⁷ na i hemala wasakulobai, itaitana doha tauheaheari, eo ia se ginauri ana ao doha tatao adi ao. ⁸ Ia i hemala tau, abo iabom i nuatudobidobiuioi, mate awaabina i awaabiei, mamohoi, satauro matena eai hinage. ⁹ Arinai hinage Eaubada ia i hedebasae-aririei, ia esana hinage i mosei esadi gamagamagari i saetawatawaidi,

¹⁰ Iesu esana eai gamagaridi turidi se bonodi, galewa ginauridi, eo tanoubu ginauridi, eo tanoubu ubuna ginauridi hinage, ¹¹ memena gamagamagari abo se ribahemasaraha, abo si ene Iesu Keriso ia Guiau ede, Eaubada Tamada arinai se hedebasaei.

¹² Egu nuanuai e, doha huia gamagamagari au awaabi, na eau arimiu eai mo nige'e, huia ta ea miasuaraemiu hinage, emi mauri paisoana au paisoaei ma nuamatamatausimiu eo ma nuatabutabubumiu. ¹³ Paana ede Eaubada nuaboeamiu eai i paipaisoa ena nuatu lolona abo au matamatayariedi eo au abiabiwataidi.

¹⁴ Ginauri gamagaridi au paisoaei tabu au gadigadigugu eo tabu au haiawayagara, ¹⁵ abo nige au baeae eo nige au manamanabara, Eaubada nanatunayao omi, arimiu eai nige edi abaribaribasuu, omi eanua nuanuatugewagewadi eo awaawayagaradi boeadi eai, eo boeadi eai abo au mara doha lamepa tanoubu eai, ¹⁶ mauri ribana au ribaribahe-masaraha; eau bena ea kode Keriso ena asubena eai, taba nige ea aitauteu gaibu, eo nige ea paisoa gaibu hinage. ¹⁷ Mamohoi, hinage ena se gabalaegu emi sunuma abaaita-lasamna eai eo paisoana eai, ea kode, gamagarimiu maemiu abo ta kode esega. ¹⁸ Matapaana esega omi hinage bena au kode, ta kode esega.

¹⁹ Guiau Iesu ea sunumaei Timoteo abo ea hetamari-heulaiyawa arimiu eai, wasamiu ea ataiei nuagu abo i biga. ²⁰ Paana nige tau esau nuana doha ia, omi i nuatu aririemiu. ²¹ Headi, isi gamagaridi isibom edi ginauri mo se eoodadaidi, Iesu Keriso ena ginauri nige se eowataidi. ²² Timoteo mo iilana au itayao, doha natuna tamana arinai, evanelia paisoana eai maegu i sagusaguigu. ²³ Egu nuatu nige baeaeona ia abo ea hetamariyawa, laulau aisana abo se abi arigu eai sora ea ita baguna. ²⁴ Taiede ea sunuma Guiau arinai eau hinage nige baeaeona abo ea laowa.

²⁵ Na ea 'ne i lolo Epaperoti ea hetamariyawa arimiu eai, ia egu tau eo maegu ai paipaisoa, eo ai ialaesega, na ia enamiu tautauwasa, ia hinage taubobodiegu. ²⁶ Ia omi gamagarimiu i nuanuaiemiu, hinage nuana i porohe, paana ede omi ia wasana au ataieyao, i asiebo wa. ²⁷ Mamohoi i asiebo lailai, mate i hanahanai; na Eaubada mo ia i nuatoatoai; hinage ia mo nige'e, eau i nuatoatoaigu hinage, ata nuadubu ea hearo nuadubu esau potana eai. ²⁸ Arinai nuagu i gigibori ia ea hetamariyawa, bena omi ia au itauioi abo au kode, eo egu nuamode hinage bena abo ie taru. ²⁹ Guiau boeana eai ia au abi ma nualolomiu; tatao doha meta au ribatausaedi, ³⁰ paana ede Keriso ana paisoa debana eai mate i hanahanai, ia

maurina nige i nuatui, ami paisoa bena au abi arigu eai wa, ia ie abi.

3

Keriso: Tauataiena ena aipate, hesabana ede i laulau.

¹ Egu tataoyao e, riba wa ohina ede ina, au kode Guiau boeana eai. Riba ea uriuriuioidi wa arimiu eai arinai nuagu nige i tomatoma, emi dobila lolona meta. ² Kedewa au komakomanidi, tatao se paisoa baaea au komakomanidi, eo isi buluma tau nigo tataodi au komakomanidi hinage. ³ Ita peritome mamohoina ede, Eaubada tau aihelahui Earua boeana eai, eo ta kode Keriso Iesu boeana eai, hinage buluma nige ta nuatudaioiei. ⁴ Eau mo taba buluma ea nuatudaioiei. Ena tau esau ena nuatu i ene buluma i sunumaei eau hinage: ⁵ asubena hehaligigi-haionana eai se heperitomegu, eau boga Isaraela mamohoina, urutubugu ede Beniamina, eau Heberu tauna, Heberu tataodi matadi eai; laugagaego matana eai eau Parisea tauna; ⁶ ea adidiri ariri, ekalesia ea hebaaea; laulau dudurai laugagaego matana eai ea dudurai. ⁷ Na, egu ginauri saesaedi wa, meta ea ene abo ea abigabaedi Keriso debana eai. ⁸ Mamohoi egu nuatu ea 'ne ginauri gamagamagari abo ea abigabaedi egu Guiau Keriso Iesu nuatusaesaena debana eai. Hinage ia debana eai ginauri gamagamagari ea abigabaedio, ea 'ne isi bii mo, Keriso bena ea abi, ⁹ eo ia boeana eai bena se lobaigu, eaubom egu laulau dudurai nige ea abi, laugagaego laulau duduraina ede meta, na meta mo Keriso sunumana eai, laulau dudurai wa Eaubada arinai i laoma, sunusunumagu eai. ¹⁰ Ia bena ea ita tahutahunuai, eo ena torouio gigiborina hinage bena ea ita, eo ena amamna maegu abo ai heoiesegaimai, ena mate arinai abo ea patuesega. ¹¹ Ginauri esega mo ea aipatei, mate torouiona eai bena ea lage.

¹² Nige ea 'ne ea lageo, hinage sora nige ea lolokomakomani, na hesabana ea laulau, ginauri aisana debana eai Keriso Iesu i toaigu bena abo ea italobai. ¹³ Egu tatayao e, nige egu nuatu ea 'ne ea itayao: teina ginauri esega mo ea adidiriei, murigu ginauridi ea nuahuiedi, ginauri matagu eai nimagu ea loloilaei aridi eai, ¹⁴ ea tau adiadidiri sigasigana eai, maisana abo ea abi, ia ede Eaubada ana paisoa saesaena Keriso Iesu boeana eai. ¹⁵ Arinai gamagarida ena ta lolo komakomani, eda nuatu abo ta nuatui doha ede meta, ena nuamiu udoi Eaubada meta hinage abo i hemasarahayawa. ¹⁶ Taiede, sigasigana wa ta lage arinai, meta dobila me ita ta laulauwatai, eo meta ginauri me hinage ta nuanuatui.

¹⁷ Egu tataoyao e, au laulauwataigu: hinage isi se laulau nei doha au nuatuidi, arinai doha au laulauwataimai. ¹⁸ Huia

gamagari ea heribamiu wa, hinage ma doudougu ta ea heribauioimiu, tatao gamagari headi edi laulau se abidi doha isi Keriso ena satauro ana waiunu. ¹⁹ Isi abo se mate, edi eaubada ede bogadi, edi taumaeamaea se ribapasipasiei, tanoubu ginauridi mo se nuanuaiedi. ²⁰ Ita eda eanua tahunuana ede galewa eai, arinai hinage Tauhemaurida, Guiauna Iesu Keriso, ta bagibagiei. ²¹ Tauda baaedi ia abo i heharihariudi, bena abo se ginauridi doha ia tauna namana-marina, ia abina i ata ena paipaisoa eai ginauri gamagaridi i hetohonadi, ia abo se awaabiei.

4

Keriso: Tauataiena ena adidiri, eo ena aba kode iwala boeadi eai.

¹ Egu tataoyao ea gadosisiaririemi e, eo ea nuanuaiemiu, egu abakode eo egu korona omi, au toro-tamotamosiesegaimiu Guiau arinai, omi ea gadosisiemiu.

² Ea awanorilau Euodia arinai, eo Sinetuke arinai, Guiau boeana eai isi taudi labui bena nuadi esega. ³ Eo oa hinage agu sagu mamohoina, ea awanorilaowa arim eai, nei sisine ne nabada wa maeguyao evanelia ta arinai ai paipaisoa, u saguidi, eo Keleman hinage, eo headi hinage agu sasaguyao, isi esadi se uridio mauri bukana eai.

⁴ Huia gamagamagari au kode Guiau arinai: hinage ea ribauio, ea 'ne, Au kode. ⁵ Emi laulau gamagamagari au abi komakomanidi tatao gamagaridi abo se ita. Guiau ena laoma i hanahanau. ⁶ Tabu ginauri esau arinai au modedaoi; na ginauri gamagamagari au uuraedi, eo au aibodaidi ma lautoimiu, emi awanori au hemasarahadi Eaubada arinai. ⁷ Eaubada ena loni, se nuatudadaasaeai wa, earuamiu eo nuamiu abo i sogohididinidi Keriso Iesu debana eai.

⁸ Egu tataoyao e, riba ohina ede ina, ginauri saha eo saha riba tohotohonadi ede, eo ginauri saha eo saha se dudurai, eo ginauri saha eo saha se lolo, eo ginauri saha eo saha se aa, eo ginauri saha eo saha itaitadi se lolo, eo ginauri saha eo saha wasadi se lolo; taba ena lolo i ota, eo taba ena aihelahui i ota, teina ginauridi ta au nuanuatuidi. ⁹ Meta ginauridi se heatamiu wa, hinage au abidio, eo au ataiedio, eo au itadi arigu eai wa, abo au abiwataidi: loni ena Eaubada abo maemiu.

¹⁰ Na Guiau boeana eai ea kode ariariri, paana teina huia ta emi nuatu arigu eai ie tubu adiadiriuo; nabada wa au nuatuigu hinage, na nige emi dabila. ¹¹ Nige ea 'ne ginauri esana ea hedeha: abisaha abisaha ea hearodi, abidi ea ata nuagu i amna mo. ¹² Ginauri ea dedeha abina ea ata, eo ginauri ea abi hegagamagari abina ea ata hinage: dimo gamagaridi

eai, eo ginauri gamagamagari aridi eai, bogagu ie sese, eo ea guriam, eo egu ginauri se gamagari, eo egu ginauri nige'e, taiede aridi eai se heatagu, ¹³ ginauri gamagamagari abina ea ata ea ginauriwataidi Keriso debana eai, ia tauheadidirigu ede.

¹⁴ Taiede emi abi se lolo egu nuadubu arinai au nuanuatuigu. ¹⁵ Na omi Pilipi taumia ina au nuatui hinage evanelia abahetubuna eai, Makedonia ea laugabaei wa, nige ekalesia bodana esau se uriurima arigu eai ginauri mosena eo ginauri abina hesabadi, na omibom mo. ¹⁶ Tesalonia eai hinage ma esega, ma labui, emi ainauia au hetamariama, egu gogogesagesa eai au saguigu. ¹⁷ Taiede ainauia mo nige ea nuatui: na uaua mo arimiu eai bena i tubu hegagamagari. ¹⁸ Eau maisana maudoina ea abiyao, ea abi hegagamagari; bogagu ie seseo, paana Epaperota nimana eai ginauri wa, arimiu eai se laoma, ea abidio; aitalasam lolona, panena i amna, arinai Eaubada nuana i lolo. ¹⁹ Egu Eaubada emi saha emi saha gamagamagari abo i lediwa doha ena gogo hedebasaena eai Keriso Iesu debana eai. ²⁰ Eaubada Tamada abo se hedebasae, i lau e, huia gamagamagari nige nosina. Amen.

²¹ Hetabu tataodi gamagamagari Keriso Iesu boeana eai au lautoiedi. Eda tataoyao ina, maeguyao se lautoiemiu.

²² Hetabu tataodi gamagaridi eo Kaisara ena numa tataodi hinage se lautoiemiu.

²³ Eda Guiau Iesu Keriso ena ainauia omi gamagarimiu maemiu. Amen.*

* **4:23:** Roma eai se uri, Pilipi tataodi enadi, Epaperota nimana eai.

PAULO ENA URIURI KOLOSI ENADI

¹ Paulo Iesu Keriso ena Aposotolo, Eaubada ena nuatu debana eai, maegu eda tau Timoteo,

² Hetabu tataodi, eo eda tataoyao taumiatahitahi Keriso boeana eai, Kolosi eai: Ainauia enamiu, eo nuataru hinage, Eaubada Tamada arinai i laoma, eo eda Guiau Iesu Keriso.

³ Eaubada, eda Guiau Iesu Keriso Tamana, ai lautoiei, enamiu ai laulau- uura huia gamagamagari, ⁴ paana emi sunuma Keriso Iesu boeana eai wasana ai ataiei, eo emi gadosisi hetabu tataodi gamagaridi aridi eai. ⁵ Sunuma wa enamiu se torenonohaiyao galewa eai, iaede nabada wa ribamamohoina ribana eai au ataiei, evanelia eai; ⁶ i lagema arimiu eai, doha hinage ie lage tanoubu tupo gamagari, eo aiaina ie tore, doha hinage arimiu eai, asubenana eai wa au ataieibagunaei, i laoma e huia ta, Eaubada ena ainauia au hearo mamohoei, ⁷ doha heleda-taupaisoa lolona Eapara i heatamiu wa, ia Keriso ena heaheari taunuaadidirina esau, ai debamai eai, hinage ⁸ emi gadosisi Earua boeana eai, ia tauheribamai ede.

⁹ Paana ede nei asubenana eai wa wasana ai ataiei, i laoma e huia ta, nige ai uura lautom enamiu, ai henua ariri bena Eaubada ena nuatu italobaina eai au monau, sonoga gamagari eai, eo sibasiba earua ena tupo eai. ¹⁰ Bena au laulau doha mamohoi omi Guiau enanayao, tatao au henualolodi, hari paisoa hari paisoa lolo aridi eai, eo aiaimiu au tore, Eaubada nuanuatuna au hemotula. ¹¹ Adidiri gamagamagari eai se headidirimiu, ena gigibori namanamarina eai, nuamiu se paipai, au taubiga- daoi, makodemiu; ¹² Tamana arinai au aiaitoi, ia ede i hetoroda, hetabu-tataodi marana boeana eai edi gogo lailai, ita enada tupona ta abi. ¹³ Ia masigiri gigiborina eai i girihaida, i torelaeda Natu-eogoeogoina ena basileia eai, ¹⁴ ia debana eai se hemauida wa, osinana eai, baaea ribagigirina ede.

¹⁵ Eaubada ana ao nige tautitana, ia tautauna ede, ginauri maumauridi gamagaridi ealahouna; ¹⁶ paana ia nimana eai ginauri gamagaridi se hetubudi, galewa eai e tanoubu eai, matada eai ta itaitaidi e matada eai nige ta itaitaidi, hari terona, e hari basileia, e hari tanuaga, e hari gigibori: ginauri gamagaridi ia tauhetubudi, eo se hetubudi ia enana. ¹⁷ Eo ia ginauri gamagaridi i bagubagunaedi, eo ia debana eai ginauri gamagaridi se laulau. ¹⁸ Ia uruna ede, ekalesia tauna ede; ia ealahouna, mate eai tautorouio-baguna; bena ginauri gamagamagaridi aridi eai ia i toro baguna. ¹⁹ Paana Tamana

ena nualolo bena abihemonau maudoina ia arinai i ota. ²⁰ Ia enada i laubiri, ena satauro osinana eai, ia debana eai ginauri gamagaridi i helabiniedi; ena tanoubu eai ginaurina, e galewa eai.

²¹ Na omi, nabada wa au tausudara, nuamiu eai omi waiunu, emi paipaisoa baaea debadi eai, ²² huia ta i helabiniemiu, ia tauna bulumana eai, ena mate debana eai, bena i hetromiu omi tabuna, nige edi aba-hegirimiu, e edi abaribasuuimiu ia matana eai: ²³ ena au heesegaimiu, sunuma eai ta au laulau, emi paa adiadidirina arinai au toro-tahitahi, evanelia sunumana arinai taba nige se oihesuaramiu, iaede au ataieyao eo tatao gamagaridi galewa ubuna eai se guguiaidio, arinai eau Paulo se hetorogu ena heaheari eai ea lau.

²⁴ Amamna ea hearodi omi debamiu eai, se hekodeaririegu, eo Keriso ena amamna tupona ea abi eau bulumagu eai, ia tauna debana eai, iaede ekalesia. ²⁵ Arinai ede se hetorogu eau tauheheari, Eaubada i tauribaegu ena nuatu i leama omi debamiu eai, bena Eaubada ena riba ea hemamohoie; ²⁶ riba eamuyamui wa mumuga ariri eai, hari huia hari isi eai, se toreyamui i laoma e huia ta se hemasarahayao ia ena hetabu-tataodi aridi eai. ²⁷ Isi aridi eai gogo lailaina, namanamarina, ginauri eamuyamuina wa enana, Eaubada bena i hemasaraha, bena i soe Murimuri-tataodi aridi eai; iaede Keriso boeamiu eai, galewa namanamarina ta sunusunumaei wa. ²⁸ Ia ai guguaei, hari tau eo hari tau ai ribahesanapuei, hari tau eo hari tau ai heata, sonoga gamagamagari eai; bena hari tau eo hari tau ai woeai e i lolodumaduma, Keriso Iesu boeana eai. ²⁹ Arinai hinage ea paisoa, ea heasaasa, ia ana paisoa debana eai, iaede boeagu eai i paipaisoa ma-gigiborina.

2

¹ Ea 'ne bena abina au ata, eau nuagu i hisihisili ariri omi debamiu eai, eo isi Laodikea eai hinage, eo isi headi, gamagaridi sora nige agu ao bulumagu eai ta se ita. ² Bena nuadi se biga, bena gadosisi eai nuadi se ino-esegaidi, eo gogo saesaena eai wa, nuatu adidiri eo italobai se monau, bena Eaubada nuatuyamuyamuina abo abina se ata, iaede Keriso, ³ sonoga gogona maisa-lailaina maudoina ia arinai se toreamuiyao. ⁴ Teina ta ea ribaei, ata tau esau riba amna aridi eai i boraimiu. ⁵ Paana bulumagu eai ata bena ea miasuaraemiu, taiede earuagu eai eau maemiu, ea kode emi miamakomani ea ita, eo emi sunuma Keriso arinai i otaesegai.

⁶ Doha Keriso Iesu Guiau aue abi nuamiu eai, au laulau hinage ia boeana eai; ⁷ lammiu ia arinai au tore, ia boeana eai

se abi-hetoromiu, sunuma eai au torotahitahi doha hinage se heatamiuo, arinai emi lautoi au helai.

⁸ Au komani ata tau esau i boraimiu tanoubu ta ena sonoga eai, eo ena nuasaesae gaibu eai, doha tatao beabedi edi laulau, doha tanoubu ta kamanina, na nige doha Keriso enana. ⁹ Paana Eaubada ana ao maudoina i mia-hemonau, ia wa tauna eai. ¹⁰ Omi hinage au monau, ia boana eai, ia gigibori maudoina, eo tanutanuaga, uruurudi ede. ¹¹ Ia boana eai omi hinage peritome aue abi, peritome wa nige nima eai se ginauri, tauna bulumana emi aba-torehesuarana ede Keriso ena peritome eai: ¹² emi bapatiso eai ia maemiu se puruhimiuo, arinai hinage ia maemiu au torouioo, paana Eaubada ena paipaisoa au sunumaei, arinai Iesu mate eai wa i hetoro. ¹³ Omi emi baaea boeadi eai aue mate, eo bulumamiu wa nige se heperitome, ia maemiu i hemauriesegaimiu, emi baaea gamagamagari i nuatugabaedio. ¹⁴ Laugagaeo nima eai se uri arinai se hegiruda wa, i saugabaei, i lau baaeaida wa na i laehesuara, satauro eai i poasihepatulaei. ¹⁵ Arinai basileia eo gigiboridi i hetatagorigoridi, i hemasaraaha-auridi, eo i saepoidi.

¹⁶ Arinai tabu tau esau i hegirumiu ena buluma au aidi, e emi nomnom eai, e huia tabudi heasisina eai, e nawalai ena huia poe, e sabati asubenadi. ¹⁷ Meta tautau mo, ginauri sora nige se tubu heaheasonidi, na ginauri mamohoina wa Keriso enana. ¹⁸ Tabu tau esau i boraimiu emi ainauia i girihai, iabom ena nuatu eai bena nuatu-dobidobi gaibu e aneru tabaohuna i heatamiu, ginauri nige abina i ata arinai i hemodeuioi, ia ena nuatu buluma mo, i nuasaesae, ¹⁹ na Uru wa nige i abididini; uruna iaede tauna maudoina tauheaina, popona eo wonowonogarana i ino-esegaidi, arinai tauna wa ie tubu, ena tubu wa Eaubada i mosei.

²⁰ Ena omi tanoubu laulaudi aridi eai aue mate, Keriso maemiu, paana saha doha tanoubu eai ma-miamiu aiudi udoi udoi au awaabiedi? ²¹ (Tabu u abi-ita, Tabu u ai-ita, Tabu u abilau; ²² ginauri gamagaridi ta ta hepaisoaei na se tatagorigori.) Tatao mo edi lauheata eo edi laugagaeo ina. ²³ Teina ginauridi ta adi ao doha sonoga, itabom eda nuatu tabaohuna eo nuatu-dobidobiuiuo, eo tauda ta healapaipai; ia-mo nige gonoana se saguida buluma lelehina arinai.

3

¹ Ena omi Keriso maemiu au torouio, dimo ewana eai ginauridi au eoidi, Keriso ena aba-babawa eai, Eaubada nima-tutuna eai. ² Emi gadosisi au toreesegai ewana ginauridi aridi-ena, nige tanoubu ta ginauridi aridi-ena. ³ Paana omi au mateo, emi mauri Keriso arinai se toreyamui, Eaubada

boeana eai. ⁴ Keriso, ia eda mauri ede, sora ena huia taumaraha eai, omi hinage maemiu abo au taumaraha, ia namanamarina eai.

⁵ Arinai eaumi tanoubu eai ta au hematedi: isi ede ganaganawari, laulau bii, buluma lelehina, gadosisi baaea, gogo gadosisina iaede doha oitau tabaohuna. ⁶ Wau ginauri wa debadi eai Eaubada ena ouyalayala abo i taru awayagara nanatunayao potadi eai; ⁷ beabeana omi hinage dohila eai ta au laulau, huia ne ginauri ta boedi eai au miamia. ⁸ Na huia ta ginauri gamagaridi ta omi au torehesuaradi; nuabaaea, ouyalayala, nuakalapi, diladila, riba-hetaumaeamaea awamiu eai au ala-gabaei. ⁹ Tabu esau, esau i borai, paana tau beabeana wa au torehesuarayao, eo ena laulau hinage, ¹⁰ eo tau harihariuna au luyao, huia gamagari italobai harihariu arinai se heharihariu, ia tauhetubuna wa ana ao i abiwatai. ¹¹ Teinai nige Heleni e Iudea, peritome e nigeperitome, etene e Sikaito tauna, tau-auau, e tauiaiyairi, na Keriso mo ginauri maudoina ede, eo ginauri gamagaridi boedi eai.

¹² Besi ginauri ta au luidi, doha omi Eaubada ena hinehineri tataomiu, se hetabuemi, se gadosisi-aririemi, iaede nuatoatoa nuamiu eai, abilolo, nuatudobidobiui, manabiga, taubiga-daoi. ¹³ Esau, esau ena huia au mosei, eo au haiheduduraiuioimiu, ena esau biribiri i hetoro ena dogarini; doha Guiau emi baaea i nuatu-gabaedio, omi hinage au abi doha nei. ¹⁴ Teina mo i baguna, gadosisi au lui, ginauri gamagaridi i au esegaidi ede, se lau lolo-esega. ¹⁵ Eaubada ena loni nuamiu bena i tanugaedi, emi dohila ina, arinai se eogaimiu omi taumi esega; eo nuamiu eai au lautoi. ¹⁶ Keriso ena riba boemi eai bena i miahelai, ma sonogana maudoina, au haiheatauioimiu, au lauihasahasauioimiu, salamo eai, eo wana tabudi eai, eo wana earua enana, au wanawana, ena ainuia nuamiu eai, Guiau arinai. ¹⁷ Eo saha eo saha au abi, emi riba eai e emi laulau eai, ginauri gamagaridi Guiau Iesu esana eai au ginauridi, ia debana eai Eaubada, Tamana, au laulautoiei.

¹⁸ Sisine-tawasora, monemiuyao au awaabiedi, doha i lolo ede, Guiau boeana eai. ¹⁹ Tatao-tawasora, monemiuyao au gadosisiedi, tabu au siosiololo aridi eai. ²⁰ Merumeru, ginauri gamagaridi eai tamamiuyao eo sinamiuyao au awaabiedi, paana teina Guiau nuana i helolo aririei. ²¹ Mai-tama, tabu nanatumiyao au hesohesomdi, ata nuadi se beruberu. ²² Tauheaheri, ginauri gamagaridi aridi eai tanuagamiyao tanoubu eai ta au awaabiedi; nige matadi eai mo au paisoa, doha tatao mo nuadi au helolodi, na ma-nuaesegamiu, doha Eaubada au matausiei. ²³ Saha eo saha au ginauri, ma nuamiu au ginauri, doha Guiau enana au ginauri, tatao

nige'e,²⁴ au nuatui, Guiau nimana eai ena gogo tupona, maisa saesaena, abo au abi: paana omi Guiau Keriso au heaeaiei.²⁵ Ia baaea tauginaurina, baaea wa maisana abo i abi, hinage tatao taba nige se heasisiedi:

4

¹ Tanutanuaga e, emi tauheaheari enadi au mose-dudurai, eo gonogonoadi; au nuatui omi hinage Tanuagamiu galewa eai.

² Uura eai au tauesegaimiu, hinage au silasilawahetete, malautoimiu. ³ Enamai hinage au laulau-uura, bena Eaubada ema dobila i soe abo ai ribariba, Keriso ena riba-eamuyamui ai ribahemasaraha, iaede debana eai se augu ta, ⁴ egu riba bena se masaraha, doha i lolo ea riba.

⁵ Au laulau komakomani ganamuri matadi eai, tabu emi huia au gabaei. ⁶ Emi riba huia gamagamagari ma-ainauiana, au hearita, abo tau esa, tau esa ena riba abina au ata au heuio komakomani.

⁷ Wasagu gamagari Tukiko abo i heribamiu, ia egu tau lolona, tauheaheari i torotahitahi, eo helegu-taupaisoa lolona Guiau boeana eai. ⁸ Hesabana ede ina ea hetamari-awa, bena wasamiu i ataiei eo nuamiu i helolodi; ⁹ ia maena Onesimo, eda tau lolona esau, ta gadosisie, eo omi emi dogasau. Isi ema laulau gamagamagari abo se heribamiu.

¹⁰ Arisitako, helegu-tauauau-tauna esau, i lautoiemiu, eo Mareko, Banaba madiana wa (emi abiabina se heribamiu—ena i laowa ia bena au oiyami), ¹¹ eo Iesu, esana esau ede Iusetasi. Helegu-taupaisoa Eaubada ena basileia enana, boeadi eai ina tatao ta isibom tau-peritome, isi tauhenuabigagu ede.

¹² Eapara, omi enamiu esau wa, eo Keriso ena heaheari, i lautoiemiu. Huia gamagari uura eai enamiu i paisoa adidiri, bena au toro, bena au lolo, eo nuamiu se adidiri Eaubada ena nuatu au abiheohi. ¹³ Ia ea itayao arinai ea ribaei ina, omi arimiu eai i nuahai ariri, eo isi hinage Laodikea eai, eo Hierapoli eai. ¹⁴ Luka, doketa se gadosisie wa, eo Dema, se lautoiemiu. ¹⁵ Eda tataoyao Laodikea eai ai lautoiedi, eo sine Numepa, eo ekalesia ia ena numa eai se oioigogo. ¹⁶ Ina leta ta se hasiriyao boeamiu eai abo au hetamari bena ekalesia Laodikea eai se hasiri hinage, eo isi edi leta omi hinage abo au hasiri. ¹⁷ Hinage Arekipa au heriba au ene, "Paisoa Guiau arinai ue abi wa, u komani abo u ginauri heohi."

¹⁸ Eau Paulo, egu lautoi ina, eaubogu nimagu eai. Egu auau ta au nuanuatuidi. Ainauia enamiu. Amen.*

* **4:18:** Roma eai se uri, Kolosi tataodi aridi eai, Tukiko eo Onesimo nimadi eai.

PAULO ENA URIURI BAGUBAGUNANA TESALONIA ENADI

Ekalesia miamiana udoi udoi.

¹ Ai Paulo, eo Silevano, eo Timoteo, ema uriuri ina Tesalonia edi ekalesia arinai, ia ede Eaubada, Tamada boeana eai, eo Guiau Iesu Keriso boeana eai: Ainauia omi arimiu eai, eo loni hinage, Eaubada, Tamada arinai i laowa, eo Guiau Iesu Keriso arinai i laowa.

² Huia gamagamagari Eaubada ai lautoiei omi gamagarimiu debamiu eai, ema uura eai esamiu ai ataidi; ³ huia gamagamagari emi sunuma paisoana ai henuhenuaisini eo emi gadosisi paisoana eo emi sunuma miatahitahina au nuapaipai Guiau Iesu Keriso boeana eai, Eaubada Tamada matana eai. ⁴ Ema tataoyao e, ai nuatuiyao Eaubada i gadosisiemiu eo i hinerimiu wa. ⁵ Paana ede ema evanelia nige i lagewa arimiu eai doha riba mo, na ma gigiborina hinage, eo Earua Tabuna boeana eai, eo ma nuatuadidirina hinage. Ai boeamiu eai wa, ai tatao ema laulau se masaraha omi debamiu eai au itayao. ⁶ Omi hinage au hemuriwataimai wa, eo Guiau hinage au hemuriwatai, riba wa au abi ma nuadoudouaririmiu, eo ma kodemiu hinage Earua Tabuna arinai; ⁷ tauataiena gamagamagari, Makedonia eai eo Akaia eai, iilamiu abo hinage se ita. ⁸ Paana ede omi arimiu eai Guiau ena riba, wasana lailai, i lau nige Makedonia eo Akaia eai mo, na dimo gamagamagari hinage, emi sunuma Eaubada arinai i tadadagorigori; arinai nige riba esau saha ai ribaei.

⁹ Isibom edi ribariba si ene doha meta ai lusaewa arimiu eai wa hinage doha oitau au nuagabaedi au sinibuima Eaubada arinai, Eaubada maumaurina eo mamohoina au heaheayaiei; ¹⁰ eo ia natuna galewa eai i laoma au bagibagiei, ia mate eai i hetorouioiyao, ia ede Iesu, ouyalayala wa abo i lagema, arinai i hemauida.

2

Tauheayai tautauna, eo ena maisa.

¹ Ema tataoyao e, omi au nuatui, ai lusaewa arimiu eai wa nige ai laowa gaibu mo; ² amamna ai hearo bagubaguna wa, eo au nuatui Pilipi eai hinage se hebaaeaaririemai, taiede eda Eaubada boeana eai ai nuakipikipi, Eaubada ena evanelia ai heribamiu wa haiawayagaradaoi boeana eai. ³ Emi riba hepaipai nige ie tubu riba borabora arinai, eo nige laulau

biibii arinai, eo hinage nige nuatu borabora arinai. ⁴ Na doha Eaubada i iairimai evanelia ta ie tore arimai eai, hinage doha ede meta ai ribaei; tatao nige ai ene bena ai henualolodi, Eaubada mo ai nuatui, ia nuada tau lautadi ede. ⁵ Nige ma esega ai nuaoiemiu omi au nuatuiyao, emi ginauri hinage nige ai eooidi; Eaubada tau itamai ede. ⁶ Tatao edi riba hetausae nige ai eooi, omi arimiu eai nige'e, eo hari tatao aridi eai hinage nige'e; taba emi ginauri headi ai abidi i lolo, ai Keriso ena aposotolo. ⁷ Na ai mo boeamiu eai manamai se biga, doha hinage sine merumeru taitawataidi nanatunayao i suidi. ⁸ Paana ai gadosisiaririemiu ai ema nuatu ai ene nige Eaubada ena evanelia mo bena ai leawa arimiu eai, na earuamai bena ai lediwa hinage, paana ede ai henua-ariaririemiu, nuamai ede omi. ⁹ Ema tataoyao e, ama paisoa eo eawasimai se motu, au nuatuiyao: ai paisoa maiona, ai paisoa asubena paana ede nige ai henua bena ai laoma ai heporohemiu, Eaubada ena evanelia ai lauguguaiei omi arimiu eai. ¹⁰ Omi au itayao, eo Eaubada hinage i itamai, omi tauataiena boeamiu eai aie mia wa ema laulau tabudi eo duduraidi ai laulauwataidi, eo nige saha arinai se hegirumai. ¹¹ Doha hinage au nuatui gamagarimiu nuamiu ai ribahetaipaidi, eo nuamiu ai ribahetarudi, eo gamagarimiu ai lauhesommiu, doha hinage tamana ena abi nanatunayao aridi eai. ¹² Omi bena aue sae eo aue dobi Eaubada au nanabuei, ia taueogaimiu wa ena basileia arinai, eo ia namanamarina arinai.

¹³ Paana ede teina Eaubada ai lautoiei, nige ai lautom, Eaubada ena riba au ataiei arimai eai wa aue abi, nige au ene tatao edi riba, au ene Eaubada mo ena riba, doha ia ede, Eaubada ena riba mamohoi, riba wa i paipaisoa adidiri hinage omi tauatai ena nuaboeamiu eai. ¹⁴ Ema tataoyao e, Eaubada ena ekalesia Iudea eai, Keriso Iesu boeana eai, omi au laulauwataidi hinage: paana omi hinage emi eanua tataodi nimadi eai amamna au hearodi, doha isi, Iudea tataodi nimadi eai, amamna se hearodi. ¹⁵ Isi Guiau Iesu se unuhemate, eo edi peroveta tataodi hinage, eo se heamamnamai hinage; eo Eaubada nuana nige se helolo, eo tatao gamagamagari se lauguduguidi hinage. ¹⁶ Se ribanuahimai taba nige ai ribalau Etene aridi eai isi bena ata se mauri, edi baaea se hemotula mo; ouyalayala abo i lagema aridi eai, isi abo se sabom.

¹⁷ Na ehamaiyao e, huia kuukuu mo taumai mo se laehesuara na nuamai nige'e, arinai ai aipatedaoi ema gadosisi lailai bena matamiu abo ai itauioidi bena ai laowa arimiu eai, ¹⁸ eau Paulo ma esega, ma labui, na Satani mo i guduguduimai. ¹⁹ Ema sunuma, eo ema kode, ema abakode

koronana saha? Omi, e nige'e wa, eda Guiau Iesu Keriso matana eai, ia ena huia lagema eai? ²⁰ Paana ema namana-mari, eo ema kode, ede omi.

3

Keriso ena bogao tauna, eo hetahetabuena.

¹ To nuamai se tomatomaemiu ema nuatu ai ene besi i lolo aibom Atenai eai ai bawa, ² na Timoteo, ema tau, Eaubada ena tauheahayai, helemai taupaisoa Keriso ena evanelia debana eai, ai hetamariyawa arimiu eai, ia abo i hetoro headidirimiu, eo emi sunuma debana eai abo i henuatarumiu, ³ teina amamna ta debadi eai tabu tau esau i moimoiu. Na omi au nuatuiyao teina arinai hinage se hetoro-dao. ⁴ Mamohoi nabada eai wa ai maemiu ta miamiaesega wa, ai heribanonohaimiuo ita amamna abo ta hearo; ia ede au hearoyao eo au nuatuiyao. ⁵ Paana ede teina amnagu se tomatoma ariri wa, esau ea hetamariyawa emi sunuma wasana bena ea ataiei, ata taunohonoho i nohoimiuo, eo ama paisoa wa ai abigaibui.

⁶ Abo ina ta Timoteo arimiu eai i uioma i laoma arimai eai, emi sunuma eo emi gadosisi wasadi lolodi i ledima, eo si ene au nuanuatuimai huia gamagamagari, eo au henua ariri bena au itamai, doha hinage ai, ai henua bena ai itamiu. ⁷ Ema tataoyao e, ema amamna eo ema nuadubu gamagamagari arinai nuamai abo se taru, emi sunuma debana eai. ⁸ Emi mauri ede ina, taba omi Guiau boeana eai au toro tahitahinei. ⁹ Lautoi esana arinai debamiu eai Eaubada ai lautoiei, ema kode gamagamagari arinai ai kode omi debamiu eai, eda Eaubada matana eai. ¹⁰ Maiona eo asubena ai uura adiadiriri bena matamiu abo ai itadi, eo bena emi sunuma otadi abo ai hemotuladiwa.

¹¹ Na Eaubada iabom, ita Tamada, eo eda Guiau Iesu Keriso, abo i woeaimai ai laowa arimiu eai. ¹² Guiau emi haigadosisi abo i hetubu eo i hetadada helailai, eo tatao gamagamagari abo au gadosisiarriedi hinage, doha ai, ai gadosisiaririemiu wa. ¹³ Arinai abo nuamiu i hetahitahinedi hetabu laulaudi aridi eai, eo abo nige se hegirumiu Eaubada matana eai, ia ede Tamada, eda Guiau Iesu Keriso ena huia lagema eai, ia maena hetabu tataodi gamagamagaridi hinage.

4

Tauataiena ena lau, eo ena sunusunuma saesaena.

¹ Ema tataoyao e, hinage ai awanorilaowa, eo Guiau Iesu debana eai ai henuapaipaimiu, doha arimai eai au ataieyao emi laulau saha saha aridi eai Eaubada abo au henualolo, doha ede meta au hetadada helailai. ² Riba wa ai lauh-esommiu wa, Guiau Iesu arinai se laoma, au nuatuidio.

³ Na Eaubada ena nuatu ede teina, bena se hetabuemi, omi laulau biibiidi au otaotaedi. ⁴ Omi gamagarimiu, esau eo esau, taumi au abikomakomanidi, au hetabuedi, eo au heasisiedi; ⁵ tabu au abidi ma nuabiimiu lelehidi eai doha ede Etene, isi Eaubada nige abina se ata. ⁶ Tabu esau ena tau laulau borabora esau arinai i boraborai: paana ede Guiau tatao gamagaridi nei doha ia tauhemaisadi ede, doha hinage ai heribanonohaimiuo, hinage ai ribahemasarahayao. ⁷ Paana ede Eaubada nige laulau bii arinai i eogaida, na laulau hetahetabu arinai i eogaida. ⁸ Arinai riba wa tauawayagara nige tau mo i otaotaei na Eaubada Earua Tabuna tauleamana, i otaotaei ede. ⁹ Maeda tataoyao ta haigadosisiuoida, riba esana abo ea uriuriyawa arimiu eai; paana haigadosisi Eaubada i heatamiuo. ¹⁰ Mamohoi hinage emi laulau ede meta eda tataoyao gamagaridi aridi eai, Makedonia taumiaina hari tupo hari tupo eai; na ai awanorilaowa arimiu eai meta laulau me arinai au hetadada helailai; ¹¹ eo au aipate au miatautaubiga, omibom ami paisoa au paisoaei, eo omibom nimamiu eai au paipaisoa, doha hinage ai lauhesommiu wa. ¹² Isi murimuri tataodi aridi eai bena emi laulau se dudurai, eo nige ginauri esau au hedehe. ¹³ Egu tataoyao e, na isi ma enodi edi dobila ea ene tabu au supusupuei, eo tabu au nuadubuedi, doha tatao headi wa, isi nige edi sunuma. ¹⁴ Paana ede ena nuada ta ene Iesu ie mate eo i torouio, isi hinage Iesu boeana eai ma enodi Eaubada maena abo i woeaidima. ¹⁵ Teina ai heribamiu ta Guiau ena riba ede: ita taumaumauri ta, eo taumiamia ta i lau e Guiau ena huia lagema eai, isi ma enodi taba nige ta guduguidi. ¹⁶ Na Guiau ia galewa eai abo i dobima, se eogalailai, aneru edi wasawasa arinana, eo Eaubada ena bogigi abo ta ataiei. Isi Keriso boeana eai se mate abo se toro bagubaguna, ¹⁷ abo ita taumaumauri ta, eo taumiamia ta, maedayao abo se napugogoisinida eada boeana eai, duaduari eai Guiau abo ta hailobai: nei doha hinage abo Guiau arinai ta miahai huia gamagamagari nige nosina. ¹⁸ Teina riba ta aridi eai au haihenuabigauioimiu.

5

Guiau ena asubena, eo tauataiena ena nonoha.

¹ Na egu tataoyao e, huiadi eo borimaidi saha abo ea uriuri enamiu? ² Paana omi au nuatuiyao Guiau ena laoma asubenana eai doha tauaiyahari maiona eai. ³ Ena isi si ene se aitaubiga eo se miataubiga, ma esega abo sabom i hearodi doha sine bogabogana ena huia ie lage; eo nige edi abadago. ⁴ Ema tataoyao e, omi nige au mia masigiri boeana eai, nei asubena ne abo i hearomiu doha tauaiyahari

wa. ⁵ Omi gamagarimiu mara nanatunayao eo asubenana nanatunayao: ita maiona enana nige'e, eo masigiri enana nige'e. ⁶ Arinai ita tabu ta eno doha tatao gamagaridi; ita ta silasilawahetete, matada ta henegadi. ⁷ Paana ede isi taueno maiona eai se eno, isi taunomnom daoi maiona eai se nomnom eauyaure. ⁸ Na ita mo asubena tataoda matada ta henegadi, sunuma eo gadosisi ligoanina ta sora; eo ada ouou, mauri ta sunusunumaei. ⁹ Paana ede Eaubada nige i heteroda ouyalayala arinai, na abihemaui bena ta abi eda Guiau Iesu Keriso arinai. ¹⁰ Ita debada eai ie mate, ita ena ta silasilawa e ta eeno, ia maeda ta mauriesega. ¹¹ Arinai au haihenuapaipaimiu, eo au hai-heatamiu hinage, doha emi laulau wa.

¹² Ema tataoyao e, ai awanorilaowa arimiu eai, isi se paisoa boeamiu eai, eo au awatanuagaedi Guiau boeana eai, eo se heduduraimiu hinage, au nuatuidi. ¹³ Isi adi paisoa debana eai au heasisidumadumaedi gadosisi boeana eai. Omi au hailoni-gogoesega. ¹⁴ Na ema tataoyao e, ai awanorilaowa arimiu eai, isi sanapu baabaeata tataodi au ribahesana-pudi, eo taunuaberuberu au henualeledi, eo tauberuberu au saguidi, eo tatao gamagamagari au henuapaipaidi. ¹⁵ Au ita ena tau esau i hebaaeamiu ena baeata tabu au hemaisa; ginauri lolona mo huia gamagamagari au abiwatai, omibom arimiu eai, eo tatao gamagamagari hinage aridi eai. ¹⁶ Au kodekode mo huia gamagamagari. ¹⁷ Emi uura au he-esegai, huia gamagari. ¹⁸ Ginauri gamagamagari aridi eai au laulautoi; Eaubada ena nuatu arimiu eai ede teina Keriso Iesu boeana eai. ¹⁹ Earua wa tabu au heboso. ²⁰ Peroveta ribadi tabu au otaotaedi. ²¹ Ginauri gamagamagari hage au aiiitadi, ginauri lolona wa au sogohididini. ²² Ena ginauri aisadi itaitadi se baeata au tauotaotaedi.

²³ Loni ena Eaubada mamohoi abo i hetabuheohimiu; eo ea aiboda Eaubada arinai earuamiu se ohi, eo nuamiu se ohi, eo taumi se ohi se abi se itawataikomakomanidi, arinai nige edi abahegirumiu, i lau e eda Guiau Iesu Keriso ena laoma eai. ²⁴ Taueogaimiu i lolo mo; ena riba gamagaridi wa abo i abiwataidi.

²⁵ Ema tataoyao e, enamai au lau-uura.

²⁶ Eda tataoyao gamagamagari ai lautoiedi, eo au alagoi-hetabuedi. ²⁷ Guiau arinai ea lauhesommiu teina uriuri ta eda tataoyao tabudi gamagamagari matadi eai au hasiri.

²⁸ Eda Guiau, Iesu Keriso, ena ainauia arimiu eai i ota maemiu. Amen.*

* 5:28: Leta bagubagunana Tesalonia enadi, Atenai eai se uri.

PAULO ENA URIURI HELABUINA TESALONIA ENADI

¹ Ai Paulo, eo Silevano, eo Timoteo, ai uriuri Tesalonia edi ekalesia aridi eai, Eaubada ita Tamada boeana eai, eo Guiau Iesu Keriso boeana eai:

² Ainauia omi arimiu eai, eo Ioni, Eaubada ita Tamada, eo Guiau Iesu Keriso aridi eai se laowa.

³ Ema tataoyao e, huia gamagamagari nuamai se adidiri Eaubada ai lautoiei omi debamiu eai, meta hinage i lolo, paana ede emi sunuma i tadada lailai, omi gamagarimiu esau eo esau, emi haigadosisi hinage i tadada. ⁴ Ai mo ema nuatu omi debamiu eai Eaubada ena ekalesia ai ribapasipasiedi, paana baaea eo nuadubu gamagamagari au hearodi wa, emi nuapaipai eo emi sunuma se ita.

⁵ Eaubada ena hekiraino dudurai heiheinoina ede meta arinai ie masaraha, omi abo si ene au lolo Eaubada ena basileia abo au abi, ia wa debana eai hinage amamna ta au hearodi. ⁶ Eaubada ena nuatu i ene laulau dudurai ede tauhebaeamiu isi abo baaea se hearo, maisana. ⁷ Omi hinage baaea wa au hearo wa maemai abo se heaiyawasimiu, huiana ne Guiau Iesu Keriso se hemasarahayama, galewa eai i laoma, maena aneru gigigiboridi hinage. ⁸ Eo oeagi balebalelemnai eai, isi Eaubada nige abina se ata abo i hemaisadi, eo isi hinage eda Guiau Iesu Keriso ena evanelia nige se awaabiei. ⁹ Edi maisa ede isi abo se sabom ariariri nige nosina, Guiau matana eo ena gigibori namanamarina eai se lausuara. ¹⁰ Nei asubenana eai ne ia abo i laoma ena hetabu tataodi boeadi eai ia abo se henamanamari, tauataataiena gamagamagari ia abo se nooei (paana ema riba arimiu eai se ataieyao). ¹¹ Arinai hinage huia gamagamagari ai lau-uura enamiu, eda Eaubada i eogahaimiu wa ai ene bena abo i ene au lolo, eo ena nualolo gamagamagari, ena laulau lolo aridi eai, abo i hemamohoiei, sunuma abiabina ma gigiborina abo i hemamohoiei hinage. ¹² Eda Guiau Iesu Keriso esana abo se hedebasaei omi boeamiu eai, eo omi hinage ia boeana eai abo se hedebasaeamiu, eda Eaubada eo Guiau Iesu Keriso ena ainauia debana eai.

2

Guiiau ena asubena, eo Baaea Tauna.

¹ Na ema tataoyao e, ai awanorilaowa arimiu eai, eda Guiau Iesu Keriso arinai ena laoma debana eai, eo eda oigogoe-sega ia arinai debana eai. ² Omi nuamiu tabu se moimoiu heuheula, eo tabu au nuadubu earua, e riba, e uriuri doha

si ene ai enamai, debadi eai, abo au ene Guiau ena asubena i hanahanauaririmao. ³ Tabu tau esau i boraimiu, paana nei asubenana ne taba nige i laoma sora se uiouio baguna, eo nei tau baaeana ne hinage abo i taumasaraha, ia ede mate natuna. ⁴ Ginauri gamagamagari Eaubada esana se torelaedi eo se aiiahelahui ia i guduguidi eo i ribatausaeuioi hinage; arinai ia doha Eaubada i babawa mo Eaubada ena dubu eai, i awa-Eaubadauioi. ⁵ Au henuaisini e nige'e, eau maemiu ta mimia wa, teina ginauridi ta ea heribamiuo? ⁶ Au nuatuiyao saha ede tau ta i nuanuahi i lau e ena huia i masaraha. ⁷ Laulau baaea i laulauyamuyamuidi ie paisoa hetubuyao; na tauguduguduina abo i gudugudui i lau e ia abo se laeudoiei; ⁸ abotai abo Tau Baaea wa se hemasarahayama Guiau ia abo i healagorugoru ia awana earuana eai, eo ena laoma namana-marina eai arinai abo i hebaeaeoahi. ⁹ Ia ede ia ena laoma Satani ena paisoa arinai, eo ma gigibori gamagamagari, eo heiheinoidi eo noonoo boraboradi, ¹⁰ eo laulau baaea ena borabora gamagamagari isi taumatemate boeadi eai; paana isi riba mamohoina gadosisina nige se abi, ata se mauri. ¹¹ Paana ede teina Eaubada nuatu borabora abo i mosei aridi eai riba borabora bena se ataiei. ¹² Isi gamagaridi riba mamohoina nige se ataiei abo se baaea dumaduma, isi laulau baaea wa se kodei.

Lauhasahasa ribadi.

¹³ Ema tataoyao e, Guiau i gadosisiemiu wa, ai nuamai esega mo, huia gamagamagari Eaubada ai lautoiei omi debamiu eai, paana huia bagubaguna eai Eaubada i ribahinehinerimiuo abihemauri arinai, Earua ena hetabu hinage debana eai, eo riba mamohoina wa abanuatuina. ¹⁴ Aridi eai wa eda evanelia debana eai i eogahaimiu, eda Guiau Iesu Keriso ena namanamari abo au abi. ¹⁵ Ema tataoyao e, arinai au torotahitahinei, riba wa se heatamiu wa, awamai ribadi e ema uriuri ai uridiwa, au sogohidi.

¹⁶ Na Guiau Iesu Keriso iabom, eo Eaubada, ita Tamada, ia i gadosisieda, eo i henuabigada, i lau e nige nosina, eo ainauia debana eai, sunuma lolo i ledima hinage, ¹⁷ ia nuamiu i hetarudi, eo riba lolodi eo paisoa lolodi gamagamagari aridi eai abo i hetoroadidiriesegaimiu.

3

¹ Ema tataoyao e, ai ribalautom ede ina: au lau-uura enamai, Guiau ena riba bena abo i hetadada heula, ma aniona, doha hinage boeamiu eai. ² Ai, tatao eauyauredi eo tatao laulau baaeadi nimadi eai bena abo se abihemaurimai; paana ede tatao gamagaridi edi sunuma nige'e. ³ Na, Guiau mo i lolo, ia abo i henuapaipaimiu eo Tau Baaea arinai abo i abihemaurimiu. ⁴ Debamiu eai Guiau ai nuatuadidiriei,

ginauri wa ai lauhesommiu wa au abiabiwataidi, abotai abo au abiwataidi hinage. ⁵ Guiau nuamiu abo i woelaedi Eaubada ena gadosisi boeana eai, eo Keriso au bagiwatai ma nuapaipaimiu hinage.

⁶ Na ema tataoyao e, eda Guiau Iesu Keriso esana eai ai lauhesommiu, eda tataoyao ena esau i laulau gaibu mo, eo riba wa arimai eai i ataiei wa nige i abiwatai, ia au lausuaraei, i otawa. ⁷ Paana ede omi au itayao taba au lauwataimai: ai ema laulau boeamiu eai ai miamia nige ai laulau gaibu mo, ⁸ eo nige tau esau ana aiai ai aiai gaibu, na paisoa ai paipaisoa dumaduma ma amamnamai, maiona ai paisoa eo asubena ai paisoa, ata ami ai abi arinai abo ai hedehamiu. ⁹ Tabu nuamiu au ene ema dobila nige'e, na iilamai mo bena abo au lauwatai. ¹⁰ Paana ai maemiu ta miamia, teina ai lauhesommiu ta, ai ene ena tau esau nige i paisoa, hinage tabu i aiai. ¹¹ Na ai ataieyao headi boeamiu eai se laulau gaibu mo, nige se paipaisoa, isi manamanatatahai tataodi. ¹² Na isi nei doha ai lauhesomdi eo ai henuapaipaidi eda Guiau Iesu debana eai, isi abo se paisoa tautaubiga, eo isibom adi aiai abo se aiai. ¹³ Na omi, ema tataoyao e, laulau lolodi eai tabu amnamiu se tomatoma.

¹⁴ Ema riba ta, teina uriuri eai ta ena tau esau nige i awaabiei meta tau me au itasipoi, eo ia tabu au awaehaei, bena abo i taumaeamaea. ¹⁵ Taiede ia tabu au hewaiunuei, na au hedudurai mo doha ia eda tau esau.

¹⁶ Na, loni ena Guiau iabom loni i leawa huia gamagamagari, eo dobila gamagamagari eai, Guiau abo gamagarimiu maemiu.

¹⁷ Eau Paulo, egu lautoi ede ina eaubom nimagu eai, uriuri gamagamagari ia ede heiheinoina: eau egu uriuri ede meta. ¹⁸ Eda Guiau Iesu Keriso ena ainauia omi gamagarimiu maemiu. Amen.*

* **3:18:** Leta helabuina ta Atenai eai hinage se uri.

PAULO ENA URIURI BAGUBAGUNANA TIMOTEO ENANA

¹ Eau Paulo, Iesu Keriso ena aposotolo Eaubada Tauhemaurida ena laugagaeo debana eai, eo Guiau Iesu Keriso, ia eda sunuma paana.

² Timoteo arinai, eau natugu mamohoina sunuma boeana eai: ainauia, eo nuatoatoa, eo loni, Eaubada Tamada arinai se laowa, eo Iesu Keriso eda Guiau arinai se laowa.

³ Doha ea aiboda arim eai oa bena u bawa Epeso eai eau ea lau Makedonia, tatao headi bena u hetaladuidi hari lauheata tabu se heaheataei. ⁴ Piripiridae ribadi eo isi baguna ribadi tabu se nuatuidi, isi ede haiawayagara ena aba tubu, Eaubada ena riba hesibasiba sunuma boeana eai bena u abi-wataidi mo. ⁵ Na, laugagaeo aniona ede gadosisi nua-aaaana eai i laoma, eo eda nuatu-abaheduduraina nuaboeada eai i laoma, eo sunuma mamohoi nige ta kailiu. ⁶ Tatao headi se lausuarao se laudede ribahegohegoila mo se abiwataidi. ⁷ Edi gadosisi bena laugagaeo taulauheataena eai se lau; edi riba, eo edi gugua hinage aniodi nige abidi se ata.

⁸ Ita ta itayao laugagaeo i lolo, ena tau i abi komakomani; ⁹ teina ta ta nuatui, laugagaeo nige se hetubu taulaulaududuraina enana, na isi mo enadi laugagaeo tauutusina eo tauawayagara, eo hinage isi tatao Eaubada nige se nuatui eo taulaulaubaeea, eo tamadiyao tauunuidi eo sinadiyao tauunuidi, eo tauaiunu, ¹⁰ eo tautaitadio, eo ma heledi tatao tauhebiuiuidi, eo tatao tauaiyahradi, eo tauborabora, eo tauaiaigorawahi, eo ginuari headi hinage lauheata mamohoi se lauudoiei; ¹¹ nuawoiwoina Eaubadana ena evanelia loloaririna kamanina ena abiabi doha ede, ia ede se sunumaegu se tore nimagu eai.

¹² Eda Guiau Keriso Iesu ea lautoiei, ia i headidirigu, paana i ene ea lolo, ina paisoa ta ea paisoaei; ¹³ bagubaguna eau Eaubada tau-ariarinabaaeaina, eo eau ea hemahemanabara, eo eau tauhebahebaeea. Na eau se nuatoatoaigu paana egu laulau bubutum eai, ia hinage nige ea nuatulobai. ¹⁴ Eda Guiau ena ainauia i helai ariariri, ma sunumana, eo ma gadosisina hinage, ia ede Keriso Iesu boeana eai. ¹⁵ Ina riba ta riba mamohoina ede, i lolo tatao gamagamagari taba se abiwatai, ede Keriso Iesu i laoma tanoubu eai ta tatao baaea i hemauidi; eau mo ea baaea ariri isi gamagaridi ea hemuridi. ¹⁶ Paana ede arinai se nuatoatoaigu, bagubaguna Iesu Keriso ena nuatoatoa i laulau e i oihai, abo i hemasara boeagu eai, abiabina wa abo se itahai, isi maraitom asubena abo ia se nuatuwatawatai mauri nige nosina arinai. ¹⁷ Na, Wasawasa i

miamia e i miahai nige nosina, ia nige i mate, eo nige ana ao ta itaitai, Eaubada sonoga esega dumadumana mo, ta heasisiei, eo ta hedebasaei, ana huia ana tasi. Amen.

¹⁸ Timoteo natugu e, teina riba ta ea lauhesom ta, doha bagubaguna eai wa enam se riba peroveta wa, isi debadi eai iala lolona abo u ialaei; ¹⁹ sunuma, eo nuatu-abaheduduraina u abididinidi; isi tatao headi wau sunuma wa se torehesuara, arinai se tatadunaduna, eo se tamogorugoru. ²⁰ Esau ede Hamenaio eo Alesana hinage, isi ea moselaedi Satani arinai, abo matadi se heiladi Eaubada abo nige se arinabaaeaei.

2

¹ Ea riba hepaipaim, bagubaguna u aiaiboda, eo u laulau-uura, eo u laulau-uura hari tatao enadi, eo u laulautoi, teina ta u abiabiwataidi tatao gamagamagari enadi; ² wasawasa enadi, eo isi se heterodi ami tanuaga enadi; bena ita ta mia tautaubiga, eo ta mia komakomani, Eaubada ena nuatu gamagamagari eo laulau dudurai boeadi eai. ³ Ina doha emi abiabi abo i lolo Eaubada Tauhemaurida matana eai; ia hinage i henuaaririei. ⁴ Ia ena nuatu tatao gamagamagari bena se mauri eo abo se lage riba mamohoina marana eai. ⁵ Paana ede Eaubada esega mo eo taulaulaubiri Eaubada eo tatao duaduaridi eai esegana ede: tau wa Keriso Iesu; ⁶ iabom i moseuioi tatao gamagamagari edi maisa, ena huia eai abo se hemasaraha. ⁷ Arinai se heterogu eau taulaugugua, eo ea hemala aposotolo (riba mamohoina Keriso boeana eai ea ribaei, nige ea boraboraimiu); Murimuri-tataodi edi taulauheata sunuma eo riba mamohoi boeadi eai.

⁸ Egu nuatu ea ene bena tatao dimo gamagamagari eai abo se lau-uura, nimadi tabudi se helelesaedi, nige se ouyalayala eo nige nuadi se ponopono. ⁹ Sisine hinage doha, adi pasa mamohoi ede adi lulu se lui komakomanidi, adi ao se nuatubidobiuioidi, edi miamia se dudurai; nige uru hepahepasa, e *gold*, e giniuba matamatapoudi, e lulu maisa lailaidi. ¹⁰ Na (sisine Eaubada ena laulau se abiabiwatai temeta mo abo adi ao aba helolodi), paisoa lolodi se paisoaedi. ¹¹ Sisine bena se hesibasibadi, taba se monomonou ma awaabidi. ¹² Eau ea 'ne sine tabu i laulauheata, hinage tabu tau arinai i awatanuaga, na i monoutaubiga mo. ¹³ Paana ede Adamu se oiuma bagunai, abotai Eva.

¹⁴ Adamu hinage nige se borai, na sine wa se borai, arinai ia laugagaao tauutusina ede. ¹⁵ Taiede, ena laulaba eai abo i mauri, ena taba sunuma, eo gadosisi, eo laulau tabuna, eo nuatusibasiba i nuatuwataidi.

3

¹ Teina riba ta riba mamohoina ede, Ena tau esau i henua bena ia se hetoro tautaitawata, paisoa lolona i henua. ² Tautaitawata ia taba nige edi abahegiruna ia monena sine esega mo, ia tau nuatusibasiba, eo taunuatukomakomani, eo tauabiabilolo hinage, tatao i haihaitalaidi, eo laulauheata abina i atao; ³ ia nige i nom-waina, eo nige i laulaulubi, eo moni nige i gadosisie, na nuana ie biga, nige i arina gegagega, eo hari ginauri nige nuana se lauedi. ⁴ Tau wa ena numa tataodi i itawataikomakomanidi, ia nanatunayao hinage ia se awaabiei, eo se heasisiei; ⁵ (Paana tau wa ena numa itawataina nige abina i ata, Eaubada ena ekalesia abo edoha ena itaitawataina?) ⁶ nige tau harihariuna, ata nuana i lauisiniui oi eo ia abo i beu Diabolo ena baeaa abo i hearo. ⁷ Hinage isi ganamuri tataodi ia se awatauloloei; ata i beu abo se talatalawasiei, eo ata i abilau diabolo ena sa'i eai.

⁸ Diakona hinage doha ede meta abo se nuatusibasiba, nige memenadi se saa, nige se nomnom-waina-daoui, nige moni se gadosisie; ⁹ sunuma ribayamuyamuina se abididini, eo ma edi nuatu aba-heduduraina aa-aana. ¹⁰ Teina tatao ta hinage abo se lauita bagubagunaedi; se itadi nige se baeaa abotai abo diakona paisoana se abi. ¹¹ Monediyao, sisine, hinage se nuatusibasiba, eo nige se monumonunu, eo se nuatukomakomani, eo ginauri gamagamagari aridi eai se dudurai. ¹² Diakona monedi esega se tawasoraei, isi nanatudiyao eo edi numa tataodi hinage se itawataikomakomanidi. ¹³ Paana ede isi diakona paisoana se abiloloei isi wasadi lolona se lobai, eo se adidiri ariri edi sunuma Keriso Iesu boeana eai.

¹⁴ Teina ribadi ta ea uridi enam, eo egu gadosisi nige baeaa abo ea laowa arim eai. ¹⁵ Ena ea bebeda abo u nuatui em laulau saha saha Eaubada ena numa alona eai abo u abi, iaede Eaubada maumaurina ena ekalesia, riba mamohoina ana du toro, eo ana lauhebara ede. ¹⁶ Mamohoi, Eaubada ena laulau ena riba eamuyamui i sae ariri: Eaubada buluma eai i hemasarahama, eo Earua boeana eai ia se hedudurai, eo aneru ia se itaitai, eo Etene aridi eai se laugugui, eo tanoubu eai ta ia se abiwatawatai, eo namanamari eai se abiisinisae.

4

¹ Na Earua riba ta i ribaei, i ene huia murina eai tatao headi sunumana abo se laugabaei, earua borabora se woehesuaradi, edi riba abo se ataiedi, eo diabolo edi laulauheata hinage abo se ataiei; ² abo se ribaborabora, se boraauridi mo; edi nuatu abaheduduraina se gabuyao poasi gigiborina eai. ³ Tawasora se riba nuahi, eo tatao se laulauhesomdi sarai se dabudabu, ginauri Eaubada i hetubudi wa isi tauataiena, eo riba mamohoina tauataiena bena se abidi, ma-lautoidi.

⁴ Paana ginauri gamagamagari Eaubada i hetubudi se lolo, eo nige ginauri esau ta otaotaei, ena ta abi, eo ia ta lautoiei. ⁵ Paana ede Eaubada ena riba, eo uura debadi eai, wau ginauri wa se heloloesegaidio.

⁶ Ena teina ginauridi ta eda tataoyao nuadi u hesaedi wa, abo Iesu Keriso ena heaheari lolona eai u lau, sunuma ribadi eo laulauheata lolona boeadi eai se suisuim, sibasiba wa arinai u lagelage. ⁷ Na mumuga pipiriridaedi se baaea ribadi u otaotaedi u aipate mo Eaubada ena laulau aridi eai. ⁸ Ta lubulubui tauda ta headidiridi huia kuukuu mo; Eaubada ena laulau ginauri gamagamagari i helolodi, teina mauri ta i helolo, eo hinage meta mauri wa sora abo i lagema. ⁹ Teina riba ta riba lolona ede, eo i lolo tatao gamagamagari abo se nuanuatui. ¹⁰ Arinai ede ina paisoa ta eo riba talawasi ai hearodi, paana Eaubada maumaurina ai sunusunumaei, ia ede tatao gamagamagari Tauhemaauridi, isi taunuatuwataina isi mo enadi.

¹¹ Teina riba ta u lauhesomdi, eo u laulau heataedi. ¹² Oa hewari mo tabu tau esau i isugaraem; na taunuatuwataina oa iilam eai abo se lauwaitaim, riba, eo laulau, eo gadosisi, eo Earua, eo sunuma, eo nuaaa boeadi eai. ¹³ I lau e ea lagewa, tatao matadi eai u buka hasiri komakomani, eo u ribahepaipaidi, eo u laulauheataedi. ¹⁴ Ainauia oa nuaboeam eai tabu u nuagabaei, ia ede se leawao peroveta debana eai, eo tauitaitawata nimadi se saosediwa potam eai. ¹⁵ Teina ginauridi ta u nuanuatuidi; oa u mose-esegaidumadumaim aridi eai; em sibasiba abo i masamasaraha ginauri gamagamagari aridi eai. ¹⁶ Oabom u nanabukomakomanim, eo em laulauheata hinage u nuatukomakomani; u mia tahitahi boeadi eai; paana teina laulau ta debana eai oabom abo u hemaaurim, eo isi hinage em riba tauataiena abo u hemaauridi.

5

¹ Tautaubada tabu u ribasui: u lauhasahasai doha ia tamam: eo tatao hewahewaridi doha em tataoyao; ² Sinesinebada doha isi sinamyao, hasahasara doha isi louloumyao, ma nua'aam.

³ Sisine se wabu, ena se wabu mamohoi, u nanabuedi. ⁴ Na, ena sine wabuwabu esau ia nanatunayao, e ia tubunayao i abidi, isi edi numa eai se heatadi edi abi abo se lolo, eo tamadi, sinadi abo se heasisiedi; paana teina ta i lolo Eaubada matana eai, ia hinage i henuaaririei. ⁵ Na, sine wa ie wabu mamohoi, eo ia gogogesagesa sinena, Eaubada i sunusunumaei, eo maiona to asubena i miatahitahi, i aiaiboda, eo i laulau-uura. ⁶ Na, ia ena miamia eai iabom amnana i helolo mo, ma maurina na ia mo doha ie mate. ⁷ Teina riba ta u laulauhesomdi, isi abo nige edi aba hegihegirudi. ⁸ Ena esau ia mo enana nige

i aiainauiaidi, ia ena numa tataodi hinage nige i aiainauiaidi, sunumana wa i harereyao, tau nige i sunusunuma wa ena baaea nige doha meta.

⁹ Tabu sine wabuwabu se hinerigaibuidi, isi mo edi borimai se lau tatao-haiona-se-mate, eo isi hinage monediyao esega dumaduma. ¹⁰ Sine we ana paisoa tatao se ita abo se riba sine moidosiei, ena ia nanatunayao headi i suidi, eo ena laolaoma tataodi headi i haihaitalaidi; eo ena hetabu tataodi aedi i deudeuridi, eo ena tatao nuanuadubu i tautaubigaidi, eo ana paisoa lolodi gamagamagari i abiabidi ma nuanuaadidirina. ¹¹ Sisine wabu hasahasaradi mo u otaotaedi, isi sora abo se hetubu Keriso se gudugudui, abo se tawasora. ¹² Isi abo se mate, paana ede edi sunuma bagubaguna se abihaiyao. ¹³ Hinage abo se babawa gaibu mo, se elielitatausi hari numa, hari numa eai, hinage nige se babawa gaibu mo, isi abo se gagagari gaibu mo, eo tatao se hemohemodedi, eo edi ribariba nige se lolo. ¹⁴ Egu nuatu ea 'ne, sisine se wabu hasahasara abo se tawasoraui, nanatuidiyao abo se laulaulabauio, eo edi numa se itawatai, eo edi laulau aridi eai eda waiunu tabu edi aba hegirudi. ¹⁵ Paana ede headi se sinibuio, na se lu senauri Satani arinai. ¹⁶ Ena tau esau, e sine esau, tauataataiena isinewabuwabu headi se abidi, isi abo se tautaubigaidi, tabu ekalesia se nuatuidi, isi sinewabuwabu mamohoi ekalesia abo se tautaubigaedi.

¹⁷ Babada ena se itaitawatalolo abo au heasisi-labula-buiedi, isi ede se paisoa gugua, eo laulauheata aridi eai. ¹⁸ Paana ede uriuri eai si ene, "Bulumakau wa sitona tauutawatawaina tabu awana au au:" eo hinage si ene, "I lolo taupaisoa ena maisa i abi." ¹⁹ Tautaubada ena se hegiru, tabu oabom riba wa u ataiei, witinesi labui e haiona hinage matadi eai isi ia abo se hegiru. ²⁰ Isi taulaulaubaaea u ribasuuidi tatao gamagamagari matadi eai, headi hinage abo se matausi. ²¹ Eaubada matana eai, eo Guiau Iesu Keriso matana eai, eo aneru se heterononohaidio matadi eai, ea lauhesom, teina riba ta u laulauwatawataidi tabu tau esau u nuatunapai mo, am paisoa eai tabu tau esega mo enana u toro. ²² Tabu nimam u saosaeheulai tau esau boruboruna eai, tabu hari tatao edi baaea u sagusaguidi: ma nua'aam eai u laulau, oabom u heaauioim.

²³ Goila ahaaha mo tabu u nom: waina hinage begana mo u nom, bogam wa eo am asiebo kamanim wa u nuatui.

²⁴ Tatao headi edi laulau baaea se hemahemasarahanonohaidio, se lau baguna edi aba hedudurai eai; tatao headi edi laulau baaea abo hinage se hemasarahanuritaedi. ²⁵ Hinage doha tatao headi adi paisoa lolodi se hemahemasarahanonohaidio; eo tatao headi enadi sora nige se hemasarahadi taba

nige edi aba toreyamuidi.

6

¹ Heaheari tataodi gamagamagari isi dabaearodi eai oegi aba oibahe se toredi bena adi tanuaga se heasisiedi, arinai Eaubada esana, eo ena laulauheata abo nige se arinabaaeaidi. ² Isi hinage adi tanuaga tausunumawata, tabu se isugaraedi paana isi edi dodogayao; se heaheaidi mo paana isi tauataataiena, eo se gadosisi, eo isi paisoa wa tanuagadiyao.

Teina ribadi ta u laulauheataei, eo u ribahepaipaidi. ³ Ena tau esau riba udoi i lauheataei, na riba lolodi nige i abiwataidi, eda Guiau Iesu Keriso ena riba wa, eo Eaubada ena laulau lauheatena hinage, ⁴ ia tauyauyaure, nige saha abina i ata, hesihesio gaibu mo eo riba i awaawayagaraedi, aridi eai airomagigiri, eo lulu, eo arina gegagega, eo nuatu baabaaeadi se tubuma. ⁵ Tatao nuanuatubaabaaeadi edi aba awayagara, riba mamohoina nige se nuatui, edi nuatu si ene Eaubada ena laulau debana eai ginauri abo se abi hegamaragari; taba isi doha meta u laugabaedi. ⁶ Eaubada ena laulau se laulauwatawataidi ma nuabigadi mo isi edi gogo i hegamaragariariedi. ⁷ Nige ginauri esana ta leama tanoubu eai ta, taba nige ginauri esana abo hinage ta laei. ⁸ Ada ai ai eo ada lulu taba ta abigonogonoadi taiede abo ta miataubiga. ⁹ Na isi edi gadosisi mo bena se monamonaune abo se beu noho eo sa'i boeadi eai, eo se beu eo se tamogorugoru eo mate boeadi eai se hegalamosidi. ¹⁰ Moni gadosisina baeea gamagamagari lamdi esegana ede: headi nuadi se lau arinai, sunumana eai se nuatu ponori, eo nuadubu gamagamagari debadi eai isibom se goruiodi.

¹¹ Na oa, Eaubada ena tau e, teina ginauridi ta u dagogabaedi; laulau dudurai, eo Eaubada ena laulau, eo sunuma, eo gadosisi, eo healapaipai, eo nuabigabiga, meta mo u laulauwataidi. ¹² Sunuma ena iala lolona u heumariei, mauri nige nosina u abididididini, arinai ede hinage se eogahaim, oa hinage tatao gamagamagari matadi eai wasa lolona u wasawasaei. ¹³ Eaubada matana eai ea lauhesom, ia ginauri gamagamagari tauhemauridi, eo Keriso Iesu matana eai, ia Ponoto Pilato matana eai wasa lolona i wasawasaei. ¹⁴ Teina laugagaeo ta u sogohididini nige biina begana, nige ena aba ribasuu, i lau e eda Guiau Iesu Keriso i taumasarahama. ¹⁵ Ia ede iabom ena huia eai abo i heitadi, iabom wasawasa Saesaena esega dumaduma mo, wasawasa edi Wasawasa ede, eo guiau edi Guiau ede. ¹⁶ Iabom mauri nige nosina paana ede, ia i miamia marana boeana eai taba nige tau esau i lau arinai; nige tau esau ia i ita, hinage taba nige

tau esau itana abina i ata; ia arinai hedebasae, eo gigibori, i lau e ana huia ana tasi. Amen.

¹⁷ Isi teina tanoubu eai ta taumonamonaune u hetaladuidi, tabu se awatausaeuioidi, tabu edi gogo gaibu se sunumawatai, na Eaubada maumaurina mo se sunumawatai, ia ginauri gamagamagari i ledimao enada, aridi eai i henualoloda. ¹⁸ Isi wa edi abi abo se lolo, se hemalamonamonaune paisoa lolodi aridi eai, edi ginauri abo se abihesuherudi, tatao se sagusaguidi; ¹⁹ edi sitoa eai edi ginauri se peihemohemonau, paa lolona se torehetoanonohai huia wa abo i laoma se nuatui, isi abo mauri nige nosina se abidididini.

²⁰ Timoteo e, meta se tore arim eai u sogohididini, riba baaea eo ribaribagaibu u otaotaedi, eo hinage riba wa se boraauri si ene sonoga ribana, u otaotaedi: ²¹ ia ede tatao headi wau riba wa se ribaedi sunuma wa se nuatu ponori. Ainauia abo u abi. Amen.

PAULO ENA URIURI HELABUINA TIMOTEO ENANA

¹ Eau Paulo, Iesu Keriso ena aposotolo, Eaubada ena nuatu eai, mauri ribahesunumana eai, ia ede Keriso Iesu boana eai.

² Timoteo, natugu ea gadosisiaririei enana; Ainauia, eo nuatoatoa, eo loni, Eaubada, Tamada, eo eda Guiau Keriso Iesu, arinai se laoma.

³ Eaubada ea lautoiei, urutubuguyao aridi eai i laoma e huia ta hinage ea heaheayaiei ma nualelelelegu nige lautomgu, egu uura eai ea henuaisinim maiona eo asubena.

⁴ Ea henua ariri bena abo ea itam, matasulum ea nuatuidi, eau bena kode lailai i hemonaugu. ⁵ Em sunuma mamohoi boeam eai wa ea nuatui, oa tubum sine Loi ia hinage i abi bagunaeyao, eo sinam Euniki i abiwatai; ea nuatui hinage oa boeam eai. ⁶ Arinai wau ea ribaei wa abo u henuaisinidi Eaubada ena ainauia nimagu ea tore potam eai arinai ue abi, abo u healabalebalelem. ⁷ Paana ede Eaubada matausi earuana nige i leama arida eai; na gigibori earuana mo, eo gadosisi hinage, eo nuaadidirina.

⁸ Arinai ede Guiau wasaduaina tabu taumaeamaeana u taumaeamaea, eo eau hinage ena tauauauina tabu u taumaeamaeaegu; na oa mo evanelia ena amamna tupona hinage u abi Eaubada ena gigibori eai. ⁹ Ia i hemauida, i eogahaida paisoa tabuna ta arinai, ita nige ada paisoa debadi eai, ia mo ena nuatu eo ena ainauia debadi eai, sora tanoubu nige se hetubu se leama arida eai Keriso Iesu boana eai.

¹⁰ Huia ta i masaraha gorigorio Tauhemauida Iesu Keriso ena lagema eai, ia mate i helautomyao, eo mauri, eo mauri nige nosina i hemasarahadio evanelia debana eai. ¹¹ Arinai ede se heterogu ea hemala taulauguguia ta, eo aposotolo, eo Murimuri-tataodi tauheaheatadi hinage. ¹² Isi debadi eai ede teina amamna ta ea hearodi; taiede nige ea taumaeamaea, paana ede ia ea sunumaei wa ea nuatuiyao, hinage ea nuanu-atukomakomani ginauri wa ea moseyao ia arinai ia sogohina abina ie ata i lau e nei asubenana eai ne. ¹³ Riba mamohoina ribadi arigu eai u ataiedio wa u sogohidi ma sunumam, eo ma gadosisim Keriso Iesu boana eai. ¹⁴ Ginauri lolona se leawa wa Earua Tabuna i miamia boeam eai debana eai u sogohiei.

¹⁵ Teina ta u nuatuiyao, isi gamagaridi se miamia Asia eai se laugabaegu; Pukero eo Hemogeni maediyao. ¹⁶ Onesipero, eo ena numa tataodi, Guiau abo i nuatoatoaidi; paana huia gamagamagari i heaiyawasigu, agu auau poasi nige i taumaeamaeaei: ¹⁷ na ia Roma eai ie mia wa, i eoodadaigu e abo

i lobaigu. ¹⁸ Guiau ia abo i sagui, abo Guiau ena nuatoatoa i lobai nei asubenana eai ne, ena laulau gamagamagari Epeso eai arinai i bobodiegu wa u nuatuidio.

2

¹ Natugu e, ainauia wa Keriso Iesu boeana eai arinai abo u adidiriei. ² Riba wa arigu eai u ataiedi wa hinage tautana gamagamagari boeadi eai, abo u mosei tatao lolodi aridi eai, isi hari tatao abo hinage se heatadi. ³ U heurauram, u hep-aipaim, doha Iesu Keriso ena iala tauna lolona. ⁴ Nige tauiala esau teina mauri ta ginauridi i nuatuidi, tanuagana tau wa i eogai wa bena i hemala tauiala, ia abo nuana i lolo. ⁵ Taba tau esau i aipate bena i haitau hailako, ia korona taba nige i abi, ena haitau laugagaeodi nige i nuatuidi. ⁶ Oea tautawataina ia i paisoa arinai aiai wa tupona abo i abibagunai. ⁷ Egu riba u nuatuidi; Guiau sonoga abo i leawa ginauri gamagaridi abo abidi u ata.

⁸ U henuaisini egu evanelia ribana eai Iesu Keriso, Davida tumana, mate eai se heterouioi: ⁹ wau wa debana eai amamna ea hearo, doha taulaulaubaeea, mamohoi se augu: na Eaubada ena riba mo nige se auai. ¹⁰ Arinai ginauri gamagaridi ea nuapaipaiedi tatao se heterodi debadi eai, isi hinage mauri bena abo se abi ia ede Iesu Keriso boeana eai ie ota ma namanamarina nige nosina. ¹¹ Riba tohotohona ede ina: ena ia maeda ta mamate, ia hinage maeda abo ta mauri. ¹² Ena ta amamna, ia maeda abo ta hemala wasawasa: ena ia ta harerei, ia abo i harereda hinage. ¹³ Ena taba ita nige ta toroesegaida: ia mo i toroesegai, iabom taba nige i harereuioi.

¹⁴ Teina ribadi ta oa abo u henuaisinidi, eo u lauhesomdi Guiau matana eai riba gaibu aridi eai tabu se haiawayagara, tautaiena ata hinage nuadi se heponoponodi. ¹⁵ U aipate komakomani abo am paisoa Eaubada ie ita i lolo, oa taupaisoa abo nige u taumaemaea, riba mamohoina ta u heonakomakomani u laei. ¹⁶ Edi ribariba gaibu eo edi riba talawasi u otaotaedi: isi abo se lau baaea abo se hetadada. ¹⁷ Isi edi riba abo ie tubu mo ie lau doha bonu: isi ede Humenio eo Pileto. ¹⁸ Isi riba mamohoina wa se riba ponori, si ene mate torouiona ta abiyao; headi edi sunuma se hetatagorigori. ¹⁹ Taiede Eaubada paapaana i otadumadumaesegai, eo heiheinoina ede ina, Guiau enanayao i nuatuidi; hinage isi gamagamagaridi Keriso esana se atai baaea abo se laugabaei.

²⁰ Numa lailai alona eai ginauri headi *gold* eo *silver* aridi eai se ginauridi, na ginauri headi hinage oegi eo tano aridi eai se ginauridi: headi se heasisiedi: headi nige se heasisiedi. ²¹ Ena tau esau teina ginauridi aridi eai nuana i deurihaidi, ia

abo i hemala ginauri heaheasisina, abo se hetabuei tanuaga ana paisoa abo i abiloloei, eo paisoa lolodi gamagamagaridi aridi i nonohao. ²² Hewari, hasara, edi lelehi kamanidi u dagogabaedi: na laulaududurai, eo sunuma, eo gadosisi, eo loni u laulauwataidi maidamyao isi Guiau esana se atai ma nuaaadi. ²³ Edi hesio eauyaure eo supusupu u otaotaedi, u nuatui meta lulu abahetubuna ede. ²⁴ Guiau ena heaheari nige i lululu; na tatao gamagaridi i manamanabigaedi, eo lauheata abina ie ata, eo nuana i hepaipai. ²⁵ Isi ena se guduguduim u guguaedi ma manabigabigam: bena Eaubada abo ena henuabui i mosedi, riba mamohoina abotai se ita. ²⁶ Isi abo nihinihidi se uiouioma diabololo ena sa'i abo se dagogabaei, ia ena nuatu eai isi se toaidi wa.

3

¹ Teina hinage abo u nuatui, asubena murimuritana eai huia baabaeairiridi abo se lagema. ² Paana ede tatao isibom abo se gadogadosisiuiodi, eo ginauri abo se gadosisiedi, eo se ribapasipasiedi, eo se ribatausaedi, eo Eaubada se ribabaeaei, tamadiyao, sinadiyao se awayagaraedi, laulautoi nige abina se ata, nige se hetabu. ³ Nige edi gadosisi, nige nuadi si ene ai laubiriedi, se hegirunapaidi mo, laulau baaea se nuahaiedi, eo se manamanabara, eo tatao lolodi se issuewaedi. ⁴ Isi taumoru, eo nuadi se heuheula, se awapokiedi, laulaugaibu mo se kodedi, edi gadosisi meta, Eaubada nige se gadosisie doha. ⁵ Nenedi doha Eaubada ena laulau se nuatuidi, na ena gigibori mo se hekahekau; tatao meta doha u lauudoiedi. ⁶ Ia ede teina doha se awasae mahimahihi numa alodi eai, sisine eauyauredi ma baabaeaei se woelaedi, nuatu gerogeromadi se laulauwataidi. ⁷ Huia gamagamagari se lauheataedi, riba mamohoina nige abina se ata. ⁸ Doha Iani eo Iameri taudi labui Mose se gudugudui, teina ta hinage riba mamohoina se gudugudui, tatao wa nuadi se bii, eo sunuma wa ribana arinai nuadi nige se dudurai. ⁹ Isi taba nige se lau darudaru se lau mo, tatao gamagaridi edi eauyaure abo se ita, doha hinage wau tataodi labui isi enadi wa.

¹⁰ Egu riba u itakomakomaniyao, eo egu laulau hinage, eo egu nuatu adidirina, eo egu sunuma, eo egu nuatoatoa i laulau mo, eo egu gadosisi, eo egu nuapaipai, ¹¹ egu amamna hinage, eo egu nuadubu ea hearodi Anitioka eai, eo Ikonio eai, eo Luseta eai, amamna ea hearodi wa gamagamagaridi ne aridi eai Guiau i hemaorigu. ¹² Mamohoi isi gamagaridi Eaubada ena laulau tauabidi, Keriso Iesu boeana eai, amamna abo se hearodi. ¹³ Na tatao baaea, eo tatao borabora abo edi baaea se hetubu helailai, tatao se boraidi, eo isibom hinage se borauioidi. ¹⁴ Ginauri wa se heatamo eo abidi

u ataaririo u laulauwataidi, u nuatui hinage eai arinai ue abidi. ¹⁵ Eo ma gagirim eai wa uriuri tabudi abidi ue ata, isi ede abo se hesonogam mauri arinai, sunuma debana eai, ia ede Keriso Iesu boeana eai. ¹⁶ Uriuri tabuna gamagamagari Eaubada i mosemosedi tauurina aridi eai, lauheata arinai abo i lolo, eo ribasuu, eo ribahedudurai, eo laulaududurai lauheatana hinage. ¹⁷ Eaubada ena tau abo i loloesegai, paisoa lolodi gamagamagari abo i abikomakomaniesegaidi.

4

¹ Eaubada matana eai, eo Guiau Iesu Keriso matana eai oa ea lauhesom ta, ia ena huia taulagema eo ena basileia eai taumaumauri eo taumatemate abo i heduduraidi. ² Riba u lauguguaiei; huia gamagamagari, huia lolo eo huia baeae, riba u lauguguaiei mo; u hegiru, u ribasuu, eo u ribahepaipai ma nuatoatoam i laulau mo, eo lauheata. ³ Paana ede huia wa abo i lagema laulauheata duduraina taba nige se ataiei; isibom edi nuatu baeana eai taulauheata gamagaridi abo se heterodi enadi, isi beadi se hinahinana; ⁴ riba mamohoina beadi abo se laeudoiedi, riba gaibu mo abo se ataiwataidi. ⁵ Na ginauri gamagamagari aridi eai u nuapaipai, amamna ginauridi u healapaipaim, evanelia wasaduaina ta u paisoaei, am heaeai paisoana u hemasarahaeohi.

⁶ Osinagu doha se heboririyao, egu huia laugabaemiu i hanahanaumao. ⁷⁻⁸ Iala lolona ea ialayao, egu haitau ie ohi ede, sunumana ea sogohididiniyao, ie lau, ie lau e, laulaududurai koronana, enagu se torenonohaiyao, Guiau tauhedudurai tauna duduraina nei asubenana eai ne abo i leama; nige eaubom mo enagu, na isi gamagaridi hinage ena taumasarahama se gadosisie.

⁹ U adidiri abo u heulama arigu eai. ¹⁰ Dema i laugabaeguo, teina tanoubu ta i gadosisie, ia i lauo Tesalonia; eo Kerese hinage i lauo Galatia, eo Tito hinage i lauo Dalamatia ¹¹ Luka iabom mo maegu. Mareko u heriba maem au laoma, paana ia i lolo i heaheayaiegu. ¹² Tukiko ea hetamarilaei Epeso eai. ¹³ Agu pereue lailai Tiroa eai ea laugabaei Karepo arinai, ena u laoma u abiyama, buka hinage u ledima, eo uriuri mamoe opina eai u abikomakomanidima. ¹⁴ Alesania *copper* tau-paipaisoaina i hebaaeaaririegu; ana paisoa baabaeae Guiau abo i hemaisawatai. ¹⁵ Tau wa oa hinage u komakomaniei; paana ede ema gugua ribadi i ribaguduguduaririedi.

¹⁶ Se helauhetala-bagubaguna wa, nige tau esau i ribasaguigu, na tatao gamagaridi se laugabaegu. Ea lau-uura Eaubada arinai tabu i hegirudi. ¹⁷ Taiede Guiau maegu, ia i totoro eau gegesigu eai, eo i headidirigu; eau debagu eai gugua ribana se ataohi, eo Murimuri-tataodi gamagamagari

abo se ataiei hinage. Arinai liona awana eai wa se girihaigu. ¹⁸ Hinage Guiau paisoa baabaaea gamagamagari aridi eai abo i girihaigu, eo ia abo i hemaorigu ena basileia galewa eai abo ea abi wa. Ia i namanamari ede, i lau e huia nige nosina. Amen.

¹⁹ Peresila, eo Akula, eo Onesepero, eo ena numa tataodi hinage ea lautoiedi. ²⁰ Eraseto Korinito eai miamiana; na Telopimo i asiebo to ia ea laugabaei Mileto eai. ²¹ U aipate adidiri wao'o huiana sora nige i tubu u laoma arigu eai. Eubulu i lautoiem, Pudena hinage, eo Lino, eo Kalaudia hinage, eo ena tataoyao gamagaridi.

²² Guiau Iesu Keriso earuam ia abo maena. Ainauia abo u abi. Amen.

PAULO ENA URIURI TITO ENANA

Hari dubu hari dubu, itaitawataidi eo woeawoeaidi lauheatana.

¹ Paulo, Eaubada ena heaheari tauna, eo Iesu Keriso ena aposotolo, Eaubada ena hinehineri tataodi edi sunuma bena ea sagulaei, eo mamohoina edi itaitalobaina hinage, arinai Eaubada ta nanabuei, ² mauri i lau e nige nosina ta sunsunumaei wa, doha Eaubada ia taba nige i boraida, ia ede i ribahesunumaedao, mumuga eai i laoma ina; ³ abotai, iabom ena huia eai, ena riba i hemasaraha, iaede se leama eau bena tauhemasarahana, doha Eaubada Tauhemaurida i lauhesomgu ta;

⁴ Tito enam ina, natugu mamohoi e, eda sunuma esegana ede:

Ainauia eo loni enam, Eaubada arinai i laoma, eo Keriso Iesu Tauhemaurida hinage.

⁵ Kerete eai ea laugabaem paana ede ina, ginauri headi metai se abihedeha, oa bena u heduduraidi, eo babadayao bena u tauribaedi, hari eanua hari eanua eai, doha am paisoa ea hetorom; ⁶ aitea tau nige edi aba-hegiruna, sine esega mo monena, nanatunayao hinage se awaabi eo taba nige se hegirudi si ene se hemanabara e se miamia gaibu. ⁷ Paana Tauwoeawoea tabu edi aba-hegiruna, ia Eaubada ena ginauri tauhepahepasoaina, bena nige i tanuagauioi, nige i ouyalayala heula, nige taunomnomdao, nige i aiaipidiri, taba nige moni biibiina arinai se hegadolesa. ⁸ Na ena laulau mo tatao i haihaitalaidi, ia abilolo taugadosisiena, eo iabom ena gadosisi abina i ata i tanugaedi, ena abi se dudurai, tau tabuna, miamia lolo taunanabuena. ⁹ Riba mamohoina se heatada wa i sogohididini, arinai abo abina i ata lauheatama mohoioi i laulauheata, eo ena riba tauheuiio edi riba i hemaisadi to se italobai. ¹⁰ Paana tauawayagara se gamagari, tauribariba gaibu, tauboraborasom, tauperitome pelena wa boeana eai se gamagari ariri; ¹¹ bena ta oihemonoudi, isi numa headi taumiaidi maudoidi se heasibuidi, ginauri nige i lolo se ribaribaedi iaede se laulauheata, moni biibiina debana eai. ¹² Doha isi edi eanua tauna i ribaei, isibom edi peroveta wa, ena riba i ene, “Kerete tataodi kamanidi se boraborasom, sarai baaedi isi, se miamia gaibu, se aiaisom.” ¹³ Ina riba sanapu ta mamohoi. Arinai i ribasuuidi, u riba adidiri, bena sunuma ta se abi-mamohoiei, ¹⁴ tabu Iudea edi piripiridae se ataatai-lau aridi eai, e tatao dobila mamohoi se tausuarayao edi riba-hesom se awaabiedi. ¹⁵ Tau-nuaaa arinai ginauri

gamagaridi se aa mo, na tatao nuadi se hebiidio, eo nige se awaawamamohoi, isi matadi eai nige ginauri esau i aa; nuadi eo nuatu aba-heduduraina nuaboeadi eai, se bii gogo. ¹⁶ Edi riba si ene Eaubada abina se ata, na edi paipaisoa eai ia se harerei; isi taukabakabaleadi, tauawayagara, nige gonoadi paisoa lolona esau se ginauri.

2

Lauheata: Eaubada ena pele suina eo woeaina.

¹ Na oa mo ginauri saha eo saha se patulau lauheata mamohoina arinai, te-meta abo u ribaribaedi. ² Tautaubada bena se mia komakomani, se italobai, nuadi se taru, sunuma eo gadosisi eo taubiga se abimaodaidi. ³ Sinesinebada hinage doha, bena edi laulau eai se heaheasisi, nige dodoga se hebahebaeadi edi gigimasi eai, nige nomnom-waina i auaudi; na saha i lolo mo, iaede bena se laulauheataei, ⁴ abo isimurimurita sisinedi se heata komakomanidi bena monediyao se gadosisiedi eo nanatudiyao se gadosisiedi. ⁵ Bena se sibasiba, tau-miamia aa, isibom edi numa-alo eai se paipaisoa, edi abi se lolo, isibom monediyao se awaabiedi, arinai Eaubada ena riba bena tabu tatao edi aba-ribabaaeaina. ⁶ Hinage doha, tatao hewahewari u lauhasahasaidi bena isi nuadi se tanuagaedi. ⁷ Ginauri gamagaridi eai oa iilam eo em paipaisoa lolodi bena i hemala edi tautau; em lauheata eai abi mamohoi eo nuatu duduraina eai u hemasarahauioim, ⁸ em ribariba se lolo arinai taba nige se hepilipilidi, arinai ena esau bena i tauguduim abo i taumaeamaea, nige aba-ribabaaeaida esau i lobai. ⁹ Tauauau tataodi u lauhasahasaidi bena ginauri gamagaridi aridi eai tanuagadiyao se awaabiedi eo nuadi se helolodi, eo tabu se oioipili. ¹⁰ Tabu edi ginauri se abi gaibuidi, na adi paisoa lolodi debadi eai abo tanuagadiyao se sunumaedi, eo Eaubada Tauhemauida lauheatana abo se mia helolo.

¹¹ Paana Eaubada ena ainuia i taumasarahao, tatao gamagaridi edi mauri i leama, ¹² i heatada bena Eaubada mia-murimuriena, eo tanoubu ta gadosisina, nuada eai ta aiduiedi, na ina huia ta ta mia komakomani, ta mia dudurai, Eaubada ta nanabuei tanoubu eai ta. ¹³ Sunuma nua woiwoinana wa, iaede eda Eaubada lailaina, Tauhemauida Iesu Keriso, ana tepo namanamarina abo i taumasaraha, ede ta bagibagiei. ¹⁴ Ia i moseuioi ita debada eai, bena baaea gamagamagari aridi eai i unehaida, i heada iabom enana, iabom ena tataoyao mamohoi, iabom ana gogo, ita wa paisoa lolodi aridi eai taunuahai.

¹⁵ Ginauri ta u lauhasahasaidi, u ribasuu, u riba doha tanuaga ena ribariba. Tabu tau esau i nuatuhegagirim.

3

¹ Nuadi u hesae, basileia tanuagadi eo aidobudi emi tanu-tanuaga, se awaabiedi. Se nonoha paisoa lolo gamagaridi aridi eai bena se soasoari, ² tabu tau esau se ribabaeai, tabu se haihaiawayagara, na se taubiga mo, edi manabiga abo i masaraha tatao gamagaridi aridi eai. ³ Paana ita hinage nabada wa ribada se walolo, ta awayagara hinage, se woea-ponorida, hari gadosisi eo aba-kode udoi udoi ta heayaiedi, nua-ealayala boeana eai ta mimia eo aiaromagi-giri, se hewaiunueda ita hinage tauhewahewaiunu. ⁴ Na Guiau Tauhemaurida ena taubiga, eo ena gadosisi abia-bilolona i masaraha eo ta ita, ⁵ i tua-hemaurida wa, nige ita eda paipaisoa e eda laulau dudurai debadi eai, na ia ena nuatoatoa debana eai mo, se labauioida wa deuri-heaana eai, eo heharihariu Earua Tabuna boeana eai, ⁶ iaede i hegoi-auri potada eai, ta abi-helai Tauhemaurida Iesu Keriso debana eai; ⁷ ena ainauia debana eai se heduduraidao, ta hemala ena gogo taubina, iaede eda sunusunuma mauri nige nosina. ⁸ Riba mia-tahitahina ina.

Ea henua riba ta u riba-headidiri, arinai abo Eaubada tauataiena se komani se moseuioidi paisoa lolodi se laelaedi. Ginauri ta se lolo, tatao aba-saguidi ede. ⁹ Na hesio eauyaure si otawa, eo isi-baguna esadi leledi, eo haisaesae, eo laugagaeo ribadi haiawayagaradi: meta nige tatao aba-saguidi, nige aniodi. ¹⁰ Aitea tau lauheata borabora i hetubu, ma-esega, ma-labui u ribahesanapuei, murina eai tau doha ina besi, u laugabaei. ¹¹ U nuatui ena laulau se gewagewa, baeae i ginaginauri, iabom ribahematena i ribaeuioi.

¹² Sora ena Aretema ea hetamariyawa, e Taikika, abo u aipate adidiri u laoma arigu eai Nikapoli eai; nuagu i adidiri bena huia gogoma eau nei eai abo ea mia. ¹³ U aipate hinage Senasi, laugagaeo-tauna, eo Apolo, u hegeru komakomanidi ena se torohai edi adau eai; tabu ginauri esau se deha. ¹⁴ Eda tataoyao bena abina se ata se paisoa lolo, abo gonoadi porohe udoi udoi se baheidi, ma-uauadi eai se laulau.

¹⁵ Isi gamagaridi wau-ta maeguyao ina se lautoiem. Metai hinage taugadosisiemai sunuma boeana eai ta, enamai u lautoiedi.

Ainauiana i mia-taunimiu, omi gamagarimiu. Amen.*

* **3:15:** Nikapoli, Makedonia eai, se uri Tito enana. Ia se hetoro Tau-woeawoea bagubagunana ekalesia Kerete eai i itawataidi.

PAULO ENA URIURI PILIMONI ENANA

Taudago esau Paulo maena se hailobai to i nuabui. Bena i uio ena dobila i hedudurai tanuagana Pilimoni arinai, ia tauataiena eo Paulo ehana esau, ena leta ina.

¹ Eau Paulo Keriso ena tauauau, maegu Timoteo eda tau, Pilimoni enana, helemai-taupaisoa ai gadosisie wa, ²⁻³ eo loumai Apia hinage, eo Akipa tauialasaguimai esau wa, eo ekalesia em numa eai se oioigogo wa:

Ainauiana enamiu, eo loni Eaubada Tamada arinai i laoma, eo Guiau Iesu Keriso arinai i laoma.

⁴ Huia gamagamagari egu Eaubada ea laulautoiei, esam ea ataatai egu uura eai, ⁵ paana em gadosisi wasana ea ataiei, eo em sunusunuma Guiau Iesu arinai, eo hetabu tataodi gamagaridi aridi eai, ⁶ eo ea lau-uura bena em italobai eo ginauri lolodi gamagaridi Keriso debana eai ta abidi, abo enam tau-heoiesega se hearodi hinage. ⁷ Em gadosisi nuagu i hekode ariri, nuagu i hebiga, egu tau e, oa debam eai hetabu-tataodi nuadi se adidiri.

⁸ Arinai mamohoi Keriso debana eai taba ea nuakipikipi to abiabi dudurai esau arim eai ea lauhesom, ⁹ taiede gadosisi debana eai taba nige ea lauhesom, na abo ea awanori mo — doha eau Paulo, tautaubadagu ta, ina huia ta eau hinage Iesu Keriso tauauauna esau— ¹⁰ ea awanorim natugu esau debana eai, ma-auaugu eai ta ea hemala ia tamana. ¹¹ Ia esana Onesimo. Beabeana wa nige i saguim, na abotai abo i hemala * tausagusaguim, tausagusaguigu hinage. ¹² Ia ea hetamariuioiawa, doha eaubogu nuagu tupona ea hetamariyawa ta. ¹³ Ea henua ariri taba ea abi-nuahi, arigu eai i mia, evanelia debana eai se tutuguduigu ta, arinai abo i itawataigu, doha taba oa inai abo u itawataigu. ¹⁴ Na eau taba nige sah ea ginauri, ena oa nige ue eari, bena em abilolo tabu eau egu dudu debana eai, na oabom em nuatu eai mo.

¹⁵ Ata bena te-ina debana eai huia begana i tausuaarem ta, bena abotai abo u abiuiui i lau e nige nosina. ¹⁶ U abiuiui nige doha em heaheari tauauauna mo, heahearina i dioi i hemala em tau mamohoi, eau ea gadosisi-aririei, nuana oa arim eai mo i lolo ariri ede, em tau bulumana eai, em tau Guiau boeana eai hinage. ¹⁷ Ena u ene oa eo eau ta paipaisoa esega, besi ia u abi gonogonoana doha eau taba em abiabigu. ¹⁸ Ena saha arinai u ene i abi-baaeaim, e saha arim eai i abi-

* **1:11:** Esa ta, Onesimo, aniona Heleni arinadi eai ede Tausagusagu.

hagahagai, u leama eau abo ea hedudurai. ¹⁹ Eau Paulo ina, eaubogu nimagu eai ta ea uriuri, ea ene abo ea hemaisa — taiede oa em hagahaga arigu eai taba nige ea ribaei, iaede em mauri, arigu eai ue abi wa. ²⁰ Ehei, egu tau e, hage u hekodegu ina, Guiau boeana eai, eo nuagu u heamna Keriso debana eai.

²¹ Ea sunusunumaem abo egu gadosisi u lauwaitai ina, enam ea uriuri na ea nuatuiyao egu riba abo u awaabiei, abo u dioi hinage.

²² Riba esau hinage, egu aba-mia abo u abi-nonohai, paana egu sunusunuma nige baeana abo ea lage boeamiu eai, emi uura maisana.

²³ Epapara, helegu-tauauau esau Keriso Iesu boeana eai, ena lautoi i hetamariyawa; ²⁴ Mareko hinage, eo Dema, eo Luka, helegu tatao-paisoa.

²⁵ Eda Guiau Iesu Keriso ena ainauia earuam i hemonau. Amen.†

† 1:25: Roma eai se uri, Pilimoni enana, Onesimo debana eai.

URIURI HEBERU TATAODI ENADI

Mauri tanuagana ede Natuna, iabom ie sae: peroveta nige'e, aneru nige'e.

¹ Mumuga eai, hari teha eai eo hari dobila eai, Eaubada ie riba tamadayao aridi eai, peroveta awadi eai; ² i lau e huia murimurita eai ta i ribalaoma arida eai hinage, Natuna debana eai, ia wa i tauribaei ginauri gamagaridi tanuagana, ia debana eai hinage tanoubu i hetubu. ³ Eaubada namana-marina abahesinana ede ia, ana ao mamohoi tautaua, ena gigibori ribana eai ginauri gamagari i abididinidi. Baaea i heagabaeyao abotai i bawabigabiga ewa eai, tepo saesaena nimatutuna eai. ⁴ Aneru i saetawatawaidi, ia mo esana lolodumadumana ia se mosei, isi nige doha.

⁵ Aisega aneru huia esana eai Eaubada ie riba i ene, "Oa natugu ede, asubena eai ta ea hetubum"? (Ps. 2.7.) ⁶ E i ene, "Eau abo tamana ede, ia abo natugu"? (2 Sam. 7.14.) ⁷ Eo huia ne natu-ealahouna i hetamariyama tanoubu eai ta i ene, "Eaubada ena aneru gamagamagari ia taba se aihelahui." (Ps. 97.7.)

⁸ Na natuna mo i ribaei i ene, "Eaubada e, em terona i lau e nige nosina, em tanutanuaga tuena, laulaudududuraina, iaede em basileia tuena. ⁹ Duduraina oa u gadosisie, baaeana u hewaiunuei; arinai Eaubada, em Eaubada, kode eausina eai urum i heyausi, em tataoyao u saetawatawaidi." (Ps. 46.6-7.) ¹⁰ Eo hinage:

"Oa, Guiau, huia bagubagunana eai tanoubu paana ue tore, galewa ede oa nimam paisoana;

¹¹ abo se tatagorigori, na oa mo abo u laulau, gamagaridi abo se beabea, doha lulu i beabeao

¹² doha abobo abo u noudi, doha lulu abo se abihai esau se lui. Na oa mo am ao gonogonoana ede, em borimai taba nige se ohi." (Ps. 102.25-27.)

¹³ Na aisega aneru huia esana eai ie riba i ene, "Nimatutugu eai u bawa, i lau e em waiunuyao se hemala aem adi bou"? (Ps. 110.1.) ¹⁴ Isi ede earuearua, tauheaheri mo, e nige'e? Mauri tauabina debadi eai se hetamaridi ede, bena isi enadi se paisoa.

2

Tau, Iesu Keriso, tanoubu abo se tore ia aena ubuna eai.

¹ Arinai ginauri wa ta ataiedio, i lolo ta ataieididinidi, ata ta buigabaedi abo ta sapurihai. ² Paana ena riba ta, aneru se bahei wa, mamohoina ede, eo laugagaao utusina gamagari,

eo awayagara, abo se hemaisadi nonoina duduraina eai,
³ ita haedi abo eda aba-dago, ena mauri lailai aririna ta
 ta nuagabaei? Guiau awana eai se hemasarahaba-gunai,
 abotai ia ena riba tauataiena se hemasarahama ita arida eai;
⁴ Eaubada hinage hemasarahana eai i saguidi, heiheinoi eo
 noo se tubu, gigibori udoi udoi, eo Earua Tabuna ena ainauia
 eai, i soieyama wa iabom ena nuatu eai.

⁵⁻⁶ Tanoubu esau matada eai wa, ta ribaribaei wa, nige
 aneru i mosedi se tanuagai. Na haedi se ribaeyao si ene,
 “Tau ia saha, to u nuanuaiei? E tau natuna, to u bobodiei?
⁷ Tau u hetubu, ena abatoro u mosei, i sigidobi begana aneru
 ubudi eai, hedebasae eo heasisi arinai u hekorona, eo u
 hetoro nimam paisoadi i tanuagaidi. ⁸ Eo ginauri gamagaridi
 u toredi aena ubuna eai, ia bena se awaabiei.” (Ps. 8.4-
 6.) Ginauri gamagaridi tau nimana eai i toredi, ia mo nige
 ginauri esau Eaubada awaabina murimurina eai i toro. Abo
 ina ta sora nige ginauri maudoina ta ita i tanuagaiheohi. ⁹ Na
 Iesu ta iita, huia kuukuuna ena abatoro ede aneru ubudi eai,
 mate amamnana debana eai ia se hekorona, se hedebasaei
 eo wasana i lolo, Eaubada ena ainauia eai ia mate i aiitayao,
 tatao gamagaridi enadi.

¹⁰ Doha i dudurai, ia wa debana eai ginauri gamagaridi se
 tubu, eo ginauri gamagaridi enana se hetubudi, nanatunayao
 se gamagari ariri bena i woeaidima iabom namanamarina
 boeana eai, arinai edi mauri tauedabagunaena wa i helolo-
 dumadumai, amamna debana eai. ¹¹ Tauhetahetabu eo isi
 wa se hetahetabuedi, gamagaridi paadi esega. Arinai ede
 nige i mae esadi i ataidi ia ana bogaoyao mamohoi, i ene,
¹² “Abo esam ea ribahemasaraha egu tataoyao aridi eai, oi-
 gogo boeana eai abo ea wana eo ea hedebaseaem.” (Ps. 22.22.)
¹³ Eo i ribauio i ene, “Ia abo ea sunusunumaei.” Eo hinage,
 “Hage au ita, eau ma-nanatuguyao ta, isi wa Eaubada i ledima
 arigu eai.” (Is. 8.17-18.)

¹⁴ Doha merumeru tamadiyao bulumadi eo osinadi se abi
 tupona, ia hinage doha, ena tupo maeda ie abi, bena mate
 dobilana eai ia wa mate gigiborina ie abi nimana eai wa,
 abo i unui, iaede diabololo. ¹⁵ Eo isi gamagaridi wa, edi mauri
 asubenadi maudoina eai mate matausina i auauidi, bena i
 iairigabaedi. ¹⁶ Mamohoi, ia nige aneru i abidi i hepaisoaidi,
 Aberahama pesipesinayao mo. ¹⁷ Arinai i aipate ginauri
 gamagaridi aridi eai maena tataoyao abo adi ao esega, bena
 i hemala edi kohena saesaena, enadi tautoro, taunuatoatoa
 ia, eo nuana i tore-esegai, Eaubada ena dobila eai bena i
 woeaidi, eo tatao edi baeea maisana ia i hedudurai. ¹⁸ Paana
 ia amamnana i abiyao, noho i hearoyao, arinai ede abina i ata
 tatao edi noho eai i saguidi.

3

Keriso, Natuna, ia Mose, tauheaheari, i saetawatawai ede.

¹ Arinai egu tataoyao tabudi e, omi galewa miamiana eai emi tupo au abiyao, hage Iesu au nuatui, ia eda sunuma ta Aposotolona ede, eo kohenana saesaena. ² Tauhetorona arinai nuana i patu-esegai, doha Mose Eaubada ena numa wa i miatahitahini. ³ Taiede, Iesu hedebaseaena mo Mose enana wa i saepoi, doha numa nige se hedebaseai na tauhetorona mo. ⁴ (Numa esa, esa tauhetorona, na Eaubada mo ginauri gamagaridi tauhetorodi.) ⁵ Mose mamohoi ia tauheaheari lolona, ia ena numa eai, ginauri sora abotai se ribaedi, ia tauhemasarahadi ede. ⁶ Na Keriso, ia doha natuna mamohoi, ena numa tanuagana ede ia. Ena numa tataodi ede ita, ena eda nua-adidiri, eda kode, eda sunuma ta abididini i lau e anasiga.

⁷ Arinai doha Earua Tabuna ena riba wa, i ene:

“Wau-ta ena arinana au ataiei,

⁸ tabu nuamiu au heoiuradi, doha huiana au hesohesomgu, doha noho asubenana eai, barabara eai wa,

⁹ huiana ne tamamuiyao se nohoigu wa, se lauitagu, egu paipaisoa se ita borimai tatao-labui-se-mate.

¹⁰ Arinai nuagu i baaea teina isina ta aridi eai, ea ene, ‘Tatao ta huia gamagari nuadi eai se gegege, egu laulau se hekahekaudi.’

¹¹ Arinai egu ouyalayala eai ea riba aigora,

‘Taba nige egu aiyawasi eai se lusora.’” (Ps. 95.7-11.)

¹² Egu tataoyao e, au komakomanimiu, ata boeamiu eai esau nuana ma-baaeana, nige i awaawamamohoi, Eaubada maumaurina abo i beugabaei. ¹³ Au lauhasahasaiuioimiu, asubena gamagari, eda huia ina gonoana ta ene “wau-ta,” ata esau baaea ena borabora debana eai iabom nuana i heoiura. ¹⁴ Paana ita eda tupo Keriso arinai ta abi, ena eda nua-adidiri bagubagunana wa ta abiabididini i lau e anasiga.

¹⁵ Doha si ene “Wau-ta,” arinana ena au ataiei, tabu nuamiu au heoiuradi, doha hesohesom huiana eai wa. ¹⁶ Aidobudi wa, arinana se ataiei to se hesom? Isi gamagaridi Mose i woehaidi Aigupito se torohaigabaei, e nige’e? ¹⁷ Aidobudi aridi eai nuana i baaea borimai tatao-labui-se-mate? Isi baaea tauabina aridi eai, e nige’e, to sinaredi se laugabaedi barabara eai wa? ¹⁸ Aidobudi i riba aigoraidi taba nige se lusora ena aiyawasi eai? Tauawayagara wa, isi ede. ¹⁹ Arinai ta ita, nige gonoadi se lusora, paana nige se awamamohoi.

4

Tauataiena aiyawasina, arinai abo i lusora, tautauna.

¹ Taba ta matausi mo, ata se ribahesunumaedao bena ena aiyawasi eai ta lusora, ia mo esau arimiu eai dobila eai i tarutoro. ² Paana ita arida eai wasa lolona se guguai, doha isi; na riba ataiena nige i helolodi, paana tauataiena nige nuadi esega sunuma eai ta. ³ Ita tauataiwataina ta lusorao aiyawasina wa arinai, doha i ribaei, “Egu ouyalayala eai ea riba-aigora, taba nige se lusora egu aiyawasi eai,” ia mo dobila ta se nuatunonohaiyao, tanoubu ena huia tubu eai. ⁴ Doha haedi hinage i ribaeyao, asubena hehaligigi-labuina ribana, i ene, “Na Eaubada ana paisoa gamagaridi aridi eai i aiyawasi, asubena hehaligigi-labuina eai.” ⁵ Aba-urina esau eai hinage i ene, “Taba nige se lusora egu aiyawasi eai.” ⁶ Hede-omi i masaraha, headi abo se lusora, na isi-baguna wa wasa lolona se ataibagunai wa, isi nige se lusora, edi awayagara debana eai. ⁷ Asubena esau hinage i ribaei, “Wau-ta,” sorasora lohalohana abotai Davida ena uriuri eai, iaede ta ribaeyao, “Wau-ta, ena arinana au ataei, tabu nuamiu au heoiuradi.” ⁸ Taba Iosua abina ie ata aiyawasi wa i mosedi, taba nige murina eai abo asubena esau i ribaei. ⁹ Hede Eaubada ana bodao edi sabate aiyawasina sora ie ota; ¹⁰ paana ia wa taulusorao ena aiyawasi eai, ana paisoa gamagaridi aridi eai i aiyawasi hinage, gonoana doha Eaubada ana paisoa eai i aiyawasi.

¹¹ Hage nuada ta headidiridi bena ta lusora wau aiyawasi eai wa, ata tau esau i beu, iilana gonogonoana doha isi, iaede awayagara. ¹² Paana Eaubada ena riba maumaurina ede, eo i paipaisoa, i mata ariri, nige elepa aba-aiaiunu matalabulabui esau ena mata doha, iabom i gorigorilapai i lau e nua eo earua i tupalapai, eo siada popodi eo aroarodi hinage, i heula ariri nuatu eo aipate nua boeana eai i itasipoidi. ¹³ Nige ginauri maumauri esau matana eai i tauyamui, na ginauri gamagaridi se masaraha, eo ia matana eai se wese-auridio, ia wa arinai ta itaitalau.

¹⁴ Arinai eda kohena-saesaena, lailaina, galewa eai i lusorao, iaede Iesu, Eaubada Natuna, eda miamia ta taba ta sogohididini. ¹⁵ Eda kohena-saesaena ta taba nige ta ene eda beruberu nige se abiita, ia amnadi i ataidio, ia tupo gamagari eai noho i hearodio, doha ita ta hearodi, ia mo nige baaeana. ¹⁶ Arinai besi ta laoma, ena ainauia teronana eai ta hanahanauma, ma-nuaadidirida, bena ena nuatoatoa ta hearo, ena ainauia ta lobai, i saguida eda deha huiadi eai.

5

Ita eda Kohena-saesaena, tautauna eo dobilana.

¹ Kohena-saesaena tatao boeadi eai, esau, esau se tauribaei tatao enadi i toro, Eaubada ena dobila i paisoaei, bena

ainauia i tore, eo aitalasam, baaea debadi eai. ² I taubiga ariri tausupusupu eo tauponori aridi eai, paana ia hinage tau beruberuna esau. ³ Matapaana ede baaea aitalasamna i ginauri, tatao enadi eo iabom enana hinage. ⁴ Taba nige tau esau bena i helolouioi, arinai paisoa ta i abi, na Eaubada ena eoga eai mo, doha Arona se eogai wa.

⁵⁻⁶ Keriso hinage, kohena-saesaena paisoana ie abi nige iabom i hedebasaeuioi, na tauyogaina ede i tauribaei, ia wa i ene, “Oa natugu, wau-ta ea hetubum”, (Ps. 2.7.) eo uriuri esau eai hinage i ene, “Oa kohena tauna i lau e nige nosina, Melekisedeka ena dobila u miawatai.” (Ps. 110.4.)

⁷ Ia bulumana asubenadi eai wa, Iesu i uura-lau ia arinai, ia wa abina i ata mate eai i hemaui, i aibodagadogadora, ma-doulailaina, ma-matasuluna, ena uura wa se ataiei, paana Eaubada matausina i matusi. ⁸ Ia natuna mamohoi taiede amamna debadi eai awaabi abina ie ata; ⁹ i lau e i lolodumaduma, arinai tauawaabi gamagaridi edi mauri i lau e nige nosina ia tauhetubuna ede, ¹⁰ Eaubada esana ie tore kohena-saesaena, Melekisedeka dobilana eai.

¹¹ Ia ribana se gamagari taba ai ribaedi, headi aniodi se pipipiri ariri paana emi ataatai eai au porohe. ¹² Huiana i lageo taba omi taulauheata, ia mo sora se heaheatamiu, Eaubada ena riba paana eo lauheatana bagubagunana. Au hemala doha isi susu mo se nomnom, taba nige ai ai mamohoi se ai. ¹³ Esau esau ena taba susu mo i nomnom, ia laulaududurai ribana sora nige i italobai, sora ia kaimou mo. ¹⁴ Na ai ai mamohoi meta tatao lailai adi, edi lubulubui eai saha i lolo e saha i baaea, abina se ata se itahineri.

6

¹ Keriso ena lauheatana bagubagunadi hage ta hemuridi, ta dalapoe i lau e maudoina ta abi, tabu paana mo ta toretoreuioi, doha nuabui paisoa matematedi aridi eai, sunuma Eaubada arinai, ² bapatiso lauheatana, nima uru potana eai se saosae, taumate edi torouio, eo hemaisa i lau e nige nosina. ³ Teina abo ta abi Eaubada ena ie eari. ⁴ Headi beabeana matadi se lala wa, ribadi: galewa ainuiana se ai-itayao, Earua Tabuna arinai edi tupo hinage se abiyao, ⁵ Eaubada ena riba lolona amnana se ataieyao eo huia i laolaoma matada eai gigiborina, ⁶ abotai ena se tausuarua, nige abina ta ata nuabui esau arinai ta heharihariudi, paana isibom debadi eai Eaubada Natuna se hesatauouioi, masaraha eai ia se isugaraei. ⁷ Huia gamagari nabu i taru tano potana eai, tano wa ie nom abo i ua, ai ai se tubu, tano taugiarina wa adi, doha Eaubada tano wa i ainuiai. ⁸ Na ena nurinuri eo lagau baaea mo, tano wa abo se ribaei i baaea, ana paisoa ede se aigabu mo.

⁹ Ai riba doha ina, na taiede, egu nuanuai e, ginauri lolodi mo ai sunumaedi abo omi arimiu eai se ua, ginauri isi ede mauri ena tupo eai se laulau. ¹⁰ Eaubada ena abi se dudurai, ami paisoa eo ia esana au gadosisiei taba nige nuana se hui, paana hetabu tataodi enadi ma-paipaisoamiu ina. ¹¹ Ai henua bena emi aipate saesaena ta au laelaei, sunumamiu au abihemonau i lau e anasiga, ¹² arinai tabu au bebeda, na isi wa edi sunuma eo edi taubiga debana eai ribahesunuma se hearodio, isi bena au abiwataidi ede.

¹³ Huiana ne Eaubada ribahesunuma i mosei Aberahama, nige esau ena sae doha ia, esana eai bena i aigora, arinai iabom esana eai i riba aigora, ¹⁴ enaba, “Mamohoi ainauia eai abo ea helolom, helaina eai abo ea helaim.” (Gen. 22.16-17.) ¹⁵ Arinai Aberahama huia lohaloha i miataubiga, i lau e Eaubada ena ribahesunuma aniona ie ita. ¹⁶ Tatao huia gamagari ginauri tau-saetawatawaidi mo esadi eai se aiaigora, eo haiawayagara gamagaridi se heduduraidi aigora esau debana eai. ¹⁷ Arinai Eaubada ena nuatu bena i hemasaraha komakomani, ribahesunuma tauabina wa bena se italobai, ena nuatu i ota-esegai mo, arinai aigora eai i riba headidiri. ¹⁸ Ginauri labui taba nige se ori, arinai Eaubada nige abina i ata i boraida, debadi eai nuada se adidiri ariri, ita baaea tau-dagogabaena ta bawayamui mauri boeana eai, ita sunuma matada eai se tore wa, taunapuhaina. ¹⁹ Sunuma ta ta abi i hemala nua sonoga, i talaahi mamohoi, i miatahitahi, i tatasorao woeo wa tupo aroarona eai. ²⁰ Metai Iesu i lusorao, tauedabagunaeda, i hemala eda kohena-saesaena i lau e nige nosina, Melekisedeka ena dohila eai.

7

Melekisedeka, eda kohena Keriso, tautaua. (Ge, 14.17-20.)

¹ Teina Melekisedeka ta, Salem edi wasawasa, Eaubada saesae-aririna ena kohena tauna, ia Aberahama i hailobai huiana ne wasawasa i unuidi wa to dohila eai i uiuioma, Aberahama wa abo i hedebasaei. ² Arinai Aberahama i heuio, ena gogo ie soi pei saudoudoi, lausoiso i esega enana i mosei. Ia esana heaheasonina bagubagunana ede laulau-dudurai wasawasana, abotai Salem wasawasana, heaheasonina ede loni wasawasana. ³ Nige tamana, nige sinana, nige uru-tubuna, ena asubena nige edi huia tubu, ena mauri nige anasiga, na doha Eaubada Natuna tautaua, ia kohena eai i miahai huia nige nosina.

⁴ Tau ta hage ta nuatui, i sae ariri! Arinai tamada Aberahama iala eai gogo i lobai wa, lausoiso i hesaudoudoina enana i mosei. ⁵ Hinage laugaga eo eai se ribaei, Levi nanatunayao kohena paisoana se abi, laugaga eo eai edi sorasora se mosedi,

gogo enadi tupona doha nei se tano tatao aridi eai, ta ene edi tataoyao mamohoi aridi eai se abi, paana gamagaridi Aberahama tauna eai se tubuma. ⁶ Na ina tau ta, ia nige adi boga tauna, ena lausoisoi Aberahama arinai ie abi, eo ribahesunuma tauabina wa i riba helabiniei. ⁷ Taba nige ta harere, tau dobidobi ia ede ainauia abo i abi tau saesaena nimana eai. ⁸ Ina huia ta tatao sora abo se mate, edi lausoisoi hesaudoudoina se tanotanoi tatao aridi eai; nei huia ne esau wa enana i tanoi, iaede se ribaei sora ma-maurina. ⁹ Arinai ta ene Levi laugagaeo eai gogo se soi hesaudoudoi arinai lausoisoina esega i abiabini, ia mo Aberahama debana eai ia hinage gogo tausoiena esau, ¹⁰ paana Levi sorana urutubuna tauna boeana eai, huia ne Melekisedeka i hailobai.

¹¹ Ena gonoana ginauri se hedudurai-heohidi kohena Levi ana bogao edi paipaisoa eai (dobila ta boeana eai laugagaeo ie lage tatao aridi eai), paana saha bena kohena udoi ta abi, Melekisedeka ena dobila eai, nige Arona ena dobila eai? ¹² Paana kohena ena dobila ena se bui, laugagaeo hinage abo se bui. ¹³ Tau wa, riba ta arinai ie patu wa, ia hari boga tauna, nige ia ana boga tauna esau aitalasam hatahatana eai i paisoa. ¹⁴ I masaraha hinage, eda Guiau ia Iuda edi bogao arinai i tubuma, boga ta Mose nige i tauribaedi bena se hemala kohena.

¹⁵ Abotai i masaraha ariri, kohena esau abo i tubu murita, ana ao doha Melekisedeka, ¹⁶ i hemala kohena nige laugagaeo dobilana eai, e urutubuna adi bogao debana eai, na iabom maurina gigiborina eai. ¹⁷ Doha ia wa se ribaei: “Oa kohena i lau e nige nosina, Melekisedeka dobilana u miawatai.” ¹⁸ Tupo esega eai ta ita laugagaeo se torehesuara, paana i beruberu, nige ena aba-heloloda ¹⁹ (paana laugagaeo nige abina i ata ginauri esau i helolo mamohoiei); tupo esau eai dobila udoi ta ita, iaede ta sunumaei arinai abo ta hana-hanauma Eaubada arinai.

²⁰ Dobila ta nige ta abi gaibui, riba aigora esau hinage debana eai ta abi. ²¹ Isi tau hemala-kohena, nige riba aigora debana eai paisoa ta se mosedi, na esau ta ma-aigorana, si ene,

“Guiiau i riba-aigoraie

taba nige nuana i bui, i ene

‘Oa kohena tauna i lau e nige nosina.’ ”

²² Riba ta debana eai dobila esau, i lolo ariri, ta sunumaei Iesu debana eai.

²³ Kohena se tauribaedi wa, se gamagari ariri, ia mo mate i helautomdi, taba nige adi paisoa se laelaei huia nige nosina; ²⁴ na ina eda kohena esau ta i lauesegai, ena mauri i lau e nige nosina, ana paisoa taba nige ana ao ie ori. ²⁵ Arinai isi

wa ia debana eai se laoma Eaubada gegesina eai, abina i ata i hemauidi, huia i lau e nige nosina, paana ia mamiana enadi i aiaiboda ede, huia gamagamagari.

²⁶ I dudurai ariri eda kohena-saesaena doha ina ta abi, ia tabuna, nige ena baeea, nige biina, nige begana ena tupo tatao baeea aridi eai, galewa ewadi ia mo i saepoidi. ²⁷ Ia taba nige asubena gamagari aitalasam i ginauri iabom ena baeea debadi eai eo tatao gamagaridi edi baeea debadi eai, doha kohena-saesaedi adi paisoa wa; paana teina i ginauriyao, ma-esega mo, huiana ne ena heaitalasamuio eai iabom i moseuioi, huia gamagari enana gonoana. ²⁸ Mamohoi laugagao tatao i tauribaedi se hemala kohena-saesaedi; na aigora wa ribana, laugagao i tauhemuri, Natuna ede i tauribaei, ia wa se helolodumadumao i lau e nige nosina.

8

Kohena edi dohila ede tautau mo, Keriso ia mamohoina.

¹ Eda ribariba eai ta, ginauri bagubagunana ede ina: eda kohena-saesaena ta ia i babawa Eaubada ena terona namamarina nima-tutuna eai, galewa eai, ² apa-tabuna mamohoina wa arinai ia tauheaeai, iaede Eaubada i abihetoro wa, nige tatao. ³ Kohena-saesaedi gamagaridi se tauribaedi bena ainuia eo aitalasam Eaubada se mosei; arinai teina eda kohena-saesaena ta ia hinage bena enana i leama i mosei. ⁴ Ena ia tanoubu eai ta ma-miana, ia taba nige kohena eai i laulau, paana isi nonohadi ina, ainuia tautorena, doha laugagao eai edi dohila se mosedio. ⁵ Adi paisoa eai galewa ginauridi se abiwataidi, doha tautauna se ginauri, doha Mose Eaubada i ribahesanapuei wa huia ne i hetubu bena * apa tabuna wa i ginauri: i ene, “U ita komakomani, ginauri gamagaridi doha tautauna oea tupina eai se heitam wa, iaede u ginauriwataidi.” ⁶ Na huia ta Keriso heaheari paisoana loloaririna i lobai, Eaubada dohila esau i hetubu, wasawasana, dohila paana ede ribahesunuma lolodi, nige doha bagubagunana wa. ⁷ Ribahesunuma bagubagunana ena i lolo, taba nige esau bena ta eooi.

⁸ Ia mo nige ena lolo gonoana, arinai i hegiru i ene:

“Sora au ita, asubenadi abo se lage, Guiau ie riba;

rihahesunuma harihariuna abo ea hetubu Isaraela numana arinai, eo Iudea numana;

⁹ nige doha ribahesunuma esau wa, tamadiyao enadi ea ribaei

nei asubenana eai ea abilau nimadi eai

Aigupito edi tano eai ea woehaidi;

* 8:5: English: tabernacle

paana Guiau ie riba i ene, egu ribahesunuma nige se miatahi-tahini,

arinai nige ea nuatuidi.

¹⁰ Ribahesunumana ede ina, abo ea hetubu Isaraela numana enadi,

asubenadi me muridi eai, Guiau ie riba;

egu laugagaeo abo ea toredi edi nuanuatu eai,

nuadi eai hinage abo ea uri-auridi,

Eau abo edi Eaubada ede,

isi abo egu basileia tataodi.

¹¹ Taba nige tau esau ena eanua tauna, e ena tau mamohoi

i heata i ene, "Guaui bena u nuatui,"

paana gamagaridi abo abigu se atao,

gagiri-konekonena i lau e tau saesae-aririna,

¹² Edi laulau baeae eai abo ea nuatoatoaedi,

edi baeae taba nige huia esau ea henuaisiniuioi." (Jer. 31.31-34.)

¹³ Wau ribahesunuma harihariuna i ribaei wa, arinai ede

bagubagunana i beabeao. Na ginauri wa i beabeao, iaede ena

huia i lauo, nige baeaeona abo i tauyamui ariri.

9

Edi tabaohu eo edi ginauri tabudi, isi hinage tautau.

¹ Ribahesunuma bagubagunana wa ena aihelahui dobilana se toreyaio, eo ena aba-tabaohu tabuna tanoubu eai ta.

² Apa tabuna se abinonohai, alona eai mara edi aba-torena, kandela, eo hatahata, arinai falawa tabuna se wese; esana ede Teha Tabuna.

³ Woeo helabuina aloalona eai tehana ede se ribaei Hetabuaririna, ⁴ muramura panepane edi abagabuna *gold* wa metai, eo *ake* ribahesunuma heiheinoina wa,

tupo gamagarina arinai *gold* se hepatu, se sumaeohi, alona eai gulewa *gold*, aiai *manna* edi aba-usaina, eo Arona ena tue,

ie bogu wa, eo we'u wa, aridi eai laugagaeo se uri. ⁵ Potana eai Serubim namanamarina, nuatoatoa ababawana mabena eai i helogulogu. Teina ta ribana se gamagari, nige gonoana inai aniodi ta ribaedi.

⁶ Ginauri ta se tore-nonohaidi doha ina, kohena tataodi huia gamagari se lulusora teha bagubagunana eai, uura eo aitalasam hesabana.

⁷ Na kohena-saesae, ia iabom taba i lusora teha esau, boea-ariri eai wa, borimai esega sorasorana eai ma-esega mo, osina i heboriri baguna, iabom enana eo tatao gamagaridi enadi, edi ponori debadi eai.

⁸ Arinai Earua Tabuna ena abaheatadi, aba-lusora teha hetabuaririna eai wa dobilana sora nige i masaraha, huiana ne Apa-tabuna i totoro

⁹ (parabole ina, eda huia ta tautauna). Dabila eai ta ita sora aitalasam eo ainauia ta toretoreti ia mo ginauri ta nige gonoadi tau-tabaohu nuana se heaa mamohoi, ¹⁰ paana

buluma laugagaeodi mo ina (doha buluma aiaina, nomnom, eo hari aiaideuri laulaudi), se hetorodi bena ta laulauedi i lau e hetubuuioi huiana i lage.

¹¹ Na Keriso i laomao, ia eda kohena-saesena ede, eo maraitom-asubena ena ginauri lolodi enana hinage, isi eda apa-tabuna saesaena, lolo-aririna, debana eai abo se tubu, nige tatao nimadi eai se ginauridi, eo nige tanoubu abiabina eai se hetubudi, ¹² nige bokania e bulumakau nanatudi osinadi eai, na iabom osinana debana eai, teha tabuna eai i lusorao, ma-esega mo, huia gamagarina enana, hemaaurina i lau e nige nosina i abiyao enada. ¹³ Hage ena bokania eo bulumakau osinadi, eo bulumakau natuna bawesina se gabu ahuna se hesuruauri tatao biibii potadi eai, gonoana i hetabuedi, buluma aba-heaana ede, ¹⁴ abo nige Keriso osinana mo nuamiu i heaa-aririedi, paisoa matematedi aridi eai i hemaaurimiu, bena Eaubada maumaurina au heaheyaiei? Ia nige baaeana begana, iabom i moseuioi Eaubada arinai, Earua Tabuna ena paipaisoa eai.

¹⁵ Paana ede ia, arinai ribahesunuma harihariuna ta ie tubu, isi laugagaeo bagubagunana boeana eai mamiadi wa, edi baaea eai abo i hemaauridi, ena mate debana eai, isi se eogaidi wa bena edi tupo se lobai ribahesunuma eai ta, i lau e nige nosina. ¹⁶ Ena tau i mate, ena gogo soiena pepana eai se uri nonohaiyao, pepana ta ita ta ene tau ie mate. ¹⁷ Tau mamiana pepa wa nige aniona, sora i mate abotai se lauwatai, wa? ¹⁸ Hinage doha, ribahesunuma bagubagunana eai wa nige se ginauri gaibui, osina eai se hetabuei. ¹⁹ Mose lauhesom ribadi gamagaridi laugagaeo eai i ribaedio tatao gamagaridi aridi eai, abotai bulumakau nanatudi eo bokania osinadi ie abi, eo goila eo mamoe uiana buiabuia, eo lugu iniini esau esana hisopa, abo buka eai i helausibusibuei, eo tatao gamagari potadi eai i hesibusibu hinage, ²⁰ i ene, "Teina ribahesunuma laugagaeona osinana ede, Eaubada i ribaei enamiu, au lauwatai." ²¹ Hinage apa-tabuna lulu eai se ginauri wa, eo ginauri tabudi numa alona eai se hepapehaisoaidi wa, ena abiabidi esega, osina eai i lausibuedi. ²² Mamohoi laugagaeo dobilana eai ta ene ginauri gamagaridi osina eai mo se heaadi, baaea nige aba-ribagigirina ena osina nige i boriri.

²³ Arinai i dudurai bena ginauri galewa eai tautaudi ina, doha ina se heaadi; na galewa ginauridi mamohoidi isi abo udoi, atalagam lolo-ariridi eai mo se heaadi. ²⁴ Paana Keriso ia nige i lusora teha tabuna tautaua eai mo, iaede tatao nimadi eai se ginauri, ia galewa mamohoina eai ie lusora, eo Eaubada matana eai i totoro ita debada eai. ²⁵ Hinage ia nige ma-hisa i heaitalagamui, doha kohena saesaena

borimai to borimai i lulusora teha hetabu-aririna eai, osina i bahei, nige iabom osinana; ²⁶ ena doha ina abo tanoubu ena abatubu eai i laoma huia ta abo ma-hisa amamna i hearo. Na huia murimuritana eai ta ia i taumasarahama, iabom ena heaitalasamuioi debana eai, bena baaea i torehesuara. ²⁷ Doha tatao edi dobila se toreyao, huia esau eai abo se mate, eo murina eai abo heduduraina, ²⁸ hinage Keriso, huia bagubagunana eai se heaitalasam, tatao gamagaridi edi baaea i baheidi, huia helabuina eai abo i taumasarahauio, baaeana nige'e, abo i taumasaraha taubagibagienna aridi eai, isi aidobu edi mauri ia arinai se abiyao.

10

¹ Laugagaeo iaede tautau mo, ginauri lolodi sora abo se laoma tautaudi ede, na nige adi ao mamohoi; tatao se awasaema aitalasam arinai, adi ao esega borimai to borimai, aitalasam wa nige gonoana tautorena i heaamamohoi. ² Ena nige'e tautabaohu abo nige se aitalasam lautom? Abo se aa'o, baaea taba nige amnana se ataiei. ³ Na aitalasam eai wa edi baaea aba-henuaisinina, borimai to borimai. ⁴ Paana bulumakau eo bokania osinadi nige gonoadi baaea se hetausuara-aririei.

⁵ Arinai Keriso i laoma tanoubu eai wa, i ene, "Aitalasam eo ginauri se ainauiai, nige u nuatuidi, na tau eauna mo, enagu u abinonohai;

⁶ aitalasam gabugabudi, eo baaea maisana se gabu, aridi eai nige em kode.

⁷ Abo ea ene, 'Hage u ita, oa em nuatu hesabana ea laoma ta, Eaubada e,'

doha buka nouna eai wasagu se uriyao." (Ps. 40.6-8.)

⁸ Huiana ne i ene, "Aitalasam eo ainauia eo aitalasam gabugabudi, eo baaea maisana se gabu oa nige u nuatui, aridi eai nige em kode," (doha laugagaeo dobilana se abiwatai wa), ⁹ abo hinage i ene, "Hage u ita, oa em nuatu hesabana ea laoma ta." Riba bagubagunana i abihai bena helabuina arinai i helaudamai. ¹⁰ Ia ena nuatu eai ta se hetabueda, huiana esega, huia gamagarina enana, Iesu Keriso tauna se heaitalasam wa.

¹¹ Kohena gamagaridi, esau, esau, i totoro aba-aitalasam eai, asubena to asubena, i paipaisoa aitalasam esegana wa i laulauginauri, ia mo baaea nige i laehesuara. ¹² Na huiana ne Keriso i moseuioi, aitalasam esega dumadumana meta, baaea debadi eai, i lau e nige nosina. ¹³ I bagibagi i lau e ana waiunuyao se hemala aena adi bou. ¹⁴ Aitalasam esegana eai ta, tauhetabu wa i hedudurai-heohidi i lau e nige nosina. ¹⁵ Earua Tabuna riba i hemasaraha arida eai, riba gabugabunana i ene,

16 “Ribahesunumana ede ina, aridi eai abo ea abi, nei asubenadi muridi eai ne, Guiau i ene: Egu laugaga eo nuadi eai abo ea toredi, edi nuanuatu eai abo ea uridi,”

17 hinage i riba muritai, “Edi baaea, edi baaea diodio, taba nige ea henuaisiniuioidi.” (Jer. 31.33-34.) 18 Ginauri ta, ena se ribagigiridio, taba nige baaeana enana se aitalasamuioi.

19 Arinai, egu tataoyao e, ta nuakipikipio, abo ta lusora teha hetabu-aririna eai wa, Iesu osinana debana eai, 20 dobilana i hetabunonohai ita enada, dobila harihariuna, maumaurina, woona wa abo ta tupapurisi, iaede ia bulumana. 21 Eda kohena-saesana ta abiyao, ede ia, Eaubada ena numa i tanuagai, 22 Hage ta awasae ia gegesina eai, ma-nuada mamohoi, eda sunuma i monau; baaea amnana eai se iairihaidao, nuada se lausibuedi, nige ada giru, eo goila aana eai tauda se deuridio. 23 Eda sunuma miatahitahina ta sogohididini, tabu begana i eoeo, paana tauribahesunumaeda wa ia ena nuatu se ota-esegaidi; 24 eo ta haisagusaguuioida, gadosisi eo paipaisoa lolodi arinai ta hesohesomuuioida, 25 eda oioigogo tabu ta nuagabaedi, doha headi edi laulau, na ta hairibahasa-hasaiuioida, ina doha ta abi-headidiri paana Asubenana wa ta ita i hanahanaumao.

26 Ena taba dobila mamohoina ta abiyao, na nuada eai baaea mo hesabana ta laulau, ita nige eda aitalasam esau baaea enana, 27 na matausi lailai mo, heduduraina abo ta bagibagiei, eo oeagi alaalasina Eaubada ena waiunuyao abo i hearodi. 28 Aitea tau Mose ena laugaga eo i gabaei, tauitana labui e haiona edi ribataubiga eai ia abo i mate, nige nuatoatoana. 29 Abo au ene edoha, ia ena maisa abo i lai ariri e nige’e, Eaubada Natuna i ututawatawai, eo ribahesunuma osinana wa, arinai ia se hetabuei, abotai i awa-ginauri-gaibuei, eo aiainauia Earuana i hebaaea? 30 Abina ta atao, paana ribana wa i ene, “Abigum eau agu paisoa ede, abo ea hemaisa.” Eo i ribauio, “Guiau abo ena tataoyao i heduduraidi”. 31 Ginauri matamatausina ede ena Eaubada maumaurina nimana eai ta beudobi.

32 Na emi asubena bagubagunadi wa hage au henuaisinidi, mara aue ita murina eai heasiwolewole lailai eo amamna au hearo, 33 huia headi se riba baaeaimiu eo se abi baaeaimiu, eo huia headi au heoiesegaimiu isi aridi eai wa, ina abiabi baaea ta tau-hearona. 34 Huiana ne headi se auauidi wa au nuatoatoedi, emi gogo se hebaeadi wa, aue kode mo, paana au nuatuiyao emi gogo loloaririna otana, gogo miatahitahina. 35 Arinai emi nuaadidiri tabu au gabaei, ainauiana i lai ariri abo au abi. 36 Paana emi gadohi esau ede nuaheesegaina, Eaubada ena nuatu au ginauri abotai abo ribahesunumana au hearo.

37 “Sora huia kuukuuna mo,

ia bena i laoma wa, abo i laoma, taba nige i bagi;

38 na egu laulau-dudurai tauna ia sunuma eai abo i miamia, ena i murisuwasuwa, taba nige nuagu i kode ia arinai.” (Hab. 2.3-4.)

39 Na ita nige taumurusuwasuwa tataoda bena baaea ta hearo, ita tausunuma, earuada se mauri ede.

11

Sunuma dobilana iabom i lolo ariri.

1 Sunuma iaede ginauri ta eowataidi adi ao ta itadio, eo ginauri sora nige ta itadi eda abaitalobaidi ede. 2 Debana eai ede tamadayao mumuga eai wasadi se lolo. 3 Sunuma debana eai ta nuatui tanoubu ta se hetubu, Eaubada ena riba eai, arinai ginauri ta itadi nige ginauri masamasarahadi aridi eai se tubuma.

4 Sunuma debana eai Abela ena aitalasam Eaubada matana eai i lolo ariri, nige doha Kaina enana, arinai ede ia se ribaei i dudurai, eo ena aiainauia Eaubada i henua; arinai hinage ia ie mate, taiede sunumana debana eai ia sora ma-ribaribana.

5 Sunuma debana eai Enoka se abiisini galewa eai, arinai ia mate nige i ita; ia nige se lobai paana Eaubada i abi'siniyao. Paana ia sora nige se abi'sini, wasana ede ina: Eaubada nuana i helolo. 6 Na ena taba sunuma nige'e, ita nige abina ta ata Eaubada nuana ta helolo. Esa bena i laoma Eaubada arinai, abo i sunusunumaei ia mamohoina, eo tauyooina ma-nuaadidirina ia abo i ainauiai. 7 Sunuma debana eai Noa Eaubada matausina nuana i dudui, ake i abi-nonohai, paana ginauri sora nige se tubu Eaubada i ribahesanapuei abo se tubu, arinai ena numa tataodi i hemaauridi, arinai tanoubu i hegiru, eo i hemala laulaududurai sunuma debana eai tauabina esau.

8 Sunuma debana eai Aberahama nei huiana ne se eogahai wa, i awaabi, i torohai eanua esau hesabana, bena abo i abi ena eanua; i torohai nige i nuatui haedi i laulau. 9 Sunuma debana eai i hemala taumiahai ribahesunuma eanuana eai ta, doha eanua udoi eai i miamia enana tahunuana nige'e, apa lulu eai se ginauridi i miamiaidi, Isaako eo Iakobo hinage doha, ia maenayao wa ribahesunuma esegana tauabina.

10 Eanua esau mo i itaitalau arinai, paa adiadidirina potana eai se abihetoro, tauginaurina, tauhetubuna, iaede Eaubada.

11 Sunuma debana eai Sara hinage ena adidiri i lobai, i sinesinebada-aririo, taiede natuna i labasi, paana tauribahesunumaena wa i sunumaei ena riba abo i hemamohoei.

12 Arinai tau esega mo, eo ia gonoana doha i mateo, ia mo ia tauna eai moutuana se tubuma, gamagarina doha galewa

iporadi, e doha geregere, gabogabo hasarina eai, taba nige ta hasiridi.

¹³ Ina gamagaridi ta ma-sunusunumadi eai se mate, ribah-esunuma wa aniodi sora nige se lobaidi, na eda lohaloha eai mo se itadi eo se kode, eo se ribahemasarahauioidi, isi tau-laolaoma mo, tau-adaadau mo tanoubu eai ta. ¹⁴ Paana riba doha ina tau-ribaena se hemasaraaha-auri si ene edi eanua tahunuana se eooeooi ede. ¹⁵ Mamohoi ena isi eanua beabeana arinai se laoma wa se nuanuatu-daoiei, taba hinage edi sorasora se lobai se uio arinai. ¹⁶ Ia mo isi eanua esau se henua, lolo-dumadumana, iaede galewa eai. Arinai Eaubada nige i mae e ia esana se ribaei edi Eaubada, paana edi eanua-saesaena ia i abinonohaiyao.

¹⁷ Sunuma debana eai Aberahama nei huiana ne ia se lauita wa, Isaako i moselaei, ribahesunuma tauabina wa abotai natu-eseesegana i mosegabaei ena aitalasam, ¹⁸ ia wa se ribaei si ene, “Isaako arinai abo am isimurita se eogaidima.” ¹⁹ Ena nuatu i ene Eaubada abina ie ata mate eai natuna taba i hemauiuiioi; arinai mamohoi, doha mate eai i abiuiioi tautauna. ²⁰ Sunuma debana eai Isaako ena riba-hewoiwoina i mosei Iakobo eo Isoa, ginauri sora nige se tubu arinai i hemasarahadi. ²¹ Sunuma debana eai Iakobo, huia ne ena mate i hanahanaumao, riba-hewoiwoina i mosei Iosepa nanatunayao labui aridi eai, ena tue eai i duihasari, i aihelahui. ²² Sunuma debana eai Iosepa hinage ena huia i hanahanau wa, Isaraela nanatunayao edi torohai i ribanonohai, eo i lauhesomdi Aigupito se laugabaei bena ia siadana abo se bahelaei.

²³ Sunuma debana eai Mose, nei huia ne se labasi wa, nawalai haiona tamana eo sinana ia se toreyamui, paana se ita merumeru lolona; wasawasa ena laugagaeo nige se matausiei. ²⁴ Sunuma debana eai Mose, huia ne i taulailaio, nige i henua esana se atai Parao natuna-sine natuna, ²⁵ i henua mo besi ia se abi-baaeaei, Eaubada ana bodao tataodi maediyao, nige i henua huia kuukuuna baaea i lauheamna. ²⁶ Ena nuatu i ene Keriso hetaumaeamaeana meta mo gogo saesaena, Aigupito ena ginauri lolodi nige se lolo doha, paana i itaitalau mo ainuiana matana eai. ²⁷ Sunuma debana eai Aigupito i nuagabaei, wasawasa ena ouyalayala nige i matausiei; i samasamadudu mo, doha ia wa taba nige ta ita, iaede matana eai i itaitai. ²⁸ Sunuma debana eai pasova mataasina i hetubu, heiheinoina wa osina i lausibuei (*numa gududi eai*) natu-ealahou tauunuidi wa taba nige i abilau enadi aridi eai.

²⁹ Sunuma debana eai gabogabona esana Buiabuia, arinai tatao se leta-dobi, doha tano pitapitari eai se awasi; na Aigupito se aipate se hemuriwataidi wa, gamagaridi se

galamosi. ³⁰ Sunuma debana eai Ieriko gana-tonana se uru-gorigori, huiana ne asubena haligigi-labui eai se tauhetaiiri. ³¹ Sunuma debana eai Rahaba, laulau baaea sinena wa, nige i mate helena taumia awaawayagaradi wa maediyao, paana eanua tau-itasipoina wa i abidi ena numa eai, i labiniedi.

³² Abo riba esana egu riba ea tubei? Huia nige gonoana wasadi ea ribaedi, Gideona eo Baraka, eo Samasoni eo Iapeta, eo Davida eo Samuela, eo peroveta gamagaridi— ³³ isi sunuma debana eai basileia se heguridi, dobila duduraidi se hetubudi, ribahesunuma hemamohoiena se hearodi, liona awadi se gududi, ³⁴ oeagi alaalasi ena gigibori se heboso, elepa matamatana se dagogabaei, beruberu boeana eai edi adidiri se lobai, iala eai se nuakipikipi ariri, waiunu edi tauiala bodadi se hetatagorigoridi. ³⁵ Sisine enadi taumate se abiuidi se mauriuo. Headi amamna lailai eai se hebaaeadi, iairihaina nige se eooi, mauri esau, lolo-aririna, isi bena se abi. ³⁶ Headi lauuta se hearodi, alaliuliua eo pidipidiri, hedeona se paidi hinage, eo se tutuguidi. ³⁷ Se lauwe'uidi, taudi se seselapaidi, noho se hearodi, elepa eai se unuhematedi; se tautausi gaibu, mamoe opidi eo bokania opidi se luiluidi, paana se gogogesagesa, se hebaaeadi, se heamam-nadi— ³⁸ ahani tanoubu nige i lolo, isi mo se lolo — barabara eai se tautausi, oea tupidi eai, aba-bawayamui eai, tano gudadi eai hinage.

³⁹ Ina gamagaridi ta sunuma debana eai wasadi se lolo, ia mo ribahesunuma aniona mamohoi isi nige se ita; ⁴⁰ Eaubada dobila lolo-aririna esau enadi i abinonohaiyao, arinai isi helolo-dumadumana taba nige se hearo, ena ita maediyao nige'e.

12

Tauataiena ena dobila eai, eda tautau ede Keriso.

¹ Ta ita, taitana gamagamagari se totoro-hetahetairida, doha eada lailai aririna, besi porohe gamagamagari ta tore hesuaradi, eo baaea i healabesibesi-aririeda wa, na ma-taubigada ta aitautau hailako eai ta, dobilana ede se tore matada eai, ² ta itaitalau Iesu arinai, eda sunuma tauhetubuna eo tauheohina, ia kode wa matana eai se tore debana eai satauro i hearo, i lau e ana siga, taumaeamaeana nige i nuatui, arinai ede ia se hebawa Eaubada ena terona nimatutuna eai.

³ Ia hage au nuatui, ia wa tatao baaea edi hewaiunu i hearo-aririei, bena omi tabu au tausiololo, eo nuamiu se beruberu. ⁴ Omi sora nige huia esau baaea au taugudui, au ialai, i lau e osinamiu se boriri. ⁵ Eo ribana au nuahuiei wa, arinai i ribalaowa doha omi nanatunayao mamohoi — i ene, “Natugu e, Guiau ena heduhedudurai tabu u nuatuhegagiri

eo tabu nuam i beruberu ena i ribasuuim.

⁶ Paana Guiau eai i gadosisie, ia abo i hedudurai ede, eo natuna esa, esa, i abi, pidipidiri abo i hearo.” (Prov. 3.11-12.)

⁷ Hedudurai ta abo i heatamiu. Hede Eaubada i abimiu doha omi ia nanatunayao; paana aitea merumeru tamana taba nige i hedudurai? ⁸ Ena omi nige se heduduraimiu, doha gamagarida tupona ta hearoyao, abo omi kamkamkeda, omi nige tau nanatunayao mamohoi. ⁹ Ita tamadayao tanoubu eai se heduduraida, hinage ta heasisiedi. Earuada Tamadi ia hinage abo nige ta awaabiei eo ta mauri? ¹⁰ Isi wa mamohoi asubena hisahisawaidi eai se heduduraida, isibom edi nuatu eai, na ia wa ita eda lolo debana eai mo, bena ia hetabuena eai ita tupona ta abi. ¹¹ Hemaisa wa, eda huia hearona eai ta ene i amamna mo, nige kodena; ia mo murina eai loni uauana abo se masaraha tauhearona wa nuadi eai, iaede laulau-dudurai.

¹² Arinai nimam se abaabasi gaibu ta, bena u lau’sinidi, eo turim beruberudi u hetamomosidi, ¹³ eda dududuraidi aem enadi u sepa-nonohaidi, arinai tau beruberuna taba nige u oihesuara, na abo u headidiri mo. ¹⁴ Em abi tatao gamagaridi aridi eai, loni hesabana u laulau, eo nuam heana, ena nige’e taba nige tau esa Eaubada i ita. ¹⁵ Au itakomanimiu ata tau esau Eaubada ena ainuia eai i abihekuu; ata lamna kalakalapina esau i ini-saema, i hemodemiu, headi boeamiu eai abo i hebiidi hinage. ¹⁶ Ata boeamiu eai tau-laulaubii esau, e tau Eaubada nige i heasisiei doha Isoa, ia lauriga esega debana eai ena ealahou-ainuiiana i unegabaei. ¹⁷ Au nuatui huiana murina eai abotai abo i henua ariri bena ainuiiana wa i hearo, i eoo adidiri ma-matasuluna, ia mo se tauotaotaei, nige ena huia se moseuio bena i nuabui.

¹⁸ Omi nige au laoma oea-tupina eai ta, oana taba se abilau, alalasila, eada dubadubana i poiitawai, eo asuasu dubadubana, eo mana, eo wowori, ¹⁹ eo bogigi daguguna, eo ariarina lailaina, arina tauataiena wa se aiboda asa bena tabu riba esau se ribaei aridi eai. ²⁰ Paana ribana i porohe ariri, nige gonoadi. “Ena suisui esau i utusae mo, besi, abo se lau-we’ui.” (Ex. 19.12-13.) ²¹ Ana ao hinage i nuamatamatausi ariri, arinai wa Mose i ene, “Ea tabutabubu ea matausi ariariri.” (Deu. 9.19.) ²² Na omi ede aue laoma Siona oea-tupina eai, Eaubada maumaurina ena eanua saesaena eai, Ierusalemale galewa eai wa, eo aneru moutuadi taba nige ta hasiridi edi heoiesega saesaena eai, ²³ eo taubaguna edi oigogo lailaina eai, isi esadi wa galewa eai se uridio, eo Eaubada arinai, tatao gamagari tauheduduraidi, eo aue laoma taulaulau-dudurai earuadi se helolo-dumadumadio aridi eai, ²⁴ eo Iesu arinai, ribahesunuma harihariuana wa

tau hepaisoaina, eo osinana wa se lausibusibuei, ainauiana ede i lolo ariri, Abela osinana nige doha.

²⁵ Au komani, ia tauribalaowa wa tabu au tauotaotaei. Paana ena isi wa nige edi aba-dago huia ne ia tanoubu eai ta ena ribahesanapu se otaotaei, ita haedi abo ta dago ena ia wa galewa eai i ribahesanapueda, ta otaotaei? ²⁶ Nei huiana ne ia arinana tanoubu i oihetabubu; huia ta i ribahesunumaeda, i ene, “Sora huia esau, nige tanoubu mo na galewa hinage, abo ea hetabutabubudi.” (Hag. 2.6.) ²⁷ Riba ta, “Sora huia esau,” aniona ede ginauri se heoiluuluidi, abo se torehesuaradi, doha ginauri nima eai se ginauri, na saha lautana eai taba nige i moimoiu, abo i miahai ede. ²⁸ Arinai eda lautoi ina, basileia ta abi wa, taba nige se hemoimoiu, eo ainauiana nuada eai ta laoma ta tabaohu, Eaubada ta aihelahui maheasisida eo mamatausida; ²⁹ paana eda Eaubada ia doha oeagi alaalasina i aiaigabu.

13

¹ Emi hai-gadosisi bena au he-esegai, doha omi tataoyao mamohoi. ² Tabu nuamiu se hui emi haitala au hemasaraha taulaolaoma aridi eai, paana doha nei tatao headi nige abina se ata na aneru se abi-taumanaidi. ³ Isi numa-tutugudu eai se auaudi au nuatuidi, doha omi maediyao se au-esegaimiu; eo isi se abibaeaidi hinage, doha omi hinage taumi eai mami-amiu. ⁴ Gamagarida bena tawasora ta heasisiei, eo tawasora aba-enona tabu ta hebii; paana Eaubada tau-enoenobiri eo tau-ganaganawari abo i hegirudi. ⁵ Moni gadosisina tabu emi mauri eai i tanuagaemiu; ginauri saha au abidio aridi eai nuamiu bena se taru; paana ia ede i ribaei i ene, “Eau taba nige ea abihebeumiu, taba nige ea nuagabaemiu.” (Deu. 31.6; Jos. 1.5.) ⁶ Arinai gonoada ma-nuaadidirida ta ene, “Guiau Tausaguigu ede, Taba nige ea matausi; tau taba i sahaigu?” (Ps. 118.6.)

⁷ Emi tanutanuagao au nuatuidi, isi wa Eaubada ena riba arimiu eai se ribaei; edi mauri aniona au italau, edi sunuma au laulauei. ⁸ Iesu Keriso ia gonogonoana mo, lahi, eo wau, eo i lau e huia nige nosina. ⁹ Tabu hari lauheata, eo riba udoidi, se woeahesuaramiu; i lolo mo taba nuamiu Eaubada ena ainauia eai se headidiridi, nige aiai aridi eai, doha headi se mode-aririedi, ia mo nige i helolodi. ¹⁰ Ita eda aitalasam hatahatana, tauheayaiena arinai taba nige adi se ai. ¹¹ Paana suisui wa osinadi kohena-saesena se leama teha tabuna alona eai, baeaa aitalasamna, eaudi murimuri eai se gabudi. ¹² Iesu hinage, tatao bena i hetabuedi iabom osinana eai wa,

eanua ganana murimurina eai ia se heamamna. ¹³ Besi ita hinage ta lau ia arinai, eanua murimurina eai, taumaeamaeana ia debana eai hinage ta bahei. ¹⁴ Paana inai nige eda eanua tahunuana, miamiahaina, na eanua esau sora abo i laoma, ta eooi ede. ¹⁵ Ia debana eai bena hedebasae aitalasamna ta helele-laei Eaubada arinai, huia gamagamagari, sopada uauadi meta, ia esana ede se ataatai. ¹⁶ Na tabu nuamiu se hui abilolo laulaudi au ginauridi, eo emi saha au mosei tatao enadi hinage se abi, teina aitalasam ta arinai Eaubada nuana i lolo ariri.

¹⁷ Isi tanuagamiu eai se laulau, au awaabiedi eo edi riba aridi eai au eari; paana isi earuamiu tautawataidi, doha tatao adi paisoa abo se hetala. Bena paisoa eai ta au hekodedi, tabu au henuadubudi, doha ina taba nige se saguimiu.

¹⁸ Enamai au lau-uura, ai nuamai se masaraha, nuata abaheduduraina eai, ema gadosisi bena ginauri gamagaridi eai duduraina ai miai mo. ¹⁹ Ea samaduduimiu ina, ma-nu-agigiborigu teina au abi, arinai abo ea lage heuheula arimiu eai.

²⁰ Abotai loni Eaubadana ia eda Guiiau Iesu Keriso mate eai i woeaisiniui, mamoe tautawataina saesaena wa, rib-ahesunumana i lau e nige nosina osinana eai wa, ²¹ ginauri gamagaridi aridi eai i helolo-aririemi bena ena nuatu au lauwatai, boeamiu eai hinage i paipaisoa, saha eo saha ia matana eai se lolo abo i hetubudi, Iesu Keriso debana eai; ia ta hedebasaei i lau e huia nige nosina. Amen.

²² Egu tataoyao e, hinage ea aibodaimiu, egu lauhasahasa ina au abi, riba kuukuuna ede ea uriyawa. ²³ Au nuatui eda tau Timoteo numa-tutugudu eai se iairigabaeyao, ena i heulama abo ia maegu, nige baeona, ai itamiu. ²⁴ Tauwoeaimiu gamagaridi eo hetabu tataodi, ea lautoiedi. Isi wa Italia eai taumia se lautoiemiu. ²⁵ Ainauiana bena maemiu, omi gamagarimiu. Amen.*

* **13:25:** Italia eai se uri, Heberu tataodi enadi, Timoteo nimana eai.

IAMESI ENA URIURI

Sunuma lauitana.

¹ Iamesi, Eaubada ena heaheari tauna, eo Guiau Iesu Keriso enana, Boda saudoudoi-labui, tupo gamagari eai se tatagorigori, enadi ea uri: Agutoi.

² Egu tataoyao e, ena noho udoi udoi au hearodi bena au ene emi kode meta, ³ teina au nuatui, emi sunuma lauitana arinai abo au torotahitahi. ⁴ Torotahitahi ana paisoa maudoina bena i abi arimiu eai, bena omi au lolo-dumaduma, au abi heohi, taba nige saha au deha.

⁵ Ena omi taumi esau sonoga i deha, taba Eaubada i aibodai mo, ia tatao gamagamagari i ainauia-daoiedi, nige i ribaribasuu, tau wa abo enana se mosei. ⁶ Na taba ma-sunusunumana mo i aiboda, nige ma-nualabulabuina, paana tau-nualabulabui ia doha butubutu esau, gabogabo eai mana se iohoilaei, se gabaisini. ⁷ Tau me tabu ena nuatu i ene abo ginauri esa Guiau arinai i abi; ⁸ tau nuana labui ia ena laulau gamagaridi se tauoriori.

⁹ Eda tau dobidobina esau, taba i kode mo ena ia se lau'sini, ¹⁰ Na taumonamonaune ia taba i kode ena se laudobei, paana doha lagau liasina ia abo i tauyamui. ¹¹ Mahana i sinai, gigiborina ma-alaalasina, nige baeaeona lagau i hewowoea, liasina i urugorigori, ana ao e pasana i baeaeo. Tai doha, taumonamonaune ena laulau gamagaridi boeadi eai abo i tauyamui hinage.

¹² Kausara hinage, aitea tau noho boeana eai i torotahitahi, sora ia se lauita abotai mauri koronana i abi, doha Guiau taugadosisiena enadi i ribahesunumaeyao. ¹³ Tau esau ena taba noho i hearo, tabu i ene, "Eaubada i nohoigu ta,;" paana Eaubada taba nige baeae nohona i hearo, hinage ia taba nige tau esau i nohoi; ¹⁴ esau to esau noho i hearo ena iabom ena gadolelehi eai se niurihai, se hegadolesa. Lelehina wa abo baeae i hetubu. ¹⁵ Lelehi wa abo ie boga, ena haihaisu ede baeae, baeae i taulailaio siagana eai abo mate i hetubu.

¹⁶ Tabu se boraimiu, egu tataoyao e, egu nuanuai. ¹⁷ Ainauia lolona, eo lolo-dumadumana, esau to esau, ewa eai i dobima, mara Tamana arinai i laoma, ia taba nige i ori, taba nige begana i sinisinibui. ¹⁸ Iabom ena nuatu eai i hetubuda, riba mamohoina debana eai, bena ita ia nimana ginaurina uaua-baguagunana ede.

¹⁹ Teina bena abina au ata, egu tataoyao e, egu nuanuai, bena tau esa eo esa ataatai eai i heula, ribariba eai mo i bebeda, ouyalayala eai i bebeda, ²⁰ paana tau ena ouyalayala

taba nige Eaubada ena laulau-dudurai i paisoaei. ²¹ Arinai biina gamagamagari, abi-baaea ena hemonau-boriboriri, ta torehesuaradi ma-nuatudobidobiuioida, ribana boeada eai se umai wa ita bena ta abi, abina i ata earuamiu i hemauidi.

²² Na bena omi riba tau-ginauriwataina, nige tau-ataiena mo, ata au borauioimiu. ²³ Ena esau riba i ataiei mo, nige i gin-auriwatai, ia doha tau ana ao mamohoi ilu eai i itaitai; ²⁴ ana ao ie ita, i torohai ie lau, abo maesega nuana ie hui ia tau ana ao itaitana saha. ²⁵ Na ia wa iairihai laugagaeona, lolodumadumana arinai i italau, eo dohilana eai i tau-esegai, ia nige doha tau-ataiena nuanuahuina, ia tau-ginauriwataina, i paipaisoa, teina tau ta ena abiabiwataina eai nuana abo i woiwoina.

²⁶ Ena tau esau boeamiu eai ena abi doha ia tau-tabaohu esau, ia mo memenana nige abina i ata i tanuagaei na iabom nuana i boraborauioi, ina tau ta ena tabaohu nige aniona. ²⁷ Tabaohu mamohoina, aana eo nige se hebii Eaubada Tamada matana eai ede ina: ta laulau dabudabure eo wabuwabu aridi eai, edi amamna boeadi eai ta aitaumanaidi, eo esa, esa, tanoubu eai i abihesuarauioi, biina taba nige i hemasi.

2

Gadosisi ana ao, eo abiabi lolodi.

¹ Egu tataoyao e, eda Guiau Iesu Keriso, namanamarina Guiauna, sunumana ena aue abi, tabu au abi-hinehineri tatao aridi eai. ² Ena taba tau esau emi sunago eai i awasae, ena nimaau *gold* eo lulu lolona ie lui, eo esau hinage i awasae, tau-gogogesagesa, lulu tausoesoena ie lui, ³ na au italau lulu lolo taulauina arinai au ene, “Agutoi, u bawa inai, ababawa lolona eai ta,” na tau-gogogesagesa arinai au ene, “U torolau me,” e “U bawadobi aegu eai ta,” ⁴ iaede, nuamiu eai au abi-hinehineri, e nige’e, eo au hetorouioimiu tauhetala, eo emi nuanuatu se baaea, e nige’e? ⁵ Egu tataoyao ea gadosisiemiu e, egu riba au ataiei. Tatao tanoubu ena gogo eai se deha, isi Eaubada i tauribaedi ede bena sunumadi eai isi gogo tataodi, e nige’e? Maraitom-asubena ena basileia tauabina abo isi, iaede i ribahesunumaei aidobudi ia taugadosisiena wa, enadi. ⁶ Na omi wa tau-gogogesagesa nige au heasisiei. Gogo lailai tataodi isi tau-heporohemiu ede, isi se tabelaemiu abalauhetala eai, e nige’e wa? ⁷ Esana saesaena arinai se eogaimiu wa isi ede tauribabaaeai, e nige’e?

⁸ Taiede, laugagaeo wasawasana ena au hemamohoiei, uriuri tabuna eai wa si ene, “Helem tauna abo u gadosisiei, doha oabom u gadosisiuioim,” abo emi abi se lolo. ⁹ Na taba abi-hinehineri eai tatao au heaheasisiedi, baaea au abi meta,

laugagaeo i hegirumiu, omi tau-utuutusina ede. ¹⁰ Paana eai to eai laugagaeo maudoina i sogohi, na tupo esega eai mo i alabesibesi, maudoina giruna abo i abi. ¹¹ Ia wa i ene, “Tabu u ganaganawari,” ia hinage i ene, “Tabu u aiunu.” Ena nige u ganawari, ia mo tau u unui, oa u hemala laugagaeo maudoina tau-utusina. ¹² Au ribariba eo au miamia doha tatao ia irihai laugagaeona arinai abo se heduduraidi. ¹³ Esau nige i nuatoatoa, ia taba nige se nuatoatoaei, abo se hegiru; nuatoatoa hegiru i dioi.

¹⁴ Ena lolo saha, egu tataoyao e, ena tau i ene i sunusunuma, ia mo nige paipaisoana? Sunuma mo gonoana abo ia i hemaui? ¹⁵ Ena eda tau esau, e louda esau, nige ana lulu e ai ai asubena to asubena ie dabu. ¹⁶ na omi esau i ribalau aridi eai i ene, “Besi, nuamiu se taru na au lau,” e “Besi, taumiu se gigibori, bogamiu se sese,” ia mo buluma aba-helolona nige begana au mosedi, edohana abo i saguidi? ¹⁷ Gonoana hinage, sunuma ena nige ma-paipaisoana, iaede i mateo.

¹⁸ E, tau esau abo i ene, “Besi oa tau-sunuma, eau tau-paipaisoana.” Ena emi paipaisoa nige’e, hage emi sunuma ana ao au heitagu, eo eau egu paipaisoa eai egu sunuma abo ea heitamiu. ¹⁹ U awamamohoi wa, u ene Eaubada esegana; kausara! Na demoni isi hinage se awamamohoi, ma-tabutabubudi. ²⁰ Na abo u italobai e nige’e, tau supusupu e, sunuma ena nige paipaisoana, i agari ede. ²¹ Tamada Aberahama ia ena paipaisoa debana eai se hedudurai, e nige’e, nei hua ne natuna Isaako i moselaei aitalasam hatahatana potana eai? ²² U ita, ia ena sunuma ma-paipaisoana, eo ena paipaisoa eai ena sunuma i hemamohoei, ²³ arinai uriuri tabuna wa se hemamohoei si ene, “Aberahama Eaubada i sunumaei, meta ia arinai se nonoi, ena laulau-dudurai ede;” eo ia esana se ribaei Eaubada ehana. ²⁴ Au ita, ena paipaisoa eai hinage tau se hedudurai, nige ena sunuma eai mo. ²⁵ Hinage doha, sine laulau-baeea wa Rahaba, ena paipaisoa debadi eai ia se hedudurai, e nige’e, paana tau-itaitasipo wa i oiyamidi, eo dohila udoi eai i hetamaridi se uio? ²⁶ Doha tauda abo se mate, ena earuada se tausuaardi, gonoana sunuma hinage, ie mate ena paipaisoana nige’e.

3

Sunuma heiheinoina: abina i ata memenana i tanuagaei.

¹ Omi tabu tauheatamiu au hegamaridi, egu tataoyao e, ta nuatui ita mo ada giru abo i porohe ariri. ² Abaponori se gamagari, arinai, gamagarida ta ponori. Ena tau esau nige begana ena riba esau eai i ponori, ia tau lolo-dumadumana ede, tauna maudoina abina i ata i tanuagaei hinage. ³ Hosi aba-woeaidi awadi eai se heapudi wa, ta toredi bena se

awaabieda, arinai taudi maudoidi ta hesinibuidi. ⁴ Waga hinage, hage au itadi; headi se lalai ariri, mana wowori adiadiridi eai se boboeo, ia mo eaisi kiukiuna eai taba se hetaiiridi haedi tau-eaisi iabom ena henuhenu eai. ⁵ Hinage doha, memena, eau-kiukiuna, ia mo ginauri lailaidi gonoana i ribapasipasiedi. Au ita, oeagi tai se lalai ginaha gagiridi aridi eai se healasidi!

⁶ Memena ede oeagi alaalasina. Tanoubu esau, baabaaeana meta, eauda boeadi eai i paipaisoa, iaede memena. Tanoubu maudoina taba i hebii, eo eda mauri edana eai i taitaiiri, maudoina taba i healasi-ohi, i lau e Gehena eai se gabu. ⁷ Paana suisui hari ao udoi udoi, eo manu, eo ginauri neneneneusidi, eo gabogabo ginauridi taba se hemanasadi, hinage tatao se hemanasadio, ⁸ na memena mo nige tau esau abina i ata i hemanasa — hemahemanabarana, hemahemate ailewana i monau. ⁹ Arinai Guiauna, Tamada ta hedebasaei, arinai hinage tau, Eaubada ana ao eai se hetubu, ta ribahemate. ¹⁰ Awa esegana eai riba-hewoiwoina eo riba-hemahemate se laolaoma. Egu tataoyao e, teina doha nige i lolo. ¹¹ Abo ipu esegana eai goila lolona eo goila telatelana se bunubunuwasima? ¹² Kuhou oeagina eai abo *olive* se ua, e *vine* daodaona eai abo kuhou se ua? Hinage taba nige goila ariarita eai goila-nomnom i leama.

¹³ Eai boeamiu eai i sibasiba, tautaitalobai? Ena miamia lolona eai taba ena paipaisoa i hemasarahadi, sonoga nuatubidobiuiuoina eai. ¹⁴ Na ena nuaboeamiu eai aiaromagigiri kalapina ie ota, eo haisaesae, tabu au ribapasipasi, tabu mamohoina au borai. ¹⁵ Sonoga doha ina nige ewa eai i dobima, i awa-tanoubu mo, earua enana nige'e, diabololo enana ede. ¹⁶ Haedi eai aiaromagigiri eo haisaesae, temetai nuaponopono eo paipaisoa baeadi. ¹⁷ Na sonoga wa ewa eai i dobima, iaede ie aa, i helahelabini, i manabiga, riba abo i ataiedi, nuatoatoa i monau eo uaua lolodi, taba nige i nualabulabui, eo ana ao i masaraha. ¹⁸ Eo laulau-dudurai masurina, ede loni eai se umai, isi taulaulaubiri nimadi eai.

4

Awa-eha tanoubu arinai, se ribasuui.

¹ Iala eo lululu boeamiu eai haedi edi aba-tubuma? Iaede emi gadosisi eai se laoma, e nige'e, eaumi boeadi eai se iaiala, wa? ² Emi henuhenu nige au abidi, arinai au aiunu. Eo gadomiu se lelehi, nige gonoamiu emi gadosisi au abidi; arinai au lulu, eo iala se tubu. Nige enamiu au abi, paana nige au aiboda. ³ Au aiboda ia mo nige enamiu au abi, paana emi aiaiboda i ponori, emi gadolelehi mo enadi. ⁴ Tauganawari

tataomiu, sisinemi! Nige au nuatui, wa, tanoubu ta awa-ehana ede Eaubada hewaiunuena? Arinai ena esau i henua bena ia tanoubu ta ehana, abo i hemala Eaubada ana waiunu. ⁵ E au ene uriuri tabudi se riba gaibu si ene, “Earuana i hemia boeada eai ta, i gadosisiei maaiaromagigirina”? ⁶ Na ia mo ainauia i helaiyama; arinai si ene, “Eaubada taunuasaesae i taugudui, na taunuadobidobi i ainuai.” (Prov. 3.34.) ⁷ Au moseuioimiu, besi, Eaubada arinai. Diabolo au gudugudui abo i dagogabaemiu. ⁸ Au sigilaoma Eaubada gegesina eai ia abo i hanahanauimiu hinage. Nimamiu au headi, omi tau-laulaubaaemiu, eo nuamiu au hetabu-headi, omi tau-nualabulabui. ⁹ Taba amnamiu se baaea, au nuadubu, au dou. Emi maruhi i hemala doudou eo emi kode i hemala nuaporohē. ¹⁰ Au hedobidobiuiomiu Guiau matana eai, ia abo i lau’sinimiu.

¹¹ Egu tataoyao e, tabu esau esau au hai-ribahe-baaeauioimiu. Esau ena tau i riba-baaeai e i hegiru, ia laugagaeo i riba-baaeai eo i hegiru. Na ena oa laugagaeo u hegiru, oa nige laugagaeo tauabiwatana, oa ede tau-hetalana. ¹² Laugageo tauhepasoaina, tau-hetalana, esegana, abina ie ata i hemaui eo abina ie ata i hebaaea. Na oa eai bena helem tauna u hegiru?

¹³ Au laoma ne, omi emi riba wa au ene, “Wau-ta e maraitom abo ai lau eanua esana eai, borimai esega abo ai mia, ai uneune eo gogo enamei ai hetubu”; ¹⁴⁻¹⁵ ia mo omi maraitom au hekau. Emi mauri saha? Omi doha goura, huia kuukuuna i taumasaraha, abotai i tauyamui. I lolo mo taba au ene, “Ena Guiau ena nuatu, abo ai mia, e ai abi doha ina, e doha meta.” ¹⁶ Na ina doha emi nuasaesae eai au ribaribapasipasi. Ribapasipasi ta i baaea. ¹⁷ Eai to eai duduraina i italobaiyao bena i ginauri, ia mo nige i ginauri, ia arinai baaea meta.

5

Taumonaune se ribahesanapuedi, eo lauhasahasa headi tauataiena enana.

¹ Ehei, omi taumonamonaune, au dou, au eaba paana abibaaea potamiu eai abo se taru. ² Emi gogo se posao eo ami lulu motamota se aidi. ³ Emi *gold* eo emi *silver* se masio, masidi abo se ribataubigaimiu, bulumamiu abo se aiaidi doha oegi alaalasi. Emi gogo enamiu au peiauri, huia murimurita enana. ⁴ Hage au ita, emi taupaisoa, emi oea tau-eaoidi, edi maisa au nuahi wa, au boraidi, iaede i eoga lailai; eo emi masuri taulauoeaina arinadi i lageo moutuana Guiauna beana eai. ⁵ Tanoubu eai ta amna lolo boeana eai aue mia, eo au hekodeuioimiu; aiunu asubenana eai omibom

nuamiu au heai-komakomanidi. ⁶ Tau-laulau-duduraina au hegiru, au unui; nige gonoana i tauguduimiu.

⁷ Arinai egu tataoyao e, au taubiga, i lau e Guiau ena laoma eai. Hage au ita, oea taupaisoa ena tano uauana lolona i bagibagiei, i taubigai i lau e nabu bagubagunana eo nabu murimuritana se taru. ⁸ Omi hinage au taubiga. Nuamiu au headidiridi, paana Guiau ena laolaoma i hanahanaumao. ⁹ Egu tataoyao e, esau to esau, tabu au haimonumonunu, ata omi hinage se hegirumiu; au ita, Tauhekiraino ia dobila guduna eai i totoro. ¹⁰ Taubiga eo amamna iilana, egu tataoyao e, hage au italau peroveta aridi eai, isi Guiau esana eai se ririba. ¹¹ Mamohoi ta ene se kode ariri, isi tau-toro-tahitahi wa. Iobu ena toro-tahitahi wasana au ataieyao, eo Guiau ena abiabi au itayao, doha Guiau i taubiga ariri eo i nuatoatoaida.

¹² Na egu tataoyao e, teina mo au ataiei, tabu au ribariba aigora, galewa esana eai, e tanoubu esana, e hari aigora eai, na emi riba E, hede E mo, eo ena au ene Nige'e, hede Nige'e, arinai taba nige se hegirumiu.

¹³ Esau boeamiu eai amamna i hearo, wa? Taba i lau-uura. Esau nuana ie kode? Taba i wana hedebasae. ¹⁴ Esau boeamiu eai i asiebo? Taba ekalesia babadadi i eogaidima, enana abo se lau-uura, eo *oil* eai se heyausi Guiau esana eai. ¹⁵ Uura ma-sunumana tauasiebo abo i hemaui, Guiau abo i heterouioi; ena taba baaea ie abi, ia abo se ribagigiri. ¹⁶ Arinai emi baaea esau esau arinai au hai-hemasarahadi, eo esau esau enamiu au hai-lau-uura, bena se helolouioimiu. Taulaulau-dudurai ena uura i gigibori ariri, ma-aniona. ¹⁷ Elia ia tau, nuana kamanina doha ita nuada, na i lau-uura ma-nuagigiborina bena tabu nabu i taru, to borimai haiona eo nawalai haligigi-esega nige i taru tanoubu potana eai. ¹⁸ Abotai i lau-uuraui to galewa nabuna i leama, eo tanoubu aiaina se tubuio.

¹⁹ Egu tataoyao e, ena esau boeamiu eai mamohoina eai i gege, na tau esau ia i woiauioi, ²⁰ taba i nuatui, eai to eai tau-laulaubaaea esau ena dobila ponorina arinai i hesinibuiyama, ia earuana mate eai abo i hemaui, eo arinai abo baaea moutuana se tauyamui.

PETERO ENA URIURI BAGUBAGUNANA

Tauataiena ena amamna eo ena laulau, ena mauri i abi-heohi.

¹ Petero, Iesu Keriso ena aposotolo, tau miamiasuara se tatagorigori tupo gamagari eai, enadi ina: Pontasi, Galatia, Kapodokia, Asia eo Bitinia eai, ² Eaubada Tamada i hinerimiuo, emi dobila i nuatuiyao, ia Earuana eai i hetabuemiu bena Iesu Keriso au awaabiei, eo ia osinana potamiu eai se hetaru: Ainauiana enamiu, eo loni se helaiyawa.

³ Eaubada ta hedebasaei, eda Guiiau Iesu Keriso Tamana! Ena nuatoatoa saesae-aririna se laba-heharihariuda sunuma maumaurina eai ta, Iesu Keriso mate eai se heterouioi wa debana eai, ⁴ eo eda gogo taba nige i posa, taba nige abahabiina, taba nige i tauyamui, galewa eai se gorai enamiu; ⁵ omi wa, Eaubada ena gigibori i abididinimiu, emi sunuma debana eai, i lau e mauri au abi, enamiu se torenonohai wa, huia murimuritana eai abo se hemasaraha. ⁶ Arinai ede au kode lailai, abo-ina ata bena nuamiu se porohe, paana huia kuukuuna noho gamagaridi se hesabaemiu ina; ⁷ emi sunuma lauitana, ginauri maisa lailaina, *gold* oeagi alaalasi eai se gabu taiede abo i tauyamui, maisana nige i lai doha, emi sunuma wa Iesu Keriso aba-hedebasaena ede, abaaihelahuina, namanamarina, ena huia taumasaraha eai. ⁸ Ia nige aue ita, na au gadosisiei; abo-ina nige au itaitai, ia mo au sunumaei to au kode, emi kode lailaina taba nige ta ribaei, namanamarina i monau. ⁹ Emi sunuma uauana aue abi, iaede earuamiu se mauri.

¹⁰ Mauri ta peroveta se hetala, se eoo adidiri, ainauia abo i laowa arimiu eai ta isi se riba-perovetaiyao. ¹¹ Se eooeoo, edohana eo aitea huiana Keriso Earuana boeadi eai wa i ribaei, huia ne Keriso ena amamna i hemasaraha-nonohaidi, eo hedebasaena, bena abo i tubu murita wa. ¹² Aridi eai se hemasaraha, nige isi enadi, wau ginauri wa omi enamiu ede, evanelia wa taulaulauguguiaina awadi eai aue abi, Earua Tabuna galewa eai se hetamariama debana eai. Teina ginauri ta aneru se henua ariri taba se itasipoidi.

¹³ Arinai nuamiu au taididinidi, au mia-komakomani, ainauia abo au abi wa, Iesu Keriso ena tau-masarahauioina eai, au sunumaei i lau e ana siga. ¹⁴ Doha merumeru awaawaabi emi gadolelehi beabeadi tabu au patuwataidi, doha bagubaguna ma-supusupumiu eai, ¹⁵ na doha tau-eogaimiu ia tabuna ede, bena omi hinage tabuna, emi miamia mauidi eai; ¹⁶ doha se uriyao, "Omi abo tabuna,

paana eau tabuna ede.” (Lev. 11.44-45.) ¹⁷ Na ena Tamana esana au ataatai, ia tatao nige i heasisiedi, gamagaridi edi paipaisoa abo i nonoi-itadi, besi emi huia miasuara eai ta ma-matausimiu au miamia. ¹⁸ Doha ede au nuatuiyao, nige ginauri posaposadi doha *gold* e *silver* aridi eai se unehemaurimiu, nabada emi miamia gaibu wa tamamiuyao edi kamani au miamiawataidi, ¹⁹ na Keriso osinana maisalailairirina eai, doha mamoe nige baaeana begana, nige gaina. ²⁰ Mamohoi tanoubu sora nige ie tubu, ia ena dobila se tore-nonohaiyao, abotai, huia murimuritana eai ta, omi debamiu eai se hemasaraha. ²¹ Ia debana eai Eaubada au awamamoheiei, mate eai i hetorouioi wa eo i hedebasaei iabom namanamarina eai; bena emi sunuma eo emi laubagibagi Eaubada arinai abo se otahai.

²²⁻²³ Paana omi earuamiu au heaadio, mamohoina wa au awaabiei, Earua debana eai, i lau e i hemala emi gadosisi mamohoi eda tataoyao aridi eai. Arinai besi au haigadosisiuioimiu, ma-nuaaamiu, ma-nuagigiborimiu. Se labaherihariumiu, nige tuma posaposana eai se hetubumiu, na tumana taba nige i posa, Eaubada ena riba eai, maumaurina ede i laulau, eo i miatahitahi i lau e nige nosina; ²⁴ na “Buluma gamagamagari iaede doha lagau eo tau ena lolo maudoina doha lagau liasina.

Lagauna abo i wowoea, liasina abo se uru,

²⁵ na Guiiau ena riba mo abo i otahai, ana huia, ana tasi.” (Is. 40.6-9.)

Riba ta ede wasa lolona, arimiu eai se guguiwai wa.

2

¹ Arinai nuayalayala, eo abi borabora, eo ao-labui, eo airomagigiri, eo ribariba baaea, maudoina au torehesaradi.

² Doha kaimou se labasi harihariudi, susu mamohoina taba au henua mo, iaede ribana, debana eai abo emi mauri eai au tubu; ³ ena taba Guiiau ena aiainauia au aiitayao.

⁴ Au laoma ia arinai, doha we’u maumaurina arinai, mamohoi tatao ia se otaotaei, na Eaubada ia i abihineriyao, lolo-dumadumana. ⁵ Omi hinage se abimiu doha we’u maumauridi, se tarini’sinimiu numana omi, earuana eai, eo kohena tabuna tataomiu, bena earuana eai aitalasam au helelelaei, iaede Eaubada i henua ariri wa, Iesu Keriso debana eai. ⁶ Doha uriuri tabuna eai si ene:

“Au ita, Sion eai kona-we’una ea hetoro, hilehileina, maisa lailai-aririna,

Esau ena i awamamoheiei, taba nige i maee.” (Is. 28.16.)

⁷ Omi tauataataiena arimiu eai ia i lolo ariri, doha ginauri maisa lailaina, na tau-awayagara aridi eai,

“We’una wau tau-abinuma se otaotaei wa

iaede i hemala we'utau, kona uruuruna eai se hetoro." (Ps.: 118.22.)

⁸ eo

"We'u aba-alabesibesina eo

tatao edi aba-beu, we'utau eai ta;" (Is. 8.14-15.)

arinai tatao se alabesibesi, paana se awayagara, edi dobila ina, enadi se nuatuiyao.

⁹ Na omi ede tatao, se hinerimiuo, kohena se awawa-sawasaei, basileia tabuna, tatao Eaubada enanayao mamohoi, bena ena abi noonoodi au hemahemasarahadi, ia masigiri eai tau-eogahaimiu wa ena mara nabunabutuana arinai au lulage. ¹⁰ Beabeana eai wa omi nige bodamiu, na huia ta omi Eaubada ena boda tataomiu; nabada wa ena nuatoatoa nige au hearo, huia ta nuatoatoana abo au hearo.

¹¹ Egu nuanuai e, ea awanorimiu ta, doha omi taulaolaoma mo, tanoubu eai ta tau-adaadai mo, bulumamiu gadosisidi aridi eai au nuahiuiomiu, isi ede earuada tau-iaialaidi. ¹² Emi miamia Murimuri-tataodi boeadi eai bena se masaraha, ata se riba-baaeaimiu doha omi taulaulau-baaea, taiede sora huia baaea se hearo abo Eaubada se hedebasaei, paana emi laulau lolodi se itadio.

¹³ Tatao edi laugagaeo gamagaridi au awaabiedi, Guiau debana eai, ena *king* arinai, ia wasawasana i sae ariri ede, ¹⁴ e gavana i tauribaedi wa, bena tau-laulau-baaea se hemaisadi eo tau-abilolo se hedebasaedi. ¹⁵ Paana Eaubada ena nuatu ina, bena omi laulau lolo eai tau-eauyaure edi supusupu eai abo au abihemonoudi. ¹⁶ Omi doha tatao se iairihaimiuo, ia mo emi iairihai tabu i hemala laulau baaea aba-woeoina; na doha Eaubada ena heaheari eai au laulau. ¹⁷ Tatao gamagaridi au heasisiedi. Eda bogao tataodi au gadosisiedi. Eaubada au matausiei. *King* au heasisiei.

¹⁸ Tau-heaheari e, ami tanutanuagayao bena au awaabiedi, ma-matausimiu, nige tau-abilolo eo taumanabiga isibom na isi tau-oiura wa au heasisiedi hinage. ¹⁹ Paana teina arinai aitoina ede, ena tau esau ena nuatu Eaubada arinai debana eai amamna i hearo eo se heporohe gaibui. ²⁰ Paana ena emi ponori debadi eai se lubilubimiu na au taubiga mo, haedi hedebasaena? Na ena taba ami paisoa lolo eai se heamamnagaibuimiu, na au taubiga mo, temeta arinai Eaubada nuana i lolo. ²¹ Ina dobila eai ta se eogahaimiu ede, Keriso ia hinage amamna enada i hearo, iilana i laugabaei eda tautau, bena omi ae-munana eai au hemuriwatai. ²² Ia nige baaea i ginauri, awana eai nige borabora esau se lobai. ²³ Huia ne se riba-baaeai, riba baaea nige i heuio; amamna i hearo nige i riba-hematausi; na iabom i toreui oi ia wa tauhedudurai duduraina nimana eai. ²⁴ Ia eda baaea i baheidi, iabom tauna eai, oeagi ewana eai wa, bena ita baaea ena tupo eai

ta mate, eo laulau-dudurai ena tupo eai ta mia. Ia gaina eai se helolomiu. ²⁵ Omi nabada aue gege doha mamoe, na au uiomao ina earuamiu edi Mamoe-tauitawata arinai, eo Tauwoeaidi arinai.

3

¹ Hinage doha, omi sisine maitawasora, monemiuyao au awaabiedi, ena taba headi Eaubada ena riba nige se awaabiei, taiede, nige ribariba eai na ata bena monediyo sisine edi miamia debadi eai tatao wa nuadi abo se buidi, ² paana emi iila aana, ma-matausina, abo se ita. ³ Ami pasa tabu ami ao mo pasana, doha uru hilihilina, e pasa *gold* au tore, e lulu luiluina eai, ⁴ na doge eamuyamuina wa nuaboeamiu eai, pasana ede earua manamanabigana, hedobidobiuiaina, iaede taba nige i posa eo Eaubada matana eai ginauri maisa lailaina ina. ⁵ Doha ina huia mumuga eai sisine tabudi, Eaubada tausunumaena, edi abiabipasa, hede monediyo se awaabiedi, ⁶ doha Saraha Aberahama i awaabiei esana i atai guiau. Ia nanatunayao-sisine ede omi, ena emi abi se dudurai, nige saha au matausiei, taba nige aruamiu se loi.

⁷ Hinage doha, omi tatao maitawasora, ma-monemiuyao au mia-esega eo au abi komakomanidi, sine au heasisiei paana ia tauberuberuna ede, au mia doha taumi labui mauri ainaiuana au hearo-esegai, abo taba nige emi uura au guduguidi.

⁸ Riba murimurita-aririna ede, gamagarimiu bena nuamiu esega, esau esau au hai-hebigauioimiu, au haigadosisi doha omi boga esega, ma-nuatoatoamiu tatao au heasisiedi.

⁹ Baaea tabu maisana au heuio baaea eai, e diladila maisana au heuio diladila eai; omi udoi, se eogahaimiu riba-helolo mo arinai au heuheuio, arinai nuawoiwaina ainaiuana bena au hearo. ¹⁰ Paana

“Ena esau maurina i gadosisiei

eo asubena lolodi bena i itadi,

ribariba baaea eai memenana taba i nuahi,

sopana hinage, ata borabora se ribaedi;

¹¹ taba baaea i tausuarai, lolo mo i ginauri;

taba loni mo i eoi, eo i lau hesabana.

¹² Paana Guiau matana se itaitalau laulau-dudurai tataodi aridi eai,

beana se tasoe edi uura arinai.

Na tau-abibaaea aridi eai Guiau ana ao i oiura.” (Ps. 34.12-16.)

¹³ Na eai abo i hebaeamiu, ena omi lolo au laulauwatai?

¹⁴ Na ena laulau-dudurai debana eai amamna au hearo, emi kode meta. Edi hemahematausi tabu au matausiei, eo tabu nuamiu se porohe, ¹⁵ na Guiau emi Eaubada nuaboeamiu

eai au hetabuei. Huia gamagari emi riba bena se nonoha, arinai abo tatao au heuioedi ena emi sunuma paana nu-aboeamiu eai wa se hetala, nuatudobidobiuiuo eai eo ma-heasisimiu eai riba au heuio; ¹⁶ emi aba-nuanuatu-dudurai, nuaboeamiu eai, abo se nega, arinai ena se riba-baaeamiu, tauhebaaeamiu emi miamia lolodi Keriso boeana eai se ita abo se taumaeamaea. ¹⁷ Paana ena Eaubada nuana ede, i lolo ariri ena laulau dudurai debana eai amamna au hearo; laulau baaea debana eai ta amamna nige i lolo. ¹⁸ Nabada Keriso amamna i hearoyao, taulaulau-dudurai, taulaulau-gewagewa enadi i hearo, huia esegana eai, bena i woeaida Eaubada arinai, bulumana eai se unuhemate na Earua i abihemauriuioi; ¹⁹ abotai ie lau earuyarua se tutuguidi wa, enadi i laugugua, ²⁰ isi mumuga eai tau-awayagara, huia ne Eaubada ena taubiga eai i bagiasaeaidi. Noa asubenana eai, huia ne ake se lauginauri, arinai tatao hisahisawaidi mo, haligigi-haiona, goila eai wa se hemauidi. ²¹ Bapatiso tautauna ina, iaede i hemauidi Iesu Keriso ena torouio debana eai, nige buluma biina toretorehesuarana eai tauda eai ta torehesuara, na eda eoga mo Eaubada arinai, bena nuatu aba-heduduraina nuaboeada eai i nega, Iesu Keriso ena torouio debana eai, ²² Ia i seuioo galewa, ia Eaubada nimatutuna eai, maena aneru, eo wasawasa saesaedi, eo gigibori udoi udoi, ia awaabina eai se laulau.

4

¹ Arinai doha Keriso, ia bulumana eai amamna i hearo wa ita debada eai, omi bena nuamiu doha, au henu-apaipaiuimiu, paana ena esau bulumana eai mamohoi amamnana i hearoyao, ia baaea arinai i lautomo, ² ena mauri asubenadi eai taba nige buluma i miawatai, tatao lelehidi eai, na Eaubada ena nuatu mo abo i miawatai. ³ Huiadi se lauo arinai gonoadi Murimuri-tataodi edi henuhenu ta ginauriwataidi, huia ne matamatae'o eo buluma lelehidi eai ta laulau, eo *wine* nomnom-daoina eai, eo laulau gaibu miamiana, eo mataasi aiaina, eo oitau tabaohuna abiabidi biibiidi. ⁴ Huia ta se heunaboisaha, si ene paana saha nige maediyao au aitauteu esega, laulau eai ta au gabauioimiu eo abidaoina eai au dio, arinai se riba baaeamiu; ⁵ ia mo edi mauri aniona abo se toro se wasawasaei ia wa matana eai, ia i nonoha wa tau-maumauri eo tau-matemate i heduduraidi. ⁶ Teina matapaana eai ta evanelia se guguaiei tau-matemate aridi eai hinage, bena tatao bulumadi mamiadi eai nonoidi eai abo se nonoidi, na earuadi eai Eaubada ena nuatu se miawatai.

⁷ Ginauri gamagaridi edi huia sigasigana i hanahanaumao; arinai omi bena au miakomakomani, eo uura arinai au

silasilawahetete. ⁸ Teina mo i sae ariri, omibom boeamiu eai emi hai-gadosisi eai bena au gigibori, paana gadosisi, baaea peina lailaina abo i bubulitawai. ⁹ Emi numa-alo au soeauridi, esa, esa, au abi-taumanaidi, tabu emi haitala au nuanuahidi. ¹⁰ Tau esa to esa Eaubada ena ainauia ie abi, iaede bena i hepaisoaei ena doga arinai, abo Eaubada ena ainauia udoi udoi omi doha tauhepaisoaina lolodi: ¹¹ esau i ribahasahasa, taba i riba doha Eaubada ena sanapu saesaedi i ribaribaedi; esau ena i heayai, taba i abi doha ia adidirina Eaubada i moseyao; bena ginauri gamagaridi eai Eaubada abaaichelahuina namanamarina ede, Iesu Keriso debana eai, ia arinai hedebasaena, eo awa-tanuaga gigiborina, i lau e nige nosina. Amen.

¹² Egu nuanuai e, lauita alaalasina i lauitaimiu ta, tabu au heunaboisahaei, doha ginauri hekahekauna boeamiu eai ie tubu. ¹³ Na au kode mo, paana Keriso ena amamna tupona omi au hearo, sora ia namanamarina huia hemasarahana eai, omi abo nuamiu se amna, eo au kode ariariri. ¹⁴ Ena se riba-baaeamiu, taiede au kode; paana namanamari earuana potamiu eai ie taru ede, eo Eaubada earuana. ¹⁵ Na tabu omi esau se hegirumiu si ene ia doha tauaiunu e tauaiyahari, e taulaulaubaaea, e tau-modegaibu hari tatao adi paisoa eai; ¹⁶ taiede ena tau esau giru i hearo paana ia * Keriso-tauna, tabu i taumaeamaea, esana eai se hegiru wa arinai taba Eaubada i hedebasaeni mo. ¹⁷ Huiana hede i lagemaohetala ie tubu ede Eaubada ena numa boeana eai; ena ita arida eai i tubu baguna, isi abo edohadi ena taba Eaubada ena evanelia nige se awaabiei? ¹⁸ Eo, "Ena tau-laulaududurai mauri taba nige i abi gaibui, Eaubada tau-miamurimuriena eo tau-laulau-baaea edi dobila abo edohana?" (Prov. 11.31.) ¹⁹ Arinai amamna tauhearo, Eaubada ena nuatu eai, abo se lolo, isi taba earuadi se toredi Eaubada nimana eai, doha mamohoi ia Tauhetubuda miamiatahitahina.

5

Mamoe Tautawataina saesaena ena laolaoma debana eai, eda aiheaheri dohilana ta nanabuei.

¹ Babadayao boeamiu eai, enadi ea riba- hasahasa, eau hinage helemiu bada esau, Keriso ena amamna eau taitaitaina esau, ena namanamari maraitom-asubena abo se hemasarahana, eau hinage abo tauhearona esau. ² Eaubada ena mamoe eawoina boeamiu eai wa, omi au suidi, au woeaidi, nige paana se duduimiu na paana aue eari, nige moni biibiina debana eai na paana nuamiu se soasoari, ³ porohe ta se tore nimamiu eai nige bena au tanuagaei,

* 4:16: English: Christian.

doha omi guiau, na doha omi mamoe eawoina edi tautau mo, iilamiu abo se lauwatai. ⁴ Huia ne Mamoe Tautawataina saesaena i laoma, omi emi korona namanamarina abo au abi, taba nige i tauyamui. ⁵ Hinage doha omi heamiu mahewahewarimiu, emi babadayao edi riba arinai bena au eari. Gamagarimiu hinage au haiawaabiuiomiu, esau, esau, nuatudobidobiuiio au abi au lui, paana “Eaubada taunusaesae i taugudui, ena ainuia ede i mosei tau-nuatudobidobiuiio arinai.” (Prov. 3.34.)

⁶ Au nuatu-hedobidobiuiomiu, Eaubada nimana gigigiborina ubuna eai, ia ena huia eai abo i abi’sinimiu. ⁷ Emi nuamodemode maudoina au gabalaei ia potana eai, paana ia tau-bobodiemiu. ⁸ Au mia-komakomani, au matasoasoari. Ami waiunu diabololo ie sae ie dobi doha liona, ie so’a, i aiailoea, bena eai abo i toai i ai. ⁹ Ia au taugudui, sunumamiu eai au torotahitahi, au nuatuiyao emi tataoyao tanoubu tupo headi eai emi amamna wa isi hinage se hearoyao. ¹⁰ Ainuia gamagamagari Eaubadana, ena namanamari i lau e nige nosina, arinai wa i eogaida, Keriso Iesu debana eai, sora begana amamna au hearo abotai ia iabom i hetorouioimiu, i hetorotahitahimiu, i headidirimiu. ¹¹ Ia arinai namanamarina, awa-tanuagana, ta mosei i lau e nige nosina. Amen.

¹²⁻¹³ Silevano, eda tau nuana i tore-esegai, ia nimana eai ea uuri ta, uriuri kuukuuna mo arinai ea lauhasahasaemiu, eo teina ea hemasaraha-auri: hede Eaubada ena ainuia mamohoina ina, arinai omi au totoro. Ia Babulonia eai ie mia wa, abi-hilei sinena, doha omi, ena lautoi i hetamariyawa ina; eo natugu Mareko hinage. ¹⁴ Gadosisi alagoina arinai esau esau au aiaitoiuiomiu.

Omi gamagarimiu Keriso boeana eai taulaulau, loni enamiu.

PETERO ENA URIURI HELABUINA

Keriso hemuriwataina: heiheinoina saesaedi.

¹ Simona Petero, Iesu Keriso ena heaheari tauna eo ena aposotolo, aidobudi sunuma maisa lailaina ta se lobaiyao, doha ai, eo eda Eaubada eo Tauhemaurida Iesu Keriso laulau-duduraina eai taulaulau, enadi ea uuri:

² Ainauia eo loni taba se helaiyawa, Eaubada emi italobaina eai, eo Iesu Keriso eda Guiau.

³ Ia gigiborina Eaubada arinai i laoma, debana eai, ginauri gamagaridi se patulau mauri arinai, eo Eaubada nanabuena arinai, i leama arida eai, Tau-eogaisinida ta nuatui arinai ta lage hedebaseaena eo lolona boeana eai. ⁴ Arinai ena ribahesunuma lolo-dumadumadi, saesae-ariridi, i leamao enada, abo tanoubu ta abiheposana wa buluma lelehidi debadi eai, au dagogabaedi eo Eaubada nuana i hemala omi nuamiu. ⁵ Teina matapaana eai ta bena au aipate adidiri abo sunuma potana eai abilolo au tubei, abilolo potana eai nuasibasiba, ⁶ abo sibasibamiu potana eai emi lau eai au * abididiniuiomiu, abiabididiniuiomiu abotai toro-tahitahi, torotahitahi abotai Eaubada nanabuena, ⁷ Eaubada au nanabuei abotai eda tataoyao au nuanuaiedi, eda tataoyao nuanuaiedi abotai ede gadosisi. ⁸ Paana ena taba ginauri ta au abidio enamiu, eo boeamiu eai se tadada, taba nige au miagaibu nige uuamiu, eda Guiau Iesu Keriso abina tauata omi. ⁹ Eai ginauri ta ie deha, ia matana se gibu, ginauri hanahanau eai mo i itaitaidi, ena baeae beabeadidiri aridi eai se deuri-heaa wa, nuana se huiedi. ¹⁰ Arinai egu tataoyao e, nuamiu bena au tore-esegaidi, au aipate dobila arinai se eogaimiu, se hinerimiu ta, au abi mamohoiei, laulau ta au laulauedi taba nige huia esau au alabesibesi; ¹¹ enamiu abo se leawa, abo au abihemonau, arinai abo au lusora eda Guiau eo Tauhemaurida Iesu Keriso ena basileia eai i lau e nige nosina.

¹² Arinai abo ea hesoarimiu, teina ginauri ta abidi au atao eo mamohoina boeana eai au torotahitahio, taiede huia gamagari abo ea henuhenuaisinidi. ¹³ Ea ene i dudurai, eau taugu eai ta ma-miagu, abo ea hesohesommiu ginauri ta bena au nuauatuidi, ¹⁴ paana ea nuatui taugu ta egu huia gabaena nige baeaeona, doha eda Guiau Iesu Keriso i ribahesanapugu wa. (Io. 21.18-19.) ¹⁵ Hedeona abo ea hesabaemiu, bena egu torohai murina eai huia gamagari abo nuamiu se sae, ginauri ta au nuatuidi.

* 1:6: English: temperance, e self-control.

¹⁶ Paana huia ne eda Guiiau ena gigibori eo ena laoma ai hemasarahawa arimiu eai, ai nige piripiridai ai lediwa, doha tatao isibom adi sanapu eai se hetubudi, na ena wasawasa tepona ai tau-itana ede, matamai eai. ¹⁷ Ia Eaubada, Tamana, arinai hedebasaena eo aihelahuina ie abi, huia ne arina esau ewa puripurina namanamarina eai i laoma, i ene, "Natueogoyogoigu ina, ia nuagu i helolo aririei," ¹⁸ arina ta ai tauataiena, galewa eai i laoma, huiana ne maemai aie sae oea-tupina tabuna eai wa. (Mt. 17.1-8; Mk. 9.2-8; Lk. 9.28-36.) ¹⁹ Hinage peroveta ribana ta abiyao, i masaraha ariri. I lolo taba au atailobai, doha lamepana, teha masigiri eai i alaala, i lau e mara i iuyari eo ubona i dalasaema nuamiu eai. ²⁰ Teina ta au nuatu-bagunai, uriuri tabudi eai taba nige esa eo esa iabom ena nuauatu eai aniona bena i nuatuwatai, ²¹ paana nige peroveta ribana esau tau ena nuatu eai i laoma, na tatao Eaubada ena riba se ribaei, paana Earua Tabuna i duduidi.

2

Taulauheata borabora, riba abo se buidi, ribahesanapuena.

¹ Na doha peroveta borabora headi se tubu tatao boead i eai, omi boeamiu eai hinage taulauheata borabora abo se tubu-eamuyamui, se hetatagorigorimiu, eda Tanuaga, tau-unehaidi wa, se uharaei, abo se heula ariri se hebaaeauioidi. ² Tatao se gamagari edi lelehi bii laulaudi abo se laulauedi, isi debadi eai, eo dobila mamohoina ta wasana abo se hebaaea. ³ Aiaromagigiri debana eai ao-borabora ribadi eai abo se abimiu doha edi uneune; adi giru maisana beabeana eai i laoma e wau-ta, taba nige i bebeda, nige i enohai, sora baaea abo se hearo.

⁴ Ena Eaubada aneru headi baaea tauhetubuna wa nige i nuatoatoaidi na i gabadobedi gehena eai, i moselaedi masigiri duhadi eai i lau e hedudurai huiana; ⁵ eo ena tanoubu mumuga eai nige i nuatoatoaei, Noa iabom i gorai maena tataodi haligigi-labui mo, laulaududurai tau tau-wasaina wa huiana ne dibori utuutu i hetamaridobei tanoubu eai taumia, eo Eaubada tau-mia-murimuriena, potadi eai; ⁶ eo ena eanua labui wa, Sodoma eo Gomora, i heasibuidi se hemala ahu mo, edi baaea debadi eai i riba-hematedi se hemala tautau Eaubada tau-miamurimuriena enadi; ⁷⁻⁸ ena tau dudurai Lota iabom i hemaui, tatao baaea edi laulau bii debana eai nuana se porohe ariri wa (tau dudurai ta isi boead i eai i mi-amia, edi laulau i itaitaidi i ataataiedi, edi hemahemanabara nuana duduraina wa se hetausiololo), ⁹ hede Guiiau abina i ata Eaubada tauataiena noho boead i eai i girihaidi, eo tatao baaea maisadi i nuatunonohai i lau e hedudurai asubenana

eai, ¹⁰ eo isi wa hinage buluma dobilana eai mo se laulau, lelehi biibiidi eai, eo tanutanuaga se isuewaidi.

Se nuaoiura ariri isibom se tanuagauioidi, tatao lolodi se isugaraedi, nige se matausi, ¹¹ aneru, isi mo se sae ariri wa, gigiboridi eai eo adidiridi eai, taiede lauhegiru ribadi taba nige se hetorodi Guiiau matana eai. ¹² Na ina tatao ta, doha ginauri se hetubudi nige nuadi, doha suisui, se labasidi bena maraitom- asubena abo se toaidi se unuidi mo, ginauri se supusupuedi iaede se hegihegirudi, mamohoi hinage abo se baaea eo isibom ede se hebaaeauioidi, ¹³ baaea abo se hearo edi baaea maisana. Tatao ta edi aiaihea buluma eai se lauheamna, asubena eai hinage se laelaei. Isi doha asiebo heiheinoina, doha bonu baabaaeadi boeamiu eai, se patulaowa arimiu eai, se ai-mataasi, se kodekodei. ¹⁴ Ganaganawari matadi se monau, baaea eai nige begana se tausiololo. Tauberuberu se woea-hegegedi. Aiaromagigiri eo gadolehidi nuadi se manasa ariri. Merumeru se ribahematedio, ede isi! ¹⁵ Dabila mamohoina se nuagabaei, se nuagabaei, se gege doha Balama, Beora natuna, ena laulau wa, ia gogo, abi-baaea eai i lobai, i gadosisiaririei, ¹⁶ na ena baaea wa se ribasuui; asina unaunana doga arinana eai i ribariba, peroveta ta ena eauyaure eai i hetarutoro. (Num. 22.5, 7.21-31.)

¹⁷ Tatao ta doha ipu nige goiladi, doha goura mana lailai ie toa abo i eohoilaei, masigiri lailaina i lau e nige nosina, enadi se tauribaiyao. ¹⁸ Riba borabora dagugu lailaidi se ribaribaedi, buluma lelehidi biibiidi se hepaisoadi bena tatao se niurihaidi, se tanuagaidi, headi wa aboina mo taumi-aponori se dagogabaedi. ¹⁹ Se ribahesunumaedi si ene abo iairihai se mosedi bena isibom nuadi se lauwatai, ia mo isi hinage tau-auau, baaea heahearina eai se laulau; paana ginauri saha tau i audidini, ia tanuagana ede meta. ²⁰ Paana ena headi tanoubu ena hebii se dagogabaeyao eda Guiiau eo Tauhemaurida Iesu Keriso italobaina debana eai, abotai abo wau ginauri wa se hetatapilipiliuioidi se unuidi, adi ao murimuritana abo i baaea ariri ede, nige doha adi ao bagubagunana. ²¹ I lolo mo taba laulau-dudurai dobilana isi sora ma-hekaudi, ena laugagaao tabuna se mosedio abotai se sinibui se nuagabaei. ²² Riba sanapu wa i patu-mamohoi aridi eai, si ene, Kedewa ie uio iabom maliwena ie ai, eo salaibawesina se hedui wa, ie uio monomono eai ie i'o.

3

*Guiiau ena uioma, eo Guiiau asubenana.
Is. 2.10-22; Hem. 19.11-21*

¹ Egu nuanuai e, teina egu leta helabuina ede, ea uriyawa arimiu eai, egu leta labui eai wa ea aipate bena nuamiu mamohoi ea hanoidi; ² bena riba peroveta tabudi se ribaedi, eo Guiau Tauhemaurida ena lauhesom aposotolo awadi eai, aridi eai abo nuamiu se sae. ³ Paana au nuatuiyao asubena murimuritadi eai tau-isuisugara abo se laoma, se alaliuliuwa, isibom edi gadosisi se laulauwataidi si ene, ⁴ “Wau ena laoma se ribahesunumaei wa, haedi ede? Tamadayao edi huia eno eai i laoma e wau ta, ginauri gamagaridi adi ao esega, doha hetubu huiana eai, bagubagunana eai.” ⁵ Ina edi nuatu eai ta nuadi se hui beabeana eai galewa ie ota, gabogabo eai tano i tubu-saema eo gabogabo i soiei, Eaubada ena riba eai. ⁶ Abotai tanoubu nei huia eai ne se helautom, goila dibori utuutuna wa debana eai. ⁷ Ribana esega eai galewa eo tanoubu ta oeagi alaalasi eai abo se helautomuioi, hedudurai asubenana eai, arinai tatao Eaubada nige se nuatui abo se hebaaeadi.

⁸ Egu nuanuai e, ginauri esega ta tabu nuamiu se hui, ede Guiau arinai asubena esega gonogonoana doha bori-mai tausani esega, eo borimai tausani esega gonoadi doha asubena esega mo. ⁹ Eaubada nige i bebeda ena ribahesunuma hemamohoi ena eai, doha headi si ene i bebeda; na i taubiga ariri omi debamiu eai, nige i henua esau i tauyamui na bena tatao gamagaridi se nuabui. ¹⁰ Guiau ena asubena abo i lagema, doha tauaiyahari, nei huiana ne galewa abo se tausudara, daguguna lailaina eai, tanoubu abo ie welo, gigibori alaalasina eai, tanoubu, maena paipaisoa gamagamagari, abo se gabuesegaidi.

¹¹ Ta itayao ginauri gamagaridi abo doha ina adi siga, hage omi abo dodoga sahasahaidi, miamia tabuna maudoina eai, eo Eaubada nanabuena eai, ¹² Eaubada ena asubena ta au bagibagiei, eo au helelehiyama, debana eai wa galewa abo se helautom oeagi alaalasina eai, eo abo se welo wa gigiborina lailaina eai. ¹³ Na ia ena ribahesunuma debana eai ita mo galewa harihariuna eo tanoubu harihariuna ta sunumaei, aridi eai abo laulau-dudurai i mia.

¹⁴ Arinai egu nuanuai e, omi ginauri ta tau-ooidi ede, besi au aipate ma-nuamiu, loni boeana eai bena se lobaimiu, nige baaeamiu, nige ami giru, ia matana eai. ¹⁵ Au nuatui, eda Guiau ena taubiga-daoui emi mauri sorasorana ede. Doha eda tau ta gadosisiei wa, Paulo, enamiu i uriyao, sonoga ia se mosei iaede i leawa, ¹⁶ ena leta gamagaridi eai ginauri ta i ribaribaedi. Arinai ena riba headi italobaidi se pilipili ariri, tau-supusupu eo isi nige se torotahitahi ribadi se haihaiabiedi, doha uriuri tabudi headi hinage edi abiabidi, arinai isibom se hebaaeauioidi. ¹⁷ Na omi, egu nuanuai e, ginauri ta au

atai-nonohai, au komani ata tatao baaea edi ponori eai se hearulaemiu emi aba-totoro adidiri ata au beugabaei. ¹⁸ Na omi bena au tubu mo, eda Guiau Iesu Keriso ainaiuana eo sonogana eai. Namanamarina ia enana ta mosei, wau ta i lau e huia nige nosina. Amen.

IOANE ENA URIURI BAGUBAGUNANA

Tamada ana bogao boeana eai, heoiesegana eda abalobaina.

¹ Bagubaguna eai ie tubu wa, i laoma e huia ta, ai ataieyao, matamai eai ai itayao, ai italau arinai, hinage nimamai eai ai abiita, iaede mauri Ribana—² maurina se hemasarahayao, ai aie ita, ribana ai ribaribaei eo ai ribahemasaraha omi arimiu eai, ede mauri i lau e nige nosina, Tamana boeana eai, iaede se hemasaraha arida eai—³ saha aie ita, eo ai ataiei, iaede ai hemasarahayawa omi arimiu eai, bena omi to ai heoiesegana ta abi; mamohoi eda heoiesega ede Tamada arinai, maeda ia Natuna Iesu Keriso. ⁴ Teina ginauridi ta ai uridiwa, bena eda kode i monau. (Io. 15.11.)

⁵ Riba wa ia arinai ai ataiei eo omi bena ai heribamiu, ede ina: Eaubada ia marana ede, eo ia boeana eai nige begana masigirina. ⁶ Ena ta ene ia maeda heoiesegana ta abi, na sora masigirina eai ta laulau, ta borauridi, eo mamohoina nige ta miamiawatai. ⁷ Na ena marana eai ta laulau, doha ia ede marana eai, ita esau to esau abo ta hai-heoiesega, eo Natuna Iesu Keriso osinana, baaea gamagamagari eai i heaheaada. ⁸ Ena ta ene nige eda baaea, ta borauioida meta, eo mamohoina boeada eai nige'e. ⁹ Ena eda baaea ta ribahemasarahadi, ia ena abi se lolo, eo i dudurai, eda baaea abo i ribagigiridi eo laulau gamagaridi nige se dudurai, aridi eai abo i heaada. ¹⁰ Ena ta ene ita nige ta baaea, ia ta awaboraboraai, eo ena riba arida eai nige'e.

2

Eda heoiesega bena i laulau, Keriso ena hesahesagu debana eai.

¹ Nanatuguyao garirimiu e, ginauri ta ea uridiwa bena tabu baaea au abi. Na ena tau esau baaea i abi, tauribasaguida enada i totoro Tamana nuanuana eai, iaede Iesu Keriso taulaulaududuraina. ² Ia hinage eda baaea abahemaisana ede, nige itabom mo enada na tanoubu maudoina enadi hinage. ³ Teina arinai abo nuada se masaraha, ia abina ta ata, e nige'e, ena taba ena lauhesom ribadi ta sogohidi. ⁴ Ena esau i ene, "Ia abina ea ata," na ena lauhesom ribadi mo nige i awaabiedi, ia tauborabora, mamohoina ia boeana eai nige'e. ⁵ Na ena esau ena riba i laulauwatai, mamohoi ia boeana eai Eaubada ena gadosisi i tubu-ohi. Teina arinai ta nuatui mamohoi, ita ia boeana eai: ⁶ esau i ene ia boeana eai

i miamiatahitahi, i lolo taba Keriso ena laulau i laulauedi. (Io. 14.21-23. eo 13.15.)

⁷ Egu nuanuaiyao e, nige lauhesom harihariuna ea uriyawa, na lauhesom beabeana, iaede bagubaguna eai aue abi; lauhesom beabeana ta ede riba wa au ataieyao. ⁸ Taiede lauhesom harihariuna ea uriyawa hinage, mamohoina ia arinai eo omi arimiu eai, paana masigiri i tautauyamui ina eo mara mamohoina ede i sina'o. ⁹ Esau ena i ene ia marana eai, na ena doga i hewaiunuei, ia masigiri eai sorana, i laoma e wau ta. ¹⁰ Ia ena tau i gadosisie i marana eai i miahai, arinai nige abahealabesibesina esau. ¹¹ Na ia ena tau i hewaiunuei, ia masigiri eai i miahai, eo masigiri eai i laulau, eo haedi i laulau nige begana i italobai paana masigiri wa matana i hegibugibu. (Io. 13.34; eo 8.12; eo 11.9-10.)

¹² Enamiu ea uri ina, omi merumeru gagirimiu e, paana emi baaea se ribagigiridio ia esana debana eai. ¹³⁻¹⁴ Enamiu ea uri, omi mai-tama e, paana ia bagubaguna eai ie tubu wa, abina au atao. Enamiu eai uri, hewahewari e, paana au adidiri eo Eaubada ena riba boeamiu eai i miatahitahi, eo paana baaea tauna au saepoi.

¹⁵ Tabu tanoubu ta au gadosisie, eo tanoubu eai ta ginaurina. Ena taba tau esau tanoubu i gadosisie, Tamana gadosisina ia boeana eai nige'e. ¹⁶ Paana ginauri gamagaridi tanoubu enana, buluma lelehina, mata lelehina, tanoubu maurina ena aba-nuasaesae, meta nige Tamada enana, meta tanoubu enana. ¹⁷ Tanoubu ta abo i tauyamui, ma-lelehina hinage; na eai Eaubada ena nuatu i ginauri ia abo i miahai ede, i lau e nige nosina.

¹⁸ Merumeru gagirimiu e, teina awa murimuritana ede; doha au ataieyao Keriso-tauialaina i laolaoma, wau ta hinage * Keriso-tauialaina se gamagari; arinai ta italobai, mahana murimuritana ina. ¹⁹ Isi wa se pesagabaeda, na isi nige enadayao mamohoi; ena isi enadayao mamohoi, abo se miahai boeada eai; na se pesagabaeda arinai i masaraha isi nige enadayao. ²⁰ Na omi Tau Tabuna i heyausimiuo, ginauri gamagaridi au italobaidi. ²¹ Enamiu ea uri ina, nige paana mamohoina au hekau, na paana au italobai, eo emi italobai eai au nuatui, taba nige riba borabora esau mamohoina arinai i laoma. ²² Eai tauborabora, hede ia tauhalele bena Iesu ia Kerisona ede? Teina Keriso-tauialaina ede, ia wa Tamana eo Natuna tauhaleledi. ²³ Eai to eai Natuna i halelei, ia Tamana nige i abi. Ia wa Natuna i ribahemasaraha ia Tamana i abiyao hinage. ²⁴ Na omi riba bagubaguna eai au ataiei wa, besi taba boeamiu eai i miatahitahi, abo omi hinage Natuna boeana eai au miatahitahi, eo Tamana boeana eai

* **2:18:** anti-christ.

hinage. ²⁵ Ribahesunuma arinai i ribahesunumaeda ede ina: mauri nige nosina.

²⁶ Riba ta ea uriyawa headi debadi eai, ata se woeaponorimiu; ²⁷ na omi heyausina ia arinai aue abi, iaede i otahai arimiu eai, omi taba nige au italau esau arinai bena i heatamiu, ia ena heyaheyausi ginauri gamagaridi i heaheatamiu ede, lauheata mamohoina, nige boraborana, i heatamiu wa iaede au miatahitahini, ia boeana eai. (Io. 14.26.)

²⁸ Abotai, merumeru gagirimiu e, ia boeana eai bena au miatahitahi, arinai ena i taumasarahama, abo nuada se adidiri, taba nige ta mae ia matana eai, ena laoma eai. ²⁹ Ena au nuatui ia laulau-dudurai tauna, au nuatui hinage aidobudi laulau-dudurai se ginauri, ia arinai ede se labasidima.

3

¹ Hage au ita, gadosisi sahasahaina arinai Tamada i ainuiuida, bena ita abo esada se atai Eaubada nanatunayao; iaede hinage, ita ede. Matapaana ede ina tanoubu ta nige i nuatuida, paana ia hinage nige i nuatui. ² Egu nuanuai e, ita Eaubada nanatunayao ina; maraitom-asubena ada ao saha sora nige i masaraha. Ta nuatuiyao sora huia ne ia i taumasaraha, ita abo doha ia, paana ana ao mamohoina eai ia abo ta ita. ³ Tau esa eo esa ina sunuma ta ie abi, abo iabom i heauioi, doha ia wa ie aa.

⁴ Esa eo esa baaea i hetubu, ia laugagaao i utuututusi hinage; baaea ede laugagaao utuutusina. ⁵ Au nuatui, ia i taumasaraha baaea bena i lahesuaradi, eo ia wa arinai nige baaeana. ⁶ Eai to eai ia i miatahitahini, taba nige baaea i ginauri; baaea tau-abiabina ia wa nige ie ita, eo nige abina ie ata. ⁷ Merumeru gagirimiu e, tabu tau esau i woeaponorimiu. Laulau-dudurai tau-abina ia tau dudurai ede, doha ia wa (*Keriso*) i dudurai. ⁸ Baaea tau-abina ia diabololo enana; paana diabololo baaea i abiabini, bagubaguna eai i laoma e wau ta. Teina hesabana ede Eaubada Natuna i taumasaraha, bena diabololo ena paipaisoa i hetatagorigoridi. ⁹ Eai to eai Eaubada arinai se labasi, ia baaea nige i hetuhetubu, paana Eaubada arinai se labasi, ia taba nige i abibaaea. ¹⁰ Eaubada nanatunayao eo diabololo nanatunayao aba-italobaidi ina: eai to eai ena laulau nige se dudurai, ia nige Eaubada enana, eo eai ena tau nige i gadosisie, ia hinage nige'e.

¹¹ Paana ribana bagubagunana eai au ataiei wa, ede ina, ita bena ta hai-gadosisiuioida, ¹² nige doha Kaina, ia taubaaea wa enana, to ena tau i eatu'unui. Na paana saha i eatu'unui? Paana ia ena laulau se baaea, na ena tau ena laulau se dudurai. ¹³ Egu tataoyao e, tabu aruamiu se loi, ena tanoubu i

hewaiunuemi. ¹⁴ Ta nuatuiyao ita mate eai ta lusoramao, ta lageo mauri boeana eai, paana eda tataoyao ta gadosisiedi. Esau ena nige i gadosisi, ia sorana mate boeana eai. ¹⁵ Eai to eai ena tau i hewaiunuei, ia tau-aiunu, na au nuatui taba nige mauri nige nosina i ota tau-aiunu boeana eai. ¹⁶ Gadosisi eda aba-italobaina ina, hede ia ena mauri i torehebiga wa ita debada eai: ita hinage bena eda mauri ta torehebiga eda tataoyao debadi eai. ¹⁷ Ena tau esau tanoubu ta gogona ie abi, ena doge ie ita ie deha, na ena nuatoatoa i nuahi, edohana abo ta ene Eaubada ena gadosisi ia boeana eai ie ota? ¹⁸ Merumeru gagirimiu e, tabu ribariba eai mo ta gadosisi, tabu memenada eai mo, na eda laulau eai ta gadosisi mamohoi.

¹⁹ Teina arinai abo ta nuatulobaiuioida, ita mamohoina enanayao, eo nuada ta headidiridi ia matana eai, ²⁰ ena nuada se hegiruda; paana Eaubada i sae ariri nuada i saetawatawaidi, eo ia ginauri gamagaridi abidi ie ata. ²¹ Egu nuanuai e, ena nuada nige se hegiruda abo Eaubada arinai ta nuaadidiri; ²² bena saha eo saha ta aibodai, ia arinai abo ta abi, paana ena laugagaeo ta sogohidi eo eda laulau eai ia nuana ta helolo. ²³ Ena laugagaeo wa ede ina, bena ia Natuna Iesu Keriso esana ta awamamohoei, eo ita esau, esau, ta haigadosisiuioida, doha laugagaeona i leama. ²⁴ Isi gamagaridi ena laugagaeo tausogohina ia boeana eai se miatahitahi, ia hinage isi boeadi eai i mia. Teina arinai ta nuatui, ia boeada eai i miatahitahi, Earua debana eai wa, iaede i leama arida eai.

4

Lauheata borabora eda aba-italobaina, eo ribahesana-puena.

¹ Nuanuai tataomiu e, tabu earua gamagaridi au ataatailau aridi eai, na hage earua au lauitadi, Eaubada arinai se laoma e nige'e; paana peroveta borabora se gamagari tanoubu eai se dadadadausi. ² Eaubada Earuana emi aba-italobaina ede ina: aitea earua i ribahemasaraha i ene Iesu Keriso bulumana eai i laomao, ia ede Eaubada enana, ³ eo aitea earua Iesu nige i ribahemasaraha, ia nige Eaubada enana. Teina Keriso-tauialaina earuana, wasana au ataiei abo i laoma, na omi-hede i laomao tanoubu eai ta. ⁴ Merumeru gagirimiu e, omi Eaubada enanayao ede, isi au saepoidio; paana ia boeamiu eai wa i sae-ariri ede, tanoubu boeana eai tauna i saetawatawa-aririei. ⁵ Isi wa tanoubu ta enanayao, arinai ede enana se ribaribaei, eo edi riba tanoubu abo se ataiei. ⁶ Ita Eaubada enanayao. Eai to eai Eaubada abina i ata, ia abo eda riba i ataiei. Teina arinai mamohoina earuana eo ponorina earuana, ta italobaidi.

⁷ Nuanuai tataomiu e, bena ta hai-gadosisiuioida; paana gadosisi Eaubada arinai i laoma. Esa to esa i gadosisi, ia taulabaina ede Eaubada, eo ia Eaubada abina i ata. ⁸ Ena esau nige i gadosisi, ia nige Eaubada abina i ata; paana Eaubada gadosisi ede. ⁹ Teina arinai Eaubada ena gadosisi se hemasaraha boeada eai, hede Eaubada Natu-esegana i hetamariama tanoubu eai, ia debana eai ita bena ta mauri. ¹⁰ Gadosisi ede ina, nige ita Eaubada ta gadosisie, na ia i gadosisieda, to Natuna i hetamari eda baeae maisadi tau-abina. ¹¹ Nuanuai tataomiu e, ena Eaubada doha ina i gadosisieda, i lolo ita hinage, esau to esau, ta hai-gadosisiuioida. ¹² Nige huia esa, tau esa Eaubada ie ita; ena ta hai-gadosisiuioida Eaubada boeada eai i miamia, eo ena gadosisi ita boeada eai abo i tubu mamohoi.

¹³ Teina arinai ta nuatui ita boeana eai ta miatahitahi, ia boeada eai hinage, paana iabom Earuana tupona i leamao. ¹⁴ Ita ta itayao, ita tau-ribaribaena, Tamana Natuna i hetamariama ede, bena ia tanoubu Tauhemaurina. ¹⁵ Eai to eai i ribahemasaraha i ene Iesu ia Eaubada Natuna, Eaubada i miatahitahini ede, ia hinage Eaubada arinai i miatahitahi. ¹⁶ Eaubada ena gadosisi arida eai ita abina ta atao, eo ta awamamohoieiyao. Eaubada gadosisi ede, ena esau gadosisi boeana eai i miamia, ia Eaubada boeana eai hinage i miamia, eo Eaubada ia boeana eai i miamia. ¹⁷ Teina arinai gadosisi ena helolo-dumaduma abo i abi arida eai, bena hedudurai asubenana eai ita abo ta nuakipikipi; paana ia tanoubu eai ana ao wa, hinage ita ada ao meta. ¹⁸ Gadosisi eai nige matausina, na gadosisi mamohoi matausi abo i aiduiei. Paana maisa debana eai ta matausi, eai i matausi ia nige gadosisi eai se helolo-dumadumai. ¹⁹ Ita ta gadosisi, paana ia i gadosisi-bagunaeda. ²⁰ Ena tau esau i ene, "Eaubada ea gadosisie," na ena tau i hewaiunuei, ia tauborabora; ena tau i itayao wa ena nige i gadosisie, Eaubada nige ie ita edohana abo i gadosisie? ²¹ Na laugagaeo ede ina, ia arinai ta aabi: esau Eaubada i gadosisie, ena tau abo i gadosisie hinage.

5

Tanoubu eai ginauri gamagaridi aba-saepoidi ede sunuma.

¹ Eai to eai Iesu i sunumaei i ene ia Kerisona ede, Eaubada ia taulabaina ede, eo eai to eai taulabaina i gadosisisei, natuna i labai wa abo i gadosisie. ² Teina arinai ta nuatui Eaubada nanatunayao ta gadosisiedi, ena Eaubada ta gadosisie eo ena ribahesom ta abiabiwataidi. ³ Paana Eaubada gadosisina ede ina, bena ena ribahesom ta sogohidi. Ena riba wa nige se porohe. ⁴ Saha eo saha Eaubada arinai se labai, tanoubu ta abo i saepoi; na saesaepoina ede ina, arinai tanoubu ta

saetawatawai, iaede eda sunuma. ⁵ Eai tanoubu ta i saepoi, na ia wa Iesu i awamamohoiei enaba ia Eaubada Natuna, wa?

⁶ Ia ede ena aba-laoma goila eo osina eai wa, Iesu Keriso; nige goila eai mo, na goila eo osina eai. ⁷ Earua ia tautitana ede, paana Earua ede mamohoina. ⁸ Tautitana wa haiona, Earua, eo goila, eo osina; taudi haiona edi riba se lau esega. ⁹ Ena ta nonoha tatao tautitana edi riba ta awaabiedi, Eaubada ena itaita ribana mo i sae ariri; ena itaita ribana ede iabom Natuna i ribahemasaraha. ¹⁰ Ia wa Eaubada Natuna tausunumaena, iabom nuana eai italobaina i abiyao. Ia wa Eaubada ena riba nige i awamamohoiei, Eaubada i awataub-oraboraei, paana Eaubada Natuna enana i ribamaodai wa, nige i awamamohoiei. ¹¹ Ribana wa ede ina, Eaubada mauri nige nosina i leamao arida eai; eo maurina ede ia Natuna boeana eai. ¹² Esau ia Natuna ie abi, mauri ie abi; ia Eaubada Natuna nige i abi, mauri nige i abi.

¹³ Teina ginauridi ta ea uridiwa, bena au nuatulobai mauri nige nosina au abiyao, omi wa Eaubada Natuna esana tausunusunumaena. ¹⁴ Ita abo nuada se adidiri ia matana eai, bena saha eo saha ta aibodaidi, ia nuana ena i lauwatai, abo i ataieda. ¹⁵ Ena ta nuatui saha eo saha eda aiboda eai i ataieda, ta nuatui hinage ginauri ta awanoridi wa, ta abidio. ¹⁶ Ena taba tau esau ena doge ie ita, baeae i abiabini (baeae, na nige doha i sinibui ariri mate ena tupo eai) taba i aiboda, na Eaubada tau wa ena mauri abo i moseuioi — riba ta isi enadi wa nige baeae se abi i lau e mate. Baeae esau iaede tau i woeai mate eai; teina doha nige ea ribaribaei bena enana se aiboda. ¹⁷ Laulau gamagamagari nige se dudurai, isi ede baeae, na baeae headi sigadi nige mate.

¹⁸ Ta nuatui, eai to eai Eaubada ia i labai, taba nige baeae eai i laulau, na Eaubada ia abo i abididini, eo taubaeae wa taba nige i abilau arinai.

¹⁹ Ta nuatui, ita Eaubada enanayao, na tanoubu ta maudojna ede taubaeae nimana eai.

²⁰ Ta nuatui hinage, Eaubada Natuna i laoma, nuada i hemasarahadio, arinai ia tau mamohoina wa abina ta atao; tau mamohoina wa boeana eai ta laulau, iaede Natuna Iesu Keriso. Eaubada mamohoina ia ede ina, eo mauri nige nosina. ²¹ Merumeru gagirimi e, oitau aridi eai au nuahiuiomiu. Amen.

IOANE ENA URIURI HELABUINA

Keriso miamiana eai mamohoina eo gadosisi, se laulabulabui.

¹ Eau ami taubaguna wa, Sinebada, Eaubada ena hinehineri sinena, ma-nanatanayao, enadi ina, isi ede ea gadosisi-mamohoiEDI, eaubom mo nige'e, na mamohoina tauitalobaina gamagaridi hinage, ² mamohoina debana eai ea uriuri, iaede boeada eai wa eo maedayao abo i mia i lau e nige nosina:

³ Ainauia, nuatoatoa, loni, abo maeda se ota, Eaubada Tamana arinai se laoma, eo Iesu Keriso, Tamana wa Natuna, mamohoina eai eo gadosisina eai.

⁴ Ea kode ariariri paana nanatumyao headi ea lobaidi, riba mamohoina dobilana eai se laulau, doha laugagaeona Tamada arinai ta abiyao. ⁵ Ea awanorim, Sinebada e, nige doha laugagaeo harihariuna esau ea uriyawa, na iaede bagubaguna eai ta aabi wa, bena ita ta hai-gadosisiuioida. ⁶ Gadosisi ede ina, bena ia ena laugagaeo ta laulauwataidi; laugagaeona wa, iaede bagubagunana eai au ataiei, ede gadosisi eai bena au laulau. ⁷ Paana tataoborabora gamagaridi tanoubu eai ta se tautausi, isi Keriso ena laoma bulumana eai nige se awamamohoiEI. Tau doha ina ia tauborabora, eo Keriso-tauijalaina. ⁸ Au itakomakomanimiu, ginauri wa arimiu eai ai hetubudi ema paipaisoa eai tabu se tauyamui, bena ainauiana maudoina abo au abi. ⁹ Eai to eai Keriso ena lauheata eai nige i miatahitahi, na i torohai-gabaei, ia Eaubada nige i abi; ia lauheata boeana eai i laulau, ia ede Tamana eo Natuna i abi-labuiedi. ¹⁰ Ena esau i laowa arim eai bena lauheata udoi i leawa, teina ta nige'e, ia tabu u oiyami em numaalona eai, tabu u aitoiei; ¹¹ paana tau-lautoiena ana paisoa baaea ede i abi-sagui.

¹² Egu riba taba ea uridiwa se gamagari ariri, ia mo nige ea henua *ink* eo *pen* eai ea uridi, na ea sunusunumaei abo ea laowa, eau matam eai oa matagu eai abo ta ribariba, eda kode abo ta hemamohoiEI.

¹³ Em dogA, Eaubada ena hinehineri sinena wa, nanatanayao se lautoiem ina. Amen.

IOANE ENA URIURI HEHAIONANA

Ehana ena lautoi, eo abi-ponori, abi-lolo, itasipoina eo ribahesanapuena.

¹ Am taubaguna wa, Gaia enana ea uriuri, ia se gadosisie i wa, eau hinage ea gadosisie, mamohoina boeana eai.

² Egu nuanuai tauna e, uura eai ea aiboda bena ginauri gamagaridi arim eai se lau lolo, eo bena taum se adidiri gonogonoana doha earuam i adidiri. ³ Huia ne eda tataoyao wa se laoma arigu eai se wasawasaem oa mamohoina eai u laulau, ea kode ariariri. ⁴ Nige egu kode esau i lai doha ina kode ta, ena wasa ea ataiei nanatuguyao mamohoina se laulauwatai.

⁵ Egu nuanuai e, paisoa saesaena u ginaginauri ena eda tataoyao u heyaiedi, eo headi u hekaudi taiede u saguidi mo. ⁶⁻⁷ Isi ede em gadosisi se wasawasaem ekalesia matadi eai. Em abi se lolo edi adau eai u healatudi, doha Eaubada ena heaheari paisoa se abi, heasisina. ⁸ I lolo tatao doha ina ta saguidi, paana heledi tatao paisoa ita, mamohoina boeana eai.

⁹ Doha ina ea uuri ekalesia aridi eai; na Diatorepe, ia i henua iabom i ribatausaeuioi, egu tanutanuaga eai nige i awaabiegu. ¹⁰ Sora ena ea laowa abo ena paipaisoa ea hemasaraha, ribariba baaea arinai i alaliuliuaigu. Temeta nige anasiga, eda tataoyao headi taba nige i oiyamidi eo headi se henua bena se hailobaidi i guduguidi eo ekalesia boeadi eai i aiduedi.

¹¹ Egu nuanuai e, tabu baaea u heaheawatotoei, na lolo mo. Esau lolo i ginauri, ia Eaubada enana; esau baaea i ginauri, ia Eaubada nige i ita. ¹² Demeterio iilana tatao gamagaridi se itayao, ena abilolo se ribaribaei mamohoina eai ena laulau se masaraha; eau hinage ia ea ribahemasaraha, na omi au nuatuiyao egu riba ede riba mamohoi.

¹³ Ginauri se gamagari ariri bena ea uridiwa, na nige ea henua *ink* eo *pen* eai ea uridi; ¹⁴ egu sunusunuma ede nige baeiona abo ea itam, eau matam eai oa matagu eai, abo ta oiriba.

¹⁵ Loni bena arim eai. Ehamyao se lautoiem. Ehaguyao ea lautoiedi, esau esau, esadi u ataidi. Amen.

IUDE ENA URIURI

Sunuma mamohoina enana ta ialai, eo lauheata udoi ribah-esanapuena.

¹ Iude Iesu Keriso ena heaheari tauna eo Iamesi ena tau mamohoi, isi se eogahaidi wa enadi ina, isi wa Tamada i gadosisiedi eo se goraidi Iesu Keriso enana:

² Nuatoatoa bena enamiu, loni eo gadosisi bena se helaiyawa hinage.

³ Egu nuanuai e, nuagu i gigibori ariri bena enamiu ea uri, eda mauri esega, omi eo ai, ribana iaede i duduigu bena ea uri ea aibodaimiu eda sunuma ta enana au iala adidiri, sunumana iaede se mose-esegai wa, hetabu tataodi aridi eai. ⁴ Paana tatao headi boeada eai se lusora-eamuyamuima, beabeana eai giru lailai ta se abiyao, isi Eaubada tau-mi-amurimuriena, eda Guiau ainaiuana se tore-bui i hemala matamataye'o, eo tanuagada esega dumaduma eda Guiau Iesu Keriso se halelei.

⁵ Ina ea henua bena ginauri headi ea henuaisinidiwa, ginauri ta abidi au atao beabeana, iaede Guiau ena tataoyao Aigupito eai i hemauidio, abotai murina eai headi i unuidi paana ia nige se ataiwatai. ⁶ Aneru headi hinage, nige edi teha eai se miahai na edi abamia mamohoi se laugabaei, ia i paidi, auaudi se otahai i lau e nige nosina, i lau e hedudurai asubenana saesaena eai. ⁷ Doha Sodoma eo Gomora eo eanua headi gegesidi eai edi laulau, se moseuioidi enoeno-biri arinai, eo buluma dobilana se bui se abiudoiei, isi se hemala eda tautau, maisadi oeagi alaalasi se hearo, nige anasiga.

⁸ Hinage doha edi enoenosuai eai bulumana se hebii, tanuaga se isugaraedi, ginauri lolodi, saesaedi, se alaliuluiaidi. ⁹ Na Mikaela, aneru saesae-aririna, maena diabololo Mose sinarena se haiabiei wa, ia nige gonoana bena riba adiadidiri arinai i lauhegiru, arinai i ene, "Guiiau i ribasuuim." ¹⁰ Na ina tatao ta ginauri nige abidi se ata na se riba-siosiololoedi, na ginauri headi se nuatuidi se lolo, doha suisui nige nuadi ia mo ginauri headi se nuatuidi se lolo, isi ede aridi eai abo se hebaaeauioidi. ¹¹ Ahani isi! Kaina ena dobila eai se laulau, se gado gogo to Balama ena ponori arinai se gabauioidi, eo Koraha ena oipiri arinai se mate. (Num. 22.24; 26.) ¹² Ina tatao ta doha masi baaeana, maemiuyao au heyaugogo emi gadosisi-mataasina huiadi eai, isibom mo se heaheaiuioidi, nige se matausi; isi doha eada nige goiladi mana se arulaedi; isi oeagi ma-lugu-wowowoeadi, taba nige se ua, se matearirio, malabui lamdi eai se laahaidio; ¹³ doha gabogabo eai butubutu

lailaidi, se butubutu, taumaeamaeadi se hepupurosaedi; ipora tatatausidi isi, amuamumu eo masigiri teha ubu eai abo enadi, i lau nige nosina.

¹⁴ Isi Enoka i riba-perovetaidi, ia Adamu eai i laoma isina hehaligigi-labuina wa, i ene, “Au ita, Guiau i laoma maena hetabu-tataoyao, tausani saudoudoidi hisa, ¹⁵ ena hedudurai bena i hepaisoaei tatao gamagaridi aridi eai, Eaubada tau-miamurimuriena edi miasuara paisoadi gamagaridi bena i hetaladi, iaede isi Eaubada nige se nuatui wa se abiabini, eo riba oioiuradi gamagaridi arinai tatao baaea, Eaubada nige se nanabuei, ia se riba-baaeai. ¹⁶ Isi tau-monunu, tauawaawayagara, isibom edi lelehi eai tau-laulau, awadi se lai ariri se riba-pasipasi, tatao mo se hebihebigadi, isibom bena edi abahelolouioidi.

¹⁷ Na omi mo, egu nuanuai e, eda Guiau ena aposotolo edi ribahesanapu bena au henuhenuaisinidi; ¹⁸ se riba arimiu eai wa si ene, “Huia murimurita eai tauisuisugara abo se laoma, Eubada abo se toro-murimuriei isibom edi lelehi gaibu eai se laulau.” ¹⁹ Isi ede tatao abo se abiabihineridi, tanoubu ta tataodi, Earua nige se abi. ²⁰ Na omi, egu nuanuai e, emi sunuma hetabu-aririna eai ta, au headidiriuiomiu; Earua Tabuna boeana eai au laulau-uura; ²¹ au taididiniuiomiu Eaubada ena gadosisi boeana eai; Guiau Iesu Keriso ena nuatoatoa au eooi, mauri nige nosina dobilana ede. ²² Headi sora ma-nualabulabuidi, se nuatoatoa au saguidi se italobai mamohoi; ²³ headi au abihemauridi, doha oeagi alaalasi boeana eai au girihaidi; headi au nuatoatoaidi ma-matausimiu, ata bena adi lulu mo na paana buluma laulauna eai se hebiidio arinai au hewaiunuei mo.

²⁴ Ia wa abina i ata i abididinimiu taba nige au beu, eo iabom namanamarina nuanuana eai i abihetoromiu nige emi baaea, eo ma-kodeariaririmiu, ²⁵ Eaubada tahunuana Tauhemaurida, Iesu Keriso eda Guiau debana eai, enana se moseyao wasawasana, tanutanuagana-maudoina, eo gigiborina, beabea-aririna eai eo huiana sora, eo abo-ina ta, eo i lau e nige nosina. Amen.

HEMASARAHANA IOANE ARINAI

¹ Eaubada ena hemasaraha i mosei Iesu Keriso arinai, bena ginauri sora abo se tubu ena heaheari tataodi i heitadi, ena aneru i hetamari, arinai i hemasaraha ena heaheari tauna Ioane arinai. ² Ia Eaubada ena riba i hemasarahaei, eo Iesu Keriso aba-italobaina ribana, eo ginauri gamagaridi ie itadi wa. ³ Kausara ia, riba-peroveta ta tauhasirina, eo tauataiena, eo ginauri se uridi ta tausogohina; paana huiana i hanahanauma ede.

⁴ Ioane i uriuri ta, Ekalesia bodadi Asia eai, dubu haligigi-labui enadi:

Ainauia bena enamiu, eo loni ia arinai i laoma, ia wau-ta ede, eo beabeana eai ia ede, eo maraitom-asubena eai abo ia ede, eo earua haligigi-labui aridi eai i laoma, isi ede ena terona matana eai se totoro, ⁵ eo Iesu Keriso arinai i laoma, ia * tauriba torotahitahina ede, eo mate eai tautorouio baguna, tanoubu ta edi wasawasa ia tanuagadi ede.

Ia taugadosisieda wa, eda baeea eai i iarihaida iabom osinana eai ⁶ eo i hetoroda ena basileia, ena kohena tataoda, Eaubada, Tamana wa, ia enanayao, namanamarina ia enana eo iabom tanuaga, i lau e ana huia ana tasi. Amen. ⁷ Hage au ita, eada boeana eai abo i laolaoma, tatao gamagamagari abo se ita, eo isi gamagaridi hinage ia taugorina wa, eo tanoubu ta bodadi gamagaridi abo se doudou ia debana eai. Hedeona. Amen.

⁸ “Eau † Alepa eo Omega, hetuhetubuna eo helahelautomna,” Guiau Eaubada ena riba ina, ia wau-ta wa ede, eo huia beabeana eai ede, eo maraitom-asubena abo i laoma ede, Taugigiborina maudoudoina wa.

⁹ Eau emi tau wa, Ioane, heamamna boeana eai ami sagu esau eau, eo Iesu Keriso basileiana boeana eai hinage, eo taubigana eai eau maemiuyao. Bonabonarua esana Patamosa eai ea mimia, nei eai Eaubada ena riba debana eai se paigu, eo Iesu Keriso ribaribaena debana eai. ¹⁰ Guiau ena asubena eai eau Earuana eai, dagelagu eai arina lailai ea ataiei, doha bogigi arinana, ¹¹ i ene, “Eau Alepa eo Omega, bagubagunana eo murimurita-aririna, saha u ita bena u uri buka eai, eo u hetamari dubu haligigi-labui aridi eai, isi ede Asia eai: Epeso eai, eo Semurina eai, eo Pegamosa eai, eo Taiatara eai, eo Sadis eai, eo Piladelepia eai, eo Laodisia eai.”

¹² Na ea sinibui wau arina wa i ribalaoma wa, bena ea ita. Ma-sinisinibuigu na lamepa aba-toredi *gold*, haligigi-labui ea

* 1:5: Witness. † 1:8: Arina Heleni eai Ieta bagubagunana eo murimurita-aririna esadi.

itadi, ¹³ boeadi eai esau doha Tau-Natuna, ana lulu i lui i dobi aena eai, eo nuapouna eai ena auduaduari *gold*. ¹⁴ Uruna eo uruna maiawana se posiposi ariri doha mamoe wuiana posiposina, ie posi doha † sinou; matana doha oeagi i ala-bale-balelem, ¹⁵ aena doha *brass* se wosa henamanamari, doha oeagi alaalasi eai se heaa, eo arinana daguguna doha goila gamagamagari se dididi dagugudi; ¹⁶ nima-tutuna eai ipora haligigi-labui i abiabididinidi, awana eai elepa-aiaiunu mata labulabuina, eo matana ana ao doha mahana ma-adidirina i sinasina.

¹⁷ Huia ne ea ita, ma-esega aena eai ea gurisalaoba, doha tau ie mate, abo nimana i hetaru potagu eai, i ene, “Tabu u matausi, eau bagubagunana wa, eo murimurita-aririna, ¹⁸ eo maumaurina wa; ea mamate, na u itagu ta ea mauri i lau e nige nosina, Mate eo Hade ki-na ede eau nimagu eai. ¹⁹ Arinai teina ginauridi u itadi ta, u uridi, ginauri se tubuo ede, eo ginauri sora abo se tubu, maraitom-asubena eai. ²⁰ Ipora haligigi-labui nimatutugu eai ue ita wa, eo lamepa abatorena *gold* haligigi-labui wa, aniodi eamuyamuidi ede: ipora haligigi-labui isi ede aneru, ekalesia dubudi haligigi-labui anerudi, eo lamepa abatorena haligigi-labui, isi wau dubu haligigi-labui ede.

2

Ekalesia bodadi haligigi-labui, esau, esau, edi ribahasa-hasa.

¹ “Epeso edi dubu aneruna enana u uri: ‘Ia nimatutuna eai ipora haligigi-labui i abiabididinidi wa, eo lamepa abatorena haligigi-labui boeadi eai i laulau wa, ena riba ede.

² “ ‘Em paipaisoa abidi ea atao, em hesahesaba eo em taubiga, eo nige ue eari tatao baaea aridi eai, eo isi wa se ribaeuioidi aposotolo, ia mo nige’e, u lauitadi mo eo edi borabora u italobaidi; ³ ea nuatuim u taubiga, porohe u bahebahei eau esagu debana eai, eo nige u tausiololo. ⁴ Na teina mo arinai ea hegirum, em gadosisi bagubagunana u laugabaeyao. ⁵ Arinai bena u nuatui, em abatoro beabeana wa arinai ue beu wa, u henuaisini, eo u nuabuiei, eo am paisoa bagubagunadi u abiuioidi. Ata ea laowa arim eai abo em lamepa ena abatoro eai ea abihesuara, ena nige u nuabui. ⁶ Taiede, teina hinage u abiyao, Nikolai tataodi edi paipaisoa u hewaiunuedi, doha eau hinage ea hewaiunuedi. ⁷ Ia beana eai bena i ataiei, taba hinage i ataiei, Earua ena riba saha, ekalesia aridi eai. Ia tau-saepoi, ia mauri oeagina eai abo ana ea mosei i ai, iaede Eaubada ena paradaiso boeana eai.’

† 1:14: English: snow.

⁸ “Eo dubu Sumerina eai aneruna enana u uri: ‘Teina ginauridi ta tau-bagubagunana to tau-murimuritaaririna i ribaedi, ia ie mate wa eo i mauriuio.

⁹ “ ‘Em amamna eo em gogogesagesa abidi ea atao (ia mo gogo tataomiu omi) eo edi ribaribahebaaeam, isi tau-awaludea ia mo isi Iudea nige’e, na Satani ena sunago tataodi wa. ¹⁰ Heamamna sora abo au hearodi, tabu au matausi. Abo au ita, diabolom omi heamiu abo i gabalaemiu numa-masigiri eai bena se lautamiu; eo amamna abo au hearo asubena saudoudoi. Nuamiu mo au tore-esegaidi i lau e mate eai, na eau abo mauri koronana ea leawa. ¹¹ Ia wa beana, besi i ataatai, saha wa Earua bena i ribaei ekalesia aridi eai. Ia tau-saepoi, mate helabuina wa ia taba nige i hebaaea.’

¹² “Eo dubu Pegamosa eai aneruna enana u uri: ‘Elepaaiaiuu matalabulabuina wa tau-abina ena riba ede.

¹³ “ ‘Em aba-mia ea itayao, nei eai Satani ena terona; esagu mo u abiabididini, na sunumagu u halehalelei, doha Anitipasi ena huia eai, ia enagu tau-ribariba lolona wa, omi boeamiu eai se unui, Satani ena abamiamia eai me. ¹⁴ Ginauri headi aridi eai ea hegirum: boeam eai headi Balama ena lauheata se laulauwatai, ia Balaka i heata arinai Isaraela nanatunayao i healabesibesidi, paana ginauri oitau aridi eai se heitalasamdi se aiaini, eo enoenobiri se laulauei. ¹⁵ Eo heamiu hinage au patulau Nikolai ena lauheata arinai. ¹⁶ Besi u nuabui. Ena nige’e, abo ea heulawa, elepa awagu eai wa arinai abo iala ea hetubu isi wa aridi eai. ¹⁷ Eai wa beana, hage i ataatai, Earua saha wa i ribaei ekalesia aridi eai. Tau-saepoi wa, abo *manna* eamuyamuina ana ea mosei, eo we’u posiposina abo ea mosei, we’u eai wa esana harihariuna abo se uri nige esau abina i ata, esa tauabina iabom mo.’

¹⁸ “Eo dubu Tiatara eai aneruna enana u uri: ‘Teina Eaubada Natuna ena riba, ia wa matana doha oeagi i alabalebalelem, eo aena doha *brass* se henamanamari.

¹⁹ “ ‘Em paipaisoa abidi ea atao, em gadosisi eo em sunuma, eo em heyai paisoa, eo em taubiga, eo am paisoa murimurita se sae ariri, am paisoa bagubagunadi wa se dioidi. ²⁰ Na teina mo arinai ea hegirum, sine wa, Iesebela, arinai ue eari, iabom i ribaeuioi sineperoveta na egu heaheari tataodi i boraboraidi eo laulau bii i heatadi, eo ginauri oitau aridi eai se heitalasamdi, i heatadi se aidi. ²¹ Ena huia ea moseyao bena i nuabui, na nige i henua ena matamataye’o aridi eai nuana i bui. ²² Au ita, aba-eno esau arinai ia abo ea gabalaei, amamnana lailaina, eo isi hinage maenayao tau-enoeno, ena sine ta ena paipaisoa aridi eai nige nuadi se buidi; ²³ eo ia nanatunayao abo ea unuhematedi. Eo ekalesia dubu gamagaridi eai abo se italobaigu, eau tatao nuadi eo earuadi

tau-eooyoidi ede, eo omi esau, esau, enamiu abo ea leawa maisamiu, ami paisoa debadi eai. ²⁴ Na omi hagahagamiu Tiatarā eai teina lauheata ta nige au abilau arinai, eo Satani ena ginauri eamuyamuidi nige abidi au ata, omi arimiu eai ea riba ea ene omi taba nige ea heporohemiu; ²⁵ teina mo, saha au lobaiyao wa bena au sogohididini i lau e egu huia laowa. ²⁶ Ia tusaepoi, eo agu paisoa tau-laelaena i lau e anasiga, ia abo ea hetoro basileia i tanugaedi, ²⁷ tue poasi arinai abo i tanugaedi doha gulewa tauginaurina ena gulewa se hetamogorugorudi, doha eau hinage gigiborina Tamagu arinai ea aabi. ²⁸ Eo ubona abo ea mosei. ²⁹ Eai wa beana, besi i ataatai, Earua saha wa i ribaei ekalesia aridi eai,

3

Ekalesia bodadi edi ribahasahasa.

¹ “Eo dubu Sadis eai aneruna enana u uri: ‘Eaubada earuana haligigi-labui eo ipora haligigi-labui tauabina wa, ena riba ede.

“ ‘Em paipaisoa abidi ea atao; esam doha oa taumauri, ia mo ue mate. ² U eno-toro, ginauri hisahisawaidi otadi arim eai u headidiridi, hanahanaudi wa abo se mate; paana nige paisoa esau arim eai ea lobai i lolo mamohoi egu Eaubada matana eai. ³ Huia bagubaguna eai saha ue abi wa, eo u ataiei, bena u henuaisini eo u sogohididini, eo u nuabui. Ena nige u siliata, abo ea lage arim eai doha tau-aiayahari, taba nige u nuatui aitea mahanana eai egu laowa abo i hearom. ⁴ Taiede esa headi arim eai, Sadis eai hisahisawaidi, isi adi lulu nige se hebiidi, isi abo maegu ai laulau, lulu posiposi abo se lui, paana isi ede se lolo. ⁵ Ia tusaepoi, ia abo doha ina lulu posiposi eai se helui, eo taba nige esana ea soegabaei mauri bukana eai; esana ea ribahemasaraha mo Tamagu arinai, eo ena aneru matadi eai. ⁶ Eai wa beana, taba i ataatai, Earua saha wa i ribaei ekalesia aridi eai.’

⁷ “Abo dubu Piladelepia eai aneruna enana u uri: ‘Tau tabuna ena riba, tau mamohoina wa eo Davida ena ki tauabina, ia wa ena i soe taba nige esau i guduuiioi, eo ena i gudu taba nige esau i soeuiioi.

⁸ “ ‘Em paipaisoa abidi ea atao. U ita, dohila soesoeaurina ea totore matam eai ta, nige tau esau abina i ata i gudu; ea nuatui gigibori enam begana mo, taiede egu riba u sogohididini, eo esagu nige u halelei. ⁹ U ita, isi Satani ena sunago tataodi, isi wa tau-awa-Iudea ia mo nige’e, se boraauridi — u ita, abo ea hetaladuidi se laoma aem eai se turibono, abo se italobai ea gadosisiem ede. ¹⁰ Paana egu riba u taubigaei eo u abididini, oa hinage abo ea abididini lauuta mahanana eai, iaede wa tanoubu maudoina abo se hearo, arinai abo

tanoubu taumiaina se lauitadi. ¹¹ Ea heuheulawa; saha u abiyao wa, temeta bena u abiabididini, tabu tau esau em korona i girihai. ¹² Ia tusaepoi, ia abo ea hetoro egu du esau, egu Eaubada ena dubu tabuna eai; taba nige i pesagabaeuioi, ia arinai egu Eaubada esana abo ea uri, eo egu Eaubada ena eanua lailai esana, Ierusalema harihariuna wa, galewa eai abo i dobima, eo egu Eaubada arinai wa, eo eaubogu esagu harihariuna abo ea mosei hinage. ¹³ Eai wa beana, besi i ataatai, Earua saha wa i ribaei ekalesia aridi eai.’

¹⁴ “Eo dubu Laodisia eai aneruna enana u uri: ‘Amen ena riba ina, tauribaribaei lolona wa, mamohoina, Eaubada, tauhetubu, nimana paipaisoana bagubagunana wa.

¹⁵ “ ‘Em paipaisoa abidi ea atao; oa nige u gogoma eo nige u gigibori. Adeli mo taba u gogoma, e u gigibori! ¹⁶ Na paana oa duaduari eai, nige u gogoma eo nige u gigibori, awagu eai abo ea gariso-gabaem. ¹⁷ Paana u ene, Eau monamonaune, egu gogo peina, eau nige saha ea dedeha! na nige u nuatui oa baabaeam ta, u nuatoatoa ariri, gogogesagesa mamohoi, matagibugibum eo ma-taukohakoham. ¹⁸ Arinai ea lauhasahasaim ta bena *gold* oeagi alaalasina eai se heaa, arigu eai u unei, arinai abo em gogo u lobai, eo lulu posiposi arinai se heluim abo em taukohakoha taumaeamaeana taba nige se ita, eo muramura arinai matam u heyausi, to u itaita. ¹⁹ Isi gamagaridi ea gadosisiedi, isi ede ea ribasuuidi eo ea pidiridi; arinai taba mo nuam se gigibori, u nuabui. ²⁰ Au ita, dobila guduna eai ea totoro, ea ipeipesi; ena tau esau arinagu i atai ei eo dobila i soeyama, abo ea awasae ia arinai, maena abo ai aiai, eo ia maegu. ²¹ Ia tusaepoi, ena tupo abo ea mosei abo maegu ai bawaesega egu terona eai, doha eau ina ea saepoiyao, eo ea bawao, ma-Tamagu, ena terona eai. ²² Ia wa beana, besi i ataatai, Earua saha wa i ribaei ekalesia aridi eai.’ ”

4

Ginauri sora abo se tubu, tautaudi.

¹ Murina eai abo ea iita, ne, galewa eai, dobila se soe! Arina bagubagunana wa daguguna doha bogigi, abo ea ataiuioi, i ribalaoma arigu eai i ene, “U saema inai, ginauri sora maraitom-asubena abo se tubu abo ea heitam.” ² Maesega eau Earua boeana eai, na ne, terona matagu eai, galewa eai se hetoro, eo esau terona eai wa i babawa! ³ Taubawaina ana ao doha we’u namanamarina esana Iaspa wa, eo konelian, eo wari terona wa i hetaiiri, itaitana doha we’u alaalawa emero ana ao. ⁴ Eo terona headi tau-esega-i-mate-hasi wau terona bagubagunana wa se totoro-hetaiiri, potadi eai

babada tataodi tau-esega-i-mate-hasi se babawa, lulu posi-posi se luidi, eo urudi eai korona *gold*.⁵ Wau terona eai wa namanamari eo arina dagudagugudi, eo palepalele se laolaoma, terona wa matana eai lamepa haligigi labui se alaala, isi ede Eaubada earuana haligigi labui;⁶ eo terona matana eai doha gabogabo daudaumorina, doha galasi, i namanamari eo i nega ariri.

Eo ginauri maumauridi hasi, terona se tau-hetaiiri, matadi se gamagari, matadi eai eo gedugedudi eai:⁷ ginauri mau-maurina bagubagunana ana ao doha liona, helabuina ana ao doha bulumakau natuna, hehaionana matana doha tau, eo hehasina doha magisubu lailaina i loiloi.⁸ Wau ginauri maumauridi hasi wa, esa eo esa, mabena haligigi-esega, matadi se gamagari ariri, tupo gamagaridi eai eo boead i eai, nige se aiyawasi, asubena to maiona se wanawana,

“Tabuna, tabuna, tabuna, iaede Guiau Eaubada gigibori-aririna, ia beabeana eai wa, eo wau-ta ia ede, eo maraitom-asubena abo i laoma!”

⁹ Abotai ginauri maumauridi ia terona eai taubawa wa se ribatausaei, se aihelahui, se lautoiei, ia wa ma-maurina i lau e huia nige nosina.¹⁰ Babadayao tau-esega-i-mate-hasi abo se gurisalaoba, ia terona eai taubawa wa matana eai, tau i mauri wa i lau e huia nige nosina se aihelahui hinage, edi korona se gabadobeidi terona paana eai, se wawana,

¹¹ “U lolo ariri oa, ema Guiau eo ema Eaubada, hedebasae, wasa lolo, gigibori, enam u abidi, paana ginauri gamagaridi oa tauhetubudi ede, em nuatu eai mo se tubu, eo se ginauridi.”

5

Buka aba-guduyahisina haligigi-labui.

¹ Abotai ia terona eai ie bawa wa nimatutuna eai buka ea iita, aloalona eai eo murimurina eai se uri, eo se gudu, aba-gududi haligigi-labui arinai se gudueahisi;² eo aneru adiadidirina ea ita, arinana lailaina eai i ribahemasaraha i ene, “Eai ena lolo gonoana buka ta i ala, eo aba-guduna i soedi?”³ Na nige esau galewa eai e tanoubu eai, e tanoubu ubuna eai, abina i ata buka wa i soe, e i italau arinai.⁴ To ea dou ariri, paana nige esau se lobai ena lolo gonoana buka ta taba i soe, e i italau arinai.⁵ Abo wau tautaubada wa, esau i ribalaoma arigu eai i ene, “Tabu u dou, ne, liona wa Iuda ena bogao enana wa, Davida Lamna, ia ginauri gamagaridi i saepoidio, ia abo gonoana buka i soe, aba-gudueahisina haligigi-labui hinage.”

⁶ Abo terona eo ginauri maumauridi hasi wa duaduaridi eai, eo wau babada wa boead i eai, Mamoe ea iita i totoro, ana

ao doha ia se unuhemateo, donana haligigi-labui, matana haligigi-labui isi ede Eaubada earuana haligigi-labui, iaede i hetahetamaridi tanoubu tupo gamagari. ⁷ Ie lau buka wa ie abi, ia wa terona eai i babawa wa, nimatutuna eai ie abi. ⁸ Buka wa ie abi, abo ginauri maumauridi hasi wa, eo babadayao tau-esega-i-mate-hasi, se gurisalaoba Mamoe matana eai, esau, esau nimana eai * huelele, eo gulewa *gold*, alodi eai muramura panepane se gabu heasuasu, iaede hetabu tataodi edi uura; ⁹ eo wana harihariuna se wanai si ene, “Oabom lolom gonoana buka ne u abilau, eo abaguduna u soedi,

paana oa ede se unuimo, eo osinam eai tatao u unehaidi Eaubada enana,

hari boga, eo hari arina, eo hari tatao, eo hari basileia, eo u heterodi eda Eaubada ena basileia eo ena kohena, ¹⁰ eo tanoubu eai ta isi abo tanuaga.”

¹¹ Ea italau, eo arina ea ataiei, doha aneru gamagamagari arinadi, terona se hetaiiri, eo ginauri maumauridi wa, eo babadayao. Se hasiridi gamagarina tausani-saudoudoi se helai ma-tausani-saudoudoi, eo tausani se helai ma-tausani, ¹² arina lailai eai si ene, “Mamoe i lolo ariri, ia se unui wa, gonoana bena gigibori, eo gogo lailai, eo sonoga, eo adidiri, eo hedebasae, eo namanamari, eo nua-woiwoina i abi!” ¹³ Na ginauri gamagaridi se hetubudio, galewa eai eo tanoubu eai, eo tanoubu ubuna eai, eo gabogabo potana eai, eo ginauri gamagaridi se hetubudi gabogabo boeana eai hinage, edi riba ea ataiei si ene, “Ia terona eai i babawa, eo Mamoe arinai, bena nua-woiwoina eo hedebasae, eo namanamarina, eo awa-tanuagaena, i lau e nige nosina!” ¹⁴ Abo ginauri maumauridi hasi wa si ene, “Amen!” eo babadayao se gurisalaoba se aihelahui.

6

Buka wa aba-gududi se soedi, esau to esau.

¹ Hinage ea ita, Mamoe buka aba-guduna esega ie soe, na ginauri maumauridi hasi wa taudi esau ie riba, arinana doha palepalele, i ene, “U laoma!” ² Abo ea ita, hosi posiposina esau, taugeruina nimana eai pidu; korona se mosei to i pesa bena eanua i ialaidi eo iala eai ana waiunu i saepoidi.

³ Buka aba-guduna helebuina ie soe, abo wau ginauri maumauridi hasi wa, taudi helabuina ie riba, i ene, “U laoma!”

⁴ Abo hosi esau i pesama, i buiabuia lolo; taugeruina ana paisosa se mosei bena tanoubu eai loni i abihai i laehesuara, bena se haihai-unuuioidi; elepa lailaina ia se mosei.

* 5:8: English: harp.

⁵ Buka aba-guduna hehaionana ie soe, ginauri maumauridi taudi hehaionana arinana ea ataiei i ene, “U laoma!” Abo ea italau na ne, hosi dubadubana ea iita; taugeruina nimana eai aba-nonoi i bahebahei; ⁶ doha arina esau ea ataiei, ginauri maumauridi hasi wa boeadi eai i laoma, i ene, “Falawa nonoina esega maisana pene esega, bali nonoina haiona maisana pene esega, na eausi eo waina tabu au hebaaeadi!”

⁷ Abo buka aba-guduna hehasina ie soe, ginauri maumaurina hehasina arinana ea ataiei i ene, “U laoma!” ⁸ Abo ea italau na ne, hosi ana ao i baaea eo i eogeyoge, taugeruina esana ede Mate, dagelana eai Hade i hemuhemuriwatai; tanoubu se soi hehasi, lausoisoina esega se tore nimadi eai bena gigiboridi eai se tanuagaei, eo se aiunu, edi aba-aiunu ede alahia eai, eo huia guriam eai, eo asiebo heaheawadi eai, eo tanoubu ta suisuidi hemahemanabaradi eai.

⁹ Buka aba-guduna hehaligigina ie soe, abo abaaitalasam ubuna eai tatao earuadi ea itadi, isi gamagaridi wa Eaubada ena riba debana eai se unuidi, eo edi mauri se ribahemasarahaei debana eai; ¹⁰ arina lailai eai se dou si ene, “O Tanuagamai e, tabuna eo mamohoina, huiana ta’i i loha, abo nige u hekiraino osinamai debana eai, eo enamai u abigum tanoubu ta taumiana aridi eai?” ¹¹ Abo esau, esau, lulu posiposi se mosei, se heribadi sora huia kuukuuna se aiyawasi, i lau e heledi tauheaheari, eo headi sora abo se unuidi doha isi, edi huia se heohidi.

¹² Buka aba-guduna hehaligigi-esegana ie soe, ea italau na ne, moniinii lailaina i oitagu; mahana i lau i dubaduba doha lulu-baeki, nawalai i hemala doha osina, ¹³ eo galewa iporadi se taru-dobi tanoubu eai doha kuhou oegina eai kuhou idaidaidi se uru, taba mana lailai oeagi wa i oiluiluini; ¹⁴ galewa i tauyamui doha pepa-uriuri se nouhai se toreshuara, oea tupidi eo bonabonarua edi abatoro eai se oihesaralaedi hari tupo eai. ¹⁵ Abotai tanoubu wasawasadi gamagaridi, eo dodoga saesaedi, eo iala kapena bagubagunadi, eo gogo lailai tataodi, eo tatao adidiri, eo tau-auau eo tauiarihai tataodi, gamagaridi se bawayamui we’u duhadi eai eo oea-tupi we’udi eai, ¹⁶ abo se awanorilau we’u eo oea-tupidi aridi eai si ene, “Taba au beuma potamai eai, taba au puruyamuimai ia matana eai, ia wa terona eai i babawa wa, eo Mamoe ena ouyalayala eai. ¹⁷ Paana edi ouyalayala asubenana saesaena i laomao, eai abo abina i ata i totoro?”

7

Tatao hagahagana heamamna lailaina boeana eai se mauri.

¹ Ina ginauri ta muridi eai abotai aneru hasi ea itadi, tanoubu konana hasi eai se totoro, tanoubu manana hasi se abiabididini, bena tabu mana i toalau tanoubu eai, e gabogabo eai, e oeagi esau potana eai. ² Abotai aneru esau ea iita, tupo aruabu eai i saesaema, Eaubada maumaurina heiheinoina ie abi nimana eai. Arina lailaina eai i eogalau aneru hasi aridi eai, isi wa gigibori se mosedio tanoubu eo gabogabo taba se hebaaea, ³ i ene, “Tabu tanoubu au hebaaea, e gabogabo, e oeagi iniinidi, sora Eaubada ena heaheari tataodi ai goraiabagunaedi, eo heiheinoi ai tore debadi eai.” ⁴ Isi se goraidi wa edi numero ea ataiei; tausani handere esega tatao-labui-se-mate hasi se goraidi, Isaraela nanatunayao bodadi gamagamagari. ⁵ Iuda ena boda tausani saudoudoi-labui se goraidi, Gada ena boda tausani saudoudoi-labui, ⁶ Asa ena boda tausani saudoudoi-labui, Napatali ena boda tausani saudoudoi-labui, Manase ena boda tausani saudoudoi-labui, ⁷ Simiona ena boda tausani saudoudoi-labui, Levi ena boda tausani saudoudoi-labui, Isakara ena boda tausani saudoudoi-labui, ⁸ Sebulona ena boda tausani saudoudoi-labui, Iosepa ena boda tausani saudoudoi-labui, Beniamina ena boda tausani saudoudoi-labui se goraidi.

⁹ Murina eai ea italau, na ne, moutuana lailai-aririna, taba nige tau esau i hasiridi, basileia gamagari tataodi, eo boga udoi udoi, eo hari tataoyao, eo arina gamagamagari, terona matana eai se totoro eo Mamoe nuanuana eai, lulu posiposi lohalohadi se heluidi, eo bagadi nimadi eai se abidi, ¹⁰ eo arinadi lailai eai se eogayoga si ene, “Abihemauri eda Eaubada arinai, terona eai i babawa, eo Mamoe arinai!” ¹¹ Abo aneru maudoidi terona eo babadayao eo ginauri maumauridi hasi wa, se toropolupoluidi, terona matana eai se gurisalaoba, Eaubada se tabaohui, se aihelahui ¹² si ene, “Amen! Helolona, eo namanamarina, eo sonogana eo aitoina eo hedebaseaena eo gigiborina eo adidirina eda Guiau enana ede, i lau e huia nige nosina! Amen.”

¹³ Abo tautaubada wa esau i hesioigu i ene, “Aidobudi ina, lulu posiposi se heluidi ta, eo haedi eai se laoma?” na riba ea heuio ea ene, “Taubada e, oa ede abina u ata.” ¹⁴ Na i ribauio arigu eai i ene, “Teina ede isi amamna lailai boeana eai se lulagama; adi lulu se deuridio se heposiposidio Mamoe osinana eai.

¹⁵ Arinai ede isi Eaubada ena terona matana eai se totoro, asubena to maiona ena dubu tabuna eai ia se heayaiei; ia terona eai i babawa wa, ia ede boeadi eai i miamia. ¹⁶ Taba nige se guriamuio, taba nige se gadomaguio; mahana taba nige i talaiddi, e gigibori i gabudi.

¹⁷ Paana Mamoe terona boeana eai wa, ia abo Taumiataunidi,

abo i woeaidi goila ipudi maumauridi aridi eai;
 eo Eaubada matasulu gamagamagari abo i saugabaedi
 matadi eai.”

8

Buka aba-guduna hehaligigi-labuina se soe.

¹ Buka aba-guduna hehaligigi-labuina wa ie soe, abo se monou, galewa eai nige dagugu esau, mahana tupona sorasorana eai. ² Abo aneru haligigi-labui Eaubada matana eai se totoro wa, ea itadi, eo bogigi haligigi-labui se mosedi. ³ Abo aneru esau i loama abaaitalasam paana eai i toro, nimana eai wa muramura panepane aba-gabuna *gold*, bena i helelelaei aba-aitalasam *gold* wa arinai, terona matana eai wa, hetabu tataodi gamagamagari edi uura ede; ⁴ muramura panepane se gabu wa, asuna aneru nimana eai wa i saesae Eaubada arinai, maena hetabu tataodi edi uura. ⁵ Abo aneru ta aba-gabuna ie abi, oeagi alaalasi aba-aitalasam eai ie abi, i hemonau, abo i gabadobei tanoubu potana eai; abotai palepalele, dagugu lailaidi, namanamari eo moniinii se tubu.

⁶ Abo aneru haligigi-labui wa, nimadi eai bogigi haligigi-labui, se henonohauioidi bena edi bogigi se iuhidi.

⁷ Aneru bagubagunana enana ie iuhi, abotai *ice* ie taru dobi, eo oeagi alaalasi maena osina se hebori, tanoubu potana eai se hegoi-auridi; tanoubu se soi hehaiona lausoisoii esega se gabu heohi, oeagi iniinidi hinage lausoisoii hehaionana, eo lagau iniinidi maudoina.

⁸ Aneru helabuina ena bogigi ie iuhi, abo ginauri esau doha oea tupina lailaina alaalasina, se gabadobei gabogabo eai; ⁹ gabogabo taba se soi hehaiona doha lausoisoina esega i hemala osina, ginauri maumauridi gamagaridi gabogabo eai, lausoisoii hehaionana se mate, waga gamagaridi hinage lausoisoii hehaionana se putuhai.

¹⁰ Abo aneru hehaionana ena bogigi ie iuhi, abo ipora lailai didigana galewa eai i beudobima, i alaala doha lamepa, ie taru saga eo goila ipudi potadi eai. ¹¹ Ipora wa esana Kalakalapi, eo goila gamagari taba se soi hehaiona, lausoisoii esegana i hemala kalapi, goila wa se hekalapidi debana eai tatao se gamagari ariri, se mate.

¹² Aneru hehasina ena bogigi abo ie iuhi, abotai mahana taba se soi hehaiona, lausoisoina esega se talai, eo nawalai hinage lausoisoina esega doha, eo ipora lausoioidi esega doha, arinai edi mara tupona hehaionana i masigiri; asubena tupona hehaionana hinage nige i mara, maiona eai tupona hehaionana hinage doha.

¹³ Abo ea italau, na aneru esau doha magesubu eada boeana eai i loiloi, arinana lailaina ea ataiei arinai ie eoga i ene, “I baaea, i baaea, i baaea, tanoubu taumia abo i laubaaeaidi, ahani aneru headi wa edi bogigi sora se iuhidi!”

9

Bogigi hehaligigina, eo baaea bagubagunana.

¹ Abo aneru hehaligigina ena bogigi ie iuhi, na ipora esau ea iita galewa eai i beudobima tanoubu potana eai, abo duha lohalohana wa i dobi e nige anasiga, ki-na wau aneru wa se mosei. ² Abo duha ie dobi nige anasiga dobilana ie soe, abo asuasuna duha eai wa i inisaema, doha um lailaina asuasuna, mahana eo eada se hemasigiri-gudui, asuasuna wa duha dobilana eai i saesaema wa debana eai. ³ Eo asuasuna boeana eai madimadi se taumasarahama, tanoubu eai se tautausi, gigibori se mosedi doha tanoubu eai ta gaganadenadewa gigi-boridi; ⁴ se lauhesomdi tabu tanoubu ta lagauna se hebaaea, e ginauri iniini esau, e oeagi esau, na tatao mo abo se hebaaeaidi, isi wa Eaubada ena heiheinoi nige se abiyao debadi eai. ⁵ Se heribadi hinage bena tabu se unuhematedi, na abo se heamamna-daoiedi mo nawalai haligigi sorasorana eai; wau edi heamamana wa doha gaganadenadewa ena heamamna huia ne tau i letai. ⁶ Nei asubenadi eai ne tatao abo mate se eooi to se eoo-asa eai, abo se henua ariri taba se mate, ia mo mate abo i dagogabaedi.

⁷ Wau madimadi wa adi ao doha hosi se abinonohaidi bena se lau se iala; urudi eai doha korona *gold* eo matadi doha tatao matadi, ⁸ urudi maiawadi doha sisine urudi, moadi doha liona moadi; ⁹ nuapoudi opeadi doha poasi, mabedi dagugudi doha sariota eo hosi gamagamagari, iala hesabana se aिताutau; ¹⁰ deledi doha gaganadenadewa deledi, deledi eai edi abagorigori ede, edi gori eai tatao se heamamnadi i lau nawalai haligigi. ¹¹ Edi wasawasa se hetero i tanua-gaedi, iaede duha wa ie dobi nige anasiga wa aneruna, esana Heberu arinadi eai ede Abadona, na Heleni arinadi eai esana *Apoliona.

¹² Baaea bagubagunana ede i lauo, sora u ita, baaea labui soradi se laolaoma ina.

¹³ Abo aneru hehaligigi-esegana ena bogigi ie iuhi, to arina esau ea ataiei, aba-aitalasam *gold* donana hasi aridi eai i laoma, iaede Eaubada matana eai i totoro wa, ¹⁴ i ribalau aneru hehaligigi-esegana wa bogigi ie abi wa, i ene, “Aneru hasi se auaudi saga lailaina Euperatea eai, u iairihaidi.” ¹⁵ Abo aneru hasi se iairigabaedi, isi se nonoha edi huia se mosedi asubena esega eo mahana esega sorasorana eai

* 9:11: Heaheasonina: Tauhebaaea.

tatao bena se unuidi. ¹⁶ Tauiala hosi se geruidi, gamagaridi tausani saudoudoi ma-tausani saudoudoi se helabui; edi numero ea ataiei. ¹⁷ Doha ina hosi wa ea itadi egu enosuai eai, eo taugerusae hinage ea itadi nuapoudi opeadi adi ao doha se alaalasi eo we'u alaalawana *safiara* wa, eo mura-mura alaalasina *sulfur*, eo hosi wa urudi doha liona urudi, awadi eai alaalasi eo asuasu eo *sulfur* se gabu se tatatapesa. ¹⁸ Baaea haiona ta debadi eai tatao se mate, tatao taba se soihehaionadi, lausoisoina esega ede se mateohi, wau oegi alaalasi eai se mate, eo asuasu, eo *sulfur* gabugabuna eai wa, awadi eai se lulagama wa. ¹⁹ Paana hosi wa gigiboridi ede awadi eai, eo deledi eai, paana deledi doha mota, ma-urudi, eo gonoadi aridi eai se aihebahebaaea.

²⁰ Na tatao hagamagana baaea eai ta nige se mate, ia mo nige se nuabui, nimadi ginauridi se tabatabaohuedi mo, eo diaboloo, eo oitau *gold*, e *silver*, e *brass*, e we'u, e oegi, isi taba nige se itaita, e se ataatai, e aedi eai se laulau; ²¹ eo edi aiainunu, edi laulau bii, edi aiayahari, hinage nige se nuabuiedi.

10

Aneru saesaena eo buka gagirina.

¹ Abotai aneru esau ea iita, adiadirina, galewa eai i dobidobima, eada eai se helui, uruna eai wari, aena doha du alaalasidi. ² Buka gagirina se alanonohai, nimana eai ie abi. Ae-tutuna i utudobi gabogabo potana eai, aeseuseurina tanoubu potana eai. ³ Arina lailaina eai ie eaba, doha liona ena so'aso'a; i eaba lautom abo palepalele haligigi-labui arinadi se dagudagugu. ⁴ Palepalele haligigi-labui se dagugu lautom to bena ea uri, na arina esau galewa eai i dobima ea ataiei i ene, "Ginauri palepalele eai se ribaedi, besi u guduyamuidi, tabu u uri-hemasarahadi." ⁵ Na wau aneru ea iita wa, gabogabo eo tanoubu potadi eai i tororo wa, nimatutuna i lau'sini galewa eai, ⁶ ia wa i miamia i lau e nige nosina wa esana eai i riba-aigora, galewa tauhetubuna wa, eo ginauri gamagaridi nei eai, eo tanoubu tauhetubuna, eo ginauri gamagaridi nei eai, eo gabogabo tauhetubuna, eo ginauri gamagaridi nei eai, i ene tabu ta bagi, huia sigana ede. ⁷ Na aneru hehaligigi-labuina bogigina ena huia iuhina eai, temeta huia ne Eaubada ena nuatuyamuyamui se ohi ede, doha i hemasarahayao ena heaheari tataodi tau-peroveta aridi eai.

⁸ Abo arina wa ea ataiei galewa eai i dobima, ea ataieiuioi, i ribalaoma arigu eai i ene, "U lau buka se soe wa u abi, iaede aneru gabogabo eo tanoubu eai i totoro wa nimana eai." ⁹ Arinai ea lalau aneru wa arinai, ea aibodai bena buka

gagirina wa i leama arigu eai. Na i ribalaoma arigu eai i ene, “U abi, u aiheohi; bogam eai abo i kalapi, awam eai mo abo i amna doha amoamo.” ¹⁰ Buka gagirina wa aneru nimana eai ea aabi, to ea aaiheohi, na awagu eai i amna ariri, doha amoamo, i lau e ea aiyao abo bogagu eai i kalapi. ¹¹ Abo se heribaguma si ene, “Abo u riba-perovetauio hari tatao, hari basileia, hari arina eo hari wasawasa aridi eai.

11

Murimuri-tataodi edi huia ena lautom.

¹ Abotai didiari moeana lohalohana doha tue abanononoi se leama, abo esau i ene, “U torohai, Eaubada ena dubu tabuna u nonoi, eo aba-aitalasma eo nei eai tautabaohu, ² na baubau dubu murimurina eai i otawa, tabu u nonoi; paana se moseyao hari basileia aridi eai isi eanua tabuna abo se utuututawatawai nawalai tatao-labui-se-mate eo labui. ³ Na enagu tauriba, tataodi labui, abo ea tauribaedi, abo baeki se lui, se ribariba-peroveta, asubena tausani esega eo handere labui eo tatao-haiona-se-mate.”

⁴ Teina olive oegidi labui, eo lamepa aba-torena labui, tanoubu Guiauna matana eai se totoro wa. ⁵ Ena tau esau bena i hebaaeadi, oegi alaalasi awadi eai i laolaoma, adi waiunu wa abo i gabudi, ena tau esau i henua bena i hebaaeadi, teina doha ia abo se unui. ⁶ Isi edi gigibori gonoana galewa taba se gudu hai taba nige nabu i taru edi huia ribariba-peroveta eai, eo edi gigibori eai taba gabogabo hinage se tanuagaei abo edi riba eai se hemala osina, eo abina se ata hinage, mahisa se henua, abo iwala baeaa udoudoi arinai tanoubu ta se lubi. ⁷ Edi ribahemasaraha se ribaheohi, Suisui baeaa duha eai wa i saema, abo i ialaidi, eo abo i saepoidi, i unuhematedi. ⁸ Sinaredi eanua lailai dobilana eai se laugabaedi se otahai, eanua ta earuana eai gonogonoana esana taba se ribaei Sodoma, e Aigupito, e haedi eai edi Guiau edi abahesataurona. ⁹ Asubena haiona eo tupona, hari tataoyao, eo hari boga, eo hari arina eo hari boga tataodi abo sinaredi se otahai wa se aiewaidi, nige se eari bena bousa eai se toredi. ¹⁰ Tanoubu ta taumiaina isi debadi eai abo se kode, se aihea, ainauia se hai-hetahetamari esau esau arinai; paana peroveta labui ta tanoubu taumia se hesahesabaedi wa, amnadi se lauhebaeaa. ¹¹ Na asubena haiona eo tupona murina eai, mauri eahuana Eaubada arinai i toama i lusora wau tatao labui wa aridi eai, abo ma-esega aedi eai se toro, taitadi abo matausi lailai i hearodi. ¹² Abotai arina lailai se ataiei, galewa eai i laoma, i ribadobima aridi eai i ene, “Au saema inai!” Abo adi waiunu matadi eai se sae galewa, eada boeana eai. ¹³ Nei mahanana eai ne moniinii lailai i hetahetabubu, eanua sigasigana hesaudoudoina ie guri, eo

dodoga tausani haligigi-labui se mate moniinii eai wa, tatao hagahagana ma-miadi isi abo se matausi ariri, se sinibui galewa Eaubadana se aihelahui.

¹⁴ Baaea helabuina wa ede i laoma i lauo; au ita, baaea hehaionana i heuheulama ta.

¹⁵ Abo aneru hehaligigi-labuina ena bogigi ie iuhi; murina eai arina lailaidi dagugudi galewa eai se riba si ene, “Tanoubu basileiana abotai se hemala eda Eaubada ena basileia, eo ena Keriso enana, ia abo tanuagana eai i laulau, i lau e huia nige nosina.” ¹⁶ Abo babadayao wa tau-esega-i-mate hasi edi terona eai se babawa wa Eaubada matana eai wa, isi se gurisalaoba, Eaubada se aihelahui, ¹⁷ si ene,

“Ai lautoiem, Guiau Eaubada gigibori-aririna e, oa ede ma-maurim ta, beabeana eai hinage i laoma wau-ta, paana em gigibori lilai-aririna u abiyao, u tanuagaimai ede.

¹⁸ Basileia se ouyalayala, na oa em ouyalayala huiana ina.

eo taumatemate edi hekiraino huiana.

em heaheari, em peroveta, em hetabu tataodi

isi hinage edi huia, bena se ainuiaidi,

eo isi hinage esam tauheasisiena, lailaidi eo gagiridi,

tanoubu tauhebaeana edi huia hinage, bena se hebaeadi.”

¹⁹ Abotai Eaubada ena dubu tabuna galewa eai se soe, to ena dubu alona eai ena ribahesunuma *akena* wa tatao se ita; abotai namanamari, eo ariarina, eo palepalele, eo moniinii, eo *ice* ie taru adidiri.

12

Sine i labalaba (Israela tautaua), eo natuna.

¹ Abo heiheinoi lailaina esau galewa eai se ita, iaede sine mahana eai se helui, aena eai nawalai, uruna eai ipora saudoudoi-labui doha ena korona; ² na sine ta ie boga, to ie eaba, paana i labalaba eo i paisoa bena i haisu. ³ Abo heiheinoi esau galewa eai se ita, *dragon* lailaina, buiabuiiana, uruna haligigi-labui, eo donana saudoudoi, eo wau uruuruna eai wa korona haligigi-labui i oudi. ⁴ Delena eai galewa iporadi i uiagabaedi i gabadobedi tanoubu eai. Na *dragon* wa sine labalabana wa matana eai i totoro i bagibagi bena i haisu abo natuna i ai. ⁵ Na natuna-tau i labasi, ia ede bena basileia gamagaridi abo i tanuagaedi, tue poasi arinai abo i tanuagaedi, na sine wa natuna se girihai se abiisini Eaubada arinai, eo ena terona arinai. ⁶ Sine wa ie dago tupo barabara eai, ena abamia nei eai Eaubada i abinonohaiyao, nei eai abo se heai i lau e asubena tausani esega eo handere labui, eo tatao-haiona-se-mate.

⁷ Abotai iala ie tubu galewa eai, Mikailo maena aneru gamagari se ialalau *dragon* wa arinai; *dragon* eo ia ena aneru

hinage iala se heuio, ⁸ na se unuidi, hinage galewa eai nige edi tupo se lobaiuio. ⁹ *Dragon* didigana wa, saesaena, abo se aiduiei. Iaede mota beabeana wa, iaede Diabolo, tanoubu maudoina tauboraboraidi wa — ia se gabadobei tanoubu eai, maenayao ena aneru hinage se gabadobeidi. ¹⁰ Abo arina lailai galewa eai ea ataiei i ene, “Abotai abo se tubuma ede, abihemauri, eo adidiri, eo eda Eaubada ena basileia, eo Keriso gigiborina. Paana eda tataoyao tauhegihegirudi se gabadobeiyao, ia wa eda Eaubada matana eai i hegihegirudi wa, asubena to maiona. ¹¹ Ia hede se saepoiyao, Mamoe osinana debana eai, eo edi mauri ribahemasarahana eai, eo paana isibom edi mauri nige se gadosisie i lau e se mate. ¹² Arinai u kode, oa galewa e, eo omi taumiaina! Ahani mo omi, tanoubu eo gabogabo taumiamiu e, paana diabolo i do-biwa arimiu eai, ena ouyalayala i lai ariri, paana i nuatuiyao ena huia i kuu mo!”

¹³ *Dragon* i italobai, hede ia se gabadobeiyao tanoubu eai, abo sine wa merumeru tau-labasina i hesabaei, i heamamna. ¹⁴ Na mabena lailaidi labui sine wa se mosei, doha magesubu lailaina mabena, bena mota wa i loigabaei i lau ena abamia wa barabara eai. ¹⁵ Abo mota awana eai goila i alagabaei, doha abaita lailai sine wa i hedidi-watai, abaita eai bena i healelei. ¹⁶ Na tano sine wa i sagui, tano awana i dabari eo abaita wa ie dom, wau mota awana eai i laolaoma wa. ¹⁷⁻¹⁸ Na *dragon* abo i ouyalayala ariri sine wa arinai, to i lau bena iala i hetubu sine wa nanatunayao headi aridi eai, isi hagahagana wa sora ma-miamiadi, Eaubada ena laugagaeo se sogohidi wa, eo Keriso ena mauri ribana tauabina wa.

13

Suisui labui, esau gabogabo eai, esau tano eai, se laoma.

¹ Na salagomgom eai ea totoro, gabogabo hasarina eai, abo suisui esau ea iita, gabogabo eai ie poe, donana saudoudoi, eo uruna haligigi-labui, eo donana eai korona saudoudoi, eo uruna eai wa esana i totoro, esa baaeana, Eaubada i riba-baaeaei. ² Suisui ea iita wa ana ao doha taiga, aena doha suisui esana *bear* aena, eo awana doha liona awana. Na *dragon* wa ia gigiborina i mosei, eo ena terona, eo awatanuaga lailaina. ³ Uruna esau ea ita doha se eatuhemate ia mo gaina ie mau, eo tanoubu maudoina suisui ta se noowatai. ⁴ Tatao *dragon* wa se aihelahui paana iabom ena gigibori i moselaei suisui wa arinai, suisui hinage se aihelahui si ene, “Eai doha suisui ta, eai gonoana i ialai?”

⁵ Ia awana se hegigibori ginauri lailaidi i ribaribaedi, eo Eaubada i riba-baaeaei; ena huia se mosei bena ena gigibori i hepaisoaei i lau e nawalai tatao-labui-se-mate eo labui.

⁶ Awana i dabari bena Eaubada i riba-baaeaei eo esana i hebaaeae, eo ena abamia, eo isi hinage taumiaina. ⁷ Ena huia se mosei bena hetabu tataodi i ialaidi eo i saepoidi. Ena huia se mosei bena hari boga eo hari tataoyao, eo hari arina eo hari basileia, i tanugaedi. ⁸ Tatao gamagaridi tanoubu eai se miamia ia se aihelahui, isi gamagaridi wa esadi nige se uridio Mamoe se unui wa ena mauri Bukana eai, isi wa tanoubu ena huia tubu eai se nuatu-nonohaidio. ⁹ Ena tau esau mabeana, besi i ataatai ina.

¹⁰ Tau esau i henua tatao i paidi, ia hinage abo se pai; esau i henua elepa eai i aiunu, ia hinage elepa eai abo se unui. Hetabu tataodi edi lauita huiana ina, bena se taubiga mo, eo se sunusunuma.

¹¹ Abo suisui esau, tano eai i saesaema ea iita; ia donana labui doha mamoe, na i ribariba doha *dragon* ena ribariba. ¹² Suisui bagubagunana wa ena gigibori maudoina wau murimuritana wa i paipaisoaei, ia matana eai. Tanoubu eo isi taumiaina i hetalauidi bena suisui bagubagunana se aihelahui, wau ana gai uruna eai se talai wa, na ie mau. ¹³ Ia hinage heiheinoi nabunabutuadi i ginauridi, doha oeagi alaalasi galewa eai i hetaru-dobima tanoubu potana eai, tatao matadi eai. ¹⁴ Tanoubu taumiaina i boraidi wau heiheinoi wa debadi eai, iaede i ginauridi suisui matana eai, i lauhesomdi bena suisui oitauna se ginauri, paana elepa eai se lau-elepai ia mo ie mia. ¹⁵ Eo gigiborina se mosei bena suisui oitauna wa eahuana i mosei, bena suisui oitauna i ribariba eo i sibasiba, eai to eai nige se tabaohuei abo i riba se unuhematedi. ¹⁶ Eo tatao gamagaridi, tatao gaibu eo tatao lailaidi; monamonaune eo gogogesagesa, iaiyairihaidi eo ma-auaudi, i riba bena ena heiheinoi i tore nimatutudi eai eo deba-pogadi eai, ¹⁷ eo taba nige tau esau enana i une, e i uneune-gabaei, ena nige heiheinoina ta i abiyao, iaede suisui wa esana, e esana numerona. ¹⁸ Sonoga ina, suisui ena numero heaheasonina eai taba i italobai? Ena numero wa ede handere haligigi-esega, eo tatao-haiona-se-mate haligigi-esega.

14

Mamoe tautaua, eo lolo e baaea ialana, saepoina murimuritanata tautaua.

¹ Abo ea italau, ne, Mamoe i totoro Sion oea-tupina eai, maenayao tataodi tausani handere esega eo tau-esega-i-mate hasi, ia esana eo Tamana esana tauabina, debadi eai se uridi. ² Eo arina esau galewa eai i dobima, ea ataiei doha goila gamagamagari dagudagugudi, eo doha palepalele lailai daguguna; arina ea ataiei wa doha tau-oihuelele edi huelele eai se oioihuelele, ³ to se wana, doha wana harihariuna se

wanawanai terona matana eai eo ginauri maumauridi hasi wa matadi eai, eo babadayo wa matadi eai. Wana ta taba nige tau esau se heata, wau tatao tausani handere esega eo tatao-labui-se-mate hasi wa, isibom mo, isi wa tanoubu eai ta se unehemauridi. ⁴Teina isi ede, nige se hebiuiuidi sisine aridi eai, isi ma-nua'aadi. Isi ede Mamoe ena dobila, haedi i lau, se hemuhemuriwatai. Tatao boeadi eai se unehaidi ede, Eaubada ena uaua-bagubagunana isi ede, Mamoe enanayao hinage. ⁵Awadi eai nige riba borabora, nige biidi.

⁶ Abo aneru esau ea iita galewa duaduarina eai i loilo, evanelia tahunuana i lau e nige nosina, bena i wasaduaiei tanoubu taumia aridi eai, eo basileia udoi udoi, eo hari boga, eo hari arina, eo hari tatao; ⁷ arina lailaina eai ie eoga i ene, "Eaubada matausina au matausi, hedebaseaena au mosei, paana ena hekiraino mahanana i lagemao; au aihelahui ia galewa eo tanoubu eo gabogabo eo goila bunubunuwasidi tanuagadi ede."

⁸ Abo aneru esau i muritama, arina lailai eai i ene, "I gurio, i gurio, Babulona saesaena wa, basileia gamagaridi ena gadosisi bii heouyalayalana wainana tauhetalauuidi bena se nom."

⁹ Abotai aneru esau, hehaionana, i hemuriwataidi, arina lailaina eai i ene, "Ena taba tau esau suisui wa i aihelahui, e ena heiheinoi wa i abi debana eai e nimana eai, ¹⁰ ia abo Eaubada ena ouyalayala wainana i nom hinage, se abinonohaiyao, nige saha arinai se hebori ena ouyalayala bianomnomna eai, abo se heamamna-daoi, oeagi alaalasina eai, eo *sulfur* gabugabuna eai, ena aneru tabudi matadi eai eo Mamoe matana eai. ¹¹ Se heamamnadi asuasuna i iniinisae i lau e nige nosina, asubena to maiona nige aiyawasina, isi wa suisui eo ena oitau tauaihelahuina, eo esana heiheinoina tauabina.

¹² Hetabu tataodi bena se taubiga ariri mo, bena Eaubada ena laugagaeo eo Iesu sunumana, se sogohidi.

¹³ Abo arina esau ea ataiei, galewa eai i laoma, i ene, "Ina ta u uri: Tatao se mate Guiau boeana eai, isi nuadi se woiwoina ariri, huia ta eo huia gamagari." Earua i ene, "Hedeona, se nuawoiwoina ariri, edi paipaisoa aridi eai se aiyawasi ina, eo adi paisoa leleadi se laulau!"

¹⁴ Abo ea itasae na ne, eada posiposina ea iita, potana eai esau ea ita i babawa, ana ao doha tau natuna, uruna eai korona *gold* ie ou, eo nimana eai aba-aiaitom matamatana. ¹⁵ Eo aneru esau dubu tabuna eai i lusorama, arinana lailaina eai i eogalau wau eada potana eai taubawa wa arinai, i ene, "Em aba-aiaitom u hepaisoaei i lauya'o, paana lauoea huiana i lagemao, paana tanoubu masurina i pogara-aririo." ¹⁶ Abo

wau eada potana eai i babawa wa, ena aba-aiaitom i heode tanoubu eai, tanoubu masurina se aiaitomei.

¹⁷ Aneru esau hinage dubu tabuna eai abo i lusorama, galewa eai wa, ia hinage nimana eai aba-aiaitom mata-matana. ¹⁸ Eo aneru esau, aba-aitalasam eai i laoma, ia gigiborina eai oeagi alaalasi i tanuagaei; na arinana lailaina eai i eogalau wau aba-aiaitom matamatana tauabina arinai, i ene, “Em aba-aiaitom matamatana u hepaisoaei, eo tanoubu eai vine se iniinigogo u tom-di, paana ena vine uauana se buina ariri.” ¹⁹ Abo aneru wa ena aba-aiaitom i gabadobei tanoubu eai, eo tanoubu masurina i tanogogoi, i gabalaei vine aba-utuhemahalamina eai, Eaubada ena ouyalayala aba-utuutuina ede; ²⁰ aba-utuhemahalamina wa arinai vine se utuututawai, iaede eanua murimurina eai, se utu-godagodai, abo aba-utuutu boeana eai osina i didima, i siuma i lau e hosi wa tau-utuutu awadi mainadi eai ie lage, i didilau e maila handere labui.

15

Eaubada ena huia, ena ouyalayala i hegoiauri.

¹ Abo heiheinoi esau hinage, galewa eai ea iita, sae-saena, nabunabutuana, aneru haligigi-labui nimadi eai iwala haligigi-labui, isi taumurimurita-ariri ede, paana aridi eai Eaubada ena ouyalayala ena aba-heohina.

² Ea italau, abo gabogabo daudaumorina ea iita, doha galasi eo oeagi alaalasina maena se hebori, eo isi suisui wa se saepoi ialana eai se baguna, ena oitau eo esana numerona wa se saepoidi, gabogabo doha galasi wa hasarina eai se totoro, Eaubada ena huelele nimadi eai. ³ Eaubada ena heaheari Mose wanana se wanai, eo Mamoe wanana, si ene, “Em paipaisoa se lai ariri, se didiga, Guiau Eaubada Gigigibori-aririna e!

Em laulau gamagaridi duduraidi, mamohoidi ede, Mumuga eai i laoma e wau-ta, Wasawasana e!

⁴ Eai taba nige esam i matausiei, i hedebasaei, Guiau e? Paana oa oabom Tabuna ede. Basileia gamagamagari abo se laoma se aihelahuim, paana em abiabi dudurai se masarahao.”

⁵ Teina ginauri ta muridi eai ea ita, tabanako, Eaubada ena nuatu aba-hemasarahana dubuna wa, galewa eai se soeauri, ⁶ abo dubu boeana eai aneru haligigi-labui iwala baaea haligigi-labui se tautautu wa, se pesama, isi we’u maisa-lailaidi eai se hepasadi, se lolo ariri, se namanamari, eo nuapoudi eai *gold* se auduaduariei. ⁷ Abo ginauri mau-mauridi hasi wa tauna esau bia *gold* haligigi-labui ie abi, Eaubada ena ouyalayala eai se monau, ia wa ena mauri i lau

e nige nosina wa. ⁸ Dubuna wa asuasu i monau, Eaubada namanamarina eo gigiborina eai i laoma, taba nige esau abina i ata i awasae dubu eai ta, i lau e aneru haligigi-labui edi iwala baaea haligigi-labui se hepaisoaheohidi.

16

Iwala haligigi-labui se hegoigabaedi tanoubu potana eai.

¹ Abo arina lailaina ea ataiei dubu boeana eai i laoma, aneru haligigi-labui wa i lauhesomdi i ene, “Au lau, Eaubada ena ouyalayala biadi haligigi-labui wa au hegoiauridi tanoubu potana eai.”

² Arinai abo aneru bagubagunana ie lau ena bia i hegoiauri tanoubu potana eai, i hemala bonu baabaaeadi, amamnaariridi, tatao aridi eai, isi wa suisui heiheinoina taudi eai wa, eo oitauna tautabaohuina.

³ Aneru helabuina ena bia i hegoigabaei gabogabo potana eai, to i hemala osina, doha taumatemate osinadi, ginauri maumauridi gamagaridi gabogabo eai se mate.

⁴ Aneru hehaionana ena bia i hegoigabaei saga potadi eai, eo goila bunubunuwasidi, to se hemala osina. ⁵ Goila aneruna abo ena riba ea ataiei i ene, “Laulaum se dudurai ariri, Tau Tabuna e, oa ede beabeana eai i laoma e wau-ta, oa em hekiraino ede ina.

⁶ Doha ina hetabu tataodi eo peroveta osinadi tatao se heboriri, arinai ede osinadi wa u mosedi se nom, agu eamoisa!”

⁷ Abo aba-aitalasang hinage ea ataiei ie dou, i ene, “E, Guiau Eaubada Gigigibori-aririna e, oa em hekiraino mamohoina ede, eo duduraina!”

⁸ Aneru hehasina abo ena bia i hegoilaei mahana arinai, ena gigibori se mosei tatao taudi i eamoridi alaalasina eai; ⁹ gigiborina lailaina wa tatao i gabudi, abo Eaubada esana se riba baaeaei ia iwala ta tanuagana wa, na nige nuadi se bui to ia se aihelahui.

¹⁰ Abo aneru hehaligigina ena bia i hegoidobei suisui wa ena terona potana eai, to ena basileia i masigiri-gudui; tatao memenadi se apu-utuutusidi edi nuaamamna lailai eai, ¹¹ eo galewa Eaubadana se riba-baaeaei edi amamna eo edi bonu debadi eai, ia mo edi paipaisoa baaeadi nige se nuabuedi.

¹² Abo aneru hehaligigi-esegana ena bia i hegoidobei saga lailaina wa potana eai, esana Euparatea, to goilana ie guma, arinai wasawasa tataodi tupo aruabu eai bena abo se laoma, edi dobila se henonohai. ¹³ Abo ea ita, earua biibiidi haiona, adi ao doha so’u, *dragon* awana eai se lusorama, eo suisui wa awana eai, eo ena peroveta borabora awana eai. ¹⁴ Isi ede

hari diabololo earuadi, heiheinoidi se ginaginauridi, isi se pesa tanoubu tupo maudoina eai wasawasadi se woegogoidi iala eai, Eaubada gigigibori-aririna ena asubena saesaena eai. ¹⁵ (“Au ita, eau egu laolaoma doha tauaiyahari! Kausara mo ia i silasilawa, ana lulu i itawatai-komakomanidi, ata mataukohakohana eai i laulau, taumaeamaeana abo se ita-masarahai!”) ¹⁶ Abo gamagaridi se heoigogoidi teha esau eai, Heberu arinadi eai esana ede Ha-Magedon.

¹⁷ Aneru hehaligigi-labuina ena bia i hegoilaei eada eai, abo arina lailaina dubu eai i laolaoma, eo terona eai, i ene, “Ohina ede!” ¹⁸ Abotai namanamari eo dagugu lailaidi, palepalele se oi, eo moniinii lilai-aririna, tatao tanoubu eai ta se mia edi huia eai nige esau doha, moniinii wa ie lai eo i didiga ariri. ¹⁹ Eanua lailaina wa i taigari, hehaiona, eo basileia udoi udoi eanuadi se guri, Eaubada Babulonia, eanua saesaena wa, i henuaisini, ena ouyalayala bia-nomnomna wa bena abo i henom heohi. ²⁰ Bonabonarua gamagaridi abo se dago se tauyamui, oea tupidi hinage taba nige se lobaidi. ²¹ Eo *ice* ie taru, we’u tupidi lailaidi esa, esa, porohedi *hundredweight* esega, galewa eai se taru-dobima tatao potadi eai, i lau e tatao Eaubada se riba-baaeai iwala ta debana eai, paana iwalana i lai ariariri.

17

Tanoubu ta tautaua, ede “Babulonia,” ana siga.

¹ Abo aneru haligigi-labui, bia haligigi-labui tauabina wa, adi sagu esau i laoma arigu eai, i ribalaoma, i ene, “U laoma, sine laulau baaea saesaena wa, goila gamagamagari i babawatawaidi wa, hekirainona abo ea heitam, ² ia wa tanoubu ta wasawasadi i enoenodi, eo tanoubu taumia ena laulau baaea eai doha i henomeauyauredi.” ³ Earuagu eai abo i bahelaegu barabara esau eai, to sine wa ea iita, i gerusae suisui buiabuiana potana eai, suisui ta esa udoi udoi Eaubada aba riba-baaeaina i monau, uruuruna haligigi-labui, eo donana saudoudoi. ⁴ Sine wa lulu buiabuiana eo alaawana eai se helui, *gold* eo we’u namanamaridi eo giniuba matamatapoudi arinai se hepasa, nimana eai abanonom *gold*, abi-baaea udoi udoi i monau, ena laulau biibiina ginaurina. ⁵ Deba-pogana eai esa eamuyamuina se uri, ribana ede: “Babulonia saesaena, enoenobiri sisinedi sinadi ede, eo tanoubu ena abi-baaea gamagari sinadi.” ⁶ Sine ta ea ita, hetabu tataodi osinadi eai i nom-eauyaure, eo isi hinage Iesu enanayao wa ia debana eai se unuhematedi.

Sine ea iita ea no’o to ea no’o matemate. ⁷ Na aneru wa i ribalaoma arigu eai i ene, “Paana saha ue no’o? Sine ta heaheasonina eamuyamuina hage ea heribam, eo suisui i

gerugerui ta aniona, iaede ma-uruuruna haligigi-labui eo donana saudoudoi. ⁸ Suisui ue ita wa nabada miana, wau-ta nige'e, abotai abo duha lohalohana i dobi nige sigana wa boeana eai i dalasaema abo i lau baaea nige nosina wa arinai. Isi tanoubu eai ta se miamia, isi wa esadi nige se urinonohaidio mauri bukana eai tanoubu ena abatubu eai, isi abo se no'o ariri paana suisui wa abo se ita, paana beabeana eai miana, wau-ta nige'e, abotai i uioma. ⁹ Tau sonoga iabom abo i italobai, heaheasonina ede: uruuruna haligigi-labui isi ede oea-tupidi haligigi-labui potadi eai sine wa i babawa; ¹⁰ hinage isi ede wasawasa haligigi-labui, haligigi se gurio, esau ena huia ina, esau sorana, abo i laoma, abo ena huia begana mo i abi. ¹¹ Na suisui wa, beabeana miana wau-ta nige'e, ia i patulau taudi haligigi-labui adi sagu esau, ia doha hehaligigi-haionana ede, eo abo i lage baaea nige nosina arinai. ¹² Dona saudoudoi ue ita wa, isi ede wasawasa saudoudoi, sora nige edi basileia se abi, se heterodi tanuaga eo wasawasa, suisui wa maenayao, edi mahana esega sorasorana eai. ¹³ Isi nuadi esega edi gigibori eo edi awa-tanuaga se mosegabaei suisui wa arinai. ¹⁴ Mamoe abo se ialai, na Mamoe abo i saepoidi, paana ia guiau edi Guiau, eo wasawasa edi wasawasa, isi maenayao wa hinage abo se baguna, paana se eogaidi ede, se abi-hileidi, isi tau-torotahitahi."

¹⁵ I ribalaoma arigu eai i ene, "Goila u itadi wa, sine laulau baaeana i babawa-tawaidi wa, isi ede tatao moutuadi, peledi lailaidi, hari basileia eo hari arina. ¹⁶ Na donadi saudoudoi u itadi wa, eo suisui wa, isi abotai abo se sinibui sine laulau baaeana wa abo se hewaiunuei; ena gogo abo se girihai, ana lulu se abihaidi, bulumana se ai, eo oeagi alaalasi eai ia abo se gabu-healahoho. ¹⁷ Paana Eaubada nuadi i dududuidi bena ia ena nuatu se ginauri arinai nuadi se heoiesega eo edi basileia se mosedi suisui arinai i lau e Eaubada ena riba se hemamohoiedi. ¹⁸ Na sine ue ita wa, ia ede eanua saesaena wa, tanoubu wasawasadi wa tau-tanutanuagaedi."

18

Huia murimurita-ariri, tanoubu eo buluma ana tepo abo i tauyamui.

¹ Teina murina eai abo aneru esau ea iita, galewa eai i dobidobima, ia se hetero tanuaga saesaena, namanamarina hinage tanoubu ta i hemara. ² Arinana lailaina eai ie eoga i ene,

"Te guri, ie guri, Babulonia saesaena wa i gurio!

I hemala demoni edi abamia, eo earua biibiidi edi teha, eo manu biibiidi, hewahewaiunudi edi tupo;

³ basileia gamagaridi ena gadosisi baaea wainana se nomyao, eo tanoubu ta wasawasadi ia arinai se enoenobiri, tauuneune tanoubu eai ta edi gogo se helai ena lauheamna udoi udoi debadi eai.”

⁴ Abo arina esau ea ataiei, galewa eai i laoma, i ene, “Omi egu tataoyao e, au pesagabaeyama, ata ena baaea aridi eai au abilau, ata ena iwala au hearodi;

⁵ paana ena baaea peina se inisaemao galewa, ena laulau baaea Eaubada i nuatuidio.

⁶ Ia ena abiabi eai besi ia hinage arinai emi abiabina doha, ena laulau maisadi au helai helabui; aba-nomnom ie asi wa, enana hinage au asi, au headidiri, au helabui.

⁷ Doha i hetausaeuioi, baaea i lauheamna, nonoina ede au mosei, heamamna ana, eo doudou. Paana nuana eai i ene, ‘Eau doha sine-wasawasa mabawagu, eau nige wabu, eau taba nige doudou ea ita,’

⁸ arinai asubena esegana eai ana iwala abo se tubu, mate eo doudou eo guriam, eo abo se gabu oeagi alaalasina eai;

paana Guiau Eaubada tauhekirainona wa, ia i adidiri-daoi.”

⁹ Tanoubu ta wasawasadi ia maenayao tau-enoenobiri wa, maena gogo se aihenuhenuariei, ia sabina abo se dou eo se eabayaba huia ne asuasuna se ita, edi huia gabuna eai wa.

¹⁰ Eda lohaloha eai abo se torolau, ma-matausidi ata ena amamna se hearo, abo si ene,

“Kapore! Kapore! oa eanua lailaina wa, oa Babulonia, eanua saesae-aririna wa!

Mahana esegana sorasorana eai em maisa u hearo ta.”

¹¹ Tauuneune tanoubu eai ta sabina abo se dou, eo se nuadubu, paana nige esau i laoma edi gogo i uneuioi, ¹² uneune *gold* eo *silver*, eo we’u namanamaridi maisa-lailaidi, eo giniuba matamatapoudi, eo lulu *linen* ealoyalona, eo *silk*, eo buiabuia, eo oeagi pane-lolodi udoi udoi, eo ginauri dona eai se tadidi, eo oeagi lolololodi eai se ginauridi, eo poasi, *brass*, eo *iron*, eo we’u oioiura, sabusabuna, ¹³ eo anihu pane-lolodi eo sinapi udoi udoi, eo muramura panepane se aiaigabu, eo wosawosa, eo nomnom waina, eo *oil*, eo falawa bigabigana, eo *wheat*, eo bulumakau, eo hosi eo sar-iota abagerugeru, eo tatao se uneunedi taupaisoa, iaede tau earuana se unelau.

¹⁴ “Uauadi wa oa nuam ena gadolelehi, se tauyamuio, ginauri gamagaridi se loloariri, eo se namanamari, maisadi lailaidi, taba nige u itauioidi, arim eai tatao taba nige se lobaiuioidi, taba nige’e!”

15 Teina ginauri ta tauuneunedi, ia arinai edi gogo se helai ariri, abo eda lolaloha eai se totoro, ena amamna se matausiei, se nuadubu eo se dou lailai, si ene,

16 “Kapore, kopore, eanua lailaina wa, ia *linen* ealoyalona eai se helui wa, eo alaalawa eai, eo buiabuia eai, eo *gold* eo we’u namanamari maisa-lailaidi eai, eo giniuba matamatapoudi eai se hepasa wa!

17 Mahana esega sorasorana eai gogo lailaina wa se hebaaea, se hetatagorigori.”

Eo waga tanuagadi gamagaridi, eo isi gamagaridi waga eai taupaipaisoa, eo edi gogo gabogabo potana eai se lobai, eda lolaloha eai se totoro se aiaiewa ¹⁸ se italau asuasua se ita se dou, si ene, “Aitea eanuana doha eanua lailaina ta?” ¹⁹ Abo tano se hesuru urudi eai, se doudou, se nuanuadubu, si ene, “Kapore, kapore, eanua lailaina ta, gogo lailaina ema abalobaina, gamagarimai ia debana eai ai adaadau gabogabo eai, eo ena gogo gadosisina debana eai!

Mahana esega sorasorana eai mo, i tatagorigori.

20 Galewa e, ia debana eai abo u kode, Hetabu tataomiu e, eo aposotolo, eo peroveta hinage, Eaubada ami gum ie abi ede, ia arinai!”

21 Abo aneru adidiri-aririna esau we’u i abi’sini, doha we’u aba-usuusu we’una lailaina, i gabadobei gabogabo eai, i ene, “Babulonia, eanua lailaina wa, doha ina abo se gababaaeai, taba nige ta itauioi;

22 tau oi-huelele, tau-wanawana, hino tau-iuhina eo bogigi tauyuhina,

arim eai taba nige se ataieiuioidi; nima paisoa taunimabigadi, arim eai taba nige se lobaiuioidi; we’u-usuusu *mill* eai se paipaisoa, arim eai daguguna taba nige se ataieiuioi;

23 arim eai taba nige lamepa marana i sinauio; tau eo sine se hetahetawasora, arinadi taba nige se ataieiuioi; oa em tau-uneune ede tanoubu ta wasawasadi, em tabotabosima eai basileia gamagaridi u boraidi.

24 Ia boeana eai peroveta osinadi se lobai ede, eo hetabu tataodi osinadi, eo isi gamagaridi tanoubu eai ta se unuidi osinadi.”

19

Hetabu tataodi se hedebaseadio, edi aihelahui eo edi tepo saesaena.

¹ Teina murina eai abo doha moutuana lailai-aririna arinana ea ataiei, galewa eai, i ene,

“Haleluia! Abihemauri eo namanamari eo gigibori, isi ede eda Eaubada enana, ² ia ena hekiraino mamohoina ede, eo se dudurai; sine laulau baaea saesaena wa i hekirainoyao, ia tanoubu i heposa wa, ena enoenobiri eai, Eaubada ena heaheari tataodi osinadi gumna ie abi, sine ta arinai.” ³ Abo se eogauio,

“Haleluia! Ia asuna wa i iniinisae, i lau e nige nosina.” ⁴ Eo babadayao tau-esega-i-mate-hasi wa, eo ginauri maumauridi hasi wa, se gurisalaoba, Eaubada ia terona eai i babawa wa se aihelahui, si ene, “Amen. Haleluia!” ⁵ Terona eai arina esau i laoma, i ene, “Hedebasae au mosei eda Eaubada arinai, omi ena heaheari tataomiu gamagarimiu, omi ia taumatausiena, gagirimiu eo lailaimiu.”

⁶ Abotai ea ataiei, daguguna doha moutuana lailai arinadi, doha goila gamagamagari arinadi, doha palepalele lailai dagugudi, si ene,

“Haleluia! Paana Guiau eda Eaubada Gigigibori-aririna ia tanuaga eai i laulau.

⁷ Ta kode, nuada se lolo ariariri, ia ta hedebasaei ta henamanamari,

Mamoe ena tawasora ede i lageo,
monena i abinonohauioiyao;

⁸ sine ta ena dohila se mosei, ia bena *linen* lolodumadumana i lui, namanamarina, aa’aana.”

Linen lolololona ta ede hetabu tataodi edi laulau duduraidi.

⁹ Abo aneru i heribagu i ene, “Teina u uri: Nuadi abo se woiwoina, isi wa se eogaidi Mamoe ena tawasora mataasina eai.” I ribalaoma hinage i ene, “Teina Eaubada ena riba mamohoina ede.” ¹⁰ Abotai ea gurisalaoba ia aena paana eai, bena ea aihelahui, na i ribalaoma i ene, “Besi, tabu u abi doha ina! Eau helem tauheaheari esau, eau maem ta, eo em tataoyao maediyao gonogonoadi, isi Iesu ribaribahemasarahana tausogohina. Eaubada iabom mo u aihelahui.” Paana Iesu ribahemasarahana iaede peroveta earuana ede.

¹¹ Abo galewa ea ita i taigari, to ne hosi posiposina i taumasaraha! Taugeruina esana ede Nuapaipai eo Mamohoina, nuatu duduraina eai i hekihekiraino, eo iala i hetubu.

¹² Matana doha oeagi ala-balebalelemnana, uruna eai korona gamagamagari ie oudi; esana se uriyao nige esau abina ie ata, ia iabom mo. ¹³ Ana lulu ie lui hede osina eai se hedao, eo esana se ribaei, Eaubada ena Riba. ¹⁴ Iala bodadi galewa eai ia se hemuriwatai, hosi posiposidi eai se geru, lulu *linen* lolololodi se luidi, posiposidi, aa’aadi. ¹⁵ Ia awana eai elepa matamatana ie tata, arinai basileia abo i unuidi, tue poasi eai abo i tanuagaedi; Eaubada Gigigibori-aririna ouyalayalana didigana eai vine aba-utuhemahemalamina eai abo i

utugodagodai. ¹⁶ Ana lulu eai eo danana eai esa ta se uri; WASAWASA EDI WASAWASA, GUIAU EDI GUIAU.

¹⁷ Abo aneru esau ea iita, mahana eai i totoro, arina lailaina eai i eogayoga, manu gamagaridi galewa duaduarina eai se loiloiusi, aridi eai i ene, “Au laoma au oigogoimiu, Eaubada ena mataasi saesaena eai, ¹⁸ wasawasa bulumadi abo au aidi, eo tauiala kapenadi bulumadi au aidi, eo tatao adiadidiri bulumadi, eo hosi bulumadi, ma-adi gerugeru, eo tatao se gamagari ariri bulumadi, iaiyairihaidi eo ma-auaudi, gagiridi eo lailaidi.” ¹⁹ Na suisui wa ea ita, eo tanoubu ta wasawasadi, eo edi iala bodadi, se tupagogoma bena se iala, hosi taugeruina wa eo ena iala bodadi bena se ialaidi. ²⁰ Na suisui wa se toai, maena peroveta borabora, ia matana eai wa nabunabutua i ginaginauridi arinai tatao i boraidi to suisui heiheinoina deba-pogadi eai se abi wa, eo ana oitau se tabaohuei. Isi taudi labui ma-maumauridi se gabadobedi gabogabo alaalasina eai wa, i alaala i lau e nige nosina. ²¹ Adi sasaguyao hahagana hinage se unuidi, ia hosi eai ie geru wa elepa awana eai ie tata wa, arinai se unuidi; manu gamagaridi wa abo bulumadi se ai e bogadi se sese.

20

Satani se pai: Eaubada ena basileia huiana.

¹ Abo aneru ea iita, galewa boeana eai i dobidobima, ni-mana eai duha lohaloha-aririna wa ki-na, eo mainana poasi, lailaina. ² Ia abo *dragon* wa i toai, iaede mota beabeana wa, Diabolo, eo Satani, abo borimai tausani esega ia se pai, ³ se gabadobei duhana eai wa to se gudu, se gabu-gudui bena tabu basileia i borauioidi i lau e borimai tausani se ohi, abotai abo se iairigabaei huia kuukuuna mo.

⁴ Abo terona ea itadi, potadi eai tatao se bawa, isi wa hekiraino paisoana se moseyao aridi eai. Abotai isi wa Iesu ribariba-hemasarahana debana eai urudi se tomtusidi, eo Eaubada ena riba debana eai, earuyaruadi ea itadi, eo isi hinage nige se tabaohu suisui arinai, maena oitau hinage nige'e, ena heiheinoi wa nige debadi eai, e nimadi eai. Ea itadi Keriso maediyao se mauriuo, eo maediyao tanoubu se tanuagaei borimai tausani. ⁵ Hari tau-matemate wa isi nige se mauriuo i lau e borimai tausani wa se ohi. Teina torouio bagubagunana ede. ⁶ Tau-nuawoiwainadi isi, eo tabudi, isi wa torouio bagubagunana eai edi tupo taulobai! Isi aridi eai mate helabuina wa nige ena gigibori; isi abo Eaubada ena kohena tataodi, eo Keriso enana, ia maedi abo wasawasa eai se lau, i lau e borimai tausani esega.

⁷ Borimai tausani wa se ohi, Satani abo se buigabaei, edi aba-tutuguduina eai, ⁸ abo i pesama basileia bena i boraidi

tanoubu tupo hasi eai, Goga eo Magoga bena i abigogoidi iala hesabana; isi tataodi gamagaridi doha salagomgom geregerena. ⁹ Tanoubu magagana se taudadai, hetabu tataodi edi aba-tupagogoma se hetairidi, eo eanua lailaina nuanuaina wa, na oegi alaalasi galewa eai i tarudobima i gabuheohidi, ¹⁰ eo diaboloo, tauboraidi wa, se gabalaei oegi alaalasina eai wa, i alaala i lau e nige nosina, nei eai suisui eo peroveta borabora se gabaedio, abo se heamamnadi asubena to maiona, i lau e nige nosina.

¹¹ Abo terona saesae-aririna, posiposina, ea ita, eo ia wa potana eai i babawa, matana eai tanoubu eo eada se dagogorigori, nige edi abamia se lobai. ¹² Abo taumatemate ea itadi, saesaedi eo gagiridi, terona nuanuana eai se totoro, abo buka se soedi. Buka esau hinage se soe, iaede mauri bukana. Taumatemate wa se heduduraidi, saha eo saha edi buka eai se uridi, eo edi paipaisoa, debadi eai. ¹³ Gabogabo boeana eai enana taumate abo i buigabaedi, isi hinage abo se heduduraidi, gamagaridi edi paipaisoa debadi eai. ¹⁴ Abo Mate eo Hade se gabadobedi gabogabo alaalasina eai. Teina mate helabuina ede, iaede gabogabo alaalasina; ¹⁵ na ena esau esana nige se lobai mauri bukana eai, ia abo se gabadobei gabogabo alaalasina eai.

21

Galewa harihariuna, eo tanoubu harihariuna.

¹ Abo galewa harihariuna eo tanoubu harihariuna ea itadi; paana galewa bagubagunana eo tanoubu bagubagunana wa se tausuarao, eo gabogabo abotai nige'e. ² Abo eanua lailaina, tabuna, ea iita, Ierusalem harihariuna, galewa boeana eai i dobidobima, Eaubada arinai i laoma, doha siu bena i tawasora, monena enana se hepasa-nonohai. ³ Abo arina lailai terona eai i laoma ea ataiei, i ene, "Au ita, Eaubada ena abamia ede tatao boeadi eai, ia maediyao abo i mia, isi abo ia ena tataoyao ede, Eaubada iabom abo maedi, ia abo edi Eaubada; ⁴ matasulu gamagamagari matadi eai ia abo i saugabaedi, mate taba nige ta itauioi, taba nige nuadubu, e doudou, e amamna, paana ginauri bagubagunadi wa hede se tauyamui-aririo!"

⁵ Ia terona eai i babawa wa, i ene, "Au ita, ginauri gamagamagari ea heharihariudi ede." Hinage i ene, "Teina u uri, paana riba ta miatahitahidi eo mamohoidi ede." ⁶ Hinage i ribauio arigu eai i ene, "Se ohio ede! Eau Alepa eo Omega, bagubagunana eo murimurita-aririna, hetuhetubuna eo helahe-lautomna. Ena esau gadona ie magu, mauri goilana nige maisana, bunubunuasina eai abo ea mose-gaibui. ⁷ Ena

esau i saepoi, teina ginauridi ta enana abo i abidi, to eau abo ena Eaubada, ia abo natugu. ⁸ Na tau matausi, eo tau nige i sunuma, taukabakabaleana, tau-aiaiunu, laulau bii tauabina, tau-tabosima, oitau tau-tabaohuina eo tatao tau aiborabora gamagaridi, isi edi tupo abo se lobai gabogabo alaalasina eai wa i lau e nige nosina, iaede mate helabuina.”

⁹ Abo aneru haligigi-labui wa nimadi eai gulewa haligigi-labui iwala baaea murimuritadi wa se usahemonaudi wa, adi sagu esau i laoma arigu eai, i heribagu i ene, “U laoma, Siu-bena-i-tawasora, Mamoe monena ede, abo ea heitam.”

¹⁰ Abo Earua boeana eai i baheisinigu oea tupina saesaena, lohalohana eai, abo eanua lailaina tabuna, Ierusalema, i heitagu, galewa eai i dobidobima, Eaubada arinai i laoma, ¹¹ Eaubada namanamarina ie abi, ena mara doha we’u maisa-lailaiaririna marana, doha we’u *iaspa*, i nega ariri doha galasi oioiurana. ¹² Tonana ewana lohalohana ie abi, guduna saudoudoi-labui, hari gudu hari gudu eai aneru saudoudoi-labui se totoro, esadi aridi eai se uridi ede Isaraela nanatunayao adi bogao saudoudoi-labui esadi; ¹³ tupo aruabu eai gudu haiona, tupo bauri eai gudu haiona, tupo eawana eai gudu haiona, tupo ealasi eai gudu haiona. ¹⁴ Eo eanua-saesaena ta tonana ena paa saudoudoi-labui, aridi eai Mamoe ena aposotolo saudoudoi-labui esadi saudoudoi-labui wa se uridi.

¹⁵ Ia maegu ai ribariba wa, nimana eai ena oegi abanononoi *gold* i baheusei, arinai bena eanuana, maguduna, ma-tonana, i nonoi. ¹⁶ Eanua saesaena ta i totoro ena tupo hasi ede se *square* mamohoi, lohana nonoina gonoana doha magagana; na eanua wa ena abanonoi eai i nonoi *furlongs* tausani saudoudoi-labui; lohana eo magagana eo ewana ie sae, gonogonoadi. ¹⁷ Abo tonana i nonoi, kubita handere esega eo tatao-labui-se-mate hasi, doha tatao edi nonononoi eai, eo aneru enadi hinage. ¹⁸ Tona wa *iaspa* eai se ginauri, eanua-saesaena ta *gold* mamohoi eai se ginauri, doha galasi namanamarina. ¹⁹ Eanua tonana paana se hepasa, we’u lolodi udoi udoi eai, maisa-lailaiariridi. Paa bagubagunana ede * *iaspa*, helabuina *safiara*, hehaionana *kalsidonia*, hehasina *emero*, ²⁰ hehaligigina *onikis*, hehaligigiesegana *konelian*, hehaligigi-labuina *krisolite*, hehaligigihaiionana *berilo*, hehaligigi-hasina *topas*, hesaudoudoina *krisoparase*, hesaudoudoi-esegana *iakinite*, hesaudoudoi-labuina *ametiso*. ²¹ Eo dohila gududi saudoudoi-labui wa, isi ede giniuba matapoudi saudoudoi-labui, hari gudu esau, esau, ede giniuba matapou esegana. Eanua-saesaena ta

* 21:19: We’u namanamaridi maisa-lailaidi esadi ina.

dobilana ede *gold* mamohoi, i nega ariri doha galasi.

²² Eanua eai ta nige dubuna ea ita, paana Guiau Eaubada Gigigibori-aririna maena Mamoe, isi dubuna ede. ²³ Eanua ta taba nige bena mahana e nawalai se sinai, paana Guiau namanamarina iaede aba-hemahemarana ede, eo lamepana ede Mamoe. ²⁴ Marana boeana eai basileia udoudoi abo se laulau; eo tanoubu wasawasadi edi namanamari abo se leama boeana eai. ²⁵ Eo dobila gududi taba nige huia esau asubena eai se gududi — hinage nei eai nige maionana. ²⁶ Basileia edi namanamari, edi hedebasae, abo se leama eanua boeana eai. ²⁷ Hinage taba nige ginauri esau i lusora ena nige i aa, e ena laulau hewahewaiununa i paipaisoaei, e ena boraborana; na isibom mo esadi se uridio Mamoe ena mauri bukana eai.

22

Paradaiso tautaua. Ribahasahasa eo ribahesunuma murimurita-ariridi.

¹ Abo goila mauri sagana i heitagu, i namanamari ariri doha galasi, Eaubada ena terona, eo Mamoe enana, boeana eai i didima, ² eo eanua dobilana duaduarina eai. Saga wa tupo eai ta eo hari sanaawasi eai, ede mauri oeagina, uauana udoudoi adi ao saudoudoi-labui, aiaidi se toredi nawalai to nawalai; eo oeagi ta luguluguna basileia gamagari abahemauridi ede. ³ Taba nige ribahemate i tubuuiio nei eai, Eaubada ena terona, eo Mamoe enana, isi ede metai, ia ena heaheari tataodi ia se aiaihelahui; ⁴ ia matana abo se ita, ia esana abo se abi deba-pogadi eai. ⁵ Taba nige i maionauio; taba nige lamepa marana se hepaisoai, taba nige mahana marana se nuatui paana Guiau Eaubada ia abo maradi ede, eo isi ma-tanuagadi eai abo se mia i lau i lau e huia nige nosina.

⁶ Abo i ribalaoma arigu eai i ene, “Teina riba ta miatahi-tahidi, mamohoidi ede. Eo Guiau, peroveta earuadi edi Eaubada, ena aneru i hetamariyawa, ginauri nige baeiona abo se tubu, ena heaheari tataodi bena i heita-nonohaidi. ⁷ Au ita, nige baeiona, ea heuheulawa.”

Kausara ia, buka ta riba-perovetana tausogohina, nuana abo i woiwoina.

⁸ Eau Ioane, eau ede ina ginauri ta tauataiedi eo tauitadi. Huia ne ea ataiiedi eo ea itadi, ea gurisalaoba aneru aena paana eai, wau ginauri tauheitagu wa bena ea aihelahui; ⁹ na i ribalaoma arigu eai i ene, “Tabu u ginauri doha nei! Eau hinage helem tauheaheari esau, eau maem ta, eo em tataoyao peroveta maedayao gonogonoadi, eo tatao gamagaridi buka ta tausogohina. Eaubada u aihelahui.”

¹⁰ I heribagu i ene, “Ina buka ta ena peroveta ribana tabu u gudutawai, paana huiana i hanahanau. ¹¹ Tau esa ena laulau nige se dudurai, besi ena laulau wa i laelaei, eo tau-bii besi ma-biina eai i laulau, eo tau dudurai besi ena laulau dudurai i he-esegai, eo ia ie aa, ma-aana eai i laulau.”

¹² “Au ita, abo ea heulama, maisa nimagu eai, esa, esa, ena paipaisoa abo ea hemaisadi, saha wa i ginauri. ¹³ Eau Alepa ede, eo Omega, bagubagunana eo murimurita-aririna, hetuhetubuna eo helahelautomna.”

¹⁴ Aidobudi adi lulu se deuridi, nuadi abo se woiwoina, arinai abo edi dobila i masaraha se laoma mauri oagina arinai, eanua-saesena dobilana eai se lusora. ¹⁵ Murimuri eai ede kedewa, eo tau-tabosima, eo tau-enoenobiri, eo tau-aiaiunu, eo oitau tau-tabaohuidi, eo isi gamagaridi aidobudi borabora se henua, eo se hetubu.

¹⁶ “Eau Iesu, egu aneru ea hetamariyawa ta, egu ekalesia peledi enadi bena ea riba. Eau Davida lamna eo iniinina, ipora namanamarina, ubona.”

¹⁷ Earua eo * Siu-bena-i-tawasora si ene, “U laoma.” Tau-ataiena hinage taba i ene, “U laoma.” Eo tau-gadomagu hage i laoma, e eai taba i henua, abo i laoma goila maurina i abi-gaibui.

¹⁸ Tatao gamagaridi buka ta ena peroveta ribadi tauataiedi, ea riba-hesanapuedi, ena taba tau esau ribana esau i tubei, iwala baaea buka eai ta se uridi Eaubada abo i peidi ia potana eai, ¹⁹ eo ena taba tau esau buka ta ena peroveta ribana esau i abihai, ia hinage ena tupo Eaubada abo i abihai, mauri oagina eai wa, eo eanua tabuna eai, doha ede se urihemasarahadijo ina buka eai ta.

²⁰ Teina ginauridi ta tau-hemasarahadi wa i ene, “Mamohoi ea heuheulawa.” Amen. U laoma, Guiau Iesu e!

²¹ Guiau Iesu ena ainuia hetabu tataodi gamagaridi bena i hearodi. Amen.

* 22:17: English: Bride; Heleni: Numpiosi.